

ERREURS
POPULAIRES
ET PROPOS VULGAIRES,
TOUCHANT LA MEDECINE
ET LE REGIME
DE SANTE.

2463

EXPLIQUEZ ET REFUTEZ
Par M. LAURIOVBERT, *Conseiller &
Medecin ordinaire du Roy, & du Roy de Navarre,
premier docteur regent stipendié, Chancelier &
ingé de l'université en Medecine de Montpellier.*

Cette-cy est de toute l'œuvre, la premiere partie
contenant cinq liures, avec l'indice des matie-
res, qui seront traitez ez autres.

1579

*Reueuë corrigée & augmentée presque de la moitié, & de
au tres-renommé seigneur de Pibrac Chancelier
de la tres-illustre Roynie de
Navarre.*



Soa nen



en mot

72,057

A BOVRDEAVX.
Par S. Millanges, imprimeur ordinaire du Roy.
AVEC PRIVILEGE.

1579

31

DIVISION DE LA SE- gonde partie an ses liures & chapitres.

DE LA COMPLEXION ET coutume. Livre VI.

- Cómant se doit antandre, que de set an set ans on change de naturel ou complexion. Chap. I.
- Que chacun doit sauoir sa complexion & portée, affin de la faire plu-tost comprendre au medecin. Chap. II.
- Que le medecin ayant cognu le malade an santé, est plus propre à le guerir. Chp. III.
- S'il est possible, que le medecin comprenne an peu de tams la complexion d'une personne : & s'il vaut mieus s'attreter de tout, à ceus qui diset le cognoitre de longue main. Chap. IIII.
- Cótre ceus qui alleguet an toutes choses leur coutume, & mesmes ayant changé d'age. Chap. V.
- S'il est vray ce qu'on dit mauuaise coutume, & bonne fouasse, fait bon rompre. Chap. VI.

DE LA TALHE ET L'AMBOM- point. Livre VII.

- Pourquoy dit on á propos de ceus qui croisset fort, la mauuaise herbe croit soudain. Est il vray, que de s'etandre fort bras & iambes, chasque matin à son leuer, fait croitre d'avantage. Chap. II.
- Contre ceus qui tiennet, que d'auoir passé la iambe sur la teste d'un enfant, l'ampesche de croitre. Chap. III.
- S'il est vray, que les iarretieres gardet de croitre, font auoir plu-tost des riddes au visage, & nuiset à la veüe. Chap. IIII.
- Pourquoy dit on, que le liege accoutumé de jeunesse ampeche ou retarde l'accroissement. Chap. V.
- S'il est vray, que l'enfant ayt la moytie de l'hauteur qu'il aura iamais, à l'age de trois ans. Chap. VI.
- S'il est vray, que l'on croit tandis qu'on dort, & que le trauail du iour diminuë autant de la grandeur, qu'on an peut acquerir an dormant. Chrp. VII.
- Sile

Si le bout des doigts estant gros, signifie que la personne est, ou deviendra grasse: & la pointe des doigts graille, est signe de maigreur

Chap. VIII.

S'il faut manger souuant, & beaucoup, pour engreffer. Chap. IX.

Quel engraisse mieus, & nourrit plus, le bouly ou le routy: & s'il est vray, que le sel, & le vinaigre amaigrissent. Chap. X.

De ceus qui se tiennent longuement debout, soudain apres le repas, afin de n'engraisser.

Chap. XI.

Moyens tres-assurés pour amaigrir, & autres pour engraisser.

Chap. XII.

Qui est le plus louable estat d'une personne, que l'on dit ambopoint,

Chap. XII.

DE L'AIR ET DES vetemens. Livre VIII.

Contre ceus qui disent, que c'est mauuaise coutume d'estre fourré en hyuer.

Chap. I.

S'il est vray, que le chauffer du lit engendre la rogne. Ch. II.

S'il est bon de sentir le froid: & qu'est ce d'estre bien hyuerné.

Chap. III.

S'il est bien dit, le haut, le bas & le milieu chaud: de tout le reste il ne t'an chaud.

Chap. IIII.

Pourquoy dit on, que les premiers frois sont les plus dangereux, & le Soleil de Mars aussi.

Chap. V.

Qu'on ne peut iustement limiter la quantité des vetemens, & de la couuerture.

Chap. VI

Du serain qu'est ce, & s'il tombe sur nous.

Chap. VII.

De l'air futil & prin: s'il est mal sain aus vielhars, & comment il donne appetit.

Chap. VIII.

S'il est mal-sain d'habiter en été sus, ou pres d'un eau courante.

Chap. IX.

Contre ceus qui se plaignent en été de la chaleur des nuis, & ce pendant ils couchent sur la plume les fenestres fermées.

Chap. X.

Si c'est bien dit, aus mois qui n'ont point de R, peu embrasser & bien boire.

Chap. XI.

Opinion d'une fame, qu'il faut demeurer au lit tout le mois de Mars, & de Settembre, pour eüiter tous les maus de l'année.

Chap. XII.

DE

*DE L'APPETIT ET DE
la soif. Livre. IX.*

- D'où vient que le boyre appaise la faim, & le manger ne mitige la soif. Chap. I.
- S'il ne faut iamais mâger sans appetit: & si on prend son appetit, d'asténir outre l'heure accoutumée des repas. Chap. II.
- Contre ceus qui mangent toujours auant qu'auoir faim, & se plaignent de n'auoir iamais appetit, & commant est ce que l'appetit vient an mangeant. Chap. III.
- Commant il faut antandre, ce que les medccins conseilhet, se leuer de table avec appetit. Chap. IIII,
- Si pour manger de-bout, on mange d'auantage: & si cela fait plus croitre. Chap. V.
- S'il est vray que les dants allongisset de faim. Chap. VI.
- Pourquoy dit on, il n'ya fausse que d'appetit: & s'il est bon d'vser quelque fois des fausses. Chap. VII.
- Commant est ce que la faim cause dessante de rheume, & rand l'homme plus chagrin, Chap. VIII.
- D'ou vient ce qu'on dit, des alteres, cracher couton. Chap. IX.
- De ceus qui se peutuet passer de boire durât cinq ou sis moys, & d'auantage: & des autres qui sont ancor plus long tams, sans boire & sans manger. Chap. X.

*DES REPAS ET DE LA
digestion. Livre X.*

- Du nombre des repas qu'on doit faire. Chap. I.
- Pourquoy dit on, qui est habile à table, est habile par tout: & qu'on n'anueillit point à la table. Chap. II.
- Sauoir-mon si l'heure des repas doit toujours estre à mesme point. Chap. III.
- De l'interualle qui doit estre communement antre les deus repas. Chap. IIII.
- Quel doit estre plus grand repas, & de viandes plus difficiles, le diner, ou le souper. Chap. V.
- Qu'on ne peut iustement limiter la quantité du boire & du manger à vn repas. Chap. VI.
- Que la longueur des repas est dommageable, comme aussi de se hater beaucoup. Chap. VII.

34
Si le souper doit estre de boulhy, & de soupe, comme porte son nom. Chap. VIII.

Que le vulgaire s'abuse sur le mot, & le fait de la digestion. Chap. IX.

Quand se fait mieus la digestion, an velhant, ou an dormant, & an trauail, ou an repos. Chap. X.

S'il sert à faire melheur digestion de manger de-bout, & la teste nuë, comme diset les Allemans. Chap. XI.

S'il est possible que l'otruche, ou autre animal, digere le fer. Chap. XII.

De croiser les bras sur l'estomach, pour faire melheur digestiō. Chap. XIII.

Que les poudres digestiues sont plus conuenables deuant, que apres le repas. Chap. XIII.

Qu'une gorgée d'eau apres le repas, sert à faire digestiō: C. XV

Qu'il ne faut ecrire, lire, ne mediter de long tams apres le repas pour faire melheur digestion. Chap. XVI.

Contre ceus qui souhaitent d'auoir vne fenestre à l'estomach, ou que il fut fait à boutons, pour y voir ce que luy nuit. C. XVII

DIVISION DE LA TROISIE- me partie an ses liures & chapitres.

DV MANGER ET DES viandes. Liure XI.

Commant il faut antandre ce qu'on dit, *Omnia sana sanis*. Ch. I.
L'abus que l'on commet, sur la regle *Non nocet qualitas, sed
quantitas*. Chap. II.

Qu'un homme prudent, & qui commande à ses appetis, se pour-
ra mieus ordonner son regime de viure, que ne fera le mede-
cin. Chap. III.

S'il est bon de parler an mangeant. Chap. IIII.

Que le foye n'est bonne viande: & pourtant on dit mal, iamais
homme ne mange foye, que le sien n'an aye ioye. Chap. V.

Qui est plus sain, le foye du chappon, ou sa chair. Chap. VI

Sauoir-mon si le ius ou degout du mouton roty, echauffe, s'il
est fort

est fort nourissant.

Chap. VII.

Si les pigeons & les œufs sont chaus, comme l'on dit. C. VIII.
Contre ceus qui diset que le poiure refroidit, & que les artichaus & les truffes echauffet.

Chap. IX.

Que la chair du porceau est la plus nourissante de toutes: & quelle est sa dignité.

Chap. X.

Que les boudins ne valet rien gardés: dont la coutume est d'en faire des presans.

Chap. XI.

S'il est vray, que la sariette ampeche de cuyre le sang. Cha. XII.

Que le rat, chat, & plusieurs autres bestes, sont aussi bonnes, que celles que nous mangeons.

Chap. XIII.

Que c'est vn desordonné appétit d'vser des truffes, & des champignons.

Chap. XIV.

De ceus qui hayset certaines viandes, le pain, le vin, l'eau, le gibbier, le fourmage, les œufs, les pommes, &c. & si cela est d'un bon, ou mauuais naturel.

Chap. XV.

Si c'est bien dit, vn œuf n'est rien, deus sont grand bien, trois sont assés, quatre sont trop. & cinq la mort.

Chap. XVI.

Pourquoy dit on, qu'il ne faut santir l'œuf qu'on veut manger.

Chap. XVII.

Si c'est bien dit, lait & poisson est poison: & apres le poisson la noys est contrepoison: l'ien ieune chair, & vieus poisson, la chair fait chair, & le poisson fait son.

Chap. XVIII.

Que le bon poisson est melheur en été, mesmes aus coleriques sieureus, que n'est la chair.

Chap. XIX.

Que le fourmage est pire, tant plus est vieus, sinon à seruir d'epicerie.

Chap. XX.

D'où sont venuës les antrées & desers, preiudiciables à la santé.

Chap. XXI.

Comment il faut attendre la diuersité des viandes an vn repas, defanduë des medecins.

Chap. XXII.

DE L'APPREST ET ORDRE AN L'V- sage des viandes. Liure XII.

Que l'apprest de toutes viandes ha été premierement enseigné des medecins.

Chap. I.

Que la chair n'attendrit au serain: & les diuers moyens de l'attendrir.

Chap. II.

Si la chair moins cuite, & la plus fraiche, est la plus nourrissante. Chap. III.

Sauoir-mon si la chair froide est moins saine que la chaude Chap. IIII.

Que la chair hachée & puis cuite, est de mauuaise digestion: cuite & puis hachée, ne vaut que à ceus qui ont mauuaises dans. Chap. V.

Qui est plus sec, le bouilly, ou le roty. Chap. VI.

Qui doit estre premier mangé, le bouilly, ou le roty: & le facil ou difficile à diger. Chap. VII.

S'il est vray, que de manger sa soupe froide, & toute derniere, auant le fruit, engraisse: ou s'il est plus sain. Chap. VIII.

Quand est meilleur la laitue, à l'antree ou à l'ysue du repas. Chap. IX.

Quand doit estre mangé le fruit, au commencement, ou à la fin. Chap. X.

S'il est meilleur d'oter la croute du pain, & la garder pour l'ysue, afin de clorre la bouche de l'estomach. Chap. XI.

DES FRUITS, SALADES, ET FORMAGE. Liure XIII.

Qu'on accuse bien souuent le fruit a tort, presque de tous les maus qui viennent au esté. Chap. I.

Contre ceus qui estiment les figues & les melons, plus mal sains que tous autres fruits. Chap. II.

Qui est pire, le raisin ou le vin nouveau. Chap. III.

Pourquoy dit on, si fame sauoit que vaut pomme, ell' n'an donneroit a son homme: & si sauoit que pomme vaut, an donneroit à son ribaud. Chap. IIII.

Sauoir-mon, s'il est sain, de manger beaucoup de pain avec le fruit. Chap. V.

Comment se doit entendre ce qu'on dit, *post crudum puris*. C. VI

Que la salade doit estre beaucoup plus forte de sel, que de vinaigre: & pourquoy dit on qu'il faut quatre personnes, à la bien composer. Chap. VII.

Pourquoy dit on, qui vin ne boit apres salade, est au danger d'estre malade. Chap. VIII.

Que la laitue est plus saine avec du miel, que autrement. C. IX.

S'il est vray, que pommes, poires, & noys, garent la vois. Ch. X.

Pourquoy

Pourquoy dit on, apres la pomme onc ne but homme : & apres la poire, prestre ou à boire. Chap. XI.

Si c'est bien dit, qu'il faut boire antre le fourmage & la poire Chap. XII.

Si c'est bien dit, la poire avec le fourmage, c'est mariage. Chap. XIII.

Pourquoy sont an pris & valeur, poires, & pommes sans rumeur. Chap. XIV.

Si t'est bien dit, contre la mort là vraye targe, ce sont le pain & fourmage: neantmoins on dit, que le fourmage est bien, qui vient d'une chiche main, & qui moins mange de fourmage, ou iambon, trompe son compaignon. Chap. XV.

DV BOIRE. Livre XIII.

S'il est bon de manger beaucoup auant que boire, (& comme on dit) faire bon fondement. Chap. I.

Pourquoy dit on, que le boire an mangeant sa soupe, gate les des, & an Allemaigne que cela fait venir la gouëttré. C. II.

S'il est melheur de boire peu & souuant an vn repas, ou à grans trais. Chap. III.

Si c'est mal fait, de boire, quand on se va coucher. Chap. IIII.

Que vaut mieus, boire tost ou tard apres le repas, si on est contraint de boyre. Chap. V.

Contre ceus qui diset, qu'il faut boyre aussi chaud que son sang, mesmes an été: & s'il est sain de raffraichir le vin. Chap. VII.

S'il est sain de boyre an hyuer ainsi froid comme l'on fait communement. Chap. VII.

Contre ceus qui diset, que l'eau caue le cœur. Chap. VIII.

S'il est vray, ce qu'on dit an Allemaigne, que le boire d'eau fait la veuë claire, & les dans blanches. Chap. IX.

S'il est vray, qu'un voire rompu soit venimeus, & que l'antier n'andure aucun venin, & pourquoy il se romt d'estre touché de celuy qui ha decoupé oignons, ou persil. Chap. X.

TRAICTE DV VIN. Livre XV.

De la nature du vin, & de ses differances. Chap. I.

Quel vin est dit vieux ou nouveau, selon les anciens Grecs. Chap. II.

Quel vin est dit bon ou mauvais, selon les anciens Grecs. Chap. III.

- Quel vin est plus chaud, le vieux ou le nouveau. & si c'est bien dit. que le vin nouveau porte son eau. Chap. III.
- Quel vin on peut permettre aus febricitans. Chap. IIII.
- Si le vin doit estre permis aus ansans. Chap. V.
- Que l'on se peut & doit souuant passer du vin: dont il n'est tant necessaire que cuide le vulgaire. Chap. VI.
- Si le vin bourret ou trebousset, dous & piquant, est sain. C. VII.
- Si le rouge est plus naturel & sain, que le blanc: & si le vin blanc conuient mieus à diner qu'à soupper. Chap. VII.
- Sic'est biē dit, vin sur lait est souhait; lait sur vin est venin. C. IX.
- D'ou vient que les hydropotes naturels s'adonnans au vin, l'aymet plus que les autres communement. Chap. X.
- S'il est vray, que le sel mis dās le vin, trouble l'esprit, anyure & insane. Chap. XI.
- S'il est mal fait de meler les vins qu'on doit boire, dans la pinte, ou dans le verre. Chap. XII.
- Qui est sain, de mettre l'eau sur le vin, ou le vin sur l'eau & de le tramper tost, ou tard auant boire. Chap. XIII.
- S'il faut tramper d'auantage le premier trait: & s'il va au foye particulierement. Chap. XIII.

DIVISION DE LA QUATRIE- me partie, an ses liures & chapitres.

DV COUCHER ET DORMIR. *Liure XVI.*

- Sauoir mō si les pieds au lit, doiuent estre plus hauts que les reins, & la teste plus haute que les pieds. Chap. I.
- Si coucher sur le ventre est meilleur, pourueu qu'on tourne la teste de couré. Chap. II.
- Contre ceus qui diset que le lit attire, & affoiblit le malade. Chap. III.
- S'il est vray, que manger des pieds, fait dormir, comme l'on dit. Chap. IIII.
- Comment se peut faire que an dormant quelqu'un chemine, & sorte de la maison. Chap. V.
- Pourquoy dit on, qui dort dine, & sur tout des ansans. Ch. VI.
- Pourquoy est ce, que le dormir sut-iour est reproué, & mesme tost

toft apres diner, ou à midy.

Chap. VII.

Que le dormir matin angraiffe fort: d'ont est ditte, *la grasse matinée.*

Chap. VIII.

Si c'est asses dormi, quand on ferre aisement les pointes de ses doigts.

Chap. IX.

Pourquoy dit on, que le fourmage fait velher, & est bon contre les larrons.

Chap. X.

DES CAUSES DE MALADIE. Livre XVII.

Que la goutte ne vient moins de trauail importun, que de grand oisueté.

Chap. I.

Que de la verole on peut deuenir ladre.

Chap. II.

Contre ceus qui attribuet tous les maus des anfans aus vers, des fames à la matrice, & des trauailleurs au morfondement.

Chap. III.

Que l'ignorance des causes an plusieurs maladies, ha introduit vn faus soupçon de sorcellerie & d'ampisonnement

Chap. IIII.

Que les choses douces emeuet plus les vertus, qu'elles ne les angeandret: & comment est ce qu'elles gatet les dans. C. V.

S'il est vray ce qu'on dit que les vers s'angeandret de manger la chair sans pain.

Chap. VI.

Pourquoy dit on, que manger le pain chaud gate les dás. C. VI.

S'il est vray ce que l'on dit, qu'on deuient pale de manger beaucoup de pain.

Chap. VII.

Que l'inflammacion des yeus, & l'ulceracion de pouton, sont contagieuses, nompas la dissantere.

Chap. IX.

S'il est bon de contregarder les anfans de ceus qui ont la rougeolle, petite verolle, & samblables maus.

Chap. X.

S'il est vray, qui prend la petite verolle d'un qui an ha beaucoup, an aura peu, & au contraire,

Chap. XI.

Contre ceus qui panser toute fieure estre de froid, hormis celle qu'on nomme chaude.

Chap. XII.

D'ou procéde le frisson, & le retour des fieures terminées.

Chap. XIII.

Si le linge blanc augmente les flux immoderes.

Chap. XIII.

- Que les lepreux des Hebreus n'etoyent pas ladres. Chap. I.
 Differance antre rheume, defluxion, & catharre, selon le vulgaire. Chap. II.
 Differace de goutte naturelle, à celle qui est de verolle. C. III.
 Que la verolle quant à son gédre ou espece, n'est mal nouveau: & moins ancor les pales couleurs de filhes. Chap. IIII.
 Des poils qui sortir à l'echine des ansans, nommez *Seides*, mal incognu aus ancients. Chap. V.
 Du crochet abbatu, & moyens de le releuer. Chap. VI.
 Des fuseaus, que l'on panie creuer an fröttât fort le bras. C. II.
 Du ver pelu, qu'on dit trauerfer le cœur auant qu'on meure: & de celuy qu'on dit à deus testes, qui fait mourir les ansans. Chap. VIII.
 S'il est vray que le phtisque crache tout le poumon, iusques à vn petit morceau. Chap. IX.
 Contre ceus qui diset, que le foye diminue, & fond aus yurognes, iusques à la grosseur d'une nois. Chap. X.

DES IUGEMANS ES

maladies. Liure XIX.

- Contre ceus qui n'estimet guieres les maus qu'ils fauet nômer, combien que ils s'y falhet le plus souuant. Chap. I.
 Du mepris des fieures, combien que les maus de chaleur abregent plus la vie que les autres. Chap. II.
 De ceus qui n'oset nommer la fieure. Chap. III.
 Contre ceus qui anuoiet l'vrine au medecin, seulement pour iuger quel mal on ha: & veulet qu'il diuine tout. Chap. IIII.
 Du iugemant qu'on peut faire des vrines portées. Chap. V.
 Contre ceus qui meprisent les medecins, pour auoir iugé autrement de la maladie, qu'il n'est auenu. Chap. VI.
 Contre ceus qui veulet mal de mort au medecin, qui aura iugé leur mal estre mortel. Chap. VII.
 Qu'il ne faut accuser les remedes, quand le mal augmente de soy-mesme. Chap. VIII.

*DES VIVRES AN MA-
ladies. Livre XX.*

- Qu'il ne faut refuser du tout leurs appetis aus malades, fort degoutés. Chap. I.
- Que la diuerfité des viandes est requise aus malades. Chap. II.
- Contre l'absurde ignorance de ceus, qui croyet tout an medecin, sauf an la quantité des viures. Chap. III.
- Contre ceus qui donnet plus de nourriture aus malades, que aus sains, & ancor plus s'ils sont vieus. Cpap. IIII.
- Des potages à minuit, & des orges môdez au matin, que le dormir sustante plus les malades, s'il y peuuet vaquer. Chap. V.
- Qu'un cors abbatu de maladie, ou de languer, ne peut estre refait à force de nourriture. Chap. VI.
- Contre ceus qui panset rompre tout mal prochain, ou presant, par le trauail. Chap. VII.
- Que les plus vieus chappons ne sont si bons, à faire potages nourrissans, ou des restaurans, que les ieunes. Chap. VIII.
- Que l'or aus restaurans doit estre battu, ou limé, nompas an chaines ou pieces d'or. Chap. IX.
- Contre ceus qui dedaignet le lait de fame, & preferet celuy d'anesse. Chap. X.

DIVISION DE LA CINQUIE-
me partie, an ses liures &
chapitres.

*DE LA CVRACION DES MALA-
dies. Livre XXI,*

- S'il est permis aus medecins, de tromper les malades. Chap. I.
- S'il est defandu aus medecins, de se panser eux mesmes. C. II.
- Que le vulgaire ha de bons remedes, mais qu'il n'an fait pas vser. Chap. III.
- Contre ceus qui s'arretet aus remedes que fait le vulgaire, sans les communiquer au medecin. Chap. IIII.
- Contre ceus qui diset, que à la fieure quarte & à la goutte, les medecins ne voyet goutte. Chap. V.
- Que la verole pleut estre parfaitemant guerrie : & de la grand varieté

varieté des moyens sudorifiques.

Chap. VI.

Que la peste est fort guerissable. & d'où vient que tant de gens an meurent.

Chap. VII.

Contre ceus qui reprouuet l'onccion an la rogne, disans qu'elle la fait r'entrer au cors.

Chap. VIII.

DES ABVS ET REMEDES. Liure XXII.

Abus de ceus qui vont à mesmes bains, pour contraires maladies.

Chap. I.

Qu'on echauffe trop les bains qu'on fait dans la maison. C. II.

Qu'on abuse fort du *semen contra*, & des *potus* contre vers.

Chap. III.

Que les fumes tuet les febricitans d'abstinence de boire, abondance de viures, & annuyeuse couuerture: & quel regime couient à vn febricitant.

Chap. IIII.

Si le lauer de teste humecte plus qu'il ne desseiche, sinon qu'on l'essuye au Soleil.

Chap. V.

De ceus qui gardet toute leur vie des receptes, dont ils se sont bié trouués quelquefois, & an font presans aus autres. C. VI.

DES MAUVAISES CVRES ET REMEDES ex irauagans. Liure XXX.

De la pernicieuse regle, qu'un desordre guerit l'autre. Chap. I.

Contre ceus qui font desordre an leurs maus à l'imitacion de ceus qui n'an sont morts.

Chap. II.

Pourquoy dit on, q d'un desordre vienet quatre ordres. C. III.

S'il est bon de boire son soul durant l'acces de la fieure: & s'il faut boire chaud ou froid.

Chap. IIII.

De ceus qui boiuet an ieun vn doit de vin pur, contre le vertigo migraine, & tremblemant.

Chap. V.

De ceus qui au mal d'estomach, y appliquet vne assiette d'estain froide.

Chap. VI.

De ceus qui à la colique mettet sur le vautre vne seruiette mollee d'eau froide.

Chap. VII.

DES REMEDES SUPERSTICIEVS ET vains. Liure XXIII.

Contre

- Contre ceus qui s'arretet du tout à l'efficace des breuets, sans
purgacion, ou autres remedes. Chap. i.
 Comment il est possible de remettre vne dislocacion sans voir
ou toucher le malade. Chap. ii.
 De l'eau coniurée, du drapeau, de la charpie bougie, & du lard
coniuré, à guerir playes & vlcères. Chap. iiii.
 De coniurer la matrice: & s'il est vray, que le mal de mere de-
celé, tourmente d'auantage. Chap. iiii.
 Contre les fames qui guerissent leurs anfans par sorcellerie & au-
chantement. Chap. v.
 Si les herbes cullies la veille de la S. Ian, ont plus de vertu, qu'a
vn autre iour. Chap. vi.
 De la graine de feugiere, & du noyer qui n'ha des noys que le
iour de S. Ian. Chap. vii.
 De chauffer touiours premiere la iambe qui repond au couté de
la douleur, pour guerir de la nephritique. Chap. viii.
 De la rose de Hiericho, pour aider à l'enfantement. Chap. ix.
 Des secrets que les ignorans & frasqueus vantent, balhés de
main an main à mode de cabale. Chap. x.

*DES BONS ET VRAYS RE-
medes. Livre XXV.*

- Du saint vinage à guerir plusieurs maus. Chap. i.
 Pourquoi on ordonne à ceus qui sont echauffés, de pisser, &
boire du vin pur. Chap. ii.
 Des amelleres avec toile d'araigne, contre le mal de ventre
qu'ont les anfans. Chap. iiii.
 Des ails qu'on fait manger aus anfans, ez moys d'Auril & de
May, pour les preseruer de vermine. Chap. iiii.
 Pourquoi est ce qu'on anueloupe de rouge, ceus qui ont la rou-
geolle, ou petite virolle. Chap. v.
 Qu'il n'y a melheur remede contre la ladrerie, que la castra-
cion. Chap. vi.
 Du bol donné contre la pleuresie. Chap. vii.
 Comment se doit antandre ce qu'on dit, à mal de teste estou-
pade de vin. Chap. viii.
 Pourquoi dit on, que le mal de la mere, requiert le pere. C. ix
 DIVI-

DIVISION DE LA SISSIE- me partie, en ses liures & chapitres.

DES EVACVATIONS COMMV- nes. Liure XXVI.

- Contre ceus qui s'aecoutumet à vomir tous les iours. Chap. I.
 Contre ceus qui gatet leur estomach de choses remollissantes
 pour auoir le vantre lache. Chap. II.
 De ceus qui marchet les pies nus sur vn lieu froid: affin d'auoir
 le vantre lache. Chap. III.
 Comment il faut antandre, l'auoir bon vantre. Chap. IIII.
 Qui est pire la constipacion, ou le vantre fort lache. Chap. V.
 Contre ceus qui ne sont iamais bien à leur aise, que quand ils
 vont souuant à selle. Chap. VI

DES PURGATIONS OV MEDECI- cines. Liure XXVII.

- Contre ceus qui pour reprouuer les medecines, alleguet la vie-
 llesse de ceus qui n'an prindret iamais. Chap. I.
 Contre ceus qui refuset des medecines, pour la præcaucion, di-
 sans, que c'est mauuaise accoutumance Chap. II.
 Que la purgacion conuiet an toute saison, voire durant les
 iours caniculiers. Chap. III.
 Que les enfans & les fames anceintes peuet estre purgées.
 Chap. IIII.
 De ceus qui refuset les medecines, & mesmes les iuleps, disans
 que cela lès degoute. Chap. V.
 Que les plus belles medecines, ne sont pas les melheures, ny.
 celles qui an petite quantité operet fort. Chap. VI.
 Qu'il ne faut estimer la bonne purgacion, de la grand' quan-
 tité, moins du nombre des selles. Chap. VII.
 Contre ceus qui cuidet, les pilules deuoit estre touiours an nō-
 bre imper. Chap. VIII.

REGIME

Contre ceus qui font desordre a boire & a manger, le soir au parauant que prendre medecine. Chap. I.

Comment il se faut gouuerner le iour de la medecine : & si on peut dormir incontinent apres. Chap. II.

Qu'il ne se faut contraindre à ne vomir la medecine, apres qu'o l'ha retenue vn' heure, ou auiron. Chap. III.

De l'heure du boullon : & si c'est mal fait d'y mettre du sel. Chap. IIII.

Du nombre & de l'heure des repas qu'il conuient faire le iour de la medecine. Chap. V.

Pourquoy est ce que l'on tient anfermés ceus, qui ont prins medecine. Chap. VI.

DE LA SAIGNEE. Liure XXIX.

Si c'est mauuaise coutume d'estre purgé, ou saigné tous les ans : & si cela apporte necessité de continuer ainsi toute sa vie. Chap. I.

Contre ceus qui craignent par trop la saignée, & ont opinion que la premiere sauue la vie. Chap. II.

S'il est vray ce qu'o dit an Allemagne, que le iour de la saignée il faut estre sobre : & le tiers iour d'apres faut estre yure, ou bien soul. Chap. III.

Pourquoy les mesmes Allemans defandent le parler à ceus qu'o ha saigné, & permettre le rire. Chap. IIII.

Qu'on peut saigner les fames grosses, les enfans, & les vieux. Chap. V.

Contre ceus qui temerairement & trop souuant vsent de la saignée. Chap. VI.

S'il est vray, que la saignée affoiblisse la veuë. Chap. VII.

DE LA MORT. Liure. XXX.

Pourquoy dit on que les prestres meurent de froid, les riches de faim, & les pauvres de chaud. Chap. I.

Pourquoy est ce, que les riches viuent moins que les pauvres, & les gras

les gras que les maigres.

Chap. II.

D'où vient que cōmunement, ceus qui ont plus d'opinion de mourir, echapet mieus que les autres.

Chap. III.

D'où vient que cōmunement, les plus chers meurent plus que les autres.

Chap. IIII.

Contre ceus qui diset, iamais mort ne fut sans regret.

Chap. V.

Erreur de ceus qui penset toujours mourir de la mort de leurs parans, & an l'age qu'ils sont mors

Chap. VI.

Extreme folie de ceus qui veulet sauoir des diuins, quand & de-quoy ils doiuent mourir.

Chap. VII.

Des ans Climateriques s'il y a raison qu'on les doiue craindre, comme etant menacés de mort.

Chap. VIII.

S'il est vray ce qu'on dit, qui tard andante, tard des-aporante.

Cap. IX.

D'où vient que chacun craint tant la mort, veu que ce n'est aucun mal, ains la fin de tous maus.

Chap. X.

MELANGE D'AVTRES

propos vulgaires, & erreurs

populaires augmenté d'une

nouvelle cruë.

1 D'où vient que les filhes communement parlet plustost que les garçons:

2 Contre ceus qui penset que l'on puisse errater vn laquay, affin qu'il alle plus vite.

3 Des hermaphrodites, qu'on appelle Ians-fames: & s'il est possible qu'une fame deuienne homme, ou au contraire.

4 Pourquoy dit on, quand quelqu'un saigne du né; que bien tost il aura des nouuelles.

5 S'il est vray que le rogner des ongles accourcit la veuë, cōme quelques vns diset.

6 Pourquoy dit on aus ansfans qui maniet le feu, ou qui le portet par la maison, qu'ils pifferont au lit.

7 S'il y a quelque raison de dire, qu'on parle de celuy auquel les aureilhes cornet.

8 Folle supersticion de ne rogner les ougles ez iours qui ont un R. mais qu'il y faut bien obseruer la Lune, comme aussi

a cou-

a couper les cheueus.

9 S'il est vray, que la Turquoise donnée d'un amy, sans auoir esté demandée, préserue de blessure, quand on tombe, si elle se romt.

10 Si l'Amethyste portée, garde d'anyurer.

11 Pourquoy dit on, le baalher ne peut mantir: on veut mager, ou dormir, ou de ses amours departir.

12 S'il est vray, que l'homme tondu ait moins de force.

13 S'il est vray que de la gale, qu'on ha au pognet ou bracelet, on puisse iuger qu'il y an ha aussi aus fesses.

14 Comment est ce que du front salé, on iuge que l'enfant a des vers, & quels sont les plus certains signes de la vermine.

15 Si c'est bien dit que les maus vienent a liures & s'an reuont a onces: ou qu'ils vienent an poste, & s'an retournent bellement.

16 Comment le malade est accusé auers le medecin: & qu'on luy reproche tous ces excez eu defaus particulierement.

17 Pourquoy dit on, que ioye de courage, fait beau visage.

18 Si c'est bien dit, que qui veut estre tard vieus, le se doit faire de bon heure, qui veut estre bien sain, se laisser mourir de faim.

19 Si c'est bien dit, que douleur de teste veut manger, & douleur de ventre veut chier.

20 Pourquoy dit on, douleur de dant, douleur de parant: & douleur de flancs, la pierre au chams.

21 Quel anyure plus-tost, le vin vieus, ou le vin nouueau.

22 D'où vient que celuy qui est yure, s'anyure dauantage, si on le met a la fenestre.

23 Comment on peut faire hayr le vin, a vne personne qui an abuse.

24 Si le dormir la teste basse fait reuer: & si le manger des chous le fait aussi.

25 Pourquoy dit on, ieune qui velhe, & vieus qui dort, ils s'acheminent a la mort.

26 Si c'est bien dit, qui tard se couche, & se leue matin, il verra tantost sa fin.

27 Pourquoy diset les bonnes gens, qui non ha lou ventre dur, non peut pas dormir segur.

28 D'où procede le ronfler, & si la teste basse, ou le dormir a l'auers, le peut causer.

29 Si on peut garder quelqu'un de ronfler, an luy mettât sous le cheuet

cheuet, son foulier, sa pantoifle, sa botte ou boutine.

- 30 Saurir mon, si le ronfler est signe de santé comme l'on dit.
- 31 Comment est ce, que les bonnes santeurs, & choses douces, emeuuet la matrice.
- 32 Pourquoi dit on, qu'un bon rheume dure quarante iours.
- 33 Des malades qu'on promeine par les ruës, avec tabourins & chansons, pour les garder de dormir.
- 37 Pourquoi estime on estre sain, de peter an pissant.
- 35 Supersticieuse & vaine opinion de ceus qui croyet, que si on est iustement traité à table, quelqu'un de ceus là mourra dedans l'année.
- 36 Abus de ceus qui diset, qu'une formy trouuée sur quelqu'un finisse suaire.
- 37 S'il est vray, que le malade trauaille plus an l'agonis de la mort, s'il y a dans son cheuet ou oreiller, quelque plume de perdrix.
- 38 S'il est possible de deuiner, le iour & l'heure de la mort.
- 39 Si le vin trappé retranche mieus la soif, que tout pur.
- 40 Pourquoi mäge on la salade plus souuant au souper, qu'au diner.
- 41 Pourquoi est melheur l'exercice auant le repas, qu'apres.
- 42 Pourquoi dit on au matin les montaignes, & au soir les fontaines.
- 43 Pourquoi dit on, que le vin sert de lait aus vielhars.
- 44 Pourquoi toutes douleurs sont communement plus grandes de nuit, que de iour.
- 45 Pourquoi dit on, que de trop estudier l'on deuient fol. ainsi qu'affirme le second né d'antre les mors, & qu'il s'en est mal trouué.
- 46 Est il vray, que ceus qui viuēt plus de regime, sont plus dāgereus d'estre malades.
- 47 S'il est vray, que de mettre les enfans trop ieunes à l'estude, on leur gaste l'esprit & ne peuuet croitre, & deuient melancoliques.
- 48 S'il est vray, qu'il y ait un coup mortel au bras.
- 49 Pourquoi dit on, an tout ha remede, fors qu'ha la mort.
- 50 S'il est vray, que ceus viuēt plus longuemant, qui ont les ongles dures, ou le poil rude.
- 51 Des applications aus carpes, & appansions au col.
- 52 Pourquoi dit on, qu'il faut prandre du poil de la beste, à

ceus

ceus qui ont fort beu.

54 Pourquoy dit on, que le premier an du mariage on est an dāgier d'estre gāueus, ou ialous, ou cocu.

55 Que veut dire fieure de veau, quand on tramble etant soul.

56 S'il est vray, qu'on n'ha iamais la peste, la fieure quarte, la petite verolle, la rougeolle, & la teigne, qu'une fois en sa vie.

56 S'il est vray que la linge fait de lin, n'angeandre des pous: & qu'il n'est bon aus playes & vlceres.

57 Pourquoy sont plus mala des ceus, qui le sont plus raremāt.

58 Si c'est bien dit, qu'il ne faut pas manger sur sa cholere. Et quand on ha grand faim, il ne faut guieres manger.

59 Pourquoy dit on, pain legier, & fourmage pelant.

60 Pourquoy dit on, qui ne peut manger, qu'il boiue.

61 Du vin lauē: & si on le doit permettre aus febricitans.

62 Pourquoy dit on, an Italien, *qui va pian, va san.*

63 Si c'est biē dit, pain d'un iour, farine d'un moys, & vin d'un an. Item de bonne heure à la pescherie, & tard à la boucherie.

64 Pourquoy dit on, bœuf saignant, mouton beillant, porc pourry, tout n'an vaut rien, s'il n'est cuit.

65 S'il faut boire au premier trait le vin plus trampē, parce qu'il va au foye.

66 Contre ceus qui tiennet, que toute saignée affoiblit la veuē: & ceus qui diset, que le pain moysi l'eclaircit.

67 Est il bon de passer le repas sans boire, si on n'a point de soif: & de manger vne croute de pain sec le matin, contre le phlegme de l'estomoch.

68 Contre ceus qui diset, que au māger & au chier (parlant an reuerance) l'homme se doit depecher.

69 D'ou vient que les grans mangeurs de chair, ont l'haleine puante.

70 Commant il faut antandre, que la rogne n'est que santé: & s'il vaut mieus que les apostemes suppuret & iettet, que s'ils se resoluēt.

71 S'il ne faut rien faire à la petite verolle, à la rogeolle, & autres maus des ansans.

72 Commant est ce que le lire, ou ecrire tost apres le repas, nuit à la digestion, & cause des rheumes.

74 S'il est vray, que le frequant vsage des medecines anuiellit: & s'il est mauuais d'y accoutumer les ansans.

75 Superstition de ceus, qui portet du sel, quād il leur faut passer quel-

ser quelque riuere ou ruisseau: affin que leur playe, ou vlcere, ne s'an indigne, ou recoure.

76 Pourquoi dit on, poulles mal cuittes, & veau cru, font le cimetiere bossu.

77 Pourquoi les huitres sont appetissantes, comme les oliues.

78 Si c'est mal fait, de chauffer l'estomac apres le repas, côme on dit : & de porter là-contre vne fourrure, ou des plumes d'autour.

79 Si vn trait de vin pur prins à l'antrée du repas, rand le ventre plus lache.

80 Contre ceus qui soutiennet, qu'on peut guerir vne playe, sans voir ou toucher le malade, pourueu qu'on ayt le pourpoint qu'il portoit quand il fut blecé, ou bien, de graisser le fer duquel on l'ha blecé, pourueu qu'il ne s'anrouille.

81 Contre ceus auxquels la resolution & dissipation des apostemes, sans qu'il vienet an auant, est suspecte : comme si la matiere estoit r'antrée dans le cors.

82 Si de se chauffer les pies, on est plu-tost delassé: & plu-tost raffraichi, de boire vn peu de vin pur.

83 Si les vin diuers anyuret plus.

84 Contre ceus qui panset, que la rougeur du visage est toujours à cause du vin: & que l'eau ne l'efface pas.

85 Pourquoi dit on, la pesche ampeche, & le noyau desam-pesche

86 Si c'est bien dit le beurre au matin est or, à diner argeant, & à souper du plomb.

87 La chair fait chair, poison fait son: poires sont pierres, & les noix garet les voix.

88 Contre ceus qui ne permettre, qu'on change de linge aus malades.

89 Si d'abaissier le cheuet, hate le malade à mourir.

* *

* *

AV LECTEUR D'ESPRIT
libre & studieux.

MY Lecteur, j'ay eü trois principales consideracions a publier & diuulguer l'indice de toutes les matieres que j'ay a discourir an mô traité des Erreurs populaires: duquel ie ne mets an lumiere pour le presât, que les cinq premiers liures. L'une des cõsideracions ha esté, de m'a-gager & obliger a poursuivre telles matieres, comme an ayant fait promesse. L'autre, à ce que si parauanture quelqu'un emeu de cet argument, vouloit antreprandre semblables discours, au-moins il ne touche a la besogne, que ie me suis talhé, & ne mette (comme on dit au proverbe) sa faucille an ma moisson. Car ie la peus iustement dire mienne, puisque j'ay semé ces propos. La troisieme est pour t'inuiter, ô Lecteur d'esprit libre & studieux, a m'auoyer des propos semblables a ceus-cy, que j'ay recuilly an lōg tams, de plusieurs personnes, an diuers pais. Ainsi j'espere receuoir de toutes pars, de ceus qui liront mon Indice des propos vulgaires touchant la Medecine & regime de sâté (câr ie n'ay que faire des autres erreurs qu'concernent les meurs, l'œconomie, la police, & autres accions de l'ame humaine) qu'ils verront par ce recueil n'estre venus a ma cognoissance. Leur adresse sera, s'ils n'ont autre nouuelle de moy, a Môpelier: ou j'ay cet honneur de presider an la plus fameuse vniuersité de Medecine qu'il soit au monde. A raison de quoy aussi j'ay esté emeu & inuité de traicter a la correction des erreurs populaires, qui troublent souuent les ieunes medecins, & leur donnet grand peine: d'autant qu'ils nont pas l'autorité de les refuter, pour le peu de respekt que le peuple leur porte, tant petite creâce au bas age, quoy qu'il y puisse auoir beaucoup de suffisance. Ce pendant tels erreurs sont pour la plus-part tres-preiudiciables a la sânté & vie des hommes, & il y an ha d'autres, qui rendent les medecins fort suiets a calomnie. Or ie ne dis pas, que tous les propos contenus an mon indice, soient erronnées. Il y an ha plusieurs vrais & certains: mais le peuple ignorant la raison de ce qu'il dit, est comme an delireur, de quoy ie le vëus examter par mes discours. Il y a dõc de ces propos vulgaires, que ie recherche & recueillis, les vns totalemant faus & erronnées, les autres ont leur cause incognue du peuple, dont ils sont comprins sous le nom des Erreurs. Et voila mon subiet, mon dessein, & mon intancion: a laquelle ie te prie, ô amy Lecteur (de quelque estat & profession que tu sois, non opiniatre ne lourdaut, ains d'esprit libre, subtil & studieux) me vouloir assister, aider & fauorir, an contribuant à ce que tu pourras colliger de tels propos vulgaires. Et ie les rangeray en leurs classes, pour discourir la dessus, tout ainsi que j'ay fait an cette premiere: & mesmement si ie suis auerty & aperçoy, que ce mien labeur t'ayt esté agreable, & que tu an desires la poursuite, iusques à l'accomplissement de ce que j'ay promis. Auquel cas, ie lairray tout' autre besogne pour te donner ce contantement: esperant que tu y auras anfiniblement grand plaisir & profit. A Dieu.

In L. IOVBERTVM medicum regium celeberrimum & in
schola Monspeliensi medicinæ professorem, STE PHA-
NVS MANIALDVS medicus Burdigalensis.

*Inuentum medicina Dei est, quæ porrigit horas
Viuendi, & vitæ noxia cuncta fugat:
Exanimi turba reduces quæ tradere vitas,
Quæque solet satis amplificare moras,
Hanc coluit diuini propior memoranda vetustas,
Captaque posteritas artis amore fuit.
Graius, Arabs, Italus, Gallus, Germanus, Iberus
Exornant, varijs irradiantq; modis.
Venerat ad summum laudis medicina cacumen,
Ars incrementum finieratq; ue suum.
Cuncta sed inuertit sæcli socordia languens,
Cuncta cui senium deteriora facit.
Sic veneranda suæ patitur medicina ruinas,
Iamque salutifera deperit artis honos,
Vulgus & impostor purgamina noxia fundunt,
Atque ita languentes mors properata rapit.
Qui velit ac possit tales sarcire ruinas
Rarus adest, morbo huic nulla medela datur.
IOVBERTVS, iubar ut radijs insigne coruscis
Exoritur, tantum & suscipit unus onus.
Errorum latuas referant, fucosque medentum
Amissum reparat restituitque decus.
Macté animo, IOVBERTE, tuo medicina resurget
Marte, artem scriptis perge beare tuis.*

Εἰς τὸν λαμπρότατον ἰατρὸν, Λ. Ιέβερτον
Στέφανος ὁ Μανιαλδός.

Εἰσὶν ἀκροπόρις ἑεῖς ἡέλιοι ἀνὰ Κελίδους,
Αὐτοὶ ἐν ἡξοῖς πλεῖστον ἔχουσι γέρας.
Φερνέλιος πολυῖστωρ περὶ πῶς περιχαλῆς.
Σύλβιος ἡπιόνης δευτέρων ἐστὶ κλέος.
Ἐρῶ δ' Ιούβερτος Πανάκης, σοφὴν τε διδάσκων
Ὡς μέγας ἡγήτηρ, νῦν τρίτον αἶνον ἔχει

Idem latinè.

*Tres artis medica produxit Gallia soles,
Paonij laudes & decora alta chori.*

*Doctus Fernelius censetur gloria prima,
 Syluius Epiones fama secunda fuit:
 Et qui nunc artis solerti mente recludit
 Abdita, Iouberto tertia palma datur.*

AD IOVBERTVM medicum Regium DOMINICI
 REVLINI Burdegal. medici epigram.

*Error sepe decus, vitam, menté mque peremit:
 Hac seruat, qui illum detegit, atque fugat.
 Ergo age, recta docens errores pellito: tutor
 Nominis, ac vita sic eris, atque animi.
 Quid posses melius populo dare? quæque referri
 Digna potest tantis gratia muneribus?*

In doctissimos IVBERTI libros de populari-
 bus in re medica erroribus.

*Errorum vindex, rectique assertor & auctor,
 Tam procul à vulgo, cui sua sensa manent,
 Iam pridem magno applausu Paradoxa dedisti,
 Ecce iterum profers hoc paradoxon opus.
 Quod pulsus tenebris illustret commoda vita,
 Quodque lubens magnus scripserit Hippocrates.
 Crediderim fatale tibi cognominis omen,
 Vox iubare ex claro ducta IVBERTETUA EST.
 Nam velut auratum Solis iubar obuia queque
 Nubila per tractus dissipat aërios.
 Errorum sic tu nebulas per inane vagantes
 Clarus Apollinea protinus arte fugas.*

IO. GVILIONII.

AM. IOVBERT SVR SES ERREVRS
 POPVLAIRES.
 SONET.

*Par l'obscur de la nuit plus belle est la lumiere:
 Plus belle est la vertu par l'acte vicieux:
 Le laid, plus beau le beau fait paroistre à noz yeux:
 Et par le faux, du vray la gloire est plus entiere.
 Si les replis nœus gros d'aquense matiere
 Ont long tems obscurcy le iour de l'œil des cieux,
 Quand d'eux il se desuoile, il est plus radieux,
 Et plus ardent il flambe autour de sa carriere.*

*Ainsi partant d'erreurs qu'un peuple auengle suit,
 Ton esprit (leur Soleil qui faict iour à leur nuit
 Flambe plus claiement, & plus beau faict sa montré.
 L'erreur, Hydre faconde un essain d'erreurs faict.
 De toy donq leur Hercule heureux est le rancontre,
 Qui combats mille erreurs, que mille ages ont faict.*

P. D E - B R A C H

Joseph du Chesne, le Morent, seigneur de Liferable, docteur en Medecine, a M. IOVBERY, iadis son precepteur,
 SONET.

*Le pere au chef doré, qui si fort m'espoisonne,
 Avecques l'aiguillon de sa sainte fureur,
 A tramer sur mon lut ce qu'or en ta faueur
 Ma muse, ta disciple, & te vouë & te donne:
 Ce mesme Delphien d'une double coronne,
 Te circuit le chef de sauoir & d'honneur:
 L'une porte son los: l'autre te rand la fleur
 De tous les medecins que l'Europe enuironne.
 O senl digne loyer d'un pere fauorable.
 O seul digne presant d'un filz tant admirable,
 A la posterité par ses doctes labeurs.
 D'un IOVBERY, qui maugré du sot peuple l'enuie,
 A voulu descourir de nouveau les Erreurs,
 Qu'il comect au hazard de nostre pauvre vie.*

*Si du puissant Thebain la gloire est perdurable,
 Tour auoir suffoqué le serpent outrageus,
 Qui pour un chef osté en faisoit naistre deus,
 Tout le terroir voysin rendant inhabitable:
 Que fera de IOVBERY le scauoir honorable,
 Qui coupe le abus d'un monstre plus hydeus,
 Monstre tout d'ignorance & d'erreur chassieux,
 Qui hait iournellement la chose veritable?
 IOVBERY ha donc plus fait, ne s'estant contenté
 Avec l'art d'Apollon de rendre la santé.
 Aux hommes trauaillés de mainte mal'adie:
 Aingois pour deuancer tous les plus excellens,
 Avecques les discours qui sont icy dedans,
 Il ha volu guerir le peuple de folie.*

PIERRE CHAMBON DE GOTZ AGENOIS.

S O N E T.

D I V I N esprit qui aus plus serieuses
Vas mariant les choses de plaisir
Et vas tirant ce profit du loisir
Des accions qu'as le moins annuyeuses:
Qui ne dira tes heures bien-heureuses,
Tes iours,tes ans? Et émeu d'un desir
Toujours d'apprendre,accourra te choisir
Second Oedippe es choses plus noueuses:
Le cieliré encontre nos pechez,
Tenoit,malin,ces beaux secrets cachés
Dedans l'obscur du tams qui tout consume:
Sans de I O V B E R Y l'esprit noble & gentil,
Qui du scavoir de son docte fusil,
Ce feu caché a nostre siecle allume.

SAL. CERTON CHASTILLONNOIS.

D V M E S M E A L U Y M E S M E.

Le profit,le plaisir,& la correction,
Qu'anseignant,recreant,& reprenant ansamble
Ton feu,ta gaillardise,& ta doctrine assamble
Dans l'esprit,dans le cœur,& dans l'intantion,
Rand animé,contant,& plein d'affection,
Le ieune,le scauant,le peuple qui en tramble.
De l'eguillon,du ris,de l'art,dont il les amble
Par ses dis,par ses ieus,& reprehansion.
Le ieune,le sauant,le peuple,icy aprenne,
Prene contantemant,& icy se reprenne,
Plein du gain,du plaisir & de l'amandemant,
Qu'a leur profit,soulas & leur grand auantage,
Leur y donne,leur cause,& preuue euid ammant
Du tres-docte I O V B E R Y le celeste langage.

Du mesme,à luy mesme.

O D E M E S V R E E,

I O V B E R Y, qu'Apollon tient chery antre tous,
I O V B E R Y, que les cieus ont paré antre tous
D'un subtil esprit,d'un sça uoir grand,
Remply d'honneur a iamais te randant:
Ou soit que d'un son plain de scauoir,tu viens
Ton tresor an nous déplier,an tirant
Du pas de la mort,hors du sommeil
L'esprit a l'eau de Caron abayant:

Ou soit que melant d'artifice annuyeus
 Moins qu'a ce premier, ton graue-dous propos,
 Nous viennes ouurir maint secret grand,
 Dans le profit le plaisir amassant.
 Ton esprit oisif onc ne se voit: toujours
 Tu vas euantant quelque sçauoir caché,
 Dont puisses vn iour t'aider, & puis
 Au paciant le secours apporter,
 Ingrat que tu n'es, & que ne fus iamais
 Du tresor exquis, dont t'a paré le ciel:
 Et aussi ingrat l'age qui vient
 Ton bel honneur à iamais ne téra,
 Il dira ton nom, ton los il hauffera
 Iusqu'au plus haut ciel: les liures & le tans
 Ramplira du bruit grand & exquis,
 Qu'ains que mourir genereus tu t'aquis.
 Et moy le sien chantre, & son auan-coureur,
 Iray deuant luy, & le deuanceray,
 Prechant ta splendeur: & le presant
 Et l'aueuir de ta gloire honorant.

LOS ME CORONANT.

Ad L. I V B E R T V M illustrissimum Regis Galliarum & Po-
 loniæ, Regique Nauarræ medicum. S. M I L-
 L A N G I V S Typographus Regius.

*Tollitur Alcides meritis super aethera: mundo
 Magnanimus strauit quod fœta monstra prius.
 Tu cecas te nebras errorisq;ue horrida monstra
 Doctus Apollineis artibus arte fugas.
 Dignus ut ille, cani. Alcidem sic carmine tollant
 Vates: te vatum cantet Apollo pater.*

S. Millanges au Lecteur.

PArce que Monsieur I O V B E R T parlât aux quatre derniers liures
 de ceste premiere partie, de la conception, generation, enfante-
 ment, gessine, & connoissance du pucelage, a esté bien souuant cõ-
 traint en descouurant les erreurs, qui se font en tels actes, vser de mots
 & parolles qui semblent estre vn peu obsce nes: il sera bon que les seuls
 mariez lisent les beaux aduertissemens, qui se font pour eux aux dictz
 liures. Et les religieux, & religieuses, & tous ceux, qui veulent viure
 chastement sans se marier doiuent entierement laisser la lecture des di-
 cts liures à ceux & celles, qui sont mariez. Quât aux autres qui ne veu-
 let oïr parler des parties hôteuses ils pourront passer sans lire les chap.
 & lieux marquez de ce signe *. Ce pendant ceux & celles qui veulent
 conseruer leur santé trouueront de bons & beaux aduertissemens
 touchant cela, en l'indice, au premier liure & aux trois derniers traittez
 que nous auons imprimé de nouveau.



PREMIER LIVRE.
DES ERREURS POPULAI-
RES, TOUCHANT LA
MEDECINE ET LES
MEDECINS,

CHAPITRE PREMIER

*Excellance de l'art de Medecine par dessus
tous les ars humains, contre ceux, qui
l'ont a vil-pris.*

NOUS antandons les ars
humains, tant liberaus
que mecaniques, tous
ceus que l'homme inspi-
ré de Dieu, ha inuanté
pour sa necessité, cōmo-
dité, ou recreation: antre
lesquels est aussi la Medecine, practique de
la philosophie naturelle sur le cors humain;

A

pour lequel tous ars mecaniques sont inuātés, comme les ars liberaus pour l'exercice de son esprit. Nous exceptons feulemant de toutes professions de l'homme, la sacrée sciāce de Theologie: laquelle n'antandōs venir en cette comparaīson, quād nous exaltons la Medecine par dessus tous les ars humains. car elle n'est art, ains sciāce, & n'est pas sciāce humaine, ains puremāt diuine, non inuantée des hommes, ains infuse de Dieu, concernant les ames, & non les cors, eternelle, infallible, immüable: ayant pour obiet ou suiēt le Dieu tout puissant, createur du mōde, qu'il ha fait de rien pour le seruice de l'homme. Auquel nous considerons l'ame raisonnable, le cors, les biens, qui luy sont dōnez pour l'antretiē de sa vie. La Theologie ha le soīn principal de l'ame: & apres elle, la philosophie morale. La Iurifprudance, retrainēte aus loys humaines, traite des biens & appartenances de l'homme, randant à chascun le sien. Antre deus est la Medecine, conseruant le cors an santē, chafant les maladies, & preseruant de mort, antant que Dieu le permet. Donc si l'excellance des professions est estimée des suiēts, comme elle doit estre, la Medecine tiendra le se.

le secõd lieu. Car l'ame est plus que le cors, & le cors que le vetemant. Ie ne veus jci contester avec messieurs les magistratz, qui ont puissance sur les cors humains, tant de la vie, que de la mort. car leur puissance, n'est que declaracion de l'absolucion ou punicion à mort, selon le demerite. Et quant à l'absolucion, si c'est par grace (comme peut le seul prince & souuerain magistrat) c'est de l'autorité que Dieu luy donne, & non de la sciance des lois: comm'est l'autre, qui declare l'innocence du preueni & accusé. Ce que n'est proprement sauuer ou donner la vie, d'autât que l'accusé ne meritoit la mort. Et quant à la puissance de faire mourir, ce n'est pas loüange, au-moins qu'on doïue cõparer a la puissance de sauuer la vie; comme fait le medecin (moyennant la grace de Dieu) à plusieurs, qui sont attains de maladie mortelle, & qui mourroient sans doute, s'ilz nettoint secours. Or si cela est faisable ou nõ, & que par l'art de Medecine on puisse prolonger la vie, ie le deduiray amplement au chapitre suiuant. Ie veus yci mōtrer (cōm'an passant) l'excellance de l'hōme, pour confirmer l'excellance de l'art qui est dedié à sa conseruacion. La principale dignité de

l'homme, est an ce que Dieu l'ha daigné & honoré de son image & semblâce, luy dōnant vn'ame immortelle, capable de la diuinité: puis, de ce qu'il ha sommis toutes choses pour sa necessité, commodité, & recreation: ayant fait pour son seruice le ciel, la terre, & tout ce qui est an iceus. Car Dieu n'ha besoin d'aucune chose qu'il ayt faite: tout est pour nostre vsage. dont il est aisé à comprendre, que l'homme est plus digne & excellant que tout le monde. Aussi de vray le ciel & la terre, qui ont eu cōmancement, finiront, anuieillissans comme vn abilhemant: l'homme ne finira iamais, ains changera de condicion, de mortel deuenant immortel, quelque tams apres que l'ame aura fait diuorce avec son cors, le reprenant plus glorieus qu'au parauant & d'vne trampe, qui ne sera plus suiette a corrupcion. Puis donc que l'homme est la chose plus digne qui soit au monde, la sciance ordōnée pour sa persone, est la plus excellante de toutes, apres celle qui concerne proprement son createur. Car l'hōme est la plus digne creature de toutes: & par consequant l'art ou sciance qui le maintient an vie & an santé, est le plus excellāt de tous les ars humains.

Voyla

Voyla vn fort argumant de la preeminā-
 ce & dignité de la Medecine, fuiuant l'ex-
 cellance du suiet qu'elle traite. I'an veus
 toucher quelques autres, qui font sembla-
 blement à sa recommandation: comme est
 son ancienneté, necessité, & vtilité, ansam-
 ble l'autorité de ceus, qui l'ont fort prisée &
 reuerée pour les mesmes raisons. Quant à I
 l'ancienneté, nul doute qu'elle ne soit des Ancien
 la transgression d'Adam, aussi tost qu'il eut né.
 peché, & par ce deuenue suiet a maladie. Sō
 medecin estoit luy mesme, à qui Dieu auoit
 donné cognoissance de la vertu de toutes
 choses, les luy faisant nōmer selon leur pro-
 priété. Les histoires prophanes attribuet
 l'inuancion de la Medecine, au Dieu Apol-
 lo, qui est le Soleil: signifiās, que de luy pro-
 cede la vertu des plantes, & autres medica-
 mans, que la terre produit. Dont ils font qu'
 Aesculape (le premier qui ha fait professiō
 de cet art) fut son filz, pere de Machaon &
 Podalyre, medecins vulneraires (autrement
 dits chirurgiens) qui furent an la guerre de
 Troye: de laquelle l'histoire est des plus an-
 ciennes du monde. Or l'ancienneté est vne
 des condicions qui recommande quelque
 chose, pōrueu qu'elle ayt eté continuée.

car si n'estoit vtile ou necessaire, elle pourroit tãtost finir. Mais on void q̃ iusques à pre-
sât on ha bié âtreteñu la Medecine, mesmes
touiours an l'augmantant, ornant, & anri-
chissant dauantage : & ce par l'industrie des
plus grans personages qui ayet eté, non seu-
lement philosophes de profession, ains aussi
roys, princes, & autres de grand'valeur : ain-
si que têsmoignent les histoires, & ce qu'ilz
nous ont laissé de leurs labeurs. Vray est
que les Romains s'an font passez anuiron
600. ans an ayans horreur, pour la cruauté
de quelques chirurgiens venus de Grece,
nacion à eus fort suspecte. Mais depuis an sa
les medecins ont eté bien honorés, res-
pectés & antretenus à Rome, tenus au rans
des nobles & cheualiers. Touchant à la ne-
cessité, ell'est si notoire que rien plus. Mais
il samble que cela diminuë l'excellance de
l'art, puisque il n'est expetible ou desirable
de soy, ains pour le besoin. Tout ainsi que an
philosophie morale, on estime plus ce qui
est desirable de soy, comme auoir des an-
fans, que le desirable pour autre respect, cõ-
me auoir des biens pour ses ansans. Ainsi la
Medecine, n'etât desirable de soy, cõme est
la Musique, ains pour la necessité, elle an
sem-

*Pl. li. 29.
chap. 1.*

2
Necessité
Objection.

semble moins loable : tout ainſi que les ars mecaniques, deſquelz on ne ſe peut paſſer. Toutesfois c'eſt au contraire, que tant plus *Solucien.* neceſſaire eſt la Medecine, tant plus ell'eſt à deſirer : & l'excellance de ſon eſſect, la rand tref-excellante. Et à cecy reuiet l'vtilité, qui tant la recommande. car com'ainſi *3 Vutilité.* ſoit, qu'il n'y ayt rien plus agreable au mōde que la ſanté, ne plus deſirable que lo n-gue vie: la Medecine pouruoyant a l'vn & a l'autre eſt la plus vtile au contantement des hommes, que nul'autre ſcience humaine. Car par le contraire, qui n'ha ſanté eſt inutile au mōde: & celuy qui dure peu, y apporte peu de proffit. Or (comme dit le pere d'eloquence) nous ne ſommes nez pour nous tant ſeulement, ains noz parans, alliez & amis, noſtre patrie, voire tout l'vniuers, requieret de nous quelque emolument & cōmodité.

Reſte a confirmer toutes ces raiſons par l'autorité des grans, qui ont fort eſtimé, & *4 Auteurs.* exalté la Medecine, & ſes profeſſeurs, la recommandant infiniment par leurs ecris. A ce faire ie me contenteray de l'exhortaciō qu'en faiēt l'Eccleſiaſtique, & de la remonſtrāce de noſtre bon pere Hippoceras. lequel

ne doit estre suspect a la matiere, pour auoir
 eté medecin : car il ne fut onc mercenaire,
 ne au seruice de personne, ains libre & tres-
 liberal de la professiõ. Et ce fut luy, qui pre-
 mier separa la Medecine de la philosophie.
 Car anciennement il n'y auoit point qui fus-
 set medecins a-part : ains les philosophes
 contemploient les maladies & leurs reme-
 des, parmy les choses natureles, pour leur
 vsage principalemant, comme tesmogne
 Celse, an ayans besoin sur tous, a cause de la
 foiblesse de leurs cors, abbatus de continue-
 les cogitations & velhez. Hippocras donc
 fut le premier qui separa cet art de la philo-
 sophie, & an fit profession publique: comme
 depuis firent Diocle, Praxagore, Chrysipe,
 Herophile & Erasistrate ses successeurs: qui
 an fin departirent la Medecine an trois, pour
 mieus accommoder les malades, remettant
 aus mecaniques l'operation manuellle ditte
 chirurgie, & la preparacion des medica-
 mans, qu'on nomme pharmacie ou apothi-
 cairie, ainsi qu'on les voit exercer ancor
 pour le iourd'hui. Mais c'est par gens mer-
 cenaires pour la plus part, desquelz le tes-
 mognage an recommandacion de l'art de
 Medecine, ne pourroit icy auoir lieu: non
 pas

*Au proce-
 me du 1.
 liure.*

pas mesmes celuy de Galien, d'autant qu'il
ha esté des premiers asseruis. Dôt ie me cō-
tenteray de ce que le grand pere an ha escrit:
apres que i'auray recité les parolles de l'Ec-
clesiastique. C'est la sapiance de Iesus filz
de Sirach, qui escrit ainsi an son 38. chapitre:
Honore le medecin, de l'honneur qui luy ..
appartient, pour le besoin que tu en as. Car ..
le seigneur l'ha créé. La guerison vient du ..
souuerain : & le medecin sera honoré mes- ..
mes des roys. La sciance du medecin luy ..
fait hauffer la teste, & le rand admirable an- ..
tre les princes. Le seigneur ha crée les me- ..
decines de la terre, & l'homme prudent ne ..
les dedaigne point. L'eau n'ha elle pas ressu Exo. 15.
douceur par le bois, pour faire cognoitre sa ..
vertu à l'homme? Ainsi donc il ha donné la ..
sciance aus hommes, pour estre glorifié an ..
ses meruelhes. Par icelles il guerit l'homme, ..
& luy ote son afflicciō. L'apotaire fait des ..
mixtions, & toutesfois ce n'est pas luy qui ..
acheue l'oeuvre. Car c'est de Dieu, que vient ..
la fanté sur toute la terre. Mon enfant, quād ..
tu seras malade, ne sois paresseus de prier ..
Dieu, & il te guerira. Reiette les offances, & ..
ayes les mains droittes & purge ton cœur ..
de ton peché. Fais ansancement, & le me- ..
morial

morial de pure farine , avec vne oblacion
 .. grasse : car tu ne le donnes pas le premier.
 .. Puis donne lieu au medecin: car le seigneur
 .. l'ha crée. & qu'il ne bouge d'aupres de toy:
 .. car tu as affaire de luy. Telle heure aduient
 .. qu'il y a bonne yssue an leurs antreprises: car
 .. aussi eus priet le seigneur , qu'il fasse prospe-
 .. rer le soulagement & la guerison, pour main-
 .. tenir la vie. Ces diuines parolles concluet
 suffisammāt nostre propos, de la dignité, ex-
 cellāce, necessité, vtilité & prerogatiue des
 medecins: condannant tous ceus, qui les
 ont à vil pris, & an eus mespris et la grand
 bonté de Dieū, qui ha voulu donner aus hō-
 mes vn tel soulagement. Oyons maintenāt
 ce qu'an dit Hipocras.

Le bon homme au liure de la Loy, se
 plaint deia, que mesmes de son tams la Me-
 decine etoit moins prisée, à cause des abus.
 Voyés ie vous prie, ce que peut estre au-
 .. iourd'hui? L'art de medecine(dit il) est des
 .. plus apparans de tous: mais par l'ignorance
 .. de ceus , qui an vset, & de ceus qui iugent de
 .. ses professeurs, il est ia beaucoup deuancé
 .. de tous les autres ars. La faute me samble
 .. proceder principalemant de ce, que aus vil-
 .. les il n'y à aucune peine ordonnée a l'art de
 Medecine

Medecine, comme aus autres, excepté le
 des-honneur. mais cela ne pique affés les
 defalhans: lesquelz sont semblables aus per-
 sonnages d'une tragedie, qui ont la fasson,
 le visage, & l'habit de ceus, qu'ilz represen-
 tet & contrefont. Ainsi il y a plusieurs me-
 decins de nom & reputacion, mais peu de
 fait. Car il faut a celuy, qui doit vraye-
 mant aquerir la cognoissance de Medeci-
 ne, auoir ces sis condicions: le naturel, la di-
 scipline, les bonnes meurs, la doctrine des
 son enfance, aymer la peine, & auoir le tams
 requis, etc. Auec ce il deuiendra bon me-
 decin, non seulement de nom, ains aussi de
 fait. Mais l'ignorance est un mauuais tresor,
 vne mauuaise bague a ceus qui l'ont, & vn
 songe de reuerie, etc. Plin poursuit bien
 ce propos, taxant le vulgaire, qui ne fait di-
 stinger antre le bon & mauuais medecin,
 s'attendant a ceus qui ont plus de babil, qui
 se vantent, & qui font bonne mine. Il aduiet
 (dit il) a ce seul art que l'on croit incontinant
 a quiconque se dit medecin: ia soit qu'il n'y
 ayt an aucune manerie plus grand danger.
 Toutesfois on ne s'an aduise pas, tant est
 plaisante a chacun la douceur d'experer
 bien pour soy. Dauantage il n'y a aucune

*Liure 26.
chap.*

“ loy qui punisse l'ignorance capitale , ou im-
 “ portant de la vie des hommes:il n'y a aucun
 “ exemple de vangeance. Ilz aprenet a noz
 “ dangiers , & font leur epreuues an tuant les
 “ personnes: & au seul medecin est grand'im-
 “ punité, d'auoir tué vn hōme. Qui plus est,
 “ ilz antret an reproche , & accuëet l'intem-
 “ perance du malade , & de gayeté on con-
 “ damne ceus qui sont mors.

I'ay pansé d'alleguer ces propos , affin
 qu'on antande , que ce n'est d'aujourd'hui,
 que plusieurs ayans le masque & apparance
 de medecin,font pour leur abuz,que la Me-
 decine est moins prisée: tout ainsi que plu-
 sieurs autres choses de soy bonnes ou neu-
 tres , sont decriées & oyet mal , par ce que
 aisement on an abuse. Et d'autant que i'ay
 cy dessus auancé,que par la Medecine on
 peut allonger la vie,qui est vn acte bien ex-
 cellant, ie veus amplemant demonstrier cō-
 mant il se peut faire.

CHA-

CHAPITRE II.

*S'il est possible par la Medecine allonger
la vie des hommes.*

Cette question ha touiours samblé fort arduë, & ha fort traualhé les plus grans esprits: comme celle, qui etant cachée & couuerte aus plus profondes cachettes de Nature, donne tres-grand peine a quiconque s'ingere de la rechercher. Les raisons de ceus qui la debatet, sont si nerueuses d'une part & d'autre, qu'a-peine se peut on resoudre de ce qu'on an doit tenir. Car il y a plusieurs argumans, qui cōcluet, la vie de l'hōme ne pouuoit estre prolongée par aucuns remedes & moyens de la Medecine. Au contraire les medecins soutienet, que cela est possible. Dont pour mieus expliquer le doute ie soutiendray premieremant chacune des parties: & an fin, comme arbitre, i'an prononceray mon auis.

Que le terme soit presis a la vie de l'hōme, & qu'il ne le puisse outre-passer par moyen que ce soit, nous auons an premier lieu, ce que an dit le tres-patiant Iob, inflam-
mé de chap 14.

.. mé de l'esprit de Dieu : Les iours de l'hom-
 .. me sont courts, & le nombre des moys est
 .. riere toy, seigneur, qui as ordonné des limi-
 .. tes a la vie de l'hōme, qu'il ne pourra outre
chap. 10. passer. Cela mesme affirme Aristote, au se-
 .. gond liure de la generation & corrupcion,
 .. disant: Le tams & la vie de chaque chose ha
 .. son comte fini & déterminé. car an toute
 .. chose y a ordre: & tout tams & vie est me-
chap. 10. suré de periode. Et au quatrieme de la gene-
 .. ration des animaux: Il est raisonnable (dit il)
 .. qu'il y ayt des periodes & saisons, tant des
 .. groisses, que des generacions & vies, qui
 .. soient comtez par iours, mois, anneés, ou au-
 .. tres tams, qui sont decris par ceus cy. Ce
 .. que explicant Auerrhois, dit, tout ce qui est,
 .. ha necessairemāt vie déterminée. Puis dōc,
 que toutes les œuures de nature, constet
 necessairemant d'un certain ordre, tellemāt
 qu'elles ne peuuet estre autrement, ou estre
 cuitées, & que l'art est de beaucoup inferi-
 eur an cela a nature (ainsi que Galen dispute
 gentilemant au liure du Marasme) on peut
 aisément conclurre, que la vie ne peut estre
 allongie par aucun artifice. A cela constant
Liv. 1. ten.
1. doct. 3. Auicenne, la ou il cherche par expres, les
chap. 3. causes de nostre mort ineuitable, disant: Et
 c'est

c'est la mort naturelle a chasque indiuidu, „
differante aus vns & autres, selon leur pre- „
miere complexion, iusques au terme qu'ilz „
ont an leur puissance, de conseruer leur na- „
turele humidité. Car tout ha son terme pre- „
fis, qui est diuers ez indiuidus, pour la diuer- „
sité des trapes. Et ce sont les termes „
naturelz. Il y an ha d'autres abregez : le tout „
suiuant la volonté de Dieu. &c. Si donc le „
terme de vie est presis & assigné a vn cha- „
cun, par le mandement de Dieu, & son „
ordonnance (c'est Nature, seruante a Dieu: „
sauoir est, l'ordre etably ez choses de ce „
monde des son commancement) il ne peut „
estre outre-passé par aucun moyen d'hôme, „
ains de la seule grace & volonté de Dieu „
tout puissant. comme au Roy Ezechias, au- „
quel le prophete Elie auoyt signifié sa mort. „
Car veu sa repantance, la vie luy fut prolon- „
gee de quinze ans, par la misericorde de „
Dieu: qui aussi promet an sa loy vie-longue „
aus ansans, qui honoret leur pere & mere, & „
ne leurs sont ingras.

*Livr 4. des
Rois, ch. 20*

Maintenant voyons, si contre ce qu'auôs „
deduit, on peut etandre & prolonger les ter- „
mes naturelz de la vie, par les ordonnances „
& remedes de nostre art. Car il y a beau- „
coup

coup de raisons qui persuadet, que non seulement l'ordre de nature, ains aussi nostre industrie, promet vie longue. Premieremāt les astrologues l'affirmet, là où ilz traitent des elections, figures & images. Et cela est confirmé par l'experiance, du soin & diligence des medecins anuers plusieurs personnes: lesquelz s'aidans de leurs remedes & bon regime, se maintienent an santé, & etans fort valetudinaires durent long tams, qui autrement mourroint bien ieunes, & ne paruiendroint a vielheſſe. Platon & Aristote (auteurs graues & maieurs de tout' exception) temognent a ce propos, qu'un homme de lettres, nommé Herodique, le plus maladif qui fut de son tams, vequit neātmoins cent ans, par grand artifice & exquise maniere de regime. Galen aussi, an quelques androis cōfesse son infirmité naturelle: mais il dit l'auoir si bien corrigeē, qu'a peine il fut iamais malade, au moins depuis qu'il s'adonna totallemāt a exercer la Medecine: sinon qu'il fut attaind vne fois ou deus de fieure Ephemere (c'est a dire d'un iour) seullemāt pour s'estre traualhē peniblement a panser ses amis. Et sinous croyons quelques vns qui l'ont escrit, il vequit set vins ans. Il n'est ia
 besoin

besoin de citer l'autorité de Plutarque , lequel remontre plusieurs fort debiles & delicas auoir longuemant vecu par le moyen de nostre art : veu que on an void tous les iours beaucoup d'experiences. Et ne faut a ceus-cy opposer quelques intemperans & dissolus, qui ont touiours meprisé le bon regime : lesquelz touttefois sans aucun moyē de nostre art, sont paruenus a grād' vielhessē & age decrepit. car il est certain, que si telles personnes (bien nées, & de bonne trampe) eussēt vecu de reigle, & se feussēt aydes de noz moyens an leurs necessitez, ilz eussēt etē plu-tard vieus, & plus long tams an vie. Ce qui est aisē a prouuer, de ce que on void le plus souuant aucuns mal sains, ou de nature, ou par accidant, qui neantmoins viuet plus lōguemāt que les robustes & galhards: d'autant que les robustes se confians trop an leur force, viuet desordonnemāt sans loy & sans regime: les autres sont sobres & cōtinans, abstenans des choses nuisantes, & obseruans certaine maniere de viure, par l'ordonnance des medecins, qui les fait viure plus longuemant. Dont est venu le prouerbe, Qu'un pot cassē dure plus long

tams que le neuf. Sur quoy Galen dit tres-
bié, qu'il est croyable, ceus viure moins, qu'il
ne leur est ordonné de Nature, lesquels igno-
ret ou mespriset la saine maniere de viure.
Car la sciance de Medecine, pouruoyant a
la santé & vie des hōmes, ha telle vertu, que
si aucun meprise temerairement ses ordon-
nances, il vit non seulemāt an misere & tout-
te sol'heure de maladies, ains aussi retransche
la longueur de sa vie, & abbrege les termes,
que Nature luy auoit presis, anticipant sa
mort, & (comm'on dit) se coupant la gorge.
Sauoir est, quand vsant de mauuais regime,
il consume son humeur radical plu-toit que
ne luy estoit ordonné, ou suffoque & etaind
sa chaleur naturele: esquelles choses cōsiste
la duracion de cette vie. Or si c'est la loy &
le naturel des contraires, qu'ilz sont dis d'un
mesme iuiet, & si l'un est, l'autre doit estre
aussi: il faut necesserement, que si on peut
accourcir la vie, on la peut aussi prolonger.
Et puis que il est notoire, que la vie huma-
ne peut estre abreegee par diuerses fautes &
excez. on conclud assez de cela, qu'elle peut
estre alongie par bon regime & sage con-
duite. Car ia soit que on ne puisse aucu-
neman euitier les incommoditez, qui de-
pandent

pander des principes de nostre generacion, comme l'effluxion & continuelle dissipaciõ de toute nostre substance, qui est faite par la chaleur naturelle (dequoy procede la vieillesse, a cause de l'excessiue & ineuitable exsiccacion) toutesfois cela peut estre retardé par nostre art, & ampeché que le dernier iour ne vienne si tost, ne si hatiuemant. Et quoy? ne void on pas quelques vns pres a trepasser, qui sont retenus quelque tams an vie, an prennant vn peu de maluaisie, d'eau de vie, ou imperiale, de confecciõ alkermes, ou autre chose cordiale? Le periode & dernière ligne de vie ia prochaine, n'est elle differée par tels moyens a vn'autre heure? Cõme on dit aussi du riart Democrite, qui etant prié de ses domestiques, a ce que sa maison ne fut an dueil, durant les festes Thesmophories lors prochaines, d'allonger sa vie durant ces festes, il le fit, moyeniant l'odeur du miel, ou (comme diset les autres) de la vapeur du pain chaud. Voila ce que noz medecins remontret, qui ha tres-grand'apparance de verité.

Nous auons debatue les deus parties, par contraires fantances & raisons. il faut maintenant appaiser le debat, & resoudre ce, qu'a

deuons tenir. Et affin que cela soit fait de plus grand artifice, il conuiét ainsi distinguer les termes de la vie : que les vns sont sur-naturelz, les autres naturels, & les autres accidantaires, lesquelz on appelle acourcis ou abregés. Nous disons estre sur-naturels, ceus que Dieu tout-puissant ha ordonné, & prefis a quelques vns de sa pure volonté : telz que nous ne pouuons instituer par aucun art ou conseil. comme les termes de vie fort longs, que Dieu ordōna au premier age du monde auant le deluge, pour la multiplication du genre humain : & mesmes a Nohé, pour la restauration d'iceluy. Les naturelz sont ceus, qui ont esté donnez a chacun, selō la diuerse trampe & batimant diuers des principes & fondemans, fors ou debiles : à raison desquelz les vns doiuet viure longuemant, les autres peu de tams, selon l'ordre de nature : & ils attaindrōt ces termes (moyenant la grace de Dieu) sinon qu'ils fassent desfordre, ou quelque incōueniant leur suruiuēne : ce qui est deia des limites ou termes de la troisieme sorte, lesquelz nous auons nommé Accidantairēs, qui peuuet auenir a tout age, pour les cas fortuis & inopinez : cōme blessures, poisons, brulemās, cheutes, ruines,

nau-

naufrages, pestes, & autres maus populaires. Telz inconuenians font le plus fouuant ineuitables, & n'est à la fciance de Medecine d'y vſer de precaucion, ains de guerir le mal auenu, s'il eſt poſſible. dont laiſſans ces termes de vie à l'arbitre de la fortune (qui n'est autre choſe, à parler piemât, que la pure volonté de Dieu, ſans ordre de Nature: *Après le 7. paradox. de la 1. decade*) cōme nous auons anſigné an quelque part) parlons ſeulement du terme dit naturel, & expliquons ſa faſſon plus amplemant.

Tous les philoſophes & medecins ſont d'accord, que il faut meſurer & borner la duration de nōtre vie, de ce que peuuet durer la chaleur naturelle & l'humeur radical, eſquels conſiſte la vie. Or à ce que telles choſes puiſſet durer plus longuemant an nous, nōtre bonne mere Nature (comme parle Galen) ha mis an nous vne puiſſance merueilleuſe, qui par cōtinuelle application de nourriture, deſand l'ordinaire diſſipacion de nōtre ſuſtance &umeur radical, antretenant la chaleur naturelle, tāt par ce moyen, que par la reſpiration, & le pouſ des arteres. Mais telle puiſſance (que nous appellons Nutritiue) etant limitee & non infinie ne peut touiours deſandre & conſeruer ledit

humeur, an suggerant vn autre. Dont il ad-
 uient, que le cors peu à peu se desseiche : &
 de là s'ansuit, que telle puissance desormais
 n'est bien exercée, & l'affoiblit de iour an
 iour, tant que an fin le corps cesse de pou-
 uoir estre nourry suffisamment. Et ainsi de-
 uenant les parties fort arides, le cors s'amai-
 grit & diminüe : puis an passant plus outre,
 il se ridde, & cette condicion est nommee
 Vielhesse. C'est la principale necessité na-
 turelle de corrupciō & mort a tout cors an-
 g'andré. car la mort est adonc, que l'humeur
 primitif, sustantifique, ou radical defaud, &
 la chaleur naturelle s'etaind : & c'est la fin de
 la vie, que nous disons fin naturelle. Quant à
 noltre art, ce n'est pas vn art, qui exampste de
 mourir (dit Auicenne) ni mesmes qui puis-
 se conduire toute personne, iusques au der-
 nier terme de la vie humaine, qui est de cent
 ou sis vins ans. mais il asseure & exampste de
 deus choses : l'vne de pourriture, qu'elle ne
 faisisse aucunement le cors : si ce n'est d'oc-
 casion externe, comme peste, ou poison.
 l'autre est, defandre la naturelle humidité, à
 ce qu'elle dure plus longuemant, & soit tard
 consumée. Ces deus choses sōt au pouuoir
 de noltre art : dont il peut prolonger la vie,
 iusques

iufques au tams qui luy eft deu, felon la trāpe d'vn chafcun. & ce par trois moyens, defquels le premier eft, préoccupper la chaleur estrangiere, ampecher les opilacions, reietter les excremans, dequoy on præuiet la generacion de pourriture, ou icelle engendree an eft etainte. Le fecond eft la deüe adminiftracion du boire & du manger, an fufstance, qualité, quantité, tams & ordre. Le troisieme, abftenir des chofes qui an confumāt & puisant l'humeur radical an peu de tams, refoluet ou diffipet anfemblemant la chaleur naturelle: comme trauail excessif, vfage des chofes piquantes, veilles, foudis, & diuerfes paffions de l'efprit, mais fur tout, la copulation charnelle demeturée, & à heu re incōmode: & autres chofes famblables, qu'on peut & doit euitier, fuiuant les ordonnances & regles de Medecine.

Mais (dites vous) on ne doute point de cela. car chafcun accordera volōtiers, emeu des fudittes raifons, que cels viurōnt plus longuement, qui feront tamperans, & aurōt foin de leur fanté. Cela n'eft que pouuoir atteindre le bout & terme ordonné de nature, fans l'abreger: combien que cela eft fort rare. Mais on demande principalemant, fi la

fin & periode naturel de la vie peut estre auancé & prolongé par l'art de Medecine. Le repons, que la vie n'est pas seulement conseruée par nostre moyen, ains aussi prolongee. Car il est raisonnable, que ce soit plus affermé & auacé, de qu'il les fondemâs, principes & causes produisantes, peuuet estre continuees, etandues, & mesmes randués plus fortes. Or les principes de la vie (c'est la chaleur naturelle, & l'humeur primitif) si ne peuuet estre reintegrez, au moins ils peuuet estre restaurés, reparés, & radus plus vigoreus par nostre art: ainsi que la curacion des hectics nous le montre, & l'amandement de chaque cōplexion, par lequel la chaleur naturelle est attrâpee. Donques si par maniere de viure humectate, par les bains d'eau douce, & autres tels remedes, on peut conseruer plus longuement l'humide radical, qui autrement seroit plus tost consumé: & contamperer la chaleur naturelle, tellement qu'elle absme plus chichement cette sienne pature, par defaut de laquelle vient la mort naturelle: qui est ce qui ne confessera, la vie estre prolôgee par nostre art, laquelle deuoit estre plus courte selon nature? Je recognoy bien & confesse,

que

que les parties solides & spermatiques ne peuuet estre humectees sustancialement, & an elles mesmes: toutefois on m'accordera, qu'elles peuuet estre humectees parmy les espaces vuïdes & porres, esquels s'insinue l'humeur alimentaire, duquel est retardé le degast de l'humeur radical. Et c'est presque de mesmes, que aus lampes on met de l'eau à l'huyle, à ce que l'huyle resiste plus a la voracite de la flamme. Mais ancor, que les termes de la vie puissent estre allongez, on le prouuera fort bien de cet argumant. Des complexions ou trapes du cors, celle de plus grand vie est l'humide, ou celle qui est ansamblément chaude & humide, que nous appellons vulgairement sanguine. la contraire, qu'on nomme communement melancholique, est de la plus courte vie. De sorte que quand bien toutes deus vseroient de samblable regime, & pareil antretié, neantmoins la premiere seroit de plus longue duree, d'autât qu'elle ha le terme de sa vie plus élogné des principes de sa generacion. Or la vertu de nostre art est si grande, qu'elle peut changer de peu a peu ce naturel temperamât froid & sec, an son cōtraire. ce que Galen enseigne de faire ez deus derniers li-
ures

ures de la conseruacion de santé. Ne s'ansuit il pas de cela incontinant, que aussi le terme de la vie peut estre prolongé par l'art de Medecine: tellement que vn malheureusemant né, & obligé a courte vie, ayant chargé de condicion, deuienne plus viuace? De ce seul que chacun (a mon auis) antand facilement, qu'on aprenne les autres: c'est, commant on peut allonger les limites de tous ages: d'ot s'ansuit, que le cours de toute la vie soit allongé. Et premierement, que la vigueur ou fleur de la ieunesse puisse estre couseruée fort longuement par l'art de Medecine, Galen le demontre ainsi. Il y a deus principaus buts an la conseruacion de santé, qui sont an nostre pouuoir: de restaurer la substance dissipée, par breuuages & viandes conuenables, & de reietter les excremans qui an prouienet. Si on ne faut an aucun de ceus-cy, le cors ce pendant iouira de santé, & sera conserué tres-longuement an la force de sa vigueur. Parelhemant & par mesme raison, la vielheffe (du tout ineuitable à ceus qui doiuet mourir de mort naturele) est prolongée par nostre art: de fasson que le transissement, & comme vn retour an poudre par l'extreme vielheffe, auiedra

dra fort tard. Dequoy an fin on conclud, que comme de tous ages(car on peut semblablement, & mesmes plus facilement, etandre les termes de l'anfance & adolescence) ainsi de toute la vie, on peut allonger les termes par la Medecine, plus auant que ne sont ordonnés de nature. Et ce sont les limites que Dieu, principal auteur de la Medecine, ha voulu estre suiets à cet art: lesquels sont an nostre puissance, tant que Dieu le permet, & ne retransche le fil du cours de nostre vie, comm'il luy plait. Tout ainsi que autres fois, par dessus tout l'ordre de nature par luy ordonné, il substante & auance la vie miraculeusement, sans aucune aide medicinale, voire sans boire & sans manger.

CHAPITRE III.

*Contre ceus, qui ont opinion, que les medecins
prolonget les maus, & ne font qu'a-
buser le monde.*

IL n'y a aucun art tant suiet à calomnie, que l'art militaire, & la Medecine: qui s'accordet aussi merueilleusement bien an plusieurs autres choses, cōme l'on pourra voir
an plu

an plusieurs discours cy apres. Car pour expliquer familiarement le fait de la Medecine, i'amprunteray souuāt les similitudes des actions belliques : & mesmes a presant me samble que m'an pourray seruir, an ce qui est proposē. C'est, que si on ha assiegē quelque ville, & on ne l'amporte dans le terme qu'on ha promis, ou bien aussi tost que ceus qui an sont loin, iugēt (sans l'auoir reconuē) qu'on la peut prandre, quoy que le capitaine y fasse tout deuoir, on le soupçonnera ou accusera de diuerſes faſſons de negligence, lacheté, intelligence, & corrupcion, trahison, ignorance, precipitation, ou tardité an ſes antreprises, mauuaise conduite, pusillanimité, ou autre defaut an sa charge, & le tout ſera faus : mais ceus qui an iugēt ainſi, ignoret la reſiſtance que ſont les aſſiegēs, les bonnes prouiſions qu'ils ont, la force des gens, & toutes choſes requiſes à ſe deſandre plus longuemant que l'aſſiegeant meſmes n'auoit cuidē. lequel pourra auoir etē abuſē des epiōs, & autres qui rapportēt l'etat du lieu, & des ſamblans extérieurs, deſquels on tire coniecture de ce que peut eſtre dedans. Ainſi le medecin qui aſſiege la maladie dans le cors de l'homme,

pour

pour luy faire quitter la place , est souuant abusé des signes exterieurs , & beaus famblans:de sorte que cuidant estre a la fin de sa cure,c'est à recommencer.Car il y ha plus de corrupciõ & mauuais humeurs, qu'il n'auoit sceu preuoir :le mal fait plus grand'resistance, que le medecin ne cuidoit , se ranforceant & ramparât tous les iours de plus an plus contre les remedes , & bon secours. De sorte que la maladie sera plus longue, que l'on n'auoit predict : & le malade ne guerira si tost que le medecin auoit promis , ou que pansoient ceus qui n'an ont intellig'ance.Dont c'est mal fait de le soupçonner , ou d'ignorance , ou de neglig'ance , d'auarice, malice, ou autre vice,qui l'induisse à faire le mal plus long qu'il ne doit estre. Touchant à l'ignorance,ie suppose qu'elle n'y soit pas, & q le medecin soit sauant,expert, & hõme de bien. S'il n'est tenu pour tel , on fait mal de l'y appeller , & de cõmettre la vie du paciant antre ses mains :tellement que le paciant pourroit dire comme Iesus-Christ a Pilate,celuy qui m'ha deliuré à toy , ha plus fally que toy.Quant a la neglig'eance , i'accorde qu'il y a des medecins doctes,expers, & gens de bien , qui se passet assés de legier à la

à la visite & pansement des malades: mais ie ne croyray iamais, que ce soit à celle fin, que le mal dure plus longuemant, ains que c'est vne neglig'ance d'inaduertâce, com'ils peuuet estre an leurs autres affaires. Et an cela y a bon remede, qui est de les solliciter de pres, & les stimuler a faire leur debuoir: les prier d'estre plus frequans, & attantifs: mesmes leur balher vn coadiuteur, qui leur soit cause de plus grand soin. Le plus que l'on se doute (a mon auis) c'est l'auarice. car le vulgaire pense, que les medecins commune-mant prolongent les maladies & les antretienent an longueur, pour an tirer plus de profit. Parquoy ie me veus plus longuemant arreter, à refuter cette fausse opinion, la plus erronée de toutes. Car an premier, ie suppose que le medecin soit homme de bien: puis qu'il ayme son honneur & reputacion. Ie veus aussi, qu'il desire profiter an sa profession, cōme chacun veut aquerir des biens honnestemant en sa vocacion. S'il est homme de bien, il ne voudra iamais faire languir le malade à son eciant. s'il n'est tel, on ne le deuroit employer, cōme dessus est dit. Mais soit il mechant: si aura il ce but, d'estre an vogue & bōne estime, pour l'au-

tre fin, qui est deuenir riche. Or s'il met an longueur les maus qu'il pourroit abreger, il n'est pas abille homme, & fait tout le contraire de son intâciõ. Car s'il guerit an moins de tams que les autres, il sera de plus grand requeste: il aura telle presse de malades, qu'il n'y pourra auenir: & on luy dônera plus volontiers l'ecu, qu'aus autres le teston. Car qui est celuy qui n'ayme mieus payer au double, voire triple ou cadruple, & estre biẽ tost guery? Si on dône aus autres medecins, qui paruienet tard a la guerison, dis escus, on ne plaindroit pas 50. escus à celuy, qui abregeroit le tams de la moitié, ou du tiers, ou du quart. Mais à la verité, ce n'est au pouoir du medecin de faire a son plaisir. Il voudroit biẽ auoir cette vertu, de guerir an touchant ou an voyât, ou de la premiere recepte, ou seullemant d'un bon regime, ou autre chose legiere. Il auroit moins de peine, an feroit mieus prisé, & gagneroit infiniment d'auantage. Bon Dieu que celuy seroit tost riche, qui auroit cette propriété. Donq' il ne faut pãser, que les medecins emeus d'auarice, fassent les maladies longues, puisque ils gagneroient d'auantage an gré, reputaciõ, & recõpanse, s'ils pouuoient guerir plus tost.

Et

Et quoy? y a il medecin qui n'ayt des parás, alliez, & familiers amis, desquels il ne prād rien? Les guerit il an moins de tams que les autres, desquels il prand, le mal etant pareil, & le suiet samblable? Il ne gagne rien ala longueur de telles maladies: c'est assez, qu'il ne perde le gré qu'ó luy doit sauoir, des bós offices qu'il y apporte. Je diray dauantage: quand luy, sa fame, ou ses ansans sont malades, c'est tout à ses depans: & n'ont ils point de longues maladies? sont ils plus-tost gueris, si tout le reste est samblable? C'est vne grand'folie, de cuider que les medecins s'obliet tant, de prolonger les maladies à leur eciant, pour peu qu'ils ayet d'affecció a leur proffit & honneur. Mais il leur auient souuant, comme à ceus qui assieget vne place, qui cuidet l'anporter dans trois iours, & y sont vn moys deuant, sans qu'ils s'y feignent ou epargnet aucunement. Ils panset qu'une muralhe n'andurera dix coups de canon, & elle resistera à plus de cent. Ils ont opinion que les assiegés n'ont des viures, & municions que pour huit iours, & ils an auront pour deus moys. Tout ce qu'on panse, sont coniectures, prises du samblable, exemples, & obseruacions, lesquelles faihet bien sou-

uant. mais il ne faut pourtant accuser le Capitaine assaluant, de faire mal son deuoir; quand il fait tout ce que l'art demâde. Ainsi est il du medecin an toutes sortes, qui est tres-excusable, sur tout quand il se faut à la quantité & efficace de ses remedes. Car c'est ce principalemant, qui rand nostre art coniectural, comme dit Galen an plusieurs lieux: definissant la coniecture, estre de condition moyenne, antre parfaite sciencē, & pure ignorance. Parquoy il faut interpreter a bien, & prandre an bonne part, le succes des remedes, que le medecin docte, expert, diligent & curieux, ordonne le mieus a propos, & le plus iustemant qu'il luy est possible: remettant l'ysue & euēemant à Dieu, qui donne & ote, augmente & diminue la force aus-dis remedes, comme il luy plait: dont la maladie est tost ou tard finie, ores à bien, ores à mal: Reste la malice, de laquelle pourroit estre soubsonné le medecin. mais s'il y a la moindre occasion de rancune, hayne & mal-veilhançe, antre le medecin & le malade, ce n'est pas bien auisé d'y appeller vn tel medecin. Car il faut au contraire, que le malade ayme le medecin, & qu'il en soit aymé: ou s'ils n'ont eu au pa-

rauant cognoiffance l'un de l'autre, soit de nom ou de fait, pour lors se doit contracter vne étroite amitié dedans leurs cœurs : autrement le malade n'aura à gré le secours du medecin, qui aussi de son côté ne s'y affectionnera pas. Quant à la malice deliberée de nuire secrettement, si quelque medecin est antaché de ce vice, il le faut tenir au rang des ampoisonneurs, & ne l'employer aucunement. Mais i'antans que le vulgaire prād an autre sans, le terme de malice an ce propos: c'est, que les medecins mettet fort bas les malades à leur eciant, par abstinence & euacuacions, an danger de passer le pas: & ce pour ostanter leur art, & auoir plus de reputation, quand ils les an peuuet sortir, sinō, ils se sauuet & targuet du prognostic fait des le commencement, que le malade est an danger de mourir: mais ce sont eus qui l'ōt precipité à ce danger. Voyla (si ie l'ay bien cōpris) le doute que le vulgaire ha le plus souuant. De vray, ce seroit tresmalicieusement, traitremant & mechamment fait, si quelqu'un iouiet ce tour a vn malade: ne plus ne moins, que s'il iettoit dans la riuiera vn qui ne sceut nager, se fiant de luy ietter incontinent apres vne corde pour l'an retirer.

Car

Car peut estre, que le submerge ne saura prandre la corde, ou il ne la tiendra bien ferme, ou que le submergeur n'aura la force de le tirer dehors: & ainsi le pauvre homme fera du tout noyé. Mais il n'est pas croyable, que les medecins vsent de ces tours: & n'est pas vray, qu'ils mettent ainsi bas les malades par leurs remedes. lesquels ie suppose tousiours estre bien institués ainsi qu'il appartient. C'est le mal mesme, qui mine continuellement les forces de nature, & augmente les siennes iusques à certain point (qui est la vigueur & souverain estat de la maladie) apres lequel, si le mal est guerissable, vient la declinacion ou diminució de la maladie, & de tous ses accidans, le malade s'acheminant a la conualessance, dequoy nous traiterons plus amplemant (si plait a Dieu) au. 7. chapitre de ce liure. Il y ha des gens plus modestes, qui ne disent pas, que les medecins mettent ainsi bas les malades & au danger, mais qu'ils font les maladies plus longues, ou par leur indulgence (c'est au cōplaisât trop aus malades) ou pour les obliger dauantage à eus, au les rettirās par apres d'une longue, profonde & dangereuse maladie. Touchant a l'indulgence, il est vray

que plusieurs malades ayment mieus estre plus tard gueris, estre plus doucement traités. & cela excuse assez le medecin, pourueu qu'il en fasse protestacion, pour deffiance de son honneur. Quant a prolonger le mal, pour en tirer plus de gré, ce seroit vne belle trahison, & mechanceté. Aussi n'est il pas croyable, si le medecin antand bien son fait, qu'il mette iamais en longueur le mal. car il ne peut mesurer cette longueur: & en l'antretenant, le mal interieur peut ampirer, qui est pis que d'estre simplement long. Autre chose est des vlceres, qui sont traités du chirurgien. car il les peut bien antretenir, sans preiudice de la personne: voire l'interieur du cors s'en portera mieus, se purgeât par les vlceres: & il n'y aura autre mal, que de la partie vlcerée. Qu'ainsi soit, nous ordonnons bien souuent que les fistules soient antretenuës, & faisons des cabrols, ou fontanelles en plusieurs androis du cors, que nous voulons estre maintenuës ouuertes vn fort long tams. Mais les maladies internes sont d'autre concideracion, & ne doiuent iamais estre antretenuës, si on les peut guerir: ce qu'il faut faire incōtinant, ou le plus tost.

L'autre point de calomnie est, que les
me-

medecinsabuset le monde: que l'on gueriroit bien sans eus, voire mieus & plus-toft: & qu'ils ne font que broullasser. Nous auõs assés refuté cette folie au premier chapitre, par l'authorité de l'Ecclesiastique, neantmoins i'aiouteray cette similitude (puisqu'il y a des places qui se randet a l'assiegeant, pour leur auoir seullemant retranché les viures: d'autres à la seule veuë du canon: d'autres au premier assaut. & au contraire, qu'il y en ha qui apres tout cela restet imprenables. Maintenant si on argumantoit ainsi: nous voyons iournelement des places, qui se randet sans les forcer, qu'est il de besoin assieger, assallir, combattre, ruiner les muralhes, & faire autres actes d'ostilité? Qu'est besoin de faire la guerre aus villes, quand nous en voyons bien souuant qui se remettet d'elles-mesmes? Donques c'est vn abus, & folle depance au pays, quelque sedicieux qu'il soit, d'y auoir gendarmes, artilherie, & autre attiral de guerre. Ce n'est que inuancion & piperie des gens, qui viuet de ce metier là: on s'en passeroit bien. Voyre, si toutes places estoient foibles, & qu'il n'y eut resistance de gens, munis &

prouueus de courage. & autres choses requises à leur defance. Telz lieux se randent aisement : com'aussi font les legieres maladies, qu'il n'est besoin de forcer par notables remedes, & le plus souuant passet d'elles mesmes: & mesmes les plus fortes, comme fieures ardantes, quand il n'y a grand munition dans le cors pour les antretenir, & les forces naturelles resistet galhardement à l'insolance du mal. Autrement il y faut du secours, amployer la batterie, & toutes sortes de remedes : ancor le plus souuant avec tout cela, on n'auance rien, le mal demeure incurable. Pour lors il ne faut auoir aucun regret, ne dire, qu'on fut mieus guery sans cela: qu'o ha abusé le patiât. Ce seroit vrayement abus, si on promettoit guerison, d'un mal qui est tenu pour incurable : d'autât qu'on ne fait aucun remede, qui soit assés fort pour le vaincre. Tout ainsi que seroit abus, d'antreprandre de forcer vne ville à coups de poins, ou abbatre les muralhes à coups d'arcbusade, là où il faut le canon, & on ne le pourroit auoir, ni instrumant qui luy respondit. Voila des notables abus, samblables aus piperies : desquelles imposet au peuple ignorant, les Ampiriques charletás,

pro-

promettans guerison de tous maus, & plusieurs autres. On peut bien dire de ceus là, qu'ils abuset le monde: nō pas des medecins racionels, doctēs, experts & gens de bien.

QUATRIEME CHAPITRE.

Que ce n'est peché ou mal fait d'appeller des medecins, & vser de leurs remedes, quand on est malade.

IL y a vn'autre sorte d'erreur, fondé an folle supersticion, d'aucuns idiots qui panset offancer Dieu, s'ils appellet des medecins pour guerir de leurs maus: disans, que c'est contreuenir & s'opposer à la volonté de Dieu, qu'iles visite de telle affliction, que c'est pour leur bien. car an chatian le cors l'ame est purgee de ses pechés, & diset (cōme recite maistre Gui de Chauliac an son chapitre singulier) Dieu me l'ha dōné, ainsi qu'il luy ha plu: Dieu me l'otera, quand il luy plaira: le nom de Dieu soit benit Amen: & remettet leur guerison totalemant à l'intercession des Saints & saintes de Paradis, faisans des veus, aumones, prieres & oraisons. Cette opinion fort erronnee, est aisee à re-

futer, par ce que nous auons allegué au. i. cha. du liure de l'Ecclesiastique, où il exhorte saintement & sagement les malades, de se reconcilier premierement à Dieu, qu'ilz ont offancé, puis de donner lieu au medecin: lequel Dieu ha créé, & luy a donné la science pour estre glorifié an ses meruelhes. Il est vray, que Dieu nous anuoie les maus pour nostre chatiemant: & nous y ha rādu suiets, à ce que nous recognoissions nostre infirmité. De luy aussi procede la guerison, par les moyens qu'il ha dressé an nature, donnant vertus aus plantes & autres creatures, de chasser & vaincre les maladies: an ordonnant la science de Medecine, & l'art d'apotecaire, & à cet effect: non moins que l'agriculture pour la nourriture des hōmes, a l'antretiē de cette vie caduque & mortelle. Dont ce sont moiens qu'il ne faut mepriser, & que l'homme prudent ne dedaignera point. Autrement c'est tanter Dieu, & vouloir follement qu'il fasse des miracles a nostre appetit. Car celuy qui dit, si Dieu veut q̄ ie guerisse de ce mal, i'ā gueriray biē sans vser de la Medecine: & si i'an dois mourir, le medecin ne me sauera pas: c'est autant que s'il disoit, si ie dois viure ancor vn mois

mois, & qu'il soit ainsi ordonné de Dieu, ie viuray bien sans boire & sans manger: dont il n'est besoin faire cette depance. Car si ie dois viure autāt, il m'est impossible de mourir, quoy que ie ne mange point. Voyla vne follie, & grand' temerité, de se promettre que Dieu fera miracle, voyre de tanter cet essay, quand on ha des viures an main, ordonnés de Dieu pour la nourriture du cors. N'est ce pas tanter Dieu, de s'attandre à voir ce qu'il voudra faire contre l'ordre de nature? Il le laira mourir de faim, avec cette folie: & le pauvre idiot sentira par effet, qu'il auoit mal colligé anson esprit phâtaistique & brutal, que Dieu l'antretiédroit an vie sans boire & sans māger. Voire, si Dieu le vouloit ainsi, il se feroit: mais nous sauons que sa volonté ordinaire porte, qu'on vse des alimās: & là il se faut tenir, & ne s'attandre aus moyens extraordinaires, qui nous sont incognus & qui ne sont amployés a notre fol appetit. Ainsi est il de la Medecine, ordonnee du tout puissant, pour la guerison des malades, & conseruacion de santé. Car quiconque veut gnerir autrement, & a cette opinion, que s'il doit guerir, il le pourra sans medecin, quoy qu'il en ayt bon moyen, celuy tante Dieu

te Dieu, & attand de voir que Dieu fasse miracle, meprisant follement le moyen naturel qu'il ha ordonné contre les maladies. Non moins que si sa maison bruloit, & il ne vouloit qu'o y ietta de l'eau, disant, si Dieu veut qu'elle se sauue, le feu s'etaindra bien autrement.

CHAPITRE CINQUIEME.

De l'ingratitude des malades auuers les medecins.

L'Ingratitude est fort odieuse & a Dieu, & aus hōmes: voire on l'estime a bon droit vn si grand vice, que qni dit ingrat, dit tous les maus du monde. Or ce vice est si commun antre les hommes, a l'androit des medecins, que ie m'ebaïs souuant, qu'il y ayt aucun de cœur genereux, qui veulhe estre medecin, estant d'ailleurs la profession fort suiette à calomnie, cousine germaine d'ingratitude. Mais nous auons des amys, & gēs de raison, honestes & recognoissans, qui couuret certe facherie, & nous retienet an volonté de faire telle profession, non obstāt que plusieurs autres nous soint par trop ingras

gras. Car on an trouue de si courtois, qui protesteront publiquemāt & souuant, qu'ils tienet la vie(apres Dieu) de tels & de telz medecins: & ayans recognu selō leur faculté, l'industrie & labeur du medecin, pour sō antretien, neantmoins confesset libremāt, qu'il ne le sauroit avoir recōpanse de tout leur bien: com'il est vray de fait. Car s'ils doiuet la vie au secours du medecin, & la vie est de plus grand valeur que tout leur bien, il n'est an leur puissance de s'aquiter de ce debte, quand ilz donneroient tout leur bien. Mais le principal de la recompanse est le gré qu'ilz an fauet au medecin, se disans obligés à luy & redeuables de leur vie. Et c'est tout ainsi, que si quelqu'un auoit oté l'eepee des mains d'un qui fut pres de vous tuer ou la corde a un qui s'efforçoit de vous an estrangler: ne luy series vous pas tenu de la vie? toute vottre bien seroit il pour le recōpanser? Et puis on dit, j'ay bien payé mon medecin, voire surpayé, luy ayant donné tant par iour. ie ne luy dois rien, s'il m'a bien pāsē & secouru, ie l'ay bien recompanse. Ha pauvre homme: ce qu'on donne au medecin, est comme vne petite recognoissance du bien & du secours, que l'on an ha ressu.

car

car de le payer ou recompanser le fruit de son labeur, s'il t'ha preserué de mort(ainsi qu'il peut faire, par la grace de Dieu, il n'est an ta puissance: sinon que tu exposes ta vie pour luy, quoy qu'il n'y ayt exposé la sienne pour te sauuer de mort. Ainsi tu luy demeurés touiours redeuable:& faut que d'un bon gré tu le luy recognoisses, confessant ton obligation. Il y an ha qui trouueront ce propos dur, quand ie dis sauuer la vie, & preseruer de la mort: non obstant que cela est trop euidant. Car posons, qu'un blecé perde son sang an abondance, & que sans doute il an moura, si on ne l'arreste: celuy qui tiendra son doit dans la playe & retiendra le sang, ne sauue il pas la vie? Autāt & plus, celuy qui le retient avec medicamās, & an fin consolide la playe, qui de soy ne gueriroit point. Autant celuy pui arreste un flus de ventre, ou un vomissement, ou autre vuidange pernicieuse & mortelle: celuy qui saigne a propos un pleuritique, ou un que la squinance etouffe & etrangle: autant certes que qui retireroit du feu, un enfant qui y seroit tombé, & se brusleroit tout vif, s'il n'estoit secouru. Il n'an faut moins estimer des medecins, qui pouruoyet aus maus interieurs, & secou

ret nature secretement par diuers moyens, desquels l'efficace n'apparoit que par effet: & ce sont (comme disoit Herophile) les mains de Dieu. Car il nous releue & retire des dangiers de mort, par le moyen des remedes, q̃ le medecin amploye au secours. N'est ce pas vn' œuvre plus diuine qu'humaine, & qu'on ne peut assez recompanser? Dont l'Ecclesiastique ha bien dit: La science du medecin luy fait hausser la teste, & le rend admirable entre les Princes. le medecin sera honoré, mesme des Roys. Et voila les principales recognoissances qu'on luy doit: sauoir est, honneur & gré, pour vn' extreme obligaciō: nompas se persuader qu'il est assez recōpansé de quelque somme d'argent. Mais il y en ha qui son pis: c'est qu'après estre gueris, par le moyen d'un bon & loyal secours, ils ne peuuent andurer qu'on les die bien redevables au medecin: & peu s'en faut qu'ils ne haysset celuy, qui leur ha sauué la vie. O extreme ingratitude! mais ce n'est pas d'aujourd'hui. Hippocras en son e-pitre à Damagete, fait ainsi parler Democrite. Je pense (dit il) o Hippocras, que en nostre science plusieurs choses sont suiuettes a calomnie & à ingratitude. Car les mala-

des

“ des, fils echappet, rapportet leur guerison
 “ aus Dieus, ou à fortune, ou à leur bõne cõ-
 “ plexion : derobbans tout l'honneur au me-
 “ decin: lequel souuant ils haïsset depuis, etans
 “ bien marris & indinés, que l'on panse qu'ils
 “ luy soient redevables. Et outre ce, qu'ils ne
 “ veulet attester ou confesser leut obligaciõ,
 “ ils sont bien aises que les ignorans de l'art
 “ (qui neantmoins an font profession) soient
 “ de mesme propos, e guillonnez d'auie, &c.

Cela conuient le mieus du monde à nostre
 tams. car la plus part des malades tapportet
 totemât leur guerison à quelque Saint ou
 Sainte de Paradis, a qui ils se sont voüés : &
 ancor bien souuant n'accõplisset leurs veus:
 suiuant ce que dit l'Italien, *passato lo malo, poi
 è gabato lo Sancto*. Tout ainsi qu'ils font de
 grans promesses au medecin, durant le grãd
 mal, promettans mons & meruelhes. Ils le
 doiuet faire tout d'or & pierres precieuses.
 Il doit auoir vne bonne pãson tous les ans.
 brief on pretand luy faire beaucoup de bié.
 Mais quand on est guery, on antre an opi-
 nion, que le medecin n'y a guieres fait, ou
 qu'on fut bien guery sans luy. que c'est le
 vœu qu'on ha fait, d'où ha procedé la gue-
 rison: ou le bon seruice des gardes, les bons

potages: ou l'apothicaire, qui voudra s'attribuer tout le succes: ou la bonne & forte complexiõ du malade, ou vn cas fortuit, comme le desordre qu'il aura fait, auquel il rapportera follemant sa guerison. brief le medecin aura la moindre partie, ou nulle, de l'honneur, gré, & recompense. Car quant aus promesses, l'homme etant guery, va panser que la maladie luy coute tant, qu'il ha tant depãdu, que ce luy est de tant d'interest. Dont il oblie son deuoir au medecin, auquel mesme il impute vne partie de sa depance, l'estimant superflue: & luy veut mal de l'auoir tant retenu au lit, faisant son estat, qu'il an pouuoit plus-tost releuer, & a moins de frais. Tellemant que à son comte, le medecin luy seroit redeuable: & s'il trouuoit des iuges à sa poste, qui eussent autorité, il le feroit condamner aus depans. Voila bien recognu le bien ressu. Y ha il pareille ingratitude? Non, sinon que cette-cy: d'vn qui s'etrangleroient par desespoir, ou autrement: & quelqu'vn venant au secours luy couppa la corde, & que puis ce pandu le fit aiourner pour luy payer sa corde. Ou d'vn qui se noieroit: & celuy qui le sauueroit, an le tirant du danger, luy dechira vn peu de son abilhemât: & que le

le noyé preserué, an voulut la reparacion. Ainsi ceus qui nous doiuet, nous demâdet: ne nous sauuet gré ne grace, de ce que les auons bien secourus, & aymet mieus dire, qu'un ignorât valet ou chambriere est plus cause de leur guerison, que le bõ soin & industrie du medecin. Et c'est pour l'une de deus raisons: ou qu'ils sont tant hebetez, & n'ont la capacité de le comprendre: ou que le sachant bien, ils sont honteus de n'auoir la volonté de le recognoître & confesser. Comme que ce soit, c'est vn' ingratitude fort odieuse & à Dieu & aus hommes.

CHAPITRE SISIEME.

Que le vulgaire n'estime rien, si on ne guerit contre son opinion, que les derniers remedes ont tout l'honneur: & heureux le medecin, qui vient à la declinacion du mal.

C Et erreur est fort conioint avec le precedent, mesmes il est souuant cause de la fuditte ingratitude. Car si on ne guerit contre l'opinion du malade, ou de ceus qui le visitet, ce n'est rien fait: & pourtât on n'an
fait

fait point de gré au medecin. Or guerir cō-
tre l'opinion, cōtient deus parties: l'vne est,
de guerir an moins de tams, & quasi inopi-
nemant. comme, si le mal dure commune-
ment tant d'accès, ou tāt de iours, de le gue-
rir an beaucoup moins. Car autrement on
dit, & bien la maladie ha fait son cours: le
medecin n'y a de rien serui. aussi bien fut il
guery dās ce tams là. Pauures gens, ne voy-
ez vous pas, que de mesme espeece de mal,
les vns sont cours, les autres longs? Il y a des
fieures tierces, & des continues aussi, qui du-
reront vn mois, ou deus. Vous supposez,
que la tierce ne doit estre, pour le plus, que
de set accès: qui sont 14. iours: & la conti-
nue de 7. 11. ou 14. comme vous auez ouï
dire aus medecins, que c'est le terme des
fieures exquisēs. Mais vous ne sauez pas,
que de mille il n'y an ha pas deus telles, ains
la plus part sont confuses & melées. dont
leur terme est de beaucoup plus long, com-
me de toutes maladies engendrées de di-
uers humeurs. Croyés (& il est vray) que
si la tierce finit dans trois semaines, ou vn
mois, estāt combatuë de nos remedes, que
sans cela ell'eut duré parauanture deus ou
trois mois, ainsi qu'on an voit plusieurs au-

I.

tres. N'est ce pas bien rabatu, & auancé beaucoup pour le malade? Mais on n'a rien fait, à son dire, si on ne fait ancor plus qu'il n'ha pretandu. car il panse que le medecin peut faire du mal, comme d'vnes etriuieres, qu'on alonge & acoutcit tout ainsi côm'on veut. N'est ce pas assez fait, d'an rabbatre vn quart, vn tiers, ou la moitié: & ampecher ou appaiser les diuers accidans, qui communement suruienet à toutes sortes de maladies, & faire qu'on an ayt la raison, le melheur compte qu'il est possible, & qu'on an sorte à quel pris que ce soit? C'est pour tóber à l'autre partie de l'opinion vulgaire, qui n'estime rié, si on ne guerit ceus q̄ l'ó tiét pour mors. Car quoy que le mal soit mortel, côme toute maladie q̄ nous appellôs aiguë (c'est à dire trāchāte, qui va vite, & ha de terribles accidans) si le malade, ou ses reuisiteurs ont opiniõ qu'il an pourra guerir, & il an auiét ainsi, ce n'est rié fait: ains au contraire, si le malade an meurt, c'est la faute du medecin. Car les assistans s'etoient persuadez (quoy que le medecin dit le contraire an son prognostic (qu'il an pouuoit guerir. Mais si on pāse, qu'il doie mourir, ou q̄ deia on le tiēne pour mort, le medecin ha fort beau ieu. car quād
il

il ne feroit que luy ordonner ses potages, avec quelque petite droguerie, sur tout des restauras & choses cordiales (ancor que ce ne fut a propos) il ha fait vn chef d'oeuvre. Voila vne belle cure, il ha guery vn tel, que chacun tenoit pour mort. il l'ha ressuscité. c'est vn grand personnage. Mais voicy la pitié. Ce mesme docteur aye an mesme tams vn autre malade, qu'on ne tient pour mortel: d'autant que son mal est plus caché. Il fait tres-grand deuoir à le randre salubre, & d'an venir a bout: il amploye toutte son industrie à sauuer le paciât, qu'il cognoit estre an plus grand dangier que l'on ne cuide. An fin il meurt, contre l'opinion du vulgaire. voila mon medecin qui perd soudain sa reputation: & dit on, il y ha fait trop de choses. l'autre fut mieus gouverné. Ainsi iamais on ne fait rien que valhe, si on ne guerit cōtre l'attente & esperance du vulgaire.

L'autre erreur proposé an ce chapitre, est, d'attribuer aus derniers remedes tout le succes de la curacion, comm' aussi on rapporte l'occasion du mal, a la derniere chose qu'on ha fait. Comme si on ha mangé quelque fruit, salade, ou autre chose moins ordinaire, & que tantost apres on soit malade,

voyre d'un mal qui dure plus d'un mois, ce-
 la seul an est cause : sans y a iouter infinis au-
 tres precedas desordres, qui an ont fait leur
 part. Car les mauuais humeurs se congre-
 get de peu a peu, iusques a certaine quanti-
 té, a laquelle ne peut plus resister nature.
 Tout ainsi qu'un verre se raplit de plusieurs
 gouttes d'eau, qu'il contient iusques au
 bord: mais etant plein, il commence a ver-
 ser d'une goutte seullement. Ainsi la moin-
 dre addició, an ce que nature supportoit an-
 cores, la fait succomber: comme un mulet
 plie sous sa charge, pour peu qu'on ajoute
 au fardeau ordinaire de sa portée. Ce n'est
 donc pas le dernier morceau, ou desordre,
 qui ha tout fait: les precedans y auoint fait
 leur part. non moins que a couper un arbre,
 auquel on donnera 100. coups de hache, il
 samble que c'est an vain, & qu'on n'auance
 rien: le cent & vnieme coup le fait tomber.
 Si on disoit, que ce seul coup l'eut abbatu,
 ne feroit on pas tort aus autres? Aussi quád
 vne tour aura soutenu mille volées de canó,
 & au dernier coup elle tombe, le dernier y
 a il plus fait que le premier? C'est tout de
 mesme qu'on iuge des remedes, qui abba-
 tet le mal, & chassent la maladie du cors : le
 dernier,

dernier, quel qu'il soit , an ha l'honneur du vulgaire mal sanlé, qui parle ainsi: on l'auoit saigné, purgé, clysterisé, drogué de mille sortes, par dedans & par dehors: pour cela rien. An fin on luy ha donné ou appliqué telle chose, & il est guery. Pauures idiots! si cela eut esté fait du commancement, il n'eut de rien serui: mais apres tant d'autres remedes, qui auoint affoibli le mal, ebranlé & deraciné, la moindre chose du monde luy fait quitter la place. Côm'aus assiegez, qui deia n'â peuuet plus, si on leur tuë ancor vn hōme, ils se randet incontinant: & puis on dira, que toute la batterie, tous les assaus, retranchemans de viures, & autres bons moyens de les vaincre, n'ont de rien seruy. celuy seul a tout fait, qui ha tiré la derniere arbusade. & toutefois il n'aura tué qu'un des moindres soldats. s'il auoit tué le chef, ce seroit autre chose. Ainsi vn breuet pandu au col, ou des drogues mises au carpe de la main, auront l'honneur d'auoir guery des fieures vn, qui n'auoit peu guerir par tant de regime, medecines, & autres remedes. C'est que le mal ne tenoit plus qu'a vn filet, qui ha peu estre rompu de la persuation & grand' opinion, que le malade aura eu de ce moyen. mais si

on l'eut appliqué des le commencement le malade n'an fut guery, quand il eut eu cent mille fois plus de persuation, & imaginaciõ forte. Car l'imaginacion peut quelque chose a la guerison, mais nompas tout, ny seule. Voila commant on derobe l'honneur aus vrays certains remedes, an iugeant mal du succes. par ce^qu'on veut estre guery, soudain qu'on ha fait quelque chose: autrement on panse que c'est en vain, & que tout ne sert de rien. celuy seul est auteur du bien, apres lequel immediatemãt on fant la guerison. Et pourtant on dit communement (qui est le tiers point de ce chap.) bien heurus le medecin, qui vient a la declinaciõ du mal. Car quoy qu'il fasse, la guerison etant à la porte, on luy attribue son introduction. Et quant bien le medecin n'y auroit du tout rien fait, ny ordonné, ancor dira on, qu'il est cause de ce bon heur: & que s'il fut venu des le commencement, le malade fut aussi tost guery. Mais si le medecin est prudent & modeste, il ne se coiffiera de cet honneur, consantant au larrecin & detraccion, qu'on fait à ceus qui ont bien traité le malade, & sont les vrais auteurs de sa guerison, ains remontrera aus assistans, que
les

les accidans passez etoint de la nature du mal, lequel ha eu tel cours:& que par le bon ordre qu'on y a mis, tout est remis & passé, a l'auantage du paciant. S'il fait autrement, & se veut attribuer l'honneur, ou l'accepter du vulgaire, il se fait vn grand tort: & autant luy an pand a l'aureille. Car quelque suffisance & reputacion qu'il ayt, il pourra auenir, que l'on appellera sur la fin d'une maladie qu'il traitera, vn autre medecin: lequel luy iouëra vn mesme tour. Ainsi donc chacun soit auisé, de se contanter honnestemāt de l'honneur qui luy est deu, sans rien derobber à son collegue ou symmyste (c'est a dire, compaignon de metier) randant bon & sain tesmognage des louables accions de chacun: se reputant bien heureux neantmoins de ce, qu'il est arriué a la declinacion du mal, pour n'auoir eu guieres de peine, & auoir bonne part au gré, qu'on doit sauoir à tous ceus qui s'y sont amployez.

CHAPITRE SETTIEME.

Qu'on iuge sineftremant du deuoir des medecins, quand aucun meurt d'un mal, dont quelques autres font gueris.

L'Ancien prouerbe recité de Terance eft journallemât trouué tres-veritable, Qu'il n'y a rien plus inique & plus iniufte, que l'hô me ignorât & imperit. Ce que nous aprou uons an noltre art, plus qu'en autre affaire quel qu'il foyt: ainfi qu'on peut aifemant obferuer, mefmemant des erreurs prefque infinies, qui ont donné argumant à cett'œu re. Celuy que ie touche maintenant, eft fort vulgaire, & pand du precedant, que les ignorans ne priſet aucune curation, finon que le malade gueriffe contre toute eſpe rance. Car ſi quelq'un meurt d'un flux de ſang, ou de vâtre, voire diſenterique, ou d'une fieure tierce, ou autre intermittante, fie ure continuë, pleureſie, & pource qu'on an void pluſieurs autres gueris, on eſtime qu'il ya de la faute au medecin, ſoit d'ignorance, ou de negligence. Ainſi oyons nous plu ſieurs qui murmurêt, ſi quelq'un meur d'arc busade,

busade, ou autre playe, aus bras & aus jambes: d'autant qu'ilz estiment seulement mortelles, celles qui sont an la teste, & au cors, c'est à dire la poitrine & ventre inferieur. Dõt si on guerit de telles playes, ils estiment infinimât la procedure & industrie du guerisseur: comme au contraire, si on meurt des playes au bras & aus iambes, on ne s'an peut contanter. & il ya tousiours quelque regret, soit que le blecé meure de hæmorrhagie (c'est à dire flus de sang) ou de Gangræne & Sphacele (qu'on appelle feu S. Anthoyne) ou autres accidans. Comme si tous maus samblables an espee, etoint de mesme particularité: & qu'il n'y eut antre les maus infinies differances, comme an l'espee de l'hôme, & de toute autre chose. Car l'homme n'est qu'une espee d'animal: comme la playe n'est qu'une espee de mal. mais comme des hômes il ya infinies diuersitez, ainsi des playes an quelque lieu qu'elles soient. Ce que dis expressement, affin qu'on ne pense, que le seul lieu fasse la difference: combien qu'il diuersifie infinimât les maus par sa diuersité. Et quand on accorderoit bien tout estre de mesme, & le lieu, & la playe, il ya ancor mille circonstances des particularitez

particularitez au subiet, qui est le cors blecé pour sa complexion, corpulāce, aage, force, ou resistance, coutume, vie precedante ou maniere de viure presante, comprenant l'habitation ordinaire, le boire & le manger, le velher & dormir, le trauail & repos, la repleció, & vuidāge, cōme par le coit, avec les passiōs d'esprit & negociaciōs. Aquoy faut aiouter la cōdicion des humeurs, cause principale du bien & du mal qui suruiēt aus blecés. Car les cacochimes an ont touiours plus de mauuais comte. Dont si on ne peut trouuer deus persōnes sāblables de tout en tout, nōpas mesmes vn qui soit cōme il ha esté an autre aage, & an autre saison (veu qu'ō se chāge a toutte heure) commant veut on argumanter du samblable, qui ne se trouua iamais qu'en espee, & comm'on diroit de gros an gros, nompas exactemāt ou an indiuidu? Et il ne faut pas grand chose pour faire trebucher ce qui balance: cōme vn dimy grain fait trebucher l'ecu. Ainsi le malade auquel on compare celuy qui est mort du mal qu'on dit auoir esté samblable, aura esté an branle de mourir, mais vn poil de melheur condicion l'aura fait pancher vers la guerison: où depuis qu'il aura incliné, ne cessera

cessera de tomber à ce couré la, tât qu'il ayt
attaind le fon. & l'autre au contraire, pour
vn poil de pire condicion (chose fort oc-
culte, & de mauuais comprandre) trebu-
chera vers la mort, & y paruiendra, quelque
secours qu'on luy sache donner, puisque vn
coup il aura prins la tombée. Voila cōmant
plusieurs meuret de pleuresie, & d'autres an-
guerissent. & vn mesme autrefois an sera
gueri, lors qu'elle sambloit plus vehemante,
& maintenant il mourra d'une de moindre
montre, voire de foy moins violante. Ainsi
des blessures à la teste, à la poitrine & au vā-
tre aucuns auront eté gueris, qui depuis
mouurrōt des playes au bras, ou jambes, qu'ō
estime le moins. Et pour oter tout regret ou
replique, de dire, si vn tel l'eut pansé, il n'an
fut pas mort: car on luy an ha veu guerir de
plus dangereux: ce sera bien souuant le mes-
me chirurgien ou medecin. Mais quoy? il y
aura ancores la duplique, pour vn opiniatre
passionné, & malcontant outre-mesure: que
le medecin ou chirurgien l'eut bien ampe-
ché de mourir, s'il eut eté plus diligent &
affectionné, ou s'il y eut auisé de plus pres, &
plus sogneusement comm'il auoit fait au-
tresfois, qu'il estoit ou plus seruiable & offi-
cious,

cicus, ou de plus grand loysir: & autres telles condicions requises a vn medecin, pour mieus faire son deuoir enuers le paciant. Or ie ne nie pas, que telles occasions ne puissent auoir lieu: car de fait elles sont causes le plus souuât de ces diuers effectz, que l'vn guerit, & l'autre meurt: toutesfois pour le plus ils auient de la part du subiet, mais c'est d'une occasion si cachée, qu'on attribue tout à ce-
 luy qui l'aura pansé. chose trop iniuste & indiscrete. Aussi, comme i'ay dit des le commencement, il n'y à rien plus inique & de-
 raisonnable que le iugement des ignorans & imperites.

CHAPITRE HVITTIEME.

Contre ceus qui meprisent les medecins, pour auoir iugé du mal autrement qu'il n'est auenu. & ceus qui veulet mal de mort au medecin, qui aura iugé leur maladie mortelle. Et si c'est mal fait au medecin, d'abandonner le malade, qu'il iuge deuoir mourir.

C'Est a Dieu seul de cognoitre & preuoir certainement l'auenir: voyre il samble que tout le reste ha esté liberalement com-
 muni-

muniqué a l'homme , duquel l'esprit est capable de comprandre tout , hormis l'assurance du futur: à Dieu toutes choses sont presentes. Il est bien vray, que par l'obseruacion des choses naturelles, qui souuant terminet a samblable point, on peut à peu pres deuiner ce qu'auendra. Aussi les prudans & bien auisés preuoyent le mal, ou le bien, qui peut suiure quelque antreprise. Ainsi les laboureurs prediset vne bonne, ou mauuaise saison. Ainsi le marinier preuoit le bon & mauuais tams. Mais comme il n'y a rien d'assuré, veu l'inconstance & frequante mutacion qu'auient an ces choses corruptibles, ou par cas fortuit, ou de noltre faute, ou par les secrets inçognus de nature, ou par la prouidence de Dieu, lequel an vn momant change & ranuerse l'ordinaire des effectz : il n'est possible a l'homme de preuoir l'auenir, sinõ par cõiectures, & fallibles argumans. Quât aus maladies, on predit quelque foys la mort, d'vne grand'assurance : de la santé, on an peut moins assurer. car vn mal guerissable bien-tost deuient incurable, ou par la faute du malade, ou de ceus qui luy assistent: par ce qu'ilz n'accomplisset antieremant les bons conseils des medecins. De là vient, que

que plusieurs maladies courtes & guerissables se changet an longues & mortelles. Voyla pourquoy les medecins bien auisés, pour euitier la calomnie & reproche du populaire, & ne faillir a dire vrayemât la cōdition du mal, aus fins que les reigles de nōtre art ne deuiennet suspectes, & soient condamnées de faus, prediset la mort ou la vie, selon qu'ilz trouuet de vertu aus malades: avec cette limitation, qu'il n'auienne autre accidant. Nous ne pouuons aussi dire que le medecin affirmera vrayemât vn mal etre guerissable, ou non: & vsera des remedes bons, & a propos: touttefois Dieu(qui est par dessus) permettra que celuy, qui deuoit mourir selon les lois de Nature, guerira, & au contraire. car ses iugemens ne peuuet etre compris de l'homme. Parquoy il faut bien antandre l'opinion de Galen, qui remontre de n'ordōner rien à ceus que nous voyons mortels: affin que les remedes & l'art ne soient meprisés, ou diffamés. Car ce seroit vne grand'inhumanité, indigne d'un medecin(qui doit etre fort secourable, plein de pieté & compassion) de ne visiter ceus qui à son iugement ont a mourir, les abandonnât avec vn simple prognostiq. Voy

re il me samble, que les malades an cet estat, ont plus grand besoin de visite, pour etre consolés a supporter patiãmant le mal, qu'il leur faut andurer. Plusieurs sont an dangier de mort, pour ne vouloir obeyr aus medecins, ou par la faute de ceus qui leur assistet. Je ne dy rien des complexions secrettes & occultes de quelques malades, qu'il est mal aisé de comprandre: & si on ne les antand exactemant, on ne peut venir a bout de leurs maus. Dont il est bien necessaire, que les gardes n'obliet rien de ce qu'ordõnt les medecins, mesmes ez choses qui sambet de peu d'importance. Il ne faut rien ajoute a leurs commandemens, ne rien diminuer, ans observer le tout diligemmant, sans faillir a chose qu'ils ayet ordonné. Si les seuls medecins manioint la Medecine, & & s'il n'y auoit ant de sortes de gés qui s'an meslent, comme sages sames, gardes, apoticaire, barbiers & vn'infinité de personnes ignorantes, il n'auientroit tant de maus aus malades, & nos prognostics seroient plus vericaöles. Mais ie m'ebay plus des malades mesmes, qui ayment mieus (pour la plus par) s'accorder au conseil des idiots, que des medecins bien fameus. Je confesse que plusieurs

eurs ne font pas assés leur deuoir, ains negligens & sans misericorde a l'androit des malades, ne tachet qu'a ramplir leur bource: n'ayans soucy de la perte d'autrui, tant que de leur profit. ilz trottet de maison en maison, sans aucune modestie: visitet les apoticaire, pour crocheter quelque pratique: font samblant, & se vantet, de cognoitre tous maus par les vrines. Par flaterie & faintise, cauteleusement trompet les malades & presque tout le monde, qui veut etre deceu & abusé. C'est la faute du magistrat, qui ne chastie pas les maluersations commises en la Medecine, donnant lieu tant facilement aus ignorans & frasqueis empiriques & imposteurs, que aus doctes & gés de bien. Veu donc les fautes, excés du defaut, que commettet les mades & les assistans, il ne faut pas trouuer étrange si les plus experts medecins se falhe quelque fois en leurs predictions. A cwy il faut ajouter la diuerse complexion des malades, comme dessus ha eté dit. Sur ce propos Celse dit

- .. tres-bien, La Medecine git en coniectures:
- .. & la raison de la coniecture est, que ayant
- .. souuant autre fois r'ancôtre, ce neant-moins
- .. quelque fois nous deffoit. Donques si vne

chose

chose a-peine faut de succeder antre mille „
 personnes, on n'an fait point de cas, par ce „
 que an vne infinité de gens il sera autremât „
 auenu. Ce que ie dis, se doit aussi bien pran- „
 dre aus maus guerissables, que aus mortels. „
 Car l'esperance est bien quelque foys faul- „
 se; & celuy meurt, duquel le medecin an- „
 premier se tenoit assuré. Dauantage les re- „
 medes qu'õ ha trouués pour guerison, quel- „
 foys cõuertisset l'affaire an pis. Et il n'est pos- „
 sible a l'homme d'euitter ces euenemãs (veu „
 son imbecillité) an si grand'diuersité de cõ- „
 plexions des cors. Si est ce qu'il faut adjou- „
 ter foy a l'art de Medecine, laquelle proufi- „
 te beaucoup plus souuant, & a beaucoup „
 plus de personnes, qu'elle ne faut. Et se resou- „
 dre a ce que dit Hipocras, que le iugement „
 fait des maladies grandes & soudaines (qu'õ „
 appelle aigues) est plus fallacé & incertain, „
 que de celles qui ont longue trainee, & sont „
 moins violentes. I'ay autres-foys predict, an „
 consultât de la maladie d'un grand seigneur, „
 mareschal de France, des le cõmancement, „
 qu'elle seroit longue ou mortelle. Dequoy „
 ie fus calomnié, d'autât que (graces a Dieu) „
 il n'an mourut pas, & fut assés tost guery. Où „
 ie panse auoir fait vn chef d'œuure, avec

ceus qui m'assistoint, sauoir est de conuertir
 vn mal mortel ou long, an vn guerissable &
 court. Ce que le peuple n'antand, ne cstime
 a la dignité. Car si vous dites, que ce mal
 est mortel, & la mort ne s'an ansuit pas, il dit
 que vous auez mal iugé. Et quoy? la peste
 n'est elle pas vn mal mortel? toutesfois plu-
 sieurs an guerisset. Ainsi la fieure continuë,
 la pleuresie, la playe au trauers du cors, &
 plusieurs autres maladies sont dittes & iu-
 gees mortelles, nompas que tous an meu-
 rer ineuitablement, ains pour la plus part.
 N'est ce pas vn'extreme insolance, de re-
 procher au medecin son pronostic, d'auoir
 predict vne fieure pestilentielle, avec le pour-
 pre, suiuiue de phrenesie, conuulsiõ, & sub-
 eth (comme fut celle dudit seigneur) estre
 mortelle ou longue? Au contraire, il le faut
 infiniement louer, de ce que par grand dili-
 gence & obseruation, bons & vrais reme-
 des il ha conuertiy le mal mortel an guerissa-
 ble, & le long'an court, s'opposant a tous ac-
 cidans si dextremant, qu'il n'y eut qu'un
 ombrage & legiere affection de phrenesie,
 conuulsion & subeth: combié que telz acci-
 danssoint mortelz d'eusmesmes, cõme sauēt
 bien les plus excellans & experts medecins.

Je viens a l'autre propos, de ceus qui veule-
 let mal de mort au medecin, qui aura quel-
 que fois iugé leur maladie estre mortelle.
 Vous diries que c'est vn preuost qui les ha
 autres fois condamnés a mort, auquel etant
 echappés, ils veulet mal de mort, & s'ilz
 pouuoient, le feroient volôtiers pandre. Mais
 le fait est fort dissamblable, veu que l'vn con-
 damne a mort, & pretand exequuter sa cō-
 damnation : l'autre ne fait sinon iuger, que
 la maladie fera mourir le patiant: comme
 celuy qui void deus hommes combatre ou
 iouër, & iuge lequel doit estre vaincu, a son
 auis. Le fait il perdre pour cela? Si quelcun
 echappe des mains du preuost, par la grace
 & remission que luy an fait le prince, il est
 cōme celuy qui echappe d'vn mal mortel,
 par la grace que Dieu luy fait, par le secours
 du medecin. Et si on replique là dessus, que
 le medecin n'y ha de rien seruy, que le ma-
 lade ne luy an doit sauoir gré: que son heu-
 re n'estoit pas venue: ie diray tout de mesme,
 que celuy, auquel le Roy ha donné grace, ne
 luy an eist pas redeuable, d'autant qu'il ne
 pouuoit mourir, son heure n'estoit pas venue:
 ainsi que l'euenement demōtre. Il faut bien
 parler autrement, & comparer le medecin

a vn Roy, & nompas au Preuost. Car tout ainsi que Dieu, ne voulant ancor retirer de ce monde, ce criminel iusticiable a mort, met au cœur du Prince vne volonté de le sauuer, & de luy donner grace: ainsi pour le malade attaind de mal mortel, qu'il ne veut ancor appeller, il met an l'esprit du medecin les moyens de le guérir, & benit ses remedes. Donc que l'on sache touiours bon gré au medecin, d'auoir predict ce que luy sembloit du dangier: veu qu'il vaud touiours mieus le craindre, que s'y fier, pour beaucoup de raisons, desquelles vne concerne l'heritage ou succession aus biens, etas, & dignitez, qu'il ne faut hazarder: l'autre le deuoir du medecin, qui doit estre plus diligent, & attantif au secours du malade, quand il ha preueu & predict le dangier. Touttesfois il y an ha de si mal auisez, que de cela ils se randed plus nonchalans: parce qu'il leur samble, ne pouuoir soutenir aucun reproche, quand ils ont predict la mort. Ce qui est tres-

Li. 3. cha 26
 „ mal fait. Celse nous auertit bien mieus, que
 „ quand le danger est grand, sans toutesfois
 „ certain desespoir, qu'il le faut sinifier aus pa-
 „ rans du malade, affin que si l'art est vaincu
 „ du mal, il ne samble qu'on l'ait ignoré ou a-
 busé.

busé. Mais comme cela conuient à l'homme prudent, ainsi c'est à faire à un bateleur, d'exalter une petite chose, afin qu'il semble auoir fait davantage. Aussi il est raisonnable, de s'obliger par confession de la chose prouuée & aisée: à celle fin que le mal qui est de soy petit, ne deuienne plus grand par la négligence de celui qui le traite. voilà comme il en faut user, & n'haïr pas le médecin qui ha sagement auerty ceus qu'il falloit, du dangier auquel il ha veu le malade.

Quant au troisieme point, proposé au titre de ce chapitre, ie suis toujours d'avis, qu'on n'abandonne iamais le malade, pour quelque accidant qui suruienne, iusques à l'extremité: Et comme on ne doit laisser de luy donner alimens aux heures ordinaires, tant qu'il ha vie au cors, quand on fau- roit bien qu'il mourra dans un heure: ainsi faut il y faire toujours quelque petit reme- de: sans toutesfois molester le pacient de chose de grand' importance. Car plusieurs guerissent contre l'esperoir humain, lesquels si on abandonnoit, mourroient sans doute (par- lant humainement) comme ceus qu'on an- terre tous vifs, passant qu'ils soyent mors. Ga- len & Celse ne contredisent à mon propos,

quand ils nous amonnestet (comme cy de-
 ssus auons dit) de ne toucher point à ceus
 qu'on n'espere de guerir: de peur que les re-
 medes soient diffames, qui ont profité a plu-
 sieurs. Car ils antandent des remedes nota-
 bles, & suiets a calomnie: cōme sont la sai-
 gnée, purgacion, incision, cauterizacion; &
 samblables: nō pas des petis & legiers, qui
 doiuent touiours estre continuez iusques à la
 fin, soit elle bien ou mal heureuse. Raison:
 Nature ha au dedans le plus souuant quel-
 que vertu cachée & anseuelhie, qui se de-
 montre apres auoir soutenu mille assaus: la-
 quelle remet tout au dessus: comme d'vne
 scintille de feu s'ambrafera vne maison, voir-
 re toute vne ville. Il ne faut qu'vn brin de
 force qui tienne bon; & qui soit secouruë
 bien a propos, pour chasser de peu a peu le
 mal & remettre la santé en sa possession.
 Dont il ne faut iamais abandonner le mala-
 de, & pour les raisons cy dessus alleguées,
 & pour les guerisons inopinées, qu'on ob-
 serue iournellemant an plusieurs, a la grand
 confusion de ceus qui les ont quittez & te-
 nus pour morts, affirmās opiniatremāt (sans
 excepcion ou limitation aucune) qu'il etoit
 impossible de les sauuer. Dequoy vn igno-
 rant,

rant, ou moins sauant, qui n'abandonne le malade, ancor qu'il n'y fasse rien que valhe, rapportera l'honneur de l'auoir guery. Parquoy il faut estre prudent au prognostic, & remontrer l'estat de la maladie estre tel, que peu de gens an echapper: toutesfois que la force de Nature est incomprehanfible. outre ce que Dieu, qui est par dessus, fait souuent des miracles. Quelque fois les medecins quittet bien les malades, qu'ils iuger mortels & incurables: mais c'est d'autant que les parans ou assistans le croyet aussi, & ancor plus fermement que le medecin, donc ils ne se souciet guieres, qu'il continue la visitacion, pour euitier la depance: & sur tout, quand il est expres an commissio a iournees, de sorte que s'il s'an veut aller, il ne le presset d'arreter, ou demeurer iusques à la fin. Et s'il se presantoit a le faire, sambleroit qu'il chercha de la besogne: mesmes que souuāt les parans iettet des mots an auant, que luy font antandre son congé assez honnestement. An tel cas le Medecin est excusable: mais n'ompas s'il est requis de n'abandonner le malade. car il doit ce contantement, & au patient & aus assistans, quand il seroit bien assuré de n'auancer rien du tout.

CHAPITRE NEUVIEME.

Contre ceux qui iugent de la suffisance des medecins, par le succès, qui est souuuent deu a l'esperance, plus qu'au saouir.

C'est grand cas, que la sciencce de Medecine est si obscure & profonde, que rien plus: & neantmoins il n'y ha si idiot, qui ne iuge du saouir des medecins. Pour iuger sainement & iustement de la suffisance de quelqu'un, il faut estre pour le moins de la profession, & y saouir quelque chose. Dont c'est grand temerité, aus gens qui n'attendent rien an la Medecine, d'antreprandre à iuger qui sont les plus sauans medecins. Ils fattendet aus succès de leurs pratiques: & si quelqu'un guerit (mesmes inopinément, comme dessus ha esté dit) on iuge bien souuuent le medecin, ancor qu'il n'y ayt rien fait que valhe. Et au contraire, le medecin ne fait guieres, si le malade meurt, ou s'il traîne longuement du mal, que le vulgaire estime plus legier. Les modestes ne dirôt pas, qu'il est plus ou moins sauant, s'il est reputé doctre antre les gens de saouir: mais ils diront, qu'il

qu'il n'est pas heureux auuers les malades. & par consequant, il n'est bon medecin, iugeans touiours par le succes. Il est vray certainement, qu'an toutes choses y a heur & malheur, & (comme dit l'Italien) *la buona, è la mala sorte*. Et le bon heur au medecin est, de n'estre appellé ou amployé pour ceus qui doiuent mourir. car on n'y aquier point de reputacion, moins de gré, ne d'amitié. neât moins il n'y a que blamer au medecin, & pourueu qu'il ayt bien fait son deuoir il ne doit estre moins estimé, que si le malade fut echapé. Tout ainsi qu'un capitaine, qui aura defandu vne place iusques au dernier effort, ayant mangé tous les cheuaus, les anes, les chiës, rats & chats du lieu assiegé, cuirs, parchemins, & autres mechantes viâdes (comm'o i dit de ceus de Sanferre, an l'an 1573. qui mangearet toute matiere de cuir & parchemin iusques à l'ardoise, de laquelle ils faisoit du pain, je ne say cōmant) ayant perdu la plus part de ses gens, la muralhe toute brisée, & n'ayant plus de quoy soutenir: contraint an fin de randre la place, ne meritera moins de loüange (sinō d'auantage) qu'un autre qui aura sauué la sienne biē pourueüe, & municioneē de tout

tes choses requises, tellemât qu'il l'aura preferuee sans grâd' peine, & sans malaise. Cela est bien facile à comprendre, pour peu qu'on ayt de iugement, & qu'on ne soit trāsporté d'affection: comme est la plus part des hommes, qui an sont aueuglez. dont auient que ils ne se peuuet persuader, n'y auoir de la faute au medecin, quand le malade, qu'ils ont fort cher, ne guerit com'ils ont desiré & esperé. Tout ainsi que il y a toujours quelque ranqueur & mecontantemāt auers le capitaine, ou gouuerneur du lieu qui s'est perdu: comme de n'auoir etē assēs prouoyāt aus affaires du siege, & ce an plusieurs particularités, iusques à vn feu. Et au contraire, celuy est estimé valhant (quand il seroit le plus poltron du monde) qui ha eu bō succes an son antreprinse. C'est vraye mant vn grand bien, que d'estre heureux an ses affaires: mais l'heur n'est pas depandant du fauoir, ou de la suffisance. c'est vn don de Dieu special, que d'estre appellē au secours de ceus, qui doiuet echaper: auers lesquels il veut continuer & effectuer la vertu donnee aus remedes: cōme aussi de n'estre appellē pour ceus qui doiuet mourir, auxquels rien ne vaud ne profite. Dont c'est tres-mal

iugé de la suffisance des medecins, par le suc-
ces, qui est plus deu a l'heur, & à la grace de
Dieu, que, au sauoir de l'homme. Il ne faut
pas toutefois de cela inferer & cōclure, que
c'est tout vn, quelque medecin que l'on ap-
pelle: an disant, que si Dieu veut que le ma-
lade guerisse, il gettera sa benediction sur les
remedes du plus ignorant du monde, & le
randra heureux. Cela est biē vray: mais c'est
tanter Dieu, ainsi que nous auons remōtré
au quatrieme chapitre. c'est comme vou-
loit, que des pierres il fasse du pain: d'un re-
mede mal à propos, vn profitable. On dit
communement, ayde toy & Dieu t'aydera.
Il faut chercher les melheurs moyens, qu'o-
peut, & remettre l'issuē a Dieu, qui ha tout
en sa main.

CHAPITRE DISIEME.

*Contre ceus auxquels tout est suspect: & calom-
niet les medecins, de la plus part des ac-
cidans, qui suruienet es maladies.*

VN des plus grans peines, qu'ayt le me-
decin genereus, & de bon cœur, est de
supporter les reproches & fausses accusaci-
ons

ons des malades, ou des assistans: qui sont si deraisonnables, que tous les accidans qui suruienet au malade, ils les attribuet aus remedes: & des bōs succés, ils doutet s'ils sōt deuz au medecin. Car premierement, quād on voit le malade fort debile, on accuse l'abstinence & la paucité des viures, ordonnée par le medecin: ou ils reprochet la saignée, ou la purgacion, & c'est le mal qui cause la foiblesse, nompas les remedes, qui an diminuant le mal, soutienet le malade an plus grand force. Dont sans l'usage d'iceus, il seroit ancor plus debile. Qu'ainsi soit, ne voit on pas ceus qui meptiet l'astinace, la saignée, & la purgaciō, deuenir ancor plus foibles? Si ceus qui n'uset de tels remedes, se maintenoit an plus grand force que les autres, on pourroit mieus dire, que les remedes sont cause de la foiblesse. mais au contraire, on les voit plus affoiblir, & an fin il an meurt plus que d'autres. Ainsi est il des autres accidans, que l'on impute iniustement aus remedes. comme le vomissement, flux de ventre, degouttement, alteracion, douleurs, velhes, reueries, & samblables: qui suruienet a cause du mal proprement, & de la nature d'iceluy, nompas des remedes, com-

me panset les ignorans. Car si apres que le malade à prins quelque chose, par l'ordonnance du medecin, ou que seullement on la luy ayt appliquée, & que tantost apres il aye vomissemant, ou flus de vantre, cela an est cause, d'autant qu'il ne l'auoit au parauant. Depuis cette medecine, ce syrop, ce restaurant, ce potus cordial, &c. il est si degouté que rien plus: l'alteraciõ le presse plus qu'au parauant. Il est vray que c'est depuis, mais non a cause de cela. & est aussi mal argué, que si on disoit, depuis qu'il ha neigé, ma robbe est plus rompuë qu'elle n'estoit: donques la neige an est cause. ou, depuis que j'ay mangé de ce chappon, j'ay eu douleur de teste, colique, ou flus de vantre: donques le chappon m'ha causé tels accidans. Pauures idiots! tout ce que vient apres, ne procede de tout ce qui ha precedé. Ce flus de vantre, ce vomissemant, degoutemant, alteration, velhe, reuerie, & samblables ont autres causes à vous incognuës, qui produiset tels effets an leur tams: & quoy que sache faire le medecin, rompant le cours du mal, preuenant ses accidans, & les diminuant, an depit de luy le mal fait vne partie de son entreprinse, & s'augmente iusques a certain point

point, qu'on appelle Etat de la maladie. mais cela se fait plus doucement beaucoup, que si on le laissoit faire. Et si l'alteracion, le degoutement, & autres accidans augmentent apres l'usage de quelques remedes bien ordonnés, croyez que c'est du mal, qui passe outre, non obstant ces retranchemans & resistances: & que le mal seroit ancor plus furieux, & lesdis accidans moins supportables, si on n'y eut rien fait: comme l'on voit par experiance, an ceus qui meprisent tels remedes. Car si il est vray, que plusieurs meurent a faute de secours (qui est vne maxime, ressuë de chacun) il faut bien qu'ils aient plus d'accidans, & plus facheus, que ceus qui an echapent. Il ne faut donq' auoir suspects, ou calomnier les remedes, qui aurônt esté suivis de quelques accidans ampirés, ou nouueaus: & dire, depuis ce frôtal il ha moins dormy, ou plus reuë. car le frontal n'an est pas cause, ains le mal qui n'an ha peu estre domté. Depuis le potus cordial il ha eu le houquet, ou la disenterie, ou le spasme. Il est bië vray: mais cette queue, n'est pas de ce veau, comme on dit an cômun prouerbe: cecy est d'un autre tonneau. Je ne dis pas, que les remedes n'an soyent cause quelque fois, d'à: car il y

an ha

an ha de mal ordonnés, & fort mal a propos
mais ie suppose touiours que le medecin
soit docte, diligent, & affectionné, duquel
il faut touiours bien santir: & puis interpreter
an la melheur par ses ordonnances, attribuant
plus tost au mal, ou à l'expres vouloir
de Dieu, que aus remedes, les accidans, qui
suruienet de nouveau, ou qui ampiret. Car
il y a des rancontres inopinez, & qu'on ne
peut aucunement preuoir, pour s'an dōner
garde: comme aucune-fois d'vne fort legiere
medecine, on an viendra iusques au sang:
d'autant que l'homme etoit sur le point d'a-
uoir vn flus de vantre. Le medecin qui ne
peut deuiner, mesmes an vn cors neutre
(c'est à dire, qui ne se tient au lit, pour n'e-
stre guieres mal disposé) si nature fera quel-
que euacuacion d'elle mesmes, cognoissant
qu'il an est besoin, ordōne sa medecine assés
legiere. Il auient là dessus, qu'apres son ope-
racion, nature passe outre, & fait vn flus de
vantre, qui continue desordōnement & ou-
tre mesure: d'autant que la vertu expultrice,
piquée des excremans acres & mordicans,
ne se peut retenir: & la matiere etant cor-
rosiue, racle tellement par où elle passe, que
le sang an sort. Le medicament sera accusé
de

de tout cela, qui neantmoins n'ha fait que deus ou trois petites selles. tout le reste est d'un debordement, & comme torrant des humeurs de long tans accumulez. Ainsi quelque fois, on ne fait qu'arracher vne pierre de la muralhe, & il an tombera plus de deus toises, tant ell'est ruineuse. Il faut à un fort mur le canon, ou double canon : à un mur foible, la piece de campagne fera grand breche. Ainsi pour bien iuger de l'effet du medicament, il faut sauoir la portee, connue du seul medecin : & n'ont pas iuger de l'effet. Car si durant l'operation du medicament, ou par apres, on voit auenir ce qui n'est de la nature, portee, ou force du medicament, il ne luy faut attribuer. Non moins que si un enfant donnoit du poin à un yurogne chancelant, & que soudain il cheut a terre. Ce n'est pas le coup de poin, qui ha eu tant de force, mais le vin qui l'auoit elourdy : dont il alloit tombant, leuant. Toutefois on pourroit repliquer de la mesme comparaison, que samblablement a un malade fort debile, un legier medicament aura la force de le faire trebucher, & aller a terre. Parquoy il vaut mieus faire c'est autre comparaison : comme si on donnoit vne chiquenaude

naude au bras d'une fame anceinte, & que tost apres elle auorta. Seroit ce pour la chiquenaude? Ce ha esté bien loin du ventre, & le coup est trop legier. Il faut donc que d'alheurs elle fut preste & occasionnée d'a-uorter. Ainsi plusieurs choses se rancontret, qui ne sont aucunement dependantes l'une de l'autre, ains cas fortuis, & qui ne sont de la cause preranduë communement.

CHAPITRE VNZIEME.

Qu'il y a plus de medecins, que d'autre sorte de gens.

ON dit, que le Duc de Ferrare, Alphonse d'Este, mit quelque fois au propos familier, de quel metier il y auoit plus de gens. L'un disoit, de courdoüaniers, l'autre de couturiers, vn autre de charpantiers, qui de mariniers, qui de chiquaneus, qui de labourens. Gonnelle, fameux bouffon, dit qu'il y auoit plus de medecins, que d'autre sorte de gens: & gage contre le Duc son maitre (qui reiettoit cela bien loing) qu'il le prouueroit dedans 24. heures. L'endemain matin Gónelle sort de son logis, avec

vn grand bonnet de nuit, & vn couurechief, qui luy bandoit le manton: puis vn chapeau par dessus: son manteau haussé sur les espaulles. An cet equipage, il prend la route du palais de son Excellence, par la ruë des Anges. Le premier qu'il rancontre luy demande, qu'est ce qu'il ha: il repond, vne douleur anragée dedans. Ha mon amy (dit l'autre) ie say la melheur recepte du monde contre ce mal là: & la luy dit. Gonnelle escrit son nom an ses tablettes, faisant samblant d'ecrire la recepte. A vn pas de là il an trouue deus outrois ansamble, qui font samblable interrogacion, & chacun luy donne vn remede. il escrit leurs noms, comme du premier. Et ainsi poursuiuant son chemin tout bellemant, du long de cette ruë, il ne rancōtra personne qui ne luy anseigna quelque recette, differante l'vne de l'autre: chacun luy disant, que la sienne estoit bié eprouuée, certaine, & infallible. Il escrit le nom de tous. Paruenue qu'il fut à la basse cour du Palais, le voyla anuironné de gens (cōm'il estoit cognu de tous) qui apres auoir antādu son mal, luy donnaret à force receptes, que chacun disoit estre les melheures du monde. Il les remercie, & escrit leur nom aussi. Quand il antre an la chambre du Duc,

son Excellence luy crie de loing, Et quas tu Gonnelle? Il repond tout piteusement, & an marmiteus, mal de dans, le plus cruel qui fut iamais. Adonc son Excellence luy dit: He Gonnelle, ie say vne chose qui te fera passer incontinent la douleur, ancor que la dant fut gatée: messer Antonio Musa Brassauolo mon medecin, n'an pratiqua iamais vne melheure. Fais cecy, & cela: incontinent tu seras guery. Soudain Gonnelle iette-bas sa coiffure, & tout son attiral, s'ecriant, Et vous aussi, Monseigneur, estes medecin. Voy-cy mon rolle, combien d'autres i'an ay trouué depuis mon logis, iusques au vottre. Il y an ha pres de deus cens, & si ie n'ay passé que par vne ruë. Je gage d'an trouuer plus de dis mille an cette ville, si ie veus aller par tout. Trouuez moy autāt de personnes d'autre metier. Voyla bien tancontré, & a la verité. car chacun se mel-le de la Medecine, & y a peu de gens, qui ne pāset y sauoir beaucoup, voyre plus que les medecins. Je laisse a-part quelques chirurgiens, barbiers, apoticaire, gardes ou seruātes des malades, sage-fames, charletās, & autres ampiriqs iusques aus marchās qui pour faire qlque professiō d'vne partie de la

Medecine, font des maitres aliborons, cuy-
dans fauoir plus que maitre mouche, faifans
des fuffifans, & se melās de guerir plusieurs
maus, avec vn' assurance effrontée, accom-
pagnée de grandes promesses. le les laiffe
(di-ie) ialoit qu'ils fassent vn beau nombre:
car il y an ha tant & tant d'autres, que c'est
pitié. Il n'y a presque personne, qui ne con-
trole sur les ordonnances des medecins:
qui ne veulhe toucher incontinent le pous
du malade, & voir son vrine: qui n'an die son
auis, & qui n'ordonne à faire quelque chose,
au contraire de ce que le medecin aura dit.
S'il y an ha qui soient mieus auisés an ce fait
là, ie croy que le nombre est si petit, qu'on
auroit fait beaucoup plus tost, d'ecrire ceus
qui ne sont si presomptueus, que de faire vn
rolle de tant d'antreprenuers: chose presque
infinie. Et combien y an ha il de si temerai-
res, qui opineront deuant le medecin (mes-
mes an sa presāce) qu'il faut saigner le ma-
lade, ou ne le faire pas: & quād on le saigne
qu'il ne faut sortir que tāt de sang: qu'il n'est
pas bon de le purger, que la saison n'y est
propre: qu'il le faut mieus nourrir: qu'il luy
faut des restaurās, destils, consumēs, pressis,
coulys, orges mondes, amandrez, &c. qu'o
permet

permet trop ses aises au malade, ou qu'on le
gehenne trop? Briefle grand contrerolleur,
voire le premier & principal iuge de tout,
est le vulgaire ignorât, tres-iniuste & inique:
lequel (comme disoit Terance) n'estime
rien bien fait, que ce qu'il fait. Et si on ne
suit son auis, il attribue la mort du malade,
ou la longueur du mal, à ce qu'on a fait au-
tremât. Car s'il imagine, & se persuade, qu'
il faut ainsi faire, toute autre procédure lui
est erronée: & pourtant il blame tout ce
qu'on fait d'autre sorte. Quelle pitie! Es au-
tres arts, qui sont moins obscurs & difficiles,
où l'on voit presque tout à l'œil, on laisse fai-
re à l'artisan, comme il antand. An la Mede-
cine, la plus occulte de tous, & où le peu-
ple ne peut veoir goutte, chacun veut gou-
uerner comme rats au pailerie. Aussi nous
ne voyons guieres bien succeder, par l'or-
dre de nature, la plus part des maladies, an
personnes d'estat, qui ont grand' visite de
gens. Ceus là guerisset mieus, desquels on
fait moins de conte.

CHAPITRE DOVZIEME.

*Que ce n'est le proffit des malades, d'auoir
plusieurs medecins d'ordinaire: mais
qu'un medecin y doit estre
fort assidu.*

Cette proposicion pourroit estre antan-
duë, de ce qu'auons dit maintenant,
touchant le vulgaire qui fait du medecin:
mais ie l'antans icy proprement, de ceus
qui sont vrayz medecins, & de sauoir, & de
profession. Il est tres-raisonnable & neces-
saire d'auoir l'auis de plusieurs, ez difficultés
& choses douteuses d'une maladie: car (cô-
me on dit cômunement) quatre yeus voy-
ent plus que deus: & c'est, en supposant que
tous soient cler-voyans. Car l'un s'auise d'une
chose, & l'autre de l'autre, que l'on assam-
ble & accorde au proffit du malade. Mais
d'auoir plusieurs medecins d'un ordinaire,
qui ayent egallement soin du malade, ce n'est
pas son proffit. Car à tout propos ils se peu-
uent contredire d'un rien, ou de chose indif-
ferante, l'un a l'auie de l'autre, plus pour
ostantacion, que de necessité. Pline ha
res-bien

tres-bien noté celà an son 29.liure, premier chap. où il écrit: Il n'y a point de doute, que ces medecins, cherchans reputacion par quelque nouuelleté, traffiquet soudain noz ames. De là sont ces miserables contestacions à l'antour des malades, nul etant de mesme auis, affin que ne samble redire. De là est la suscripcion du malheureus sepulchre: *Je suis perdu, d'auoir eu force medecins.* Il signifie l'apereur Adria qui an mourât s'ectia ainsi: la multitude des medecins me fait perir. Or la raison de ce mechef est diuerse: & premierement, de l'auie ou ialousie que l'un porte à l'autre cōmunement, ceus mesmemāt, qui sont plus mal créés, ambicieus, & auares, outre l'ordinaire des autres artisans. Car cela est commun, qu'un potier est auieus de l'autre, ioute l'ancien prouerbe. mais plus sans cōparaizon le medecin, d'autant qu'il vouldroit, qu'on luy defera antierement tout l'honneur d'auoir bien predict, bien ordonné, & guery le malade. Parquoy il ne supporte pas volontiers, qu'on an fasse part à autrui. Je ne parle de l'auare ambicieus, qui est aussi cōmunement quereleus, detracteur, & insupportable, il y en ha de fort modestes: mais ancor sont ils ia-

lous de l'honneur qu'ils estiment leur estre deu:& an ce qu'ils panset pouuoir bien faire d'eus mesmes, comme choses legieres, cōmunes,& ordinaires,ils seroient bien contās, de n'etre contredits: ce neantmoins il consentet & s'accordet au desir & plaisir du patient, ou des siens. Mais ce n'est pas le profit du malade, ainsi que i'ay antreprins de remonstrier. car iasoit que nous posions les trois ou quatre medecins, que l'ō veur assister ansamble a la cure d'vnhomme, estre tous fort modestes, paisibles, & sauans: neantmoins on ne pourra euitier la plus part des inconuenians que ie deduyray, pour les plus ordinaires. Car ie laisse à ceux qui an ont obserué d'autres, à iuger, combien cette fasson est nuisante, ou incōmode aus pauvres patients. Premieremāt, s'il n'y ha qu'vn ou deus medecins d'ordinaire, ils an seront plus sogneus, plus diligens, plus affeccionnés, pour an forrir a leur honneur: & vn qui aura toute la charge sur ses epaules, y fera ancor plus attantif, d'autant quil' ne s'en repose sur personne, & tout doit tomber sur luy. Dont sil ha bon cœur, & est homme de bien, il s'estudiera à mieus faire, que s'il etoit acompagné: supposant touiours (com'il faut) que

an toutes difficultés, il recourra au conseil. Or l'affection du medecin auuers le malade n'est de petite importance, ains si grande, qu'elle merite estre mise au premier lieu. L'autre incōmodité est, que plusieurs medecins mal-aisemant se petuet racontrer, de visiter le malade touiours à mesme heure. car chaqu'un ha des malades apar d'un ordinaire, & d'autres suruenans, & autres menuz affaires: dont on est souuant contraint de fallir a l'heure designée, que tous se doiuet trouuer cheus le malade. An ce cas, le medecin plus ordinaire, ou ceus qui s'y racontret, sont bien ampéchés de dire leur auis, ou d'ordonner sur ce qui sera suruenu: craignant que l'absant ne le trenue pas bon, & que son opinion suruenante ne mette an erreur le malade, ou les assistās: qui voudrōt sauoir par apres son auis, & le luy demander a-part. Quelquefois ce ne sera que d'une cerise, ou autre petit differant, qui de soy ne vaud le parler: mais il faut que tous s'y accordet. Cela tient an peine les medecins, & souuant les malades an andurer. Cōme aussi (pour venir au troisieme point) ils andurer de plusieurs petites choses, que le medecin presant & ordinaire feroit & ordonneroit

2.

3.

donneroit, fuiuant les occasions qui se presentent à tout momant (ie dis petites d'elles mesmes, toute fois reuenantes bien souuant a grande commodité) mais il n'ose, craignant que les autres en foint mal contans. Parquoy le malade passe beaucoup d'ânuis, desquels ils pourroit estre axant : comme d'andurer trop la soif, d'estre tenu trop chaudement, trop pressé de nourriture & de medicamans, & conduit de quelque plaisir & recreation non preiudiciable a la guerison, & samblables. Je me contanteray d'auoir deduit ces trois inconuenians, qui sont ordinaires an la pluralité des medecins : pour montrer qu'il vaudroit sans comparaison mieus, de n'auoir qu'un medecin, & qu'il fut assidu. C'est le plus grand heur que puisse auoir le malade, d'auoir un bon medecin, qui ne bouge d'aupres de luy an suiuant le conseil de la sapiance de Iesus Fis de Sirach, lequel nous auons recité au premier chap. de celiure. Car d'une visite ou deus par iour, le malade n'est bien pansé, cela se peut dire, de gros an gros, & non exactemât: veu que le medecin presant obserue plusieurs particularitez, qui luy font changer d'auis d'heure a autre, tant sur la norriture, que sur autres

remedes.

remedes. Parquoy Celse dit tres-bien, où il remôte de quelle diligēce doit vser le medecin, pour ordōner biē iustemāt des viures quāt aus heures, & mesure d'iceus qui est vn des plus grās pōins an toute la curaciō: car, cōm'il escrit, la viāde biē à propos, est vn tres bon remede & medicamāt, il faut touiours obseruer, & par tout, que le medecin assistāt s'auise continuēlle māt des forces du malade & tant qu'elles serōt bōnes, il vse d'abstināce, quād il cōmāce à se douter de la foiblesse, il le secours de viāde. Car c'est sō deuiroir qu'il ne sur-charge le malade de matiere superflue, qu'il ne trahisse pas aussi la foiblesse à la faim, &c. De quoy on peut antādre que plusieurs ne peuuent estre pāsés d'vn medecin: & q̄ celuy (s'il antād biē son art) est biē propre, qui ne desapareguieres le malade. Mais ceus qui sont adōnez au gain, d'autant qu'il y a plus à gagner sur la multitude du peuple, ils ābrasset volōtiers les reigles qui ne requieret grād curiosité: cōme an cecy. Car il est biē aysé de cōrer les iours, les heures, & les acces, mesmes à ceus qui ne voyet souuant le malade. Il faut celuy estre assidu, qui doit voir ce qui est seulemāt de besoin, & quand le malade sera trop foible, s'il ne

prād nour-

nourriture. Voila cōmant il est de tres-grād importance au seruicé du malade, qu'il soit touiours assisté d'un bon medecin, & pour son regime, & pour l'vsage des remedes. car etant presant, il auancera ou retardera, augmentera ou diminuera, & fera plusieurs choses d'autre faſſon, que s'il ne voit le malade sinon par longs interualles, cōme on le pratique sur le peuple. Dont il vaudroit mieus auoir vn medecin, qui eut vn peu moins de suffisance, ou de reputation (& par cōsequēt moins de presse) qui fut plus frequant & assidu. Car la diligence, vigilance & curieuse obseruatiō du medecin ordinaire, peut bien contrepeser vn plus grand fauoir, qui n'est pas ainsi amployé par le menu.

CHAPITRE TREZIEME

Contre ceus qui se plaignet, de la courte visitacion de quelques medecins.

NOtre vie est pleine de cōtrarietés, ainsi que Democrite remontroit à Hippocras, au deuis qu'ils eurent ansamble: comme ledit Hippocras escrit à Damagete, en ses epîtres.

epitres. Car ce que nous plait maintenant, nous deplait dans vn'heure. Le laboureur veut estre soldat, & an peu de tams reiette sa premiere condicion. Le marchant fait du gentilhomme: & bien tost apres retourne à sa marchandise. Mais la cōtradiccio est ancor plus decouuerte, quand on veut an vne mesme chose des contradictoires: comme d'estre gendarme, & n'estre tenu à la guerre: d'estre grand terrien, & n'estre suiet a proces: d'auoir beaucoup de valetz & chambrieres, & ne pouuoir estre derobbé: viure dissoluëmant, & ne venir point malade. Ainsi est il de plusieurs, qui veulet auoir des medecins les plus ampressés, & qui ont plus de pratique (de quoy le vulgaire fait iugement, qu'ilz sont le plus sauans: cōme le plus souuant il auient, nompas touiours) & soudain ilz se plaignet de leur courte visite, & de les auoir si peu aupres d'eus. C'est vne plainte qu'on fait communement des medecins de Paris, les plus fameus: lesquelz an si grād ville, ont tant de malades ordinairement, qu'il est impossible du tout, qu'ilz puissent arreter longuement aupres d'un chacun. Car si vn medecin ha à voir deus fois le iour vint malades, n'est ce pas beaucoup, qu'il demeure

aupres de chacū vn quart d'heure à chaque fois ? Il ne peut faire d'auātage. Car au plus lōg iour, qui fera de 16. heures, ie veus qu'il cōmāce sa visīte a cinq heures du matin, & la cōtinuē iusques a dis: puis recōmāce a midy, & la continuē iusques a cinq du soir. Voyla dis heures qu'il amploye à visīter. Il luy faut biē le reste pour sō repos: cōme de 10. à 12. pour son diner, & raffraichissemant. de 5. à 7. de mēme au soir, & puis sō dormir an repos: car s'il ne cesse iour & nuit, il est impossible de durer lōguemāt. Ie veus ancot dōner sis heures au matin, & sis apres diner. car l'aller d'vne maisō a lautre, mōter & deffandre les degrés, importe bien de deus heures sur la visīte de 20. malades: mēmes qu'on ne va pas an poste par ville, & qu'an æté (lors des grās iours) la viteffe & mouuemāt est dāgereuse d'echauffemāt, sueur, alteraciō, & autres tels accidās. Restet donc anuirō dis heures toutes nettes, q̄ le medecin sera aupres du lit de ses malades, pour le plus qu'il y puisse amployer. Et que reuient cela a chacū de vint? Si ie say biē cōter, c'est a chacun vn quart d'heure le matin, & autāt l'apresdinée. Or ilest certain q̄ les plus fameus medecins, auront tel iour à visīter plus de 30 malades:

& outre

& outre ce à faire des consultations, où l'on est contraint de sejourner beaucoup plus qu'à vne simple visite. Dōt il s'ensuit necessai remāt & ineuitablemant, q̄ chacune des autres visitacions ne seront d'un demy quart d'heure. Car il faut cōtāter chacū, & de ce luy qui se depart à plusieurs, chacū an ha biē peu. Ainsi le medecin ne fait qu'ātrēr & sortir, s'informe an courant de l'etat dumalade, touche le pous, voit l'vrine, dit vn mot de ce qu'il faut faire: & deuāt, à vn autre. On ne le peut redarguer iustemāt de la celerité, & sōmaire visite, puis qu'il ne luy est possible de faire autremāt, & ceus qui les appelle, an sont biē informés. Que plus est si le medecin repōd quelque fois, qu'il n'y peut vaquer, veu le grād nōbre des malades qu'il ha à secourir, on luy replique, Mōsieur, vous n'y faies qu'ātrēr & sortir: le malade pāsera estre guerry seulesmāt de vottre veuē. qu'il vous voye vne fois le iour an passāt, il est tout satisfait. Autāt an dit vn autre, & le tiers, & le quart, q̄ feries vous là? Mais dira quelqu'un: si faut-il auoir regard à la qualité des personnes, & s'arrester plus longuemāt au-pres d'un grād seigneur, euesque, abbé, conte, barron, presidant, conseilher, tresorier, general des finances,

ses, & autres gens d'honneur, qui ont de quoy le recognoitre & recompanser mieus que de l'ordinaire des autres. On repond à cela, qu'il faut bien faire son deuoir auuers tous, & s'aquiter fidelemant de sa charge : & que an outre, il y an ha de plus reCOMMANDÉS, comme les proches parans, les alliés, amys, familiers, & ceus auquelz on ha quelque grád'obligation. Ceus là de vray, selon les sans & iugemant humain, doiuet estre preferés aus autres, quelque grade & ranc qu'ils tienet : & ceus desquelz on ne prend point d'argent, a raison de la fudidte obligaciõ, requieret iustemant du medecin plus de soin & diligence, que ceus desquelz on attend recompance. Dont ce n'est peu de chose, d'auoir obligé a soy, & bien affectionné vn docte & prudât medecin, qui aura touiours plus d'egard a l'amitié, qu'a la grandeur. Et quoy? la plus part de ces grans ne cognoissent le medecin que de renom, & sont ancor moins cognus du medecin. N'estant la cognoissance reciproque, & n'y ayant familiarité, amitié, ou quelque obligaciõ mutuelle, ce medecin ne luy sera pas plus propre qu'un autre, lequel ayant moins de presse le pourroit mieus secourir, & de plus près.

Mais

Mais on est ainsi passionné, qu'on veut celuy qui est plus en vogue: & chacun le voudroit tout auoir: qui est proprement vouloir l'impossible. E puis on se plaint de la courte visite. Si vous dittes, ie ne suis pas des moindres, & i'ay aussi bien de quoy payer qu'un autre: il y en a ha cét, qui dirôt tout de mesme. Que pourra faire le medecin, sinon departir les visitacions en tant de pieces, que chacun en ayt un peu? Mais il reseruera toujours les plus longues, à ceus qui l'ont obligé, & auquelz il est redeuable, comme la raison & l'humanité luy commandet. Parquoy il vaudroit mieus, que chacun fut bien aisé de vouloir ce qu'on peut auoir: c'est un medecin aisé a recouurer, d'autre ceus qu'on estime saufs, & n'ont tant de besogne, pour ce que leur saison n'est ancor venue, etans postposés aus autres, qui sont de plus longs tans. Et si il y a quelque difficulté en la maladie, on peut faire cōsultier là dessus. Croyés que si le medecin ordinaire, qui fait la consultation, est habile homme, il antandra bié tost, & a peu de paroles, ce qu'il faut: puis il l'exequutera, ainsi qu'il appartient. Voila le meilleur aui que puisse prandre un malade, de quelque qualité qu'il soit, pour estre bié

secouru. & si l'on hait le moyen d'entretenir
pres de soy du tout le medecin, & qu'il n'an
bouge que bien peu, ce sera ancor mieus
pour luy, suiuant ce que i'ay discoursu au pre-
cedant chapitre.

CHAPITRE QUATORSIEME

*De combien sert la confiance du malade au
medecin.*

Quelqu'un pourroit auoir mal antan-
du, ce que i'ay deduit au prochain
chapitre: comme si ie reprenois l'affection
que plusieurs ont, d'estre visitez des mede-
cins plus fameux, & qui pour leur grand' re-
putacion, ont plus de presse ez bonnes vil-
les. Ia à Dieu ne plaise que ie le fasse. ie fe-
rois tott aus venerables & rares personna-
ges, qui de leur merite ont acquis ce grand
bruit: & ferois tort aus malades, si ie leur
persuadois de n'y auoir affecciō, & recours
a la guerison de leurs maus. Car au cōtrai-
re, si on an peut iouir plainement, & tant
que besoin est, ils sont les plus propres du
monde. Le n'ay taxé que la plainte vulgaire,
de ceus qui à tort se meccōtantet d'eus, pour
n'an

n'an pouuoir iouir com' ils voudroint. Je dis
touiuors, qu'ils sont les plus propres du mō-
de, quant à eus, & pour leur egard. C'est,
que volontiers ceus qui ont telle reputaciō,
& sont de grand' requeste, sont aussi des
plus sauans & experts, heureux an leurs pra-
tiques, & agreables aus malades. car autre-
ment leur vogue n'est de durée, & leur re-
putacion mal fondée, s'an va bien tost an fu-
mée. Ainsi quant à eus, ils sont fort propres,
aptes, & idoinés, a panser des plus grans
maladies, & ez plus dignes personnes. Ils
ont aussi par cet egard de reputacion, & pre-
mier ranc entre les medecins, plus d'heur a
guerir les malades. Car l'opinion qu'on an
ha conceuë, donne certaine confiance au
malade de guerir mieus, & plus seurement
par leur moyen, que des autres. Dont nous
disons communement an noz ecolles, *celuy
guerit plus de malades, à qui plusieurs se fiet.*
Et c'est, de la forte imaginacion, qui ha tres-
grand pouuoir à faire impressiō an nous;
cōme i'ay suffisammāt demōtré a la p̄face
du segond liure du Ris. C'est vne puissance
de l'ame, qui emeut fort le sang & les esprits,
de forte, que si elle marche avec vne ferme
opiniō & cōfiance, les forces de nature s'af-

samblent pour combatre le mal .Et pourtāt on voit de grans changemens au malade , à la seule arriuee du medecin deuotemāt a t-
 randu. Car le desir & l'esperoir etans satisfaits, l'ame se reueille, & ranforce cōtre le mal: tel lemant que bien souuāt nature fait quelque braue sallie & effort, chassant la matiere du mal impetueusemāt, par vne crise qu'on appelle. Au contraire, si le medecin n'est fort agreable au malade, lequel ne se voit secouru ainsi qu'il desireroit, tel medecin n'auancera pas guieres: & le malade se contristant & decourageant, deuiēdra plus debile qu'il ne feroit. car ses esprits etonnés, n'ont point de vigueur, pour la crainte & defiance qui ha saisi le cœur. Il y a vn autre bien, qui reui-
 ent au malade, d'auoir vn medecin à sa deuociō, a son gré, & souhait, duquel il espere grand secours. c'est, qu'il s'accommode volontiers a tout ce que luy est ordonné avec vne fiance que tout le doit guerir & solager. Comme au cōtraire, il prend d'vn autre medecin tout à dedain, & a regret: dont il luy profite peu, ou rien. Car quand ce seroit la melheur & plus delicate chose du monde, si on n'an ha bonne opinion, l'estomach s'an fache, & n'an fait si bien son profit, que si el-
 le etoit

estoit prise avec gayeté de cœur. Le vin, le boullhō de chapon, la chair de perdrix, sont tres-bons alimens, delicats & frians : mais si quelqu'un en vsoit a regret, avec mauuaise opinion du sommelier, ou du cuisinier, qui ne fussent agreables, cela ne feroit point de bien en vsant contre cœur. Que sera ce des choses qui sont de soy mal plaisantes, & qu'on abhorre naturellemēt, cōme les medecines, & autres drogueries? Il faut en outre, que le malade endure plusieurs facheries, esquelles il sera beaucoup plus impatient à son preiudice, s'il n'a grand'opinion du medecin, & confiance en luy. Car il sera pour un tel, ce qu'un autre n'aura credit de luy persuader. Donques ce n'est en vain, que les pauvres malades requierent ceus qui ont grand reputatiō, & desquels communemēt on a bōne opinion. car tels ont plus d'efficace en leurs procedures & ordonnances. Mais il ne se faut tant affeccionner à ceus qu'on ne peut auoir, qu'on n'ayt point d'affeccion aus autres : ains il en faut choisir pour second & troisieme lieu, auxquels on s'adresse à faire des premiers. Et lors qu'on appelle quelqu'un de ceus-ci, il faut remettre toute sa fiance, esperance, & affeccion en eus, sans plus desirer

rer les autres : & esperer sur tout an Dieu, qui donne vertu aus remedes selon son bon plaisir. Tout ainsi qu'an mariage, les filles fouhaittet estre logées an grans maisons. Si elles n'y peuuet auenir, il faut que se cōtentet des moyennes: & que mettet desormais tout leur amour & affeccion, au mary qui leur echet. Et Dieu leur peut donner autāt ou plus de bien & contantement, avec les petis compagnons, qu'avec les plus riches du monde. Ainsi on fait vn bon menage: autrement rien que valhe: cōme le medecina l'ādroit du malade, qui n'y a point d'affeccion, & an desire vn autre,

CHAPITRE QVINSIESME.

Contre ceus qui veulet des medecins, & ne font ce qu'ils ordonnet.

DES malades qui appellet le medecin a leur secours, il ya diuers humeurs. Les vns veulet force remedes & an grād diuersité: iamais ne sont assez drogués. les autres au contraire n'an veulet point, mais seulement vn bon regime, & estre bien nourris. Il y an ha d'autre deus, qui refuset toutes choses par dedans, & ne s'accordet que aus applications tant qu'on voudra. Aucuns acceptet tout, excepte les clysteres. J'ay veu, quelquefois à Narbonne vn gentilhomme

Venicien, ambassadeur de la Seigneurie: qui disoit a propos des medecins, que quand il est malade, il les croyt bien aus negatiues, mais nompas aus affirmatiues. C'estoit vn bon velhard, galhard & ioyeus, qui reuenoit d'Espagne, ayant accompli le terme de sa legacion aupres du Roy Philippe. Il interpretoit les negatiues, ce que les medecins prohibet: comme ne boire point de vin, ne manger du fruiçt, ne s'euâter, & semblables. Et les affirmatiues, comme de prandre medecine, clysteres, iuleps, & autres choses qu'on ordonne. Voila vne belle proposiciõ, laquelle plusieurs pratiquet a leur ttes-grãd dõmage. Car ils veulet bien des medecins, mais cherchès qui fera ce qu'ilz ordonnet. A peine se cõtienet ils dãs les bornes de ce Venicien, qui a u-moins veut abstenir dece qu'õ luy defãd: & la plus part de noz malades veulet tout le cõttaire: q̃ sert il d'auoir le medecin, si on n'est resolu d'accõplir & equuter son cõseil, pour la deffâce de sa vie? Quel secours peut il dõner, si on ne veut qu'il vie de ses armes? C'est cõme vn qui seroit tõbẽ dans vne fosse, & implorât vostre aide, vous tiẽdroit les mains liẽes, ou ne permettroit qu'elles fussent amployees a sõ secours. Aucuns repondet, que la presãce du

medecin les console, reiouyt, & donne plus de courage: dont ils fantet le mal amoindrir, & leurs forces augmanter. Il y an ha qui diset, ie fais quelque chose de ce que le medecin me conseille, au-moins des viures & du regime: mais des drogues, ie n'an puis ouïr parler. C'est tout de mesmes, que si les gens d'une ville assiegee appelloient quelque bon capitaine à leur secours & defance: auquel etant venu, ils ne volussent obeïr, ny accôplir ses ordonances: disans, qu'ils se contantent de sa presance, & qu'ils an sont fortifiés: ce leur suffit, qu'il donne ordre aus viures, & a la police. car quant à combattre, & tirer arcbusades, ils n'y veulet antandre. Et qu'est cela, sinon se moquer du metier (côme l'on dit) & se perdre a credit? Je n'oserois pas dire que c'est vne folie, si l'Ecclesiastique ne me l'auoit anseigné, disant, que l'homme sage n'aura la Medecine an horreur. Mais cela est tant facheus à prandre? Il est vray, & Dieu l'ha ordonné ainsi pour combattre le mal. Car comme la santé est agreable, on la traite de mesme, de choses agreables: & côme le mal est facheus, on le traite de choses facheuses. Il est bien vray, qu'il faut estre gracieux aus malades, & ne les traiter rudement, ou

(com-

(comm'on dit) rhabarbatuement . Car le mal est si ennuyeux, qu'il fait refuser beaucoup de choses:& on peut dispenser de plusieurs, ou les diuersifier en formes plus agreables. Peut estre que le mal en sera plus long: mais la plus part des malades ayment mieus cela que d'estre fort pressé & comme importuné de remedes . Quelques vns disent au Medecins à ce propos:ayes patience, ie l'ay bié. Et de fait plusieurs ayment mieus estre gueris en plus long tans par medicamans, que par chirurgie en peu de iours. Et Galé nous cōselhe, de le proposer au choix des patiās. Touttesfois, en ce qu'on ne peut dispenser, & qu'il n'y ha autre remede qui puisse estre amployé bien a propos, & mēmes que l'occasion fort soudaine le requiert il faut protester contre le malade, des incōueniās qui en pourroient auenir: afin que ne soit reprochee au medecin, vne indulgence dommageable, ou ignorance, ou infidelite. Dōques ce n'est pas sagement fait, de ne s'accommoder à tout ce que le medecin ordonne, sans mespriser aucune chose. Car bien souuent a faute d'une obseruacion, qui semblera petite, le mal ampire iusques a la mort. Tout ainsi qu'une ville se perdra quelquefois

fois, à faute d'une sentinelle, ou par le moyen d'un petit trou, qui sembloit n'estre point d'importance. Faut il plus qu'une scintille de feu, pour anflammer tout un pallier, & de là toute la maison, & d'une maison tout le bourg? D'une petite faute, soit un excès, ou un défaut, il s'ensuit bien souvent un grand desordre. Et que auiendra il à ceus qui mesprisent le conseil du medecin, quand nous auons souvent beaucoup à faire de sauuer ceus qui font tout ce que nous voulons? Ils me font souuenir de ce que Celse escrit: Les hommes intemperans (dit-il) donnent aus medecins les heures du manger: les autres au contraire, ranuoyent les heures aus medecins au don, se reseruant la quantité à eus-mesmes. Ceus pensent faire bien liberalement, qui delaissant au vouloir des medecins les autres choses, sont libres en l'espece des viandes. Comme si on demandoit, qu'est-ce qui est permis au medecin: & non pas, qui est salutaire au malade: auquel il nuist grandement, toutes & quantes fois on peche au tans, ou en la quantité, ou en l'espece de ce qu'on prend. Et de fait il vaudroit presque autant, n'vser point de la Medecine, si on ne veut faire tout ce qu'il appartient. Car beau-

coup de remedes peuuet nuire, si on n'vse tout le reste qu'ordonne le medecin. Il aduient communement à ceux, qui sont tant difficiles, qu'à la fin ils veulet tout, lors que les moyens ne sont plus de saison, & ne les peuuet ampecher de mourir, comme ils eussent bien fait au parauant, moyenant la grace de Dieu. Tout ainsi que les assiegés, qui ont esté frois d'ampremier à se bien defendre, & amployer tous leurs moyens, epargnans leurs coittres, balles de laine, caisses, & autres meubles a ramparer, leurs viures & argent à bien traitter les soldats, leurs armes & personnes à combatre valhammant: an fin quand se voyet forcés, ils presantet saques & bagues, iusques à leurs antralhes, pour se sauuer; mais il n'y a plus remede qui leur serue, trop tard s'auiser les Phryges, comme dit le prouerbe. Pource donc, chacun se propose des le commence-
 mant, de faire volontiers ce que le medecin conseillera, & ordonnera, sans aucune restriction ou distinction d'affirmatifs, & negatifs: & ancor pour Dieu soit, si on en echappe à tel marché.

SEIZIEME CHAPITRE.

*Contre l'absur de ignorance de ceus, qui
croyet tout au medecin, fors an la
quantite des viures.*

IE ne puis assez m'esbayr, commât le vulgaire est si stupide & fad, qu'il croit les medecins, & se remet du tout a eus en choses plur difficiles, & de tres-grand importance: & leur est retif ou cõtredisant ez choses fort aysees & plus legieres. Car s'il est question de la saignee, ou de la purgatiõ, & (que plus est) des incisions, cauteres & autres grands remedes (voyre extirper quelque membre) on y consant, & pour soy & pour les siens, sans resister aucunement a ce qui an est aui-sé par vn ou plusieurs medecins. Mais quât aus alimens, il y a bien a contester, nompas touchant la qualité (qui est ancor le plus important & difficile: de quoy toutesfois le vulgaire n'entreprant contre, ou par dessus le medecin) ains la quantite: de laquelle les idiots se font acroyre, & an sont maitres, an depit du medecin. Car a leur dire, les malades ne sont jamais suffisamment nouris, &

meuret

meurent presque tous de faim. Il est bié vray, que s'ils mangeoint tousiours, ils ne mourroint iamays : mais le manger trop souuant & trop a la foys, an tuë la plus part. Quant ie dis manger, j'antàs prandre nourriture, soyt an machât, soit an humant, ce m'est tout vn, pourueu que nourriture antre dans l'estomac. Et n'est ce pas grand pitie, que les medecins ne soient crus an cela, qui est le plus aysé a antandre, auxquels on accorde tous autres poins? S'ils prenoient a pânson les malades, on pouroit soupçonner, qu'ils les nourrisset a la legiere, pour epargner, & gagner dauâtage. Mais puisque il ne coute rien aus medecins, que leur importe il si le malade mange tous les iours dix chapons, ou an prenne la substance? sinon que cela reuenant au dommage du patiât, ils an sont maris, ne desirans rien plus que d'auoir hôneur an leur procedure. Pansés vous que le Medecin, qui antant tous les poins de la curacion, iusques aus plus difficiles, n'antâde aussi la quantite conuenable des alimens? Pour quoy ne l'an croit on? Si on ha opinion qu'il ne l'antand pas bien, on ne le deuroit croire aus choses plus abstruses & ardues, ains le rejeter comme ignorant, & qui sait moins
que

que les fames. Encor plus, si on cuide qu'il entand bien la deuë quantité, mais que a son eciant il affoiblit le malade, ou pour le tenir plus long tams (& par consequant an tirer dauantage) ou pour se faire plus estimer, quād il l'aura depuis releué de fort bas. Car il seroit fort mechant de hazader ainsi la vie du malade, comme i'ay remontré au troiesme chapitre: & j'estimerois bien fol, quiconque ayant telle opinion de luy, l'employeroit à son secours, & des siens. Mais au cōtraire, je suis bien assuré, qu'il n'y a medecin au monde, qui ne fut tres-joyeux que ses malades guerisset dans trois jours, voire aussi tost qu'il les auroit touchés ou regardés: & qu'il peut remedier à tous maus par la seule nourriture & grād' chere, epargnāt toutes drogues. Bon Dieu que tel medecin auroit de presse! il gagneroit plus an vn jour, que les autres an tout vn an, quand on fauroit qu'il guerist plu-tost, & que les cuisiniers, sont les apoticaire. Donques c'est vn grand abus, d'antreprandre a contester ou resister au medecin, qu'on estime sauuant, prudent, diligent, & de bonne conscience, qui an outre ay me le proffit du malade,

lade, & desire auoir honneur an son fait: ie dis contester & controroller, tant an autres affaires, que an la quantité des viures, qu'il doit fauoir estimer selon la grandeur du mal, & la force du patiant. A quoy le vulgaire n'antand rien, & neantmoins ontrecuidé panse mieus sauoir que tous les medecins du monde, combien de fois le jour, & a quelles heures, & combien à chaque fois il conuient donner au malade. De tout le reste, on croit assés le medecin. On ne me peut icy obiecter, si non que le medecin n'est pas toujours presant: dont il ne se peut aduiser si bien que les assistans, de la foiblesse du malade, requerant nourriture & refection. Laquelle obiection auroit quelque lieu, si on n'importunoit de mesme contradiction les medecins presans & Cliniques (c'est à dire, qui ne partet d'aupres du lit) expres & ordinaires à vn certain malade, cōme quand on est aus champs an pratique, logé cheus le malade, qu'ils voyet tout le long du jour, & plusieurs fois la nuit, s'il est de besoin: auxquels toutesfois on ne fait moins de instance, que aus autres: mesmes ils sont pressés & so-

& sollicités a toutr' heure d'accorder du
 boullhon, orgemonde, coulys, restaurant,
 distil, &c. pour ne laisser iamais l'estomac,
 en repos. Quant aus autres, qui ne visitet le
 malade, que deus ou trois fois le jour pour
 le plus, il est certain qu'ils ne peuuet si iu-
 stemant limiter la quantité des viures, & les
 heures des repas. C'est proprement é celuy
 qui assiste, ainsi que Celse amonestre tres-
 bien, disant: Il faut toujours & partout ob-
 seruer, que le medecin assistât regarde coup
 a coup aux forces du malade: & tant qu'el-
 les seront puissantes, combattre le mal par
 abstinence. s'il commence a craindre la foi-
 blese, qu'il luy subuienne de viures. De
 quoy on peut antâdre, que plusieurs ne peu-
 uet estre pensés d'un medecin: & que ce-
 luy (sachant son art) est propre, qu'il ne s'elo-
 gne guieres du malade. Mais ceus qui seruet
 au gain, par ce qu'il est plus grand du peu-
 ple, embrassent volôtiers les preceptes, qui
 ne requieret sedulité, comme an ce fait icy.
 Car de comter les jours, ou les acces, il est
 aisé mesmes à ceux qui voyet peu souuant
 le malade. Il est necessaire que celuy soit
 assistant, qui doit voir ce qui est seulemant
 requis, quand il seroit trop foible s'il ne
 prend

grand nourriture. Mais comme que ce soit, le prudent & sauant medecin, qui visite vne ou deus fois le iour ses malades, considerât bien la nature du mal, & les forces du patient, ordonnera beaucoup mieus la qualité des viures, que la plus sauâte (ou pour mieus dire) la plus outrecuidée & presumptueuse, simple fame du monde. Et s'il auient ou echet quelque incidant incognu au medecin, qui semble requerir plus grand nourriture qu'il n'a ordonné, il ne faut que l'an- uertir & il y pouruoyra. Ou bien si on ha outrepassé son ordonnance, pansant mieus faire pour quelque occasion, au moins qu'on ne le cele au medecin, pour antâdre de luy, si an semblable cas on doit continuër, ou bien faire autrement. Car si le medecin ignore quelque chose de ce qu'on ha faict au malade, sa procedure n'aura si bõ succès, d'autât qu'il tire d'un couté & les autres d'un autre. qui est souuant la cause, que le medecin est frustré de l'esperance qu'il ha eu, & donné au malade ou a ses familiers. Car les fames bien souuant nourrisset au desceu du medecin autrement qu'il ne conseilhe ou cuide; & non seulement an quantité, ains aussi an qualité. Et puis, si la guerison s'an

ansuit, elles gazoulhet faut pas dire com-
mât, & se vantet sans vergogne, q̃ le malade
fut mort, si elles eussent creu le medecin. Les
pauures fottes & folles temerayres, ne cog-
noisset pas que le malade an fut plu-tost gue-
ry: & qu'elles l'ont mis an danger de mou-
rir: tellement que si Nature n'eut eté assez
forte, pour resister a leur desordre, le patient
fut demouré sous la charge. leur importu-
nité est cause, pour certain, de la longueur
de plusieurs maladies (ie ne dis pas de la
mort de plusieurs, pour ne les dire homici-
des) de ce qu'il faut tant souuant repurger.
Car ceus qu'õ nourrit trop, accumule et for-
ce excremans, qui mettet les maladies an
longueur, & cōtraignet les medecins a fre-
quante purgacion. Elles panset fortifier les
malades par beaucoup de nourriture: & not-
tre Hippocras leur dit, tant plus on nourrit
vn cors mal net, tant plus on l'offance: &
que la viãde a celuy qui ha fieure induit foi-
blesse. Mais quoy! elles cuident fauoir plus
an cela, que tous les medecins qui furet ia-
mais: & quand Aesculape reuiuroyt, on le
croyroyt de tout, sinon de la quantité & des
heures de la nourriture. dequoy les fames
ont vsurpé la cognoissance, haute iurisdic-
tion, &

Liv. 2. "
Aph. 11.
Liv. 7. "
Aph. 69.

on, & dernier ressort. Dont qui leur veut estre agreable, & attirer force pratiques a soy, il faut que soit auocat ou procureur de leur Cour, & qui plaide toujours pour les depans. Tels medecins fort populaires, sont estimez les plus suffisans, & renommez pour amys de Nature, n'etans jamais soupsonnez de la mort du paciant. Car le vulgaire ha moins de regret, a la mort de ceus qui ont ete amplemant nourris, & fort potages: comme si c'estoit le seul, ou principal moyen, d'arreter l'ame dans le cors. Aussi quand on leur parle de faire des consommez, coulys, pressis, gelée, destils, ou eau de chair, restaurans, & autres choses bien nourrissantes (incognues ou inusitées aus anciens, toutes-fois peres de la Medecine) elles dresse l'oreille, & sont fort promptes a l'exequucion. Mais de malheur, elles ne se contentent d'avoir en main des alimens si ayse & delicats, qui en petite quantité nourrissent & subsistent inestimablement la personne debile & qui digere mal. Elles veulent outre ce, que le malade en prene a toutes heures, & bonne quantité: de sorte que dans

vint & quatre heures on luy donnera toute la substance de trois ou quatre chapons. N'est-ce pas vn grand excès, & euydant abus de telle nourriture, laquelle on 'ha inuanté pour ceus qui ont l'estomac fort debile, & auquelz il ne trauaile moins a digerer ce peu de consommé, coulys, pressis, & cet. qu'il faisoit an fanté a digerer viandes solides an bonne quantité? Dont il n'en faut donner beaucoup a la fois, ne si souuét, affin que l'estomac an fasse son profit. autrement tout se corrompt par ce qu'il y an ha trop, ou a faute de loisir. Et ainsi le cors frustré de bonne nourriture, s'affoiblit touiours d'auantage, & le mal gagne le dessus. Tout vn chapon, avec vne ruelle de veau, ou braslet de mouton, est reduit a vn' ecullée de boullon consommé ou d'vn distil. Le malade fort delicat & foible, n'ha il pas assez de la moitié pour vne fois, & de la a six heures de l'autre? N'est-ce pas autant que s'il māgeoit a chaque fois demy chapon, & du veau ou mouton an proporcion? Il n'y a rien a dire, que le marc ou trasse de la chair, qui deuendroït fiante, & yroït au retrait. Cela an est rabbatu & séparé, pour ne trauailler: qui ne ressoit an cette procedure que le suc nourrissant

rissant, & qui se doit conuertir an louables humens, pour alimant de tout le cors. duquel suc toutesfois, il n'est pour lors moins ampeché a le bien digerer, qu'il seroit an sa pleine force a cuire la chair d'un dimy chapon. Voyla pourquoy il luy conuient donner tel loisir a profiter cela, que requiert sa foiblesse. Autrement il se trauaille an vain, & la viande ainsi delicate se conuertit a ce excremât par crudité: dequoy le mal est antretenu, & il ne faut iamais faire autre chose que purger & repurger le cors. Donques les fames soient aduerties pour vne bonne fois, de croire & obeyr aus medecins, non moins an la quantité des viures, que an la qualité, & tous autres chefz de la curacion: veu que c'est vn point que le medecin ne peut ignorer, pour peu qu'il antande an son art. & il n'y a medecin si frasqueus & malheureus, qui ne veulhe auoir honneur a ce qu'il antrepren.

CHAP. DIS ET SETTIEME.

*De ceus qui an leurs maus ne veulet aucun
medecin ou remede, sinon contre
les douleurs,*

J'Ay retenu ce propos d'un gentilhomme de Viuares, qui aymoit fort ses plaisirs. Il ne faisoit grand comte des maus, qui estoient sans douleur : & estimoit que les remedes y seruoient de bien peu, ou rien, cōme s'il estoit necessaire, que le mal fit son cours : & quoy qu'on y fit, la maladie passeroit ses quatre tams, si ell' estoit guérissable : & si ell' estoit mortelle, il n'y auoit aucun remede, qui sont propos erronées, fondés sur des erreurs cy deuant refutés. An somme, il ne vouloit point de medecin, ny de medicamans, que pour luy oter les douleurs. Mais s'il fut tombé an paralyfie, qui est mal sans douleur, ie croy qu'il eut bien voulu y remedier par medecine. Et quant aus maus douloureux, il faut antandre, que la douleur n'y est le principal (ia soit que de grand' importance) & qu'il faut oter le mal d'où la douleur procede, si on veut bien faire besognes. Car si on
s'amuse

s'amuse simplement à la douleur, & sa cause est mesprisée (qui est le mal, source, racine, & mere de la douleur) il n'y a que deus moyens. l'un par medicamans anodyns, qui diminuēt la douleur aucunement, & font que la partie supporte le reste plus paciāmant. l'autre par medicamans narcotics, c'est a dire stupefians, qui endormet le membre, an etonnant la chaleur naturelle. dont il n'an faut vser qu'a vne extreme necessité, & prudemment. Mais tant les vns que les autres, ne font passer ou amoindrir la douleur, que pour un tans. Il faut toujours reuenir a la curacion du principal: autrement c'est a recommencer. Et que noz remedes ne seruent a oter le mal, qui est sans douleur, ou qui cause douleur, c'est la plus grād'fausseté du monde: comme i'ay suffisamment remoutré cy dessus, ou i'ay ranuersé ce propos, que les medecins sont inutiles, & ne font qu'abuser le monde: Si on me replique ancor, que plusieurs guerisset bien sans medecin & sans medicamans: ie repliqueray de mesme, que aussi plusieurs perdent leurs douleurs sās medecin, & sans aucuns remedes: tellement que telle proposition se confond d'elle mesme.

CHAP. DIS ET HVITIEME.

Que les ſuiets a maladies, ſont ſuiets a la Medecine, les autres non.

PLusieurs redarguēt ceus qui obſeruet quelque regime, & ſ'aſſuietiſſet a certains remedes, pour ſe maintenir an ſanté, & preuenir les maus auquelz ilz ſont ſuiets. Ceus qui reprenet telz moyens, ſont volontiers bien ſains, & de bonne complexion. dont pour leur regard, la propoſicion eſt bien vraye, ſuiuāt ce qui eſt dit en l'écriture ſainte, Au iuſte n'eſt donnée la Loy:& plus expreſ quand il dit, Il ne faut point de medecin, a ceus qui ſe portet bien. Mais ce propos auſſi confirme le contraire:c'eſt, que les perſonnes mal ſaines ont beſoin de medecin:& qui eſt ſuiet à quelque mal eſt ſuiet a quelque reigle. Tout ainſi que nous etans ſuietes a peché, ſommes ſuietz à la Loy. I'accorderay toujours, avec le tres-eloquant Celſe, que l'homme ſain, durant qu'il ſe portet bien, & eſt à ſoy, ne ſe doit obliger a aucune loy, ou regime, ny amployer le medecin

Matth.9

Li, I, ch, I

..

..

cin. Il faut qu'il aye diuerſe maniere de vi-
ure : maintenant eſtre aus chams, mainte-
nant an la ville, mais plus ſouuant aus chās,
nauiguer, chaffer, eſtre an repos quelque
fois, mais ſ'exercer le plus ſouuant. Car l'oi-
ſiueté & pareſſe rand le cors hebeté : le tra-
uail l'aſſermit. celle là hate la vielheſſe. cet-
tuy cy fait durer l'adoleſſance. Il eſt bon auſ-
ſi quelque fois de ſe baigner, quelque fois
vſer des eaus froides : ores ſe oindre, ores le
meſpriſer, ne craindre aucune ſorte de viande
qui ſoit vſitée du peuple. quelquefois eſtre
an feſtin, quelquefois ſ'an retirer : maintenāt
māger outre meſure, maintenant ſobremāt :
faire deus repas le iour, plus ſouuant qu'un :
& touiours bien manger, tant qu'on peut di-
gerer. &c. Quant a la copulation charnelle,
il ne la faut trop deſirer, ny trop craindre auſ-
ſi. Celle qui eſt rare, excite le cors : la frequan-
te, le reſout. &c. Cecy doit eſtre obſerué, de
ceus qui ont la ſanté ferme : & ſe garder, que
les remedes du mauuais port ne ſoient con-
ſumés ou amployez au bon. Ainſi donc les
perſonnes bien ſaines, doiuent eſtre indiffe-
rantes à tout, & ne ſ'aſſuiettir a rien, lors qu'-
elles ſe portet bien, & leur ſanté eſt ferme,
comme Celfe limite. car on ſe feroit grand
tort

tort, de se randre delicat & tandre, amollissant & eneruant sa bonne & forte complexion : laquelle se ranforce toujours plus an s'exercant à tout. Mais les valetudinaires, mal sains, & suiets a quelques maladies, cōme elpilepsie (qu'on appelle mal de S. Ian) migraine, rheume, catharre, courte haleine, mal d'estomach, oppilacion de foye ou de rattelle, colique vanteuse ou pierreuse, gouttes, & semblables maus (desquels la plus part est hereditaire aussi biē que la ladrerie) qui doute que telz ne doiuet viure de reigle, s'ilz veulet estre a leur aise, & viure longuemant? Ceus aussi qui s'adonnet a l'etude, ou a charges publiques, d'autant qu'ils sont suiets à beaucoup de necessités, doiuet estre reiglez, autrement ilz tombet souuant an maladie. Car ilz se contraignent à beaucoup de choses, qui leur sont nuisantes. Et Celse au propos allegué suppose que l'homme sain, soit aussi tout à foy. Or an la proposiciō que nous disons, *suiet à maladie* nous atandons vne particuliere subieccion & aptitude. Car tous les hommes du monde, sont suiets a toutes sortes de maus, comm'ils sont tous suiets a la mort. mais nous disons, aucuns y etre suietyz particulieremant, qui ont

vne

vne inclinacion & disposicion à quelque mal, duquel la semance ou le rudimant est an eus: non qu'ils soient de fait malades, mais pour peu de choses ilz tombet an maladie. & pourtant ilz se doiuet bien contregarder: à l'exemple de celuy, que nous auons allegué au second chapitre de ce liure, qui etât le plus maladif de son tams, neantmoins vequit cent ans, par grand artifice, & exquise maniere de viure.

CHAP. DIS ET NEUVIEME.

Que ceus qui sauet quelque peu de la Medecine, sont plus mal aupres des malades, que ceus qui ne sauet rien du tout.

Cett'erreur deuoit estre deduite apres celle du neuuieme chapitre, ou i'ay remontré, qu'il y a plus de medecins, que d'autre sorte de gens. mais craignant d'offancer les personnes qui sont fort secourables, i'ay été long tams an ce combat d'esprit, si ie les deuois taxer & reprâdre ainsi publquemât. An fin i'ay été persuadé a passer outre, sachât qu'il y a plus de dâgier que l'on ne cuide, an ceus qui sauet quelque chose, & panset tout
sauoir

fauoir. Car de'cclà, outre-cuidés, presu-
 met & antreprenet des plus grans choses: ou bié
 resistet & ampeçhet, que les medecins n'a-
 ployét leurs principaus remedes, qui seroient
 necessaires a la prompte & seure guerison.
 mais ces contrerolleurs les tienet angagez
 de crainte, tellemant qu'ils n'oset, & font al-
 to. Il y ha des persônes, qui ne sauét de tout
 rien an Medecine, quant au discours ou rai-
 son (comme sont fames ignorantes) qui
 mesmes ne sauét lire, ne ecrire: mais ont q̃l-
 ques obseruacions & reigles, sachans bien
 faire vn potage, vn colis, restaurât, orge mô-
 dé, qui font bien vn lit, coiffet bien le ma-
 lade, sauét quelques petis remedes cōtre la
 rogne, la bruleure, la violette abbaissée, les
 vers, la suffocacion de matrice, &c. De cela
 ils panset tout sauoir, & font plusieurs cho-
 ses de leur sicap ou phantasie, au desceu du
 medecin: & s'il succede mal, ils n'ont garde
 de s'an vanter. la grand robbe du medecin
 couure tout cela. Il seroit bon & expediât,
 que les assistans ne sceussent du tout rien, si-
 non obeyr aus ordonnances du medecin.
 C'est vn sauoir fort profitable au malade:
 car qui ne presumer rien de soy, n'antrepren-
 dra iamais que d'exequuter ce que luy est
 prescrit,

prescrit, ordonné & commandé. Les autres qui pāset sauoir, y aioutet, diminuet, alteret, ou n'an font du tout rien. comme les mauuais apoticaire, qui exequent a leur plaisir les ordonnances des medecins : pansant de sauoir mieus la portée du malade, ou la nature du mal : anyurez de quelque opinion d'eus, pour auoir veu plusieurs telles maladies, hanté diuers medecins, & obserué le succes de samblables receptes. O dangereuse outrecuydance! voyla que ruyne la plus par des malades. Il vaudroit beaucoup mieus, de par Dieu, ne sauoir du tout rien, que sauoir ainsi an anpirique. O quel malheur, pour la vie du paciant, & l'honneur du medecin, que d'auoir vn apoticaire ainsi outrecuydé, temeraire, & antreprenneur. An Italie & an Espagne aussi (comme i'an tans) les malades sont bien mieus seruis, car l'apoticaire ne va point voir le malade, si ce n'est de courtoysie & amitié, non comme apoticaire. & les medecins n'ecriuet point au pied de leurs receptes, a quoy faire sont les remedes, tellemāt que l'apoticaire fait aussi peu l'intancion du medecin, que sil n'an voyoit rien. Par ce moyen, il ne peut abuser des ordonnances du medecin, ou
beaucoup

beaucoup moins que noz apoticairez, auxquels tout est communiqué trop familièrement. Apres les apoticairez (ie parle des mauuais, & non des bons, prudans, modestes, & gens de bien, qui ne se melet que de faire leur metier) les plus dangereuses sont les gardes ou seruâtes des malades, qui panset plus sauoir que le medecin (mesmes si elles sont vieilles au metier) touchant la nourriture principalemant, quoy qu'elle soit d'ineestimable importance, pour sa qualité, heure & mesure. Vray est que de la qualité, elles an croyet assés le medecin: mais de l'heure & mesure, elles an font a leur plaisir. Je laisse a-part la droguerie qu'elles vsent a cachettes, & l'omission qu'elles font de nos ordonnances. Brief-elles dispanset de tout, & an vsent a leur phantasie, si elles rancontret le malade de mesme. Telles personnes sont fort dangereuses: & vaudroit beaucoup mieus auoir de celles, qui n'ont jamais rien veu, & ne sauet autre lesson que de l'obeissance.

CHAPITRE VINTIEME.

contenant quinze erreurs.

De l'ingratitude des malades anuers les apoticairez : & d'où vient qu'ils sont le plus souuant mal payez.

L'Ingratitude des malades anuers les apoticairez, n'est pas de mesme sujet qu'a uers les Medecins, il s'en faut beaucoup : & mesmes il n'y a point de iuste comparaïson. d'autant que les vns ne peuuent estre payez, a parler proprement, ainsi que j'ay deduit au cinquième chapitre, les autres le peuuent estre. Car ce qu'on doit a l'apoticaire, est marchandise & seruice, qu'on peut estimer en argent, & payer raisonnablement, sans que l'apoticaire en puisse pretendre autre reconnaissance ou deuoir. sauf le gré qu'on doit toujours a vn seruiteur public, qui s'est acquitté fidelement de sa charge en son metier. Cômme aussi a vn seruiteur domestique, qui habié & loyaument seruy, on en fait bon gré, outre ce qu'on l'a bien payé de ses gages. Autrement le maitre est ingrat & meconnoissant,

fant à la verité. Car l'homme, etant libre de nature, ne doit pas seruir pour gagner seulement de l'argeant, ains s'il est de bon cœur, il se propose de gagner outre ce, le cœur, l'amitié & bonne grace de celuy, auquel il sert: & doit estimer plus cela, que tout autre bien qu'il an peut receuoir. Et ainsi reciproquement, le maistre doit toujours aymer celuy qui l'ha bien serui, & le tenir toujours pour domestique, ayant l'antrée de sa maison tant qu'il viura. Or l'ingratitude de plusieurs anuers les apoticairez, est communement de tant plus grande, que ces pauvres gens auront plus fourny & seruy. Car on se fache de payer vne si grand' somme, qu'on doit: & puis, on dit: ce ne sont que herbes & racines, lesquelles l'apotaire ha prins an noz jardins, prés, vignes, chams, ou landes. Il a eu vn peu de peine à les cuillir: il ha depandu vn peu de bois, ou charbon a les cuire. & voila tout. il m'ha baillé quelques clysteres: il ha velhé deus ou trois nuis: on l'ha fait leuer cinq ou sis fois du lit. Et que peut valoir tout cela? Il demande cent liures de deus ou trois semaines, que i'ay esté malade. Aurois-ie bien depandu cinq ou six liures par jour an ces potringues? Et puis, i'ay tant

depan

Depandu an chappons & autres viâdes. I'ay tant donné aus medecins, & au chirurgien. la garde ou seruiciau me coute tant. Quoy? cette maladie me reuiédroit a plus de cent ecus. Mais c'est bien pis, si le malade vient a mourir. Car celuy qui doit payer, antrera volontiers an reproche, disant, que les drogues de l'apoticaire ne valoint rien: qu'elles etoint vielhes. & que si le malade eut eté bien & fidellemant secouru, il n'an fut pas mort. tellemant que l'apoticaire est plus tost redeuable, que creancier. Il y an ha de si mal auisés, qui diront: le medecin & l'apoticaire sauoit & voyoit bien, qu'il n'an pouuoit pas guerir: qu'il etoit ineuitablemant mort. Pourquoy est-ce, que on la fait consumer en depance? C'est vn affront & piperie. l'apoticaire deuroit perdre cela, comme celuy qui fournit de l'argeant ou de marchadise à vn enfant perdu. He pauvres gés: quand vous sauries de vray, que ce malade mouroit dans trois ou quatre jours, lairries vous pourtant de le nourrir? Trouués vous bon que l'on abandonne vn malade, veu le grand nombre de ceus qui echapet contre toutte esperance? Il est certain (mon amy) que les maus coutet plus qu'ils ne valet: ou-

tre ce qu'ilz ruinet le cors.mais le recouremât de santé,ne peut estre estimé a pris d'argent:ainsi que i'ay remontré au cinquieme chapitre.Vray est,que l'apoticaire & la garde peuuet estre bien payés,comme aussi les vandeurs de poulalhe, & autres viandes, & comme les autres seruiteurs & chambrieres : mais cette marchandise & ce seruice de l'apoticaire doiuet estre payez plus liberalement,veula necessité,& la peine facheuse que donne le malade extraordinairement. Il y a des plaisirs & seruices, qui doiuet estre achetez au double des autres: par ce que ils sont fais avec quelque dāgier, ou grand incōmodité, de ceus qui les font: ou a telle necessité, de celuy qui les ressoit, que la recompanse an doit multiplier. Ne dōnerez vous pas volūtiers d'un verre d'eau fraiche,etant sur les chams fort alteré, plus que d'une pinte de vin,etant au lieu de commodité. C'est, que vous estimez beaucoup dauantage, ce que vous sert au besoin,pour faire passer vne grand'facherie. Aussi quand on est malade on n'estime rien la valeur & cherté des drogues: on veut que tout soit amployé pour telle necessité:mais au payer, on cognoit l'ingratitude. Tant s'an faut
qu'on

qu'on surpaye, qu'a peine l'apoticaire an peut tetirer son cabal. Car on fait bien, qu'il amploye, outre les herbes & racines du terroir où il habite, plusieurs drogues apportées du Levant, & du Ponant, regions fort lointaines, drogues bien cheres, & sur lesquelles souvant il perd: comme il auient aus autres marchans de perdre sur ce qu'ils achettet pour reuandre. Et quand l'apoticaire n'y perdrait rien, cen'est pas assez. Ne faut il pas qu'il gagne de son industrie, a la composition & administration des medicamans? Il deuroit estre plus riche qu'un grossier, tant pour tant, car le grossier vand les choses comme il les achete, sans leur donner aucune forme ou preparacion. L'apoticaire ha la peine de les accommoder an mille sortes, & randre propres aus malades. Tout ainsi que les charpentiers & menuisiers fassonnet le bois & l'accommodet an batimans & meubles. Le radelier le vand tout rude & sans forme. Que vaut plus(a vottre auis) un gros tronc de noyer ou les tables, chaires, & litz qui an sont faitz? Ces meubles valet plus cinq ou sis fois que leur matiere, pour le labeur

& l'industrie qu'on a amployé à les fassonner, & randre vtiles au seruice de l'homme. Ainsi les drogues que le grossier ha fourny à l'apoticaire, étant accommodées suiuant l'ordonnance du medecin, valet cinq ou sis fois plus qu'elles n'ont couté. Et toutesfois on veut, que l'apoticaire n'an ayt rien plus que le grossier. Vne liure de rhab-barbe coutera neuf ou dis liures, autant du plus que du moins. Et ie say bien, que si l'apoticaire n'an fait plus de cinquante liures, il ne gagnera pas assés. Et puis on veut, qu'il le donne pour le pris qu'il luy ha couté: comme qui voudroit les meubles, pour le pris que coute le boys. Il feroit bon voir qu'on estima ainsi vn' epinette, vn lut, vn' harpe, & autres instrumans de musique, seulement autant que vaud le boys: vne clef & vne ferrure, nomplus que le fer sans fasson: & vn horologe, autant que peut couter sa matiere: vne peinture, à la valeur des couleurs qu'on y a mis. Et l'apoticaire qui fait des ouurages plus excellans, & plus vtiles sans comparaison, n'aura il rien de son industrie, & de la fasson de ses drogues, mais on luy payera autant qu'elles ont couté au gros? Voila bien antandu. Quand on

I
 Erreur populaire.

on est de fait malade , on ha bien autre
aui. il samble qu'on ne sauroit assés payer
les remedes , & le seruice de l'apotecaire.
Mais quand on est guery , il an faut rab-
battre la cinquieme partie ou la quatrie-
me : quelques vns ont cette coutume d'an
rabbattre le tiers , & les autres font par
moitié. An quoy ils s'abuset trop lourde-
ment, pansans d'an auoir melheur conte. II
Erreur po-
pulaire.
Car si c'est la coutume de la ville, ou de la
maison , & (comme vous diries) vn ordi-
naire & pacte ressu de la part des apotica-
res, ils font que tout reuiet à vn. Car si
votre coutume est , & etes ainsi d'accord,
qu'on an rabbatra toujours le quart , l'apo-
ticaire qui pretand qu'il luy soit justement
du , quarante sis liures , cinq sols , trois de-
niers , il fera reuenir ses parties à la som-
me de soixante & vne liure , treze sols,
huit deniers: sachant que vous an rabba-
tres quinze liures , huit sols, cinq deniers,
qui est le quart. & ainsi luy resteront qua-
rante & sis liures , cinq sols , trois deniers,
qu'il pretand luy estre justement dus. Les
autres font taxer les parties aus medecins. III
Erreur po-
pulaire.
Et que sauet les medecins combien valet

les drogues de l'apothicaire, sinon par son rapport mesme ? va-il aus foires acheter le rhabarbe, la casse, la manne, le gaiac, l'argeant vis, le musc, l'ambre, & autres marchandises. Il n'an fait autremant le pris, que de l'ouïr dire à l'apothicaire : lequel vous an dira bien autant : & puis vous n'an saurés pas moins que le medecin. Dauantage les marchandises changet souuant de pris. dont le medecin qui se tiendrait toujours à vn taus, feroit tort à l'apothicaire, ou à celuy qui le doit payer. Ne void on pas, comme le sucre hausse & baisse fort souuant an valeur : & la cire, & le cotton, & le saffran, & autres marchandises qu'on nomme Latines, assés improprement : d'autant que on les demande an François, & nompas an Latin, comme nous faisons les drogues des malades. Car toutes nos receptes & ordonnances sont an Latin : & toutesfois on ne les appelle pas, marchandise Latine. Puis donc que tout change de pris, an moins de quatre ou cinq ans, comme aussi le bled, le vin, l'huile, le linge, les draps de laine & de soye, le plomb, le cuiure, l'or, l'argeant, & cæt. com-

mant

IIII

Terreur po-
litaire.

mant voulés vous qu'un medecin taxe bien la marchandise d'un apothicaire: & que toujours il estime un clystere sept sols & demy, un potus cordial vint sols, une medecine de rhubarbe trante solz &c. sans faire tort au marchand, ou au payeur? Et que faut il tant barguigner. si il vous ha bien & fidelement seruy (comm'il faut presuposer) payez le liberalement: & il sera toujours plus affectionné à vous servir loyaument & diligemment. Mais on fait bien pis, que sans payer le premier, a un autre besoin on se retire a un autre, & volontiers c'est a un nouveau venu (sous couleur que ses drogues doivent estre plus fraiches) lequel pour auoir chalandise, ressoit volontiers tout le monde. Et puis quand ce vient à payer, pour la premiere fois, on y trouue meilleur marché. mais quand cetuy-cy est assés achalandé, & qu'il demande autant comme un autre, on se remue à un troisieme. Voila le vray signe d'un mauuais payeur. Et sauroit on mieus employer son biē, an quelque marchandise que ce soit, ou qui valhe plus, q̄ les remedes a recouurer la santé: lesquelles a bon droit Herophile apelloit, mains de Dieu? & n'esti-

^V
Erreur.

més vous rien le plaisir que vous ha fait l'apothicaire, de vous auancer son bien, & vous secourir a telle necessité? Si quelque prest merite vsure (qu'on dit plus honnestement, interest ou proffit) c'est celuy-là. Ancor se fait on tirer l'oreille d'an payer le principal. O vilaine & mesquine ingratitude! Le m'ebay commant (pour reuenir a ma comparaison, des grossiers & des apoticaire) il y a beaucoup plus d'apoticaire que de grossiers: veu que ceus-cy gagnent bien dauantage, sans tant de peine & facherie: outre ce que leur gain est liquide & assuré. Mais d'ou pansez vous que procede la faute, & que noz apoticaire sôt si mal payés? C'est pour leur outrecuidance le plus souuant: & de ce qu'ils veulet tout embrasser. Il leur samble que cela fait a leur reputacion, d'auoir plus de chalans que les autres: & qu'ils se montrent sauoir autât qu'un medecin. Voila deus folies qui les font perdre, de par Dieu. Voila leur grand' ruine. Et premierement, quât a vouloir tout embrasser, pour estre an plus grande reputacion, cela leur cause de mauuais debtes. Car ils n'osent refuser a personne, pour n'an exclurre les autres: n'ont mesmes ceus qu'ils sauet bien auoir quitté leur

leur apoticaire, pour estre mauuais payeurs, comme i'ay dit. C'est tres-bien fait, de n'e cōduire les pauvres. Ils doiuent estre an principale recommandacion, & bien secourus par charité, voire sans an pretandre aucun salaire ou proffit, leur donnant mesmes le cabal, an aumone charitable. Mais des riches, c'est vn autre partie. Ils ont bien de quoy payer tout contant, pour la plus part: & on leur fait plus de credit que aus pauvres, affin de les antretenir, & se maintenir an reputaciou, d'estre apoticaire de toutes les meilleurs maisons, ou de la plus part: lesquelles an fin ne payet qu'an bonnadies, ou an outrages & reproches: quelques-fois an menaces ou bastonnades. pour le moins il y faut des proces, auxquels les auocas gagnet plus que le marchand. Son dam. il ha voulu auoir cette reputacion: ou pour ne perdre quelque peu que luy estoit du, il y est voulu antrer plus auan, craignant que s'il ne continuoit d'auancer, vn autre print la chalandise & partant il s'y anfonce iusques aus oreilles, a son grand preiudice. Le segōd point d'ou-trecuidance est, quand l'apoticaire veut faire du suffisant, hors de son metier & vocacion, an contrefaisant le medecin, duquel il veut

veut estre dit compagnon, sinon majtre & superieur. Car il samble a quelques apoticairez, fauoir plus que les plus sauans docteurs, par ce que ils ont veu force malades, & obserué les receptes de plusieurs & diuers medecins, qui ont esté de leur tams an reputacion. dont ils panset auoir aquis par experiance, vn fauoir plus solide & asseuré, que les modernes qui ordonnet pour le presant. Et de cela outrecuidez, oset bien antreprendre, d'ordonner plus souuant de leur phantasie, aussi a-propos comme est *manifestat* a matines, suiuant le commun prouerbe. Grosses bestes, & plus dangereuses que les sauages! les medecins qui sont consumez en leur sciance, y sont bien ampechés. & ces galans icy n'y treuuet point de difficulté. On leur fait trop d'honneur, de les appeller Ampiriques, si on prand ce mot proprement. Car les Ampiriques ont esté gens doctes, faisans vne troisieme secte an la Medecine, non moins que les Methodiques & les Dogmatiques. lesquelles trois Galen ha bien voulu fauoir: & puis se tenir a la Dogmatique ou rationelle, qui est fondée an raison naturelle, sur la parfaite connoissance de l'anatomie, des elemans, des complexi-

complexions, vertus ou facultez, actions naturelles, vitales & animales: Ité des vrayes causes & signes des maladies, de leur essence & diuers accidans. Ce que ignoret les presumptueux charletans, outrerécuidés vanteurs & dangereux entrepreneurs: qui n'ont rien que des receptes. C'est bien assez qu'ils antandent leur metier, & qu'ils l'exercet fidelemant, suiuant les ordónances & mandemens des medecins, sans y ajouter ou an rabatre vn grain. Car cela est trop d'agereus. Qu'ils se souuiennet, de ce que racôte leur Saladin an sa premiere particule, des interrogaciõs qu'on doit faire a l'apoticaire: où il fait m'aciõ d'un qui estoit au tresillustre Roy d'Arragon, lequel fut aigrem'at puny & honteusem'at cõdamné a Naples par ledit Roy, de ce que les medecins de sa magesté ayans ordonné vn electuaire cordial, auquel antroit du corail blanc: ledit apoticaire n'an ayant point, brula du corail rouge, qui an deuient blanc. Cela et'at venu a la notice du Roy, il cond'ana son apoticaire a neuf mille ducas. (Nicolas preuost recitant cette histoire, ne dit que mille ducas) & de là an hors ne s'an voulut plus seruir. C'est vn bel exemple aus entrepreneurs, qui n'õt seulem'ant font des medecins, a ordõner toutes sortes de reme-

VIII.
Erreur.

des, ains aussi contreroller & font autremant les receptes, qu'il ne leur est commandé, qui est vne fausseté, beaucoup plus dangereuse que de falsifier la monnoye. Dont ils ne meritoit moins d'estre brulez tous vifs dans l'huile bouillant, ou tenalhez, tout ainsi que les assassins seruiteurs domestiques qui egorget leurs maitres. Feu monsieur Torrilhon, lieutenant principal au gouuernement & siege presidial de Montpellier, quand on luy parloit de la reformatiō des apoticaire, racontoit volontiers, d'un de Paris, qui le seruit an vne grand maladie aus faus-bourgs S. Germain: etant pansé d'un des plus sauas medecins de la ville. Quand il fut guery, il paye liberalement ses parties a l'apotaire, sans an vouloir rien rabbatre, cōme on fait communement. L'apotaire voyant son honnesteté, luy dit: vraiment, (monsieur) i'ay bien merité cet argeant: & il vous ha bien fait besoin, que ie vous soys eté amy. Car si i'eusse fait tout ainsi que le medecin ordonnoit, vous fussies mort, ou tard guery. Lors ledit Sieur Torrilhon, an s'ecrian- luy dit, Ha mechant homme! Voyla pouquoy i'ay ete si longuement malade. Si vous eussiez fait comme le medecin ordonnoit, ie fusse

fusse plus-toſt guarý. Ainſi cet outrecuidé preſumptueux, pañſant qu'il luy en ſauroit plus de gré, perdit ce luy qui luy pouvoit eſtre du, ſ'il eut fait ſon deuoir. Ne meritoit il pas de perdre auſſi l'argeant de ſes parties (comme la fauſſe mōnoye eſt conſiſquée) & outre ce, puny au cors? Car quiconque vſe de ces tours, met le malade en danger de mort, ou bien le fait plus long tams andurer a la ruyne de ſon cors & de ſes biens. Et puis, ils ſont ſi auceugles de vaine gloire & fauſſe perſuaſion, qu'ils ſ'en oſent bien vanter apres que le malade eſt guery: c'eſt a dire, quand il n'eſt peu mourir de leur mechante & deloyalle procedure. De laquelle ſ'il fuſt mort, l'apoticaire n'auroit garde de ſe vāter, d'auroir fait autrement que le medecin ordonnoit. O extreme infidelité, & trahiſon deteſtable! C'eſt vne des raiſons (a mon auis) pourquoy ils ſont ſi mal payez. Car Dieu ne veut pas qu'ils ayent profit de leur abus, ains tout meſcontantement, n'etans payez pour la plus part, qu'a force de chicanerie. Ancor eſt ce trop, pour ceus qui vſent de qui pro quo, ou qui ſont des medecins. Mais (dira quelqu'un) tous ne ſont pas de cet humeur, & n'abuſent ainſi de leur metier.

IX.
Erreur.

metier. Il faudroit au-moins que ceus-cy fussent bien payés. Cela est vray : mais souuant le bon andure pour le mauuais. Le nombre des loyaus & fidelles est si petit, que pour eus on ne fait exception. tout passe sous vne generale condamnacion, pour les frequans abus de la plus grand partie. & jusques à tant qu'ils soient tous bien reformés, ils seront tous mal payés. Aussi plusieurs qui sont bien consciencieux, qui dispanset tres-fidellemant les ordonnances des medecins, & n'antreprenet rien d'eus-mesmes, falhet d'une autre sorte: dont il leur auient d'estre mal payés. C'est, qu'ils sont trop faciles & volontaires, faisans credit plus long tams qu'ils ne deueroient, à gens riches. & aisés, craignans plus de leur deplaïre, que de les perdre. Trop de bonté nuit bien souuant, & (comme on dit communemant) tourne an fadaïze. Il est raisonnable & honneste de faire plaïsir, mais il ne faut pas que il reuienne à son dommage, sans aucune necessité. Bien seruir, & vouloir estre bien payé, sont choses legitimes, & bien correspondantes. Dont qui ne sert bien, ne merite d'estre payé : & qui ne paye bien (ayant le dequoy, cela s'an-

tand

x

Erreur.

tand) ne merite d'estre seruy. Il y ha eu à Lyon vn apoticaire, qui se faisoit payer tout contant & auant la main, ce que montoit les receptes qu'on luy balhoit à dispanser & exequuter. Il n'an faisoit rien autremant, quand ce eut eté le plus honorable de la ville. dont il fut surnommé, le grand vilain. Auoit-il moins de pratique pour cela? Au contraire, si grande presse, qu'à peine y pouuoit il auenir, avec set ou huit seruiteurs. Car on estoit assuré, d'estre bien seruy, an bien payant. Je ne donne point de conseil là dessus: mais il me samble, que si tous les apoticaire faisoient de mesmes, anuers ceus qui ont dequoy payer contant, ils les pourroint mieus seruir: & si demeureroient an melheur grace avec eus. Car quand il faut an fin debourcer vne grand somme, c'est vne grand facherie.

XI
Erreur.

Il y a vn autre abus, duquel les apoticaire se font grand tort, & non-moins aux malades. C'est, qu'ils ne font tout le jour que trotter a visiter les pacians, & laisset faire à leurs seruiteurs les ordonnances des medecins, comme bon leur samble: tellemant qu'ils seruet a credit les mala

malades. Ne voudroit il pas mieus de tenir pié a sa boutique, & trauallier an ce qu'il peut, voyant ce que font ses seruiteurs, que de se promener ainsi de maison an maison? An Italie & an Espagne, comme i'ay remōtré au precedant chap. les apoticaire ne bouget de leur boutique, & ne vont voir aucū malades, si ne sont leurs parans & familiers amis, lesquelz ilz ne visitet point cōme apoticaire. Car ilz ne leur aportet pas ce que les medecins ont ordonné, & ne l'appliquet pas aussi. Il ne fauet ce qu'on an veut faire. On vient querir les remedes, de cheus le malade: & les gardes les aministret, ainsi que le medecin leur ha dit. Les barbiers ballet les clisteres. les gardes appliquet tout le reste. Les malades an font ilz moins biē seruis? Cent fois mieus que an France. car le maitre apoticaire s'attāndant à sa besogne, & voyant ce que font ses seruiteurs fournit plus promptement & plus fidelement ce que le medecin a ordonné, sans perdre tans à vagabonder: & ne sachant à qui doiuet seruir les receptes des medecins. Car on n'e-crit iamais a la fin, la maniere d'an vser, ilz n'an deuient pas empiriques, & ne sont outrecuidez a contrefaire les medecins. Cela est

est mauuais, dira quelqu'un: d'autant que le malade est fort consolé, d'estre visité souuât de son apoticaire, & qu'il sache quelque peu an l'art de medecine. C'est la commune erreur de ce royaume, & double abus très-prejudiciable aus malades. Car quant a sauoir quelque peu i'ay remontré au precedant chapitre, que cela est dangereux pour les malades. Il vaut mieus qu'il soit assistez & seruis de personnes qui ne sachet, sinõ obeyr au medecin. & quât à la visite qu'on estime seruir a cōsolaciō, il ya ancor double erreur: l'un que l'apoticaire se detourne mal a propos, du principal seruice du malade: pour lequel il vaut trop mieus qu'il ne bouge de sa boutique, comme dit est: & que tout soit prest aus heures que le medecin ha ordonné. L'autre, que les malades s'abusent grandement an cela, tenans les apoticares pour dymy-medecins, ou comme vicaires des medecins. Je n'ose pas dire(car i'an ay trop grand honte) que plusieurs se fient plus de certains apoticares, que des meilleurs medecins du monde. Tantans fier, nompas an ce que concerne le preudhomme, de faire bien & fidelemant son deuoir(comme a ne balher de la poison, an lieu d'un remede sa-

XII.
Erreur.

XIII.
Erreur.

lubre) ains de la suffisance an l'art de medecine, pour quelque pretandue experiance & obseruacion. Quelle folie? De là procede, que le plus souuant l'apoticaire ha la premiere cognoissance du mal, & est le premier appellé, donne premier son decret: fait ou applique quelques petis remedes. puis sil an est d'auis, on appelle le medecin. C'est le plus grand abus du monde, lequel ie refute alheurs, montrant le dangier, que passe vn malade, de s'adresser plus-tost a l'apoticaire que au medecin, & luy donner la premiere cognoissance de sa maladie, comme a vn iuge ordinaire & subalterne pour instruire le proces qui doit aller plus auant. Mais c'est comme si on plaidoit deuant des greffiers ou procureurs, qui n'ont cognoissance de cause: & ne sont que officiers ou ministres de la justice. Touchant a l'autre confiance que le malade ha a son apoticaire, de ne le trôper ou trahir an ce qu'il fournit & administre, elle est tres-raisonnable. Dont il faut que l'apoticaire soit fort homme de bien, de bonne conscience & grand integrité. car la vie du malade est plus an tre ses mains, que du medecin. Touttesfois il ne s'an doit pas orgueillir, comme font quelques vns:

disans,

disans, que les malades leur sont plus redevables que aus medecins, d'autât qu'ils peuvent plus faire de biẽ & de mal, etant en leur pouuoir de balher de la poison au lieu d'un restaurant. Mes amys: n'vsez jamais de telles vanteries: & pour cela n'estimés pas que les malades vous soit plus redevables, qu'aus medecins. Car autant an dira bien vn cuisinier, vn bolanger, somelier, patissier, vn meunier, bouchier, jardinier, frommagier, poissonnier, poulalier, & tout autre qui fourni tou prepare les viures, ou an public, ou an priué: iusques au valet ou chambriere qui tire l'eau du puis, ou la va querir a là fontaine. N'ont ils pas tous moyen d'ampoysonner? & s'ils ne le font pas, meritet ils plus de gré ou recompanse, plus d'honneur & de bien, ue les magistras & autres sur-intandans a a police: que les majtres d'hotel, ou que les medecins? C'est bien fait d'abstenir du mal: & l'homme de bien an abstient, non pour crainte de punicion, ains par ce qu'il hait le mal, & cherit le bien. mais cela ne merite, sinon vne commune reputacion d'homme de bien. Car celuy qui abstient du meurtre qu'il pourroit faire, n'est pas tenu pour auoir sauué la vie. au-

tremant, nous serions redeuables de nostre
 vie à toute personne qui nous est pres, d'au-
 tant qu'il est biẽ an sa puissance de nous cou-
 per la gorge quand nous dormons. Vn coup
 de pistolle est aisẽ a donner. Tout valet &
 chambriere nous peut empoisonner. Et pour
 ce qu'il ne le font pas, leur sommes nous re-
 deuables de noz vies? Il est bien yray, que
 l'apotecaire le peut faire plus secrettement,
 & de sorte que la mort procedée de sa poi-
 son, ne luy sera attribuée, ains a la maladie.
 Dont ne fessant point ce tort au malade, cõ-
 me il pourroit bien faire, il sera simplement
 reputé homme de bien, comm'il doit estre
 antieremãt: mais nompas que le malade luy
 soit tenu de sa vie, s'il ha esté an dangier de
 mort: comm'il an est redeuable au medecin:
 ainsi que i'ay amplemant demonstré au cin-
 quieme chapitre de ce liure. L'apotecaire ne
 se peut de rien plus vanter, que la garde, ou
 le cuisinier, qui ont fait les potages, orgemõ-
 dés, consumés, & apreste autres viandes: nõ-
 plus q̃ ceus, qui luy dõnoient a boire: voire q̃
 ceus qui le pouuoient tuer an dormant où an
 velhant, & ont abstenu de telle mechâceté.
 Et pourtant, que les apoticaire ne se van-
 tet point de cela, cõme ayant plus merité du
 mala-

de, que autre personne. Car il n'ya point de comparaison de luy au medecin: lequel ne peut estre payé, comme i'ay assez prouué au fudit chapitre: & l'apothicaire peut estre surpayé. Dont il se doit contanter d'un gain honnestes & raisonnable: nompas estre excessif: & se faire bien payer ce que luy est du. Mais la plus-part ose bien encores se comparer au medecin, & dire: quoy? Le medecin aura pour le cours d'une maladie, vint cinq ou trante escus, ou ie n'auray que vint ou trante liures. Il ne fournit rien: & i'employe mon bien, outre mon industrie. & si ie trauaille beaucoup plus que le medecin. Mon amy, il ne faut pas conter ainsi. le medecin ha son cabal an l'esprit, qu'il a aquis par long etude, & non a petis frais. C'est un cabal spirituel, qu'il dispance par le menu aus uns & autres selon leur necessité, sans toutefois rien diminuer. tout ainsi que plusieurs chandelles prenent lumiere d'une flamme, qui n'an diminuë point. Ce cabal est plus digne & excellent que toutes les marchandises du monde: dont il ne peut estre payé ou recognu suffisamment par argeant, comme i'ay deduit au fudit chapitre. Mais ton cabal peut estre bien payé & surpayé. Et quant au

XV.
Erreur.

labeur, ie veus que l'apoticaire trauualhe plus
 son cors, & (si vousez) ancor son esprit , a
 faire & exequer bien ce qui luy est com-
 mandé . Pour cela merite il plus de recom-
 pāce que le medecin? Les massons, & char-
 pantiers, qui besognent sous vn architecte,
 ont bien plus de peine que luy : & toutes-
 fois ils sont assez payés , & se contentent de
 dis ou douze solz pour iour, où l'architecte
 ha vn escu: Le patron d'vn nauire trauualhe
 moins, que les vogueurs, & si est ce qu'il ga-
 gne dauantage. Le laboureur n'ha il pas plus
 de peine, trauualhant pour nostre nourriture,
 que vn paintre qui represente biē au vif vne
 personne? toutesfois le laboureur , ja soit
 qu'il s'occupe an chose tres-necessaire , ne
 gagnera pas dans huit jours quatre liures:&
 le paintre aura de son labeur, s'il est des mel-
 heurs, vint cinq ou trante escus. Ainsi le me-
 decin, ja soit qu'il trauualhe moins, il merite
 dauantage sans comparaison. car son labeur
 est plus digne, & tel qu'on ne peut assez re-
 cognoistre , quand il est bien a propos . Il
 feroit bon voir , qu'vn soldat voulut auoir
 cent liures d'etat par moys , voire plus que
 son cappitaine, disant qu'il ha plus de peine
 & passe plus de dangiers: qu'il luy faut faire
 santi-

fantinelle, ou estre au cors de garde, lors que le capitaine est bien a son aise dans vn bon lit: qu'il luy faut aller a des escarmouches plus souuant que son capitaine. qu'il luy faut porter ses armes alant a pied, & le capitaine ha charroy. dont il merite auoir plus de gages, que le capitaine. Ainsi le ragasse pourroit bien dire, qu'il merite plus que son majtre, d'autant qu'il ha plus de peine, & qu'il porte le plus souuant ses armes. Et pour reuenir aus nottes, la garde se plaidra d'auoir beaucoup plus de peine que l'apotecaire, & toutesfois elle gagne moins. Brief, il n'y a pas le moindre, qui ne s'estime meriter plus, que ceus qui ont les principales charges & superintandances: etas fort dangereux, & moins paisibles & assurez que les plus petis & abjets. Le medecin ha toute la charge du malade (qui est fort pesante) sur son dos. les autres qui excequutet ses commandemens, ont bon tams aupris de luy, fils le sauoit comprendre. Dont il est bien raisonnable qu'il soit plus honoré, respecté & reconnu sans aucune comparaison. Or sus donc, que les apoticaire se contentet de leur vocació, & du gré qui est du a leur fidelité, cō-

me bons seruiteurs publics : qu'ils tachet a
bien faire leur deuoir anuers les malades,
suiuant les ordónances des medecins: qu'ils
n'antreprenet riẽ, qui ne soit de leur metier:
ne soient point soucieus d'auoir grand presse,
ains de seruir loyaument & diligemmant
ceus qui les an requieret : se contentãs d'vn
honneste proffit, etans bien assidus an
leurs boutiques, & auises au prest
& auancement qu'ils font: Dieu
permetra qu'ils serõt mieus
payez de leur cabal, indu-
strie, & labeur.

FIN DV PREMIER LIVRE.



SECONDE PARTIE
DES ERREURS
 POPULAIRES, ET
 PROPOS VULGAIRES,
 touchant la Medecine & le regime
 de santé, refutés ou expliqués

PAR

M. LAUR. IOVBERT, CONSEILLER
 & Medecin ordinaire du Roy, & du roy de Na-
 varre, premier docteur regent, Chancelier & Ju-
 ge de l'Vniuersité en Medecine de Montpellier.

AVEC DEUS CATALOGUES DE
 PLUSIEURS AUTRES ERREURS
 ou propos vulgaires, qui n'ont été man-
 tionnés en la premiere & seconde
 edition de la premiere partie.

ITEM.

DEUS AUTRES PETITS TRAITES,
 concernant les Erreurs populaires, avec deus Paradoxes
 du même auteur.

PLUS

L'APOLOGIE DE SON OR-
 tographie, diuisée en quatre Dialogues.


Le tout nouvellement imprimé.

A PARIS,

Pour Lucas Breyer, tenant sa boutique au
 second pillier de la grand' salle du Palais.

M. D. LXXIX.

AVEC PRIVILEGE DV ROY.





A

MON TRES-HONNORÉ

SEIGNEVR, MONSEIGNEVR

*de Neufuille, Seigneur de Villeroy, con-
seiller & secretaire d'estat du Roy.*

*grand tresorier general de l'ordre
de sa Majesté, Berthelemy Ca-
brol, son tres-humble serui-
teur, Salut.*



Onseigneur i'ay
eu mon refuge
à vous, pour me
fauluer du mes-
contêtement que
M. IOVBERT
a receu de moy : à raison d'une se-
conde partie de ses Erreurs popu-
laires, que ie faisois imprimer, cō-

me a la defrobee, voyant sa resolution de n'en mettre plus en lumiere. Il m'a surpris cheus l'imprimeur, fort indigné de mon entreprise. Touttesfois, quand il ha entendu, que ie vous en voulois faire vn present, il ha esté tellement satisfait, que sur le champ il ha permis a Lucas Breyer, marchant libraire (auquel ie m'en etois adressé) de passer outre: luy donnant ancor deux beaux discours, traduits de ses Paradoxes latins, par Isaac Ioubert son fils aîné. En quoy i'ay cogneu par effect, le grãd respect qu'il vous porte, & la venerable autorité que vo⁹ auez gagné sur luy, par voz bien-faiçts & merites en son endroit: ainsi qu'il proteste souuent & en priué & en public, vous estimant l'un des meilleurs seigneurs & amys qu'il ayt

ayt en Frāce. Pour ce (dit il) que sās vous auoir iamais faiēt aulcun ser- uice, ne aus vostres, luy aues tou- jours en tous ses affaires esté si gra- cieulx, bening & fauorable, qu'il ne pourroit rien plus attendre d'un auquel il eut seruy toute sa vie.

C'est vostre grādeur, Monseigneur, de faire ainsi acquisition d'un grād nombre de seruiteurs bien affectiō nez, & tels que ie cognois lediēt sieur LOBERT: lequel ne s'epar- gnera iamais a rendre le debuoir, au moindre qui l'ayt obligé. L'un de ses moyens est (qui n'est a mespri- ser) d'honorer la memoire de ses bien-faiēteurs par ses escripts. Dōt ie m'assure, que s'il eut de soy mis cet' œuure en auant, il la vous eust donnee, plus-tost qu'a autre que ie sache. Ell'est dōc vostre de bō droit

& mesmes veu la permissiõ de l'auteur: qui est vn expres consentemẽt comme s'il la vous donnoit, & que ie la vous presentasse de sa part. En quoy vo⁹ plaira aussi cõsiderer, l'extreme desir que i'ay d'estre cognu de vo⁹, m'insinuât par ce moyen en vos graces, & me presentant à vous faire tref-humble seruice, quand il vous plaira m'honorer de voz commandements. Monseigneur, vous me cognoitrés en cela de si ardente affection, que vous le pourriez desirer du plus confident & asseuré seruiteur que vous ayez eu iamais: emeu à cela, tant des propos de mondict sieur IOBERT, que de la commune reputation de voz rares & excellentes vertus, qui vous ont rendu tref-aggreable au

Roy nostre sire, & aus autres princes de ce royaume, maniant les plus grans & importans affaires de la Couronne, autant heureusement que prudẽment, avec vne merueilleuse dexterité, accompagnee de singuliere confidence & discretiõ, loyauté, rondeur, integrité, synce-rité & preud'homme, diligence, patience, vigilance, promptitude, honesteté, gentillesse, grace, bõté, douceur, humanité, benignité, courtoisie, modestie, generosité, constance, magnanimité, liberalité, excellente memoire, subtile iuuentiõ, profõd & sain iugement, discours solide & graue, & tres-bon auis & conseil & toute autre vertu requise à vostre estat, condiciõ, & charge. O qu'un grand Roy est heureux, d'auoir vn tel conseiller aupres de sa personne.

O infinimât heureux le monarque,
 qui en auroit autant qu'il ya de
 grains envne belle grenade, comme
 le grand Roy Darius souhaittoit
 autant de Zopyres! Heureuse la pa-
 trie, heureux le peuple, qui a telle
 adresse, pour obtenir de son Roy
 ce qu'il en peut requerer iustement,
 ou an attendre fauorablement: ad-
 dresse tant facile, tant seure, & ve-
 ritable, qu'õ ayt iamais eu en Frâce.
 Monseigneur, ie serois trop proli-
 xe (ie le voy bien) si ie voulois racõ-
 ter seulement la disiesme partie des
 louables actions qu'on rapporte
 publicquemēt de vous: outre ce que
 ie ne m'en scaurois dignemēt acqui-
 ter. Aussi ie pense, qu'il vous sera
 plus agreable, de ietter inconti-
 nent voz yeulx, sur les beaux &
 plaisants discours de M. I O VBERT,

sca-

sçachât que vous aues par cy-deuât
prins grãd plaisir à la premiere par-
tie, que luy-mesme fit publier y ha
vn an. Ie croy q̃ vous ne l'aurez pas
moindre de cette-cy : mais quoy
que ce soit, vous plaira interpreter
en mieux mon hardiesse, & aggreer
le present que ie vous fais en toute
reuerance & humilité: en vous bai-
sant les mains, & priant Dieu que
vous doint, Mōseigneur, le comble
de voz meilleurs desirs, en parfai-
cte santé, tref-longue & heureuse
vie. De Paris ce 3. de Feburier, 1579.

DE B. CABROL, MAI-
STRE IVRE EN LA FA-
culté de Chirurgie, de l'Uni-
uersité, Cité, & Ville de
Montpellier, Chirurgien
ordinaire du Roy.

REPULSIVE
DES ENVIEUX ET VENIMEUX
PROPOS TENVS CONTRE L'AU-
teur des erreurs populaires.

ADDRESSEE
AV TRES VERTVEUX, MA-
GNIFIQUE ET GENEREUX SEI-
GNEVR, M. ANTOINE DE
CLERMONT, Baron de MON-
TOISON, & gentilhomme
de la chambre du Roy.



*N dit bien vray commune-
ment, qu'Enuie ne mourra
iamais. Car elle fut engendree
de Lucifer, dez le commence-
ment du monde: Et n'aura ia-
mais fin, nom plus que les diables d'enfer, peres de*

Epistre Apologetique.

calomnie & detractiō, dont ils portent le nom. Je l'ay quelquefois sentie bien piquante, & facheuse en mon endroiēt: mais ie me suis tousiours consolé, & ay prins meilleur courage, de ce que ie me voyois en telle affliction, compagnon des plus gens de bien, des plus vertueux, studieux, & sçauans qui soient au monde: Et de ce que i'ay tousiours ouy dire, qu'il n'y a personne exempt d'Enuie, que le miserable: & qu'il vaut mieux estre subiect à Enuie, qu'à pitié. Mais ce que i'ay senty en moy de ses piqueures & morsures, n'est riē au prix des assaulx & alarmes qu'elle a donné à M. IOBERT, de x qu'il a commencé de paroistre, auoir reputation, & estre tenu entre les plus doctes & rares personnages de sa profession. Ce fut premierement, quand on eut publié la premiere Decade de ses Paradoxes, sās qu'il en sceust rien: & plus encores, apres que l'ayant recognuë & aduouëe, il l'a feist reimprimer, y adioustant la seconde. Bon Dieu, quelles detractiōs & calomnies luy excita Enuie, à l'occasion de ceste œuvre là! Je le sçay bien, pour l'auoir veu, au grand desplaisir de ses amys, & de tous ceux qui cognoissent sa vertu, valeur, & preud'homme. Cela neantmoins luy succeda tres-bien, & luy

Epistre Apologitique.

donna grand bruiet : tout ainsi que la palme se rehausse & releue, contre le fardeau qui la presse, & tasche à la deprimer. Tellement que pour le iourd'huy ses Paradoxes sont en telle vogue, & en tel prix, que iusqu'au plus profond d'Allemagne on les desbat, & soustient: comme l'on void par les escripts des plus sçauants de ce tēps. Touttesfous ledict Sieur IOBERT, ayant promis vng grand nombre de tels Paradoxes (suivant le roolle qui est à la fin de sa premiere Decade, en la seconde & troisieme edition) n'ha pas voulu poursuiure cest argument, comme desdaigné & iustement courroucé des meschances que l'Enuie luy auoit suscité. Vray est que en diuerses œuures, comme il luy vient à propos, il desduit ses autres Paradoxes : mais ce n'est qu'en passant, & nompas a plein fond: dequoy les studieux sont fort marrys. Ainsi est-il aduenu (de mal-heur) à l'une de ses dernieres œuures, qui sont les Erreurs populaires & Propos vulgaires, par luy expliqués & corrigés, iusques au nombre de soixante chapitres: en promettant encor plus de trois cens, comme il appert du Catalogue, qu'il a faict quant-&-quant publier. Mais ayant entendu par vrays rapports, qu'il en soubstenoit

grand

& propos vulgaires.

cause de l'hernie, ne peuuent depuis angeandrer,

122. Pourquoy dit on qui ne peut mäger qu'il boyue.

123. Et-il vray, que les bains naturels ne valet rien, ou qu'ils sont dommageables, à ceus qui ont à la verolle.

CATALANS.

1. *Qui mingeo porc, mingeo sa mort.*
2. *Dono e capon, es toujours de seson.*
3. *Qui non ha lou ventre dur, non pot dormir segur.*
4. *Entre lo merdo, & lou pis, se nourris lou bel fils.*
5. *Non fais iamaïs Kiou, de ta bouco.*
6. *Assais fay, qui ren non fay.*
7. *Qui non flouris, non grano.*
8. *Qui se vay dormir en sed, se leuo en santad.*
9. *En iun, & en iulhet, ne fenno ne caulet.*

ESPAGNOLS.

Vna azeituna es de oro, la dos es de plata, la terçera es de plomo, la quarta es de hierro.

ITALIENS.

1. *Salata ben salata, poco aceto, & bien ogliata.*
2. *Vesti caldo, mangia poco, beue assai, & viueray.*

Erreurs populaires

3. Veghiar à la Luna , & dormir al Sole, non fa ne pro, ne honore.
4. Per tutto April, ne te descuprir.
5. Da saneto Luca, metti la man in bocca.
6. Bon vino, cattiva testa, & fauola longa.
7. Vin di fiasco, la matina buono, la sera guasto.
8. El pescé guasta l'acqua, la carne l'acconcia.
9. Chi non se gouuerna un anno , é cinbue anni dapoï senza allegressa.
10. Chi mal cena, peg gio inghiotisse.
11. Chi non fa come fa l'occa , la sua vita é triste & poca.
12. Frommaggio, pere , & pan , sonno pasto da vilan: frommag gio, pan' & pere, son paste da cauagliere.
13. Bisogna un matto, e un sauto, a tagliar del frommaggie.
14. El pan sutto, fa diuentar muto.
15. El vino alla sauer, & il pan al color.
16. Chi mangia el cauolo, e lascia il brodo, piglio il cattiuo, e lascia il buono.
16. Tre cose buone fa la Zouppa: fa patire, fa dormire, & fa la gangia rossa.
18. Chi vuol esser bene una settimana , laue se la testa: chi un mese, ama l'ze el porco : chi un anno, tolga moglie: chi sempre mai, se faccia prete,
19. A mal mortal ne medico, ne medicina val.
20. Ad ogni cosa remedio, excetto a la morte.
21. Chi va piano, va sano: & chi e sano, va lontano.
22. La mano al petto, la gamba al letto.

23. El maggior fastidio ch'habbia vn vecchio, è di non cagar tenero.
24. Chi va al letto senza tena, tutta la notte si dimena.
25. Vn paste buono, vn triste, e vn mezzano, mantiene l'huomo sano.
26. Chi fa quel fatto troppo, scola i fageoli: & chi nol fa, non ha figliuoli.
27. Chi lo fa quanto ei puol, nol fa quando ei vuol: & chi piu lo fa, manco lo fa.
28. Chi mangia carne e pesce, la vita gli rincresce.
29. Vino amaro, tien lo cara.
30. A tauola non sinuecchia.

L A T I N S.

1. A pane biscofco, à modico indocto, à fulgure & tempestate, defende nos Domine.
2. Cassius laudatur non albus, nec argus, nec Magdalenus.
3. A la mala, coxa noxa, cropion dibium, collum remota pelle bonum.
4. Vinum lymphatum, cito potatum, generat lepram.
5. Summa medicina est, nunquam uti medicina.

6 de caseo Barcam, de pane Bartolomeam

L'IMRIMEVR AV
LECTEUR DE
bonn' ame.

AMY Lecteur, ie dois bien estre excuse en-
uers toy, attendu ma bonne volunté, si i'ay
en plusieurs endroiets falluy contre l'ortographie
de M. IOVBERT, d'autant qu'elle m'a e-
sté fort nouuelle a ceste foys, & difficile à imi-
ter. Dequoy iet'ay bien voulu aduertir, affin
que tu n'imputes à l'auteur, quelque deffaut en
l'observation de ses reigles, ou de n'estre par tout
semblable à soy. l'espere de faire mieux vne au-
tre fois, si i'ay cest honner d'imprimer encores de
ses œuvres françoises: te priant ce pendant de cor-
riger toy-mesme les fautes plus notables, & qui
peuuet troubler le sens (lesquelles me sont eschap-
pees) comme s'ensuit.

COR-

CORRECTION DES. fautes plus notables.

Pag.3. ligne.3. lasciuité: 6.27. simplemant.7. 23. souue-
 nir.8.au marge, li.1. de la fac. des simpl. med. ch.29. Pag.
 9.li.1. cause la digestion.10.15. meprise.27.16. du sang.
 & 18. finification. 28. 30.8.Nous.39.8.cetuy-cy. & 18.
 qui tacher.46. 11. qu'ils les vantet. 47.23. portrait.57.
 26.il sy faut.59. 20.il le faudra.61.18.les fieurs.63.18.
 de complaire.64.29.moy, cognoissant. 65.21.gonde et
 presque.22.faim, & sont.66.au marge, Parad. 8.67.28.
 nostre orge.74. 1. interrupcion soit.74. 25. Condrieu.
 86.20.Mesme appareil.87.3. effaces depuis, ie ne le voy
 iusques a le sang des porceaus. 91. 25. veu sa grande.
 92.18. menstrual. 93. 4. n'an peut consumer. 96.4. l'ha
 mal.102.4.vne fieure.105.5.guidée de.113.7.S'ils eusser.
 & 29. manne, syrop. 122.20.casse, manne. 125.9. selon
 qu'elle: & 26. quelle heure.126. 25. quelle.128.16. resser-
 rer.& 19.et fort rompu.129.7.anuiron.132.21.m'ha fal-
 lu.133.6. mesaraïques.141.2.qu'on la.142.28. passer tel
 morf.148.26.Autât. 154.6.on les pourra.157.14.l'heur,
 que.183.29.bouche de.189.21.coit. & 25. D'où vient.
 200.8.aura il pardonné.202.16.veut dire.206.1. ayant
 recouert. 213.3. ie loue leur condicion. 215.22. quil
 desint. 219.19.produiset.223.7.ancor mieus la.231.25.
 estoilles a cinq rayons: & 26. lucur:ja-soit que.244.13.
 La reuerie.245.21.infecte.252.29.éguisans.256.18. qui
 la propose.257.1. ressoiuet.267.3. Car si le besoin. & 8:
 n'ont aucun.269.10.s'exerceait.281.28.donné totale-
 mant.

ADVERTISSEMENT
SVR L'ORTHOGRAPHIE
de M. IOVBERT.

L retrenche tant qu'il peut toutes lettres superflues: c'est à dire, celles qui ne sont prononcées au langage François: entendant par *François*, nompas toutes les langues auxquelles commande le tres-Chrestien Roy de France (à qui Dieu doit bonne vie & longue) ains la Courtisane, ou des lieux esquels on parle mieus. Car lesdittes lettres ne s'ot point superflues en quelques prouinces du grand Royaume de France, qui les prononcēt en leur parler vernacule. Exemple, le, *E*, superflu en ces mots *Lieüe & Eaue*, pour dire *lieu* ou *lië*, & *eau*, est bien prononcé en Poiteuin. Le, *s*, qui est superflu au dis mille mots François, est prononcé en Gascon, Languedogeois, & Prouençal. Ainsi presque de toutes lettres que le François omet & taïse en son parler, vous les oyez prononcér en diuerses prouinces de ce Royaume. La où *G* doit sonner, comme *I* consonante, deuant vn *A*, ou vn *O*, il entremet vn *E*, ou il escrit le mot par vn *j* longuet, signifiant consone. De cetuy-cy, vous en auez l'exemple au mot *jans*, au lieu de *gens*: affin que s'il e-

eriuoit *gears*, comme il escrit *mangeans*, on n'en-
 rēdit les grans hōmes dits *gigantes* en Latin. On
 ne trouuera pas etrange qu'il ecriue *mangeoit*,
 mot dissyllable, veu que tous escriuet *George*,
 aussi de deus syllables, où le *E* n'est point ouy.
 Il escriroit bien *manjoit* par *j* long & conso-
 nant: mais on pourroit equiuoquer, & pren-
 dre ce mot pour celuy qui signifie tenir en
 main, ou toucher de la main. Il escrit par *lh* les
 mots esquels on prononce *L* liquide, comme
 fil y auoit *li*. Exemple *filhe*, *galharde*, comme
 fil y auoit *filie*, *galiarde*: mais il ne faut faire que
 vne syllabe du *ie* & *ia*. Ce que l'etranger ne
 comprendra si bien, que d'estre vne fois auer-
 ty, que *lh* et vn *l* liquide ou coulant, tout ainsi
 que fil y auoit vn *l* apres. Il faict escrire *fou*,
cou, *mou*, *sou* (au lieu de *fol*, *col*, *mol*, *saoul*) ain-
 si qu'on les prononce. Il retrenche les *E* des
 tierces personnes plurielles *tiennent*, *dirent*, *firent*:
 & tant d'autres, comme on peut voir en l'Apo-
 logie de son orthographie cōposée par ses an-
 fans. Enquoy certainement il y a grand'epar-
 gne de lettres: & par consequent proffit à la
 Republique, entant que les liures imprimez
 de cette façon, seront à meilleur marché, au-
 moins de la dixieme part. Car il y a bien au-
 tant de lettres rabatuës. Ce qui est fort consi-
 derable, attēdu la multiplicité des liures qu'on
 ha pour le iour d'huy, par benefice de l'impri-

merie: lesquels il seroit bon de reduire en plus petit volume, & imprimer en moins de lettres qu'on pourroit, voire qu'une finifiast tout un mot, ou une sentence: à l'imitation des lettres Hieroglyphyques des Ægyptiens (chose bien inuentee) affin qu'on en peüst iouyr à meilleur marché. Outre ce, qu'un gros liure de plaist, & donne pensément à celui qui en desire la lecture: car on n'a pas plu-tost commencé un liure, qu'on en voudroit voir la fin. Vous verrez bien d'autres raisons en la fuditte Apologie (œuvre non moins utile, que gentile & delectable) & en la declaration des abus que l'on commet en ecriuant, mise en lumiere par très-excellent personnage, maistre Honorat Rambaud, homme très-digne de louange immortelle, pour l'extreme desir & ardente affection qu'il a de profiter au public, plus sans comparaison que a son particulier. Son liure est nouvellement imprimé à Lyon, par Ian de Tournes. Quand M. IOVBERT en parle, il dit qu'on ne le pourroit assez estimer: tant est de bonne grace, & preignant de raisons, le discours de ce bon homme, lequel il cognoit familièrement & aime extrêmement.

Κεκοπίδας νοσούντας ἰδὼν ἐπιδήμιον ἄλγος,
Εξεσάωσε κακὸν Κῶϊος Ἴπποκράτης.
Αγνοίῳ νοσούντας ἰδὼν ἐπιδήμιον κῆρας,
Ἔωσεν ἸΟΥΒΕΡΤΟΣ δευτέρως Ἴπποκράτης.
Ἰοσὴ πῶς Σκαλάν.

Illudit miseris varius mortalibus error:
Et nullum errores non genus artis habet.
Sed non, quàm medica, damnosior error in arte:
Unde salus doctis, mors rudibusque venit.
Non ducis indocti duplex datur error in armis:
Cui semel erranti tota caterua perit.
Non sibi commissio medicus bis aberrat in agro:
Errorem cuius mors aliena luit.
Ergò magna tuis, decus ô IOBERTE medentum,
Gratia debetur tempus in omne libris.
Qui non contentus praecepta docere medendi,
Quæ schola doctorum, Regis & aula probet:
Errores etiam, quos ignorantia vanis
Inuexit populis in sua damna, doces.
Quòd pietas est si qua viam monstrare vaganti,
Quam pius arte tuâ est vita tuenda labor.

ΙΟ. ΑΥΡΑΤΥΣ Ποῦτα Regius.

Minus Io captas nostris IOBERTE camænis,
Io triumphe, fas Io.

Aut (clari soboles patris) è styge Maena solue,

Aut monstra clauâ figere

Desine: vel fuerit tantis ingrata tropæis

Nostri camæna seculi.

Monstra quidem Alcides stupido metuenda popello,

Partu deorum discidit.

Monstra sed errorum tu Coa cuspide scindis,

Turbæ timenda Delphica.

Ergo tuis vi Io par sit IOBERTE triumphis,

Emitte Plutus è fauis

Maoniden: patris solium vel Apollinis, anlam

Stellis coruscant scandito.

IO. EDOARDVS *du Monin, Burg.*

C Hacun monstre sa faute, un monstre à faire
mieux.

Infinis sont de mal, un chemin de bien faire.

De IOVBERT & l'auis, & l'exēple à mieux faire,

Tance de faire mal, apprend à faire mieux.

C'est bien faire, auertir l'egaré d'aller mieux.

Le remettre au chemin, est encore mieux faire.

Suïser l'homme cheu de sa cheute, est bien faire:

Et luy tendre la main, est faire encore mieux.

Tant de lampes estaindre, Apollon n'a que faire,

Menteuses es couleurs, apprises de les faire

Pallir aux yeux trompēz, sinon qu'il luyse mieux.

En vain l'homme deffend, & reprend de mal-faire,

Sinō qu'ē faisant mieux, il enseigne à mieux faire.

Bien faict qui bien reprend, & mieux faict qui faict
mieux.

DV PERRON.



Le peintre & le graueur représentent fort bien
De ta face les traits : mais tu sçais encor mieux
Par ta plume exprimer & mettre sous noz yeux
L'image de ton ame, où il ne manque rien.

I. GUICHARD DOCT. MED. DE MONT.



LA SECONDE PARTIE
DES ERREURS POPULAI-
RES, ET PROPOS VUL-
gaires, touchant diuer-
ses matieres.

PREMIER CHAPITRE.

*Que l'on se peut & doit souuent passer du vin
dont il n'est tant necessaire, que cuido le vulgaire.*



AN s doute le vin est
tres-bon alimant, qui nō
seulemant angeandre de
soy beaucoup de sang,
ains aussi fait mieus dige-
rer les autres viures, re-
uient tost les esprits, susci-
le la chaleur naturelle &
luy donne vigueur, antretien l'humeur radi-
cal, epurge les excremans liquides par sueurs

& vrines, dissipant an fumee les plus sutils, qu'on nomme fuligineus. Brief, il est infinimant profitable, à qui an vse moderemant & à propos. Mais si on abuse de sa bonté, an le prenāt plus pour plaisir, que par necessité, il fait tout le contraire, angeandrāt mille maus au cors & à l'esprit: qui ont pour leurs causes prochaines, des crudites, phlegmes, froideurs, opilacions, & autres indispositions totallemant contraires aus qualites du vin. L'experience le demoutre suffisammant, quād nous voions que les yurogues sont fort sujets à catarthes, mal caduc, apoplexie, subeth, stupeur, paralytie, trablemant, gouttes froides, hydropisies, & samblables. Il faut donc vser du vin avec discretion, accommodant le naturel de ses proprietes, au besoin que nous an auōs. Et premieremant les anfans qui sont bien nés, an doiuet abstenir: parce qu'ils ont naturellemant si grand chaleur & humidité, qu'on ne leur peut augmanter ces qualitez, sans cuidant preiudice de leur santé. Outre ce que le vin rāplit fort la teste de vapeurs: dōt echauffant leur ceruelle boulhante, il andommage l'esprit. Passés les dis & huit ans, il est permis an bien petite quantité, & plus aus filhes que aus garçons, contre l'opinion vulgaire: & il le faut augmanter de peu à peu, iusques au quarantieme an. le dis de peu a peu: car autre-

mant

mant il trouble l'antandement, & l'elourdit
ou rand fueus, prouoquât la ieunesse à cho-
lere, luxûre & toute lasciuété. Aus vielhars il
est fort prôre, & leur est comme le lait aus
ansans: Mehe Platon (diuin philosophe) di-
soit, que Deu l'auoit donné aus hommes,
pour remède contre l'apreté de la vielhese,
medecine bie salutaire. Car il les fait raieu-
nir, hoblier le annuïs, soucis, soupçons, & cha-
grins, les randnt plus maniables, an remollif-
sant leur rude & dure condiciõ: tout ainsi que
le feu attandri & rand malliable le fer. De ce
propos on peu attandre, que le vin n'est pas
tant necessaire, que plusieurs ne s'an puissent
bien passer, non seulemât etans malades, ains
aussi an pleine santé. Car aus complexions
chaudes nommément, & aus ages de mesme, il
est nuisant: parcequ'il augmente leur chaleur
out e sa deuë proportion, an danger d'y met-
tre le feu, qui brulera tout l'edifice. Mais lais-
sant à part telles raisons: ie veus moutrer par
vne anquete, que l'on vit commodément, sai-
nemant, & longuement, voire an tout age, an
tout lieu, & toute saison, avec l'abstinence du
vin. Le monde est d'ancienneté diuisé an trois
parties (aujourd'huy on y aioute la quatries-
me, & la cinquieme) desquelles l'Europe que
nous habitons, est selon les Cosmographes, si
petite à l'égard des autres parties, que si tout

le monde n'estoit qu'une cité, come Paris, l'Europe de sa part n'y auroit qu'une maison où deus: l'Asie, l'Afrique & l'Ameque separeroient le reste. Or ce peu de temps, est l'endroit où il se boit plus de vin. Car aus autres pays, où il n'y croit point de vives, ou les ians s'abstiennent de ce breuvage (ice n'est à cachettes) par l'ordonnance de Maomet: duquel la secte ha prins telle estude, que les Chretiens ne sont qu'une pogue de jans, comparés à si grande troupe. An sont ils plus mal sains, foibles où delicats? Non: ans au contraire, nous admirons leur force. Ne dit on pas, il est fort comme un Turc? Quant à l'agilité, adresse, vivacité, & autres verus corporelles, ils ne cedent point aus Chretiens, s'ils n'an amportent le pris, outre ce qu'ils vivent sainement, & parviennent à grand' vieillesse. Si on dit, que l'Afrique & l'Amerique sont pays trop chauds pour l'usage du vin, mais que aus lieux froids ou tampus, on ne peut bien vivre sans tel breuvage, je repondray qu'une part de l'Asie est egallement tampus, & sous le meilleur climat, de l'opinion des plus renommes Geographes. Ce qui est vers le Septentrion, gele de froid: ce neantmoins le vin par tout est incognu, & par tout on vit commodement. Que dirons nous, si an notre Europe Chretienne aussi on trouve infinies personnes qui n'an

beuret iamais? & d'autres qui n'an boyuet guieres souuant, comme ez pays Septentrionaus & frois, où il ne s'an recueilt point: & apporté d'alheurs il est si cher, que les pauvres jans n'an tatet sinon les bonnes festes? car leur ordinaire est de l'eau pure, ou de la biere, ceruoise, citre, poyré, pommé, & autres breuuages artificiellement préparés de grains, ou de fruis. Ils ne viuet pas moins pour cela que les riches. ils sont autant sains & galhars, fauf le plus. An noz môtaignes (i'antans de celles qui sont vn peu loin des costaus & des plaines qui produiset le vin) les pauvres ne boiuet que de l'eau pure, & si viuet plus lōguement, etans moins souuant malades, que ceus du bon pays; auquel se trouuet ancores plusieurs qui, ou de natiuité hayssiet le vin, & l'abhorret estrange-ment, ou qui l'ont depuis quitté de leur gré, ayans egard a leur santé: comme pour euter les rheumes, catarrhes & gouttes. Tellement que si nous colligeons de cete diuision, le nōbre des vin-beueurs, nous le trouuerons si petit, que du monde party an mille, a peine les dis an seront. On n'oit pas dire pourtant, que nous viuiōs plus long tams, ou plus sainement a tout notre vin, que les autres des regiōs plus chaudes, plus froides, ou tamperees. Ce neantmoins le vulgaire ignorant, & sur tout le paysant, ha telle affection au vin, que sans luy il ne

panseroit viure. Sain & malade il an veut toujours, mesmes estant malade de fièvre ardante. Si on le luy defand, par ce qu'il augmente euidamment la brulante chaleur, & redouble l'excessiue alteraciō, la douleur de teste & des reins, mettant le patient en dangier de frenesie, il ha opinion qu'on le veut mettre bas & affoiblir, a ce que le mal dure plus longuement. Ces paüres ians cuidet parfaitement, que le seul vin soutiēt toute la force. Dōt pour chasser la maladie, ils cherchet à boire du meilleur. Il me souuient d'auoyr pansé y a vint & cinq ans, vn gentilhomme pres d'Aubenas en Viua-
rez, qui me vouloit prouuer, que luy ayant grand' fièvre & continuē, à raison d'vne vraye pleuresie, n'an deuyt abstenir: disant, que le Vin ha prins son nom de Vie, comme s'il estoit de son enfance. Et quand i'auoyz refuté cela, il me repliquoit ainsi: Comment est-il possible, que le vin, si bon & gracieus à toutes personnes, iusques aus plus incognus, fit mal à moy qui toute ma vie l'ay aymé & caressé extrêmement? Ne seroit il pas bien mechant, & nō pas bō, comme chacū l'estime? Voila les beaux propos que tienet les plus abillés d'antre les idiots, qui ne suiuet qu'vn appetit sansuël & brutal. Les autres cuidet s'implemant de faire leur proffit, n'estans emeus d'aucune volupté, nō pas mesmes trouuans pour lors bon goust
au vin

au vin, nō plus qu'à vne medecine: dont ils meritent de leur naïue simplicité, qu'on les oste de cet erreur. Qu'ils sacht donc, que les Medecins interdisent le vin an deus causes principalement: l'vne, quand le mal est de grād' chaleur par tout le cors, ou an quelque partie. Ne faites vous pas euidamment que le vin echauffe? Si vous plaignes d'estre comme dans vn feu, n'vses rien de ce qui peut augmanter la chaleur. Quelqu'vn me repondra, qu'on le trampe, ou (comme on dit) laue si bien, qu'il n'ha plus gout de vin. Et dequoy sert il donc, si l'eau abbat totallement sa force? Vous direz, qu'il corrige l'eau de sa qualité, & le peu de substance qui est parmy, recree & maintient la vertu du patiant. Il faut donc que ce peu de vin retienne son naturel, an proporcion de sa quantité: dont il nuïra toujours quelque peu. C'est parler à toute rigueur; nompas an Medecin dous, humain & amy de nature: lequel outre les sudittes consideracions, doyt auoyr egard à la coutume, & cupidité du malade: & se souuanir de la sances du bō vieillard, qui dit si sagement, le boyre & le manger vn peu pires, mays, plus agreables, doiuent estre preferes à leurs cōtraïtes. Et luy mesme dōne ez maladies aiguës, qui sont avec fièvre cōtinuë, du petit vin, qu'ō nōme Oligophore, lequel nous pouuons cōtrefaire avec force

„ Hipoc.

„ Aph. 3.

„ Liur. 2.

Liu. de
la facult.
des simpl.
med. cha.

eau & peu de vin. Je diray bien d'auantage, que le vin fort trapé desaltere mieus, raffraichit & humecte plus que l'eau pure, ainsi que Galen remoutre del'oxycrat, an ceus qui ont grand' soif. Car le vin, & le vinaigre fait plus auant penetrer l'eau, qui raffraichit & humecte: dôt il s'ansuit, qu'on s'an desaltere mieus. Et de fait, si ie ne craignois l'abus & l'importunité (car si on an permet vn doit aujourd'huy, demain on an veut deus) & le reproche qu'on an peut ancourir, ou pour le moins la suspiciô d'auoir mal procedé, quand apres suruient quelque accidant de la nature ouordinaire de la maladie (lequel on raportera à vne goutte de vin) i'an permettrois quelque peu aus febricitans qui en ont grand desir: & ie m'assure qu'ils s'an porteroyt mieus. Mais nous craignons tât de choses, que nous aymons mieus que le malade andure quelque desplaisir, que si l'honneur du medecin an estoit interesé. Car on abuse facilement de ce qui est plaisant: & si on permet quelque chose qui soit vn peu suspecte au vulgaire, tout est calomnié. Outre ce qu'il y a beaucoup d'autres moyens de sustanter vn malade fort debile, exans de tout dangier ou soupçon: comme sôt potages, consumés, coulis, pressis, destils, eau de chair, œufs frais & moulets, qui nourrisset bien plus qu'vn peu de vin. Vray est que le

vin cause mal digestion, & facile distribution des autres choses qu'on prand: il recree, reiouit, fait mieus dormir, & si desaltere mieus etant bien trâmpé, que ne fait l'eau pure, ou avec du sirop. Seulemant ie remoutre, de ne s'y affectionner tant, qu'on an veulhe boire comme que ce soit, & mesmes qu'il sante au vin, quand les medecins le defandet, ou (que pis est) d'an boire a la derobbée, comme pour nous trôper. Nous essayons par tous moyens, de retirer le bois qui brule, & oter les charbons, pour etaindre ce feu: & eus au contraire, y verset de l'huile. Ils ont egard a la foiblesse: mais commant est ce qu'on remettra la force au cors, si la chaleur que le vin augmante est-ce qui l'affoiblit? On void que la chaleur de l'été, du bain, ou de l'etuee nous rand tous laches, vains & abbatus. La fieure cause samblable effet, plus de sa simple qualité, que du fardeau des mauuais humeurs. Si an meprisant noz raisons, ils vouloint a tout le moins antandre aus auertissemans que nature leur donne, ils s'y porteroyt plus sagement qu'ils ne font. Car côme l'estomac etant plain d'humeur, le plus souuant nous perdons l'appetit (ce q denote qu'il n'y faut plus rien mettre, que cela n'an soit hors) aussi quand le vin nous samble amer, ou d'autre mauuais gout, comme il aduient presque an toutes fieures, il

faut soupçonner, que pour lors il n'est pas profitable, & que le cors n'en a besoin. Car Nature ha balhé vne rude cognoissance à l'estomac, & à sa bouche (qu'on appelle vulgairement le cœur, à l'imitació des anciens Grecs) de ce que nous est conuenable, avec l'appetit qui nous en auertit, affin que nous regis par elle, si nous etions bien sages & hobeissans, d'un instinct qu'elle donne, sachions nous gouverner sains & malades. Mais l'intemperance des hommes est telle, que nonobstant ces admonitions, ils veuleut suiure vn autre desir. Je tiens cela pour ordinaire, que quiconque est tant malade (sur tout ayant fièvre) sent le vin de mauuais goût, il m'éprise & offense nature, si l'entreprend d'en vser. Mais ie ne dis pas au contraire, qu'on en puisse boyre, si on le trouue bon. Car la seconde occasion qui nous contraint à le desandre, ne luy fait pas toujours perdre sa friande saueur. C'est le rheume ou catarrhe, lequel lors qu'il est loin de la bouche, n'y peut imprimer mauuaise qualité: ce neantmoins le vin et a bon droit prohibé en telle affeccion, pource que les humeurs fondus, subtiliés, & echauffés de la chaleur du vin, deffluet plus aisement: & que la mesme qualité elargit les passages, en dilatant les pores & conduis. Outre ce que le vin est si fort penetrant, que nous le sentons quelquefois iusques

ques aus ongles, aussi tost qu'on l'a beu. Dôt
rancontrant par chemin des humeurs gros, pe-
sans & tardifs à se mouuoyr, il les pousse, agite
& rand fluides. Pour ces raisons, nous consel-
hons aus rheumatics, catarrheus & goutteus,
d'an abstenir. Ce n'et pas pour noltre plaisir,
comme si nous deléctions à gchenner les per-
sonnes, & à les traiter rudement. c'et le mal
qui nous moutre dequoy il s'agrandit, & nous
le remoutrons aus malades. N'est ce pas vne
lourde faute, de balhier au mal les armes, des-
quelles il vous battra? Doncques il conuient
se ranger à cette conclusion, que le vin n'est
pas tant propre à l'homme, qu'il ne s'an doieue
souuant passer, an santé & an maladie: veu mes-
mes qu'il y a infinité de ians, qui n'an buret ia-
mais, & ils n'an viuet moins sainemât. C'et vne
grand' erreur, de l'estimer si conuenable à sou-
tenir noz forces, que nuisant de sa qualité, on
ne le veulhe pas quitter. On fait des boissons
delicates pour les plus delicás, an lieu du vin:
comme et l'hippocras d'eau (nommé Bou-
chet) & l'eau de coriandre. La ptisane & l'hy-
dromel seront pour le commun.

S E G O N D C H A P I T R E .

*Contre ceux qui panset, toute fieure estre de froid,
hor-mis celle qu'on nomme chaude. D'où procede
le frisson, & le retour des fieures terminees.*

L'ABVS que l'on commet du vin
es fieures, comme nous venons
de moutrer, n'est pas seulemât
fondé sur l'antretien de la for-
ce, ains sur vn autre erreur du
vulgaire, qui pâse que la fie-
ure soit maladie froide. Sa raison est (à mō auis)
que ce mal est causé de froid, & viêt avecques
froid: sinō (par auâture) la fieure cōtinuë, qu'ō
nomme pour cerespect fieure chaude. Car vo-
luntiers apres vn grand trauail ou exercice,
qui ha fort echauffé le cors, si on est surpris
de froid, il y a danger de fieure. Et de fait
le peuple ne ressoit guieres autre cause du
mal, qu'il appelle Morsondemant. Si la fieure
est terminee, comme la quarte, tierce, ou quo-
tidienne, soit simple, soit double ou compo-
sée, parce que l'acces commence par frisson,
rigueur, trablemant, ou horripilation, il cui-
de proprement, que le mal soit la froideur an-
close dans le cors, laquelle il faut vaincre par
chaleur, nature luy anseignant qu'un contrai-
re repousse l'autre. Doncques ces bonnes ians

ont opinion, que la fieure soit ce grand froid causé de froid. Tellement que si on leur demande apres l'accès, s'il ha gueres duré, ils respondront, vn' heure ou deus pour le plus: n'estimans que la chaleur qui vient apres le froid, soit du conte. Voila pourquoy tout leur dessein est a se rechauffer: dôt ils se couuret fort, chauffet des pierres & tuilles pour les pies, boiuet de bon vin pur, humet des boulhons epissés, saffranéz, avec du frômage fort vieus, & piquant comme poyure. Brief ils n'essaient que à surmonter le froid, & prouoquer bon-gré maugré la sueur: comme si le mal estoit d'humeur gelé & glacé, qu'il fallut fondre & conuertir an eau. Aussi quand ils commencent de sentir la chaleur, ils estimet que la fieure est passée, & ne faut plus qu'attendre la sueur. Parquoy les mieus auisés d'antr'eus, andurent patiammant la gehenne d'estre presque etouffés de couuertes durant la grand chaleur, pour epraindre l'humeur, tout ainsi qu'on presse vn eponge a deus mains. Ils panset, que l'importune chaleur qui tant & si longuemant les annuie, apres le frisson peu durable, n'est que de leur procedure & gouuert: ayans par tous moyens voulu subiuguer le froid, qu'ils tiennet seul pour essance du mal. Dont depuis ils nourrisset la chaleur ardante le mieus qu'il leur est possible, iusques a la

fueur. Il ne se faut donc ebahir s'ils vset de l'epicerie, puisq'ilz ont telle opinion. Mais les pauurets sont an tresgrád' erreur, quant à l'essance de leur mal: & de là pullulet ces fautes. Car ils ne sauēt pas, que la fieure soit l'ardante chaleur, & le froid son precurseur, ou le trompette qui signifie sa venuë: ce que ie leur feray antandre bien aysemant par ce discours, an remoutrāt la cause de si diuers effais. Notre peau est toute percee de petits trous, lesquels on ne peut apercevoir, si ce n'est par la fueur qui an sort, & du poil qui an occupe la plus grád part. Nature bien auisee l'ha fait ainsi, pour donner libre passage aus fumees excitees de nostre chaleur, lesquelles sans cela l'etouferoient, comme on voit mourir le feu a faute d'estre euanté. Ces fumees sont famblables à suye, noires, grasses, de matiere brulee, inuisibles de leur subtilité, si ce n'est par effait, qui et la saleté, noirceur, & graisse qu'elles rendet à noz chemises & autres vetemens. Aussi an hyuer, pource que le froid serre & condanse la peau des mains (qui sont plus decouvertes pour nostre vsage, qu'autre partie du cors) et rude & noire dudit excrement retenu. Car il ne se vuide pas bien, quand le cuir est cōstipé. C'est donc l'vsage, & de quoy nous seruet les pertuis de la peau; sauoir est, de donner lieu aus fumees, vapeurs & exhalacions

eions cōtinuëlls de la chaleur, qui toujours trauaillie au cors sur les humeurs, les apretant à nourriture. Si ces trous deuient bouchés, ou tant serrés que la sūye y demeure, ne pouuant passer à trauers, nostre chaleur deuient aigre, piquante, forte & brulante outre mesure, comme le feu couuert de sandre : & s'il dure longuement ainsi, ces excremans l'estouffet & accablet. Or quand nous auons trauailhé, la chaleur augmantee echaufant les humeurs, excite & pousse dehors beaucoup d'exhalacions; desquelles les humides souuant deuient eau, & font la sueur; les seiches s'anvōt en fumee. Lors il est de besoin, que les pores (ainsi appellons nous les pertuys de la peau) soient ouuers à commandement. Car si le froid les surprand & constipe, l'echauffement conceu & permanent fera de la chaleur naturelle (qui est douce, benigne, & molle) vn feu corrompant les humeurs. De cela procede la fièvre continuë (que le vulgaire appelle Chaude) quand le desordre imprimé aus humeurs, perseuere quelques iours sans intermission, ne cessant pas aussi tost que sa cause est abolie. Car les exhalaciōs suscitees à grand tas, requieret d'estre vuidees. & le sang trop echauffé demande rafraichissement. Quelq̃ fois la matiere corrompuë du feu

allumé par la cōstipation du cuir, se perd à vn acces de fièvre, qui termine en sueur: mais certaine portion de chaleur estrangiere, (qu'on peut dire empireume, comme trace & vestige du feu) restée du premier desordre, apres vn laps de tams renouuelle semblable inflammation & corruption d'humeurs. Ce que fait les fieures intermittantes de sis heures, d'un iour, ou deus; qui ne faillet d'auoir leur retour ordinaire, iusques a tant que la mauuaise qualité imprimée du premier echauffement au cœur, soit antierement etainte & abolie. Voila comment le froid exterieur cause les fieures, d'une forte chaleur, qui embrasée dans les humeurs perseuere bien longuement. Ainsi d'un contraire nait l'autre, par accidant. Car la froidure serrant le cuir, ampeche la trāspiration, qui doit entretenir la chaleur naturelle au deuē medioerité. Il ne faut donc panser, que la fièvre soit vn mal froid, parce qu'elle peut venir de froid: veu mesmemant qu'il y ha prou d'autres causes, que le peuple soupsonne abō droit & ressoit entre les occasions de la fièvre: cōme quelques viandes mauuaises, la cholere, la tristesse, les vers, la chaleur du Soleil, & samblables, qu'on ne sauroit faire auenir au vulgaire Morfondement. Outre lesquelles la crudité, oppilacion, pourriture, aposteme interne, chaleur de l'air alterante, le mouuement excessif,

veiller

le veiller trop lóguemát, & autres causes incongnues au peuple, n'an font pas moins. Toutes reuient a ce point, d'ágeádrer beaucoup d'exhalaciós, an corrópát les humeurs: ou d'echauffer par trop le sang, les esprits, ou parties solides, d'vne chaleur pernicieuse, qui et la propre essance de la fieure. Elle ne sera pas donc froide, comm' on l'estime de ce que le froid extérieur quelque fois an est cause, puis que nous la voyons plus souuant prouenir d'un autre moyen. Mais comment seroit il possible (dires vous) que la maladie etant chaude, soit avec horripilacion, rigueur, frisson, & trablemát, iusques a clyqueter des dans? Cecy est l'autre cause d'erreur aus idiots, qui ne voyans d'ou procede vn si etrange accidant, qu'ils estiment plus facheusque tout le demeurant, fy arrettet antieremant, & le nommet la fieure. Parquoy il leur faut enseigner, qu'est ce qui meut tel accidant, & qu'il signifie, pour abolir les fautes que les pauvres jans y commettet imprudamment. Le commun des medecins (duquel ie ne me veus departir pour maintenant, n'ayant affaire qu'au vulgaire) tient, que des fieures intermittantes (qu'on appelle vulgairement, terminees) la chaude qualite fieureuse corromt l'humour contenu dans les vaisseaus: & quand il est si difforme & gaté, que nature l'ha an horreur, les veines le iettet dehors d'vne grand

secousse , & le repandet parmy la chair , les nerfs , peaus ou membranes , & autres parties sensibles. Cette matiere et si cuisante , & se meut si roidement, que les androis où elle passe an ont telle douleur , qu'il samble qu'on les pique , dechire , detranche ou ecorche. Il ne faut pas trouuer estrange, qu'un humeur chaud de pourriture ou autrement , cause frisson & rigueur : car l'eau bouillante ietee a l'impourueu sur vn cors nud , le fait trambler aussi bien que la fioide. Les scintilles du feu an font de mesme , & si on et piqué seulement d'une eguille bien viuemant , tout le cors se retire . Ainsi les parties sensibles irritees de l'humeur cuisant & brulant , secouët toute la personne, quand elles tachet an s'epraignant de reietter ce que leur est mis sus. De là vient le bailher, l'etirement ou pandiculation, & la tous, qui presignifiet l'aces: lequel dure apres tels accidans , iusques a ce que la matiere soit consumee & dissipée an sueur ou fumee . Car le froid n'et, sinon tandis que l'humeur et poussé d'un lieu a autre violamment, & qu'il commence mieus a pourrir an lieux etroits. Car depuis que les mambres l'ont ja accoustumé, vn peu apres sa venue qu'ils refusoient , ils n'an sont plus tât offencés. Et quand la matiere est plus inflâmee, sa chaleur poursuit tout le cors,

apres

apres auoyr gagné le cœur. Ce desordre continuë touiours an augmantant, iusques a l'extreme corruption de l'humeur: lequel subtilié de la chaleur, se perd an fin, partie visiblemant, partie inuisiblemant, quand la declina-
cion approche. Donques le mal de fieure terminee, n'et sinon d'humeur pourri & corrompu de mauuaise chaleur: dont il deuient brulant, & brule si longuemant qu'il soit aneanti. Le frisson qui precede, et la moutre ou arriuee des matieres qui font l'acces. Tellemant que c'et grand erreur, de tenir le frisson pour essance de fieure, nompas l'ardeur qui s'an ansuit: veu mesmes que le nom denote euidammât, auquel des deus il la faut assigner. Car fieure n'et ainsi nōmee de la froideur, ains de ferueur, à l'imitation des latins, qui la deduiset d'ebullicion, comme les grecs de feu.

Je pense auoyr suffisammant anseigne, que la fieure d'où qu'elle procede, & de quelque espeece que ce soit, et toute fondee an chaleur: tellemât q les pauures idiots abusent de l'echaufsemant, gehēnet leur cors an vain, ampiret leur mal, & se tuet souuant a force d'espissierie, vin pur, & couuertes. Ilscuidet tout estre de froid & qu'il ne faut que bien suër. La fieure continuë & ardante, qui n'ha point de frissons, ils l'appellet fieure chaude: comme s'il y an auoit de froides, ne sachans pas ce que le mot,

de fièvre importe. Et si on me demande, pourquoy donc les continuës n'ont aucun tremblement ? ie repondray ce que tient nostre escolle, que la matiere est corrompue toute dedans les veines, & ne sort pas aus membres plus sensibles, sinon quelque fois a l'antiere terminaciõ, qui est aussi suivie d'une rigueur. Reste d'antandre (comme plusieurs sont curieux de le sauoyr) d'où vient que les fieures intermittentes ont leur retour a mesme heure, l'une tous les iours, l'autre de deus an deus, & l'autre an trois iours vne fois. Je suis content de leur en dire l'avis commun des medecins. C'est, que nostre cors ayant besoin de quatre diuers humeurs, pour nourrir tant de parties qu'il ha fort dissimblables, il en angeandre plus d'un que d'autre, selon qu'il leur appartient. Tellement qu'il fait grand' quantité de sang, & moins de phlegme, beaucoup plus toutefois que de cholere, & plus de cette-cy que de melancholie. Or s'il auient que le phlegme pourrisse, estant corrompu de la chaleur fiévreuse, tous les iours ce mal reuiendra. Car le phlegme s'angeandre aisement an peu de tans, dont il est fort copieux. Nous n'auons pas tant de cholere, & ancor moins d'humeur melancholique, pour faire si promptement reuenir les acces: il faut plus grand sejour pour en asssembler quantité. Posons le cas (par maniere d'exemple) que tous
acces

acces requieret vn' once de matiere. Au premier, ce qui l'auoyt prouoque est deja consume: Le segond ne peut reuenir, que l'humeur ne soit de nouveau amasse, en telle porcion que puisse molester nature, sauoyr est (come nous supposons) quand l'once y sera toute. car la dimye, ne les trois quars, ne peuuet exciter ce feu. Le phlegme dans sis heures deuient si abundant, qu'à peine le reste du iour occupé de l'acces quotidien, en peut venir a-bout. Il faut plus de trāte heures a faire l'once de cholere, requise aus acces de la tierce: & deus iours pour renouueller ce peu d'humeur melancholique, causant la fieure quarte. Car on croid, que les humeurs se corrompet & deuient febrifiques de peu a peu, nompas tout a-coup: & que durant les intermissions, il s'en viciē autāt de l'amas qui et de long tams au cors, qu'il en faut pour vn acces, s'il ne s'angeandre nouuellement tout de prauē, pādant les treuues paroxymiques. Parquoy si l'once et toujours presente a mesme heure, la fieure reuiēdra toujours a mesme point, & sera de mauuays guerir, come dit Hippocras. Or bien souuant ell' est retardee ou deuanee, parce que nostre cors endure mille changemās des choses que nous faisons, vuidons, y receuons, ou appliquōs: de sorte que la simple quarte peut par vn grand desordre deuenir double, & triple: c'est si on an-

Hypoc.
 Aphor. 30
 Liur. 4.

geandre tel amas de melancholie, que l'once y soit antiere tous les deus iours, tout ainsi qu'an la tierce: ou chaque iour, comme an la quotidienne. Car l'essance des fieures (sinon des simples) n'est pas touiours conforme a leur appellation: & nous n'estimons tierce, toute fieure qui reuiet le troisieme iour, ne quotidienne celle qui est ordinaire. Mais i'antre vn peu trop auant aus difficultes, & plus que n'ha besoin le populaire: lequel se contantera bié de sauoyr, que les acces des fieures terminees suiuet la quantité de l'humeur qui les cause, ainsi que no^s auôs deduit. Je pourrois alleguer plusieurs autres raisons, si mō discours estoit pour medecins. Je m'an passe fort de legier, & ne recherche les grans subtilites que meriteroit la dispute. Si ie vouloys mieus sonder ces propos, il faudroit mettre an doute, tout ce que nous auons dit des causes du frisson, qui preuiet la chaleur. Car c'est la commune opinion, laquelle nous refutōs an noz Paradoxes: comme aussi tout ce qu'on dit de la pourriture des humeurs febrifiques. An quoy ie suis tres bien soutenu par maitre Simon Simonee, tres-docte & subtil philosophe-medecin, qui ha excellammāt elaboré le suiet que i'auois seulement esbauché.

Il est tams de conclurre, qu'il ne faut plus distinguer la fieure an froide & chaude, veu
que

que le mot de fieure importe ebullicion. C'est vn ardeur & inflammacion, qui ne peut andurer le mot de froide pour surnom : & ce mot chaude y est superflu : car il n'y an ha point d'autre. La chaleur, & nompas le froid, est le vray mal auquel il faut remedier.

TROISIEME CHAPITRE.

Du Morfondement & Larfondement: & comment le peuple s'abuse, cuidant que tous les maus des trauailleurs, (ou la plus part) soit de Morfondement.



Ource que nous auons cy dessus mancionné vne cause de mal, qu'on appelle Morfondement, auquel le vulgaire rapporte presque toutes ses maladies, & principalement la fieure: ce sera bien a propos de remoutrer que c'est, & qu'il ne le faut pas estimer si commun. A ce que ie puis comprandre des remedes que y font les payfans, & des propos qu'ils an tienet, Le Morfondement est, quand apres vn grand trauail, echauffant tout le cors i'usqu'a suer, on est surpris de froid. La fieure an prouient bien ay-

sement, à ceus qui sont replets & abondent en
 excremans, si leur cuir est aisé à constiper,
 par les causes deuant dites. Aus autres, les
 chairs en deuiet iusques aus os, comme si on a-
 uoit tout brisé: il y a lassitude & pesanteur a-
 uec peine de respirer. Cecy et le plus ordinai-
 re au mal de Morfondement: & auient, de ce
 que les vapeurs emeuës par la chaleur, ne pou-
 uât trauerser la peau resserree du froid, demeu-
 ret parmy les nerfs, muscles, & tandonz qui
 font le mouuement: dont ramplis & ampechés,
 ils manquent à leur office. La douleur qui s'en
 ensuit, et comme si toute la chair estoit piquée
 d'épines, ou ecorchée, ou pleine d'apostemes,
 enflée ou tannée, selon la qualité des exha-
 lations, vapeurs & fumées. La difficile respira-
 tion prouient, de ce que le poumon est surpris
 de l'air froid apres l'échauffement. car ses tui-
 aus s'anroydisset, de sorte qu'on ne les peut aise-
 ment dilater ainsi que de coutume: & pource
 les morfondus en deuiet pouffifs. Autre-
 fois les pores du cuir sont tant ouuers, que le
 froid penetre iusqu'au dedans, saisit & assie-
 ge les veines: lesquelles il peut non moins bou-
 cher ou oppiler, que le petit froid constipe
 les trous du cuir. Et cela donne commence-
 ment aux fieures, qui sont d'obstruccion inter-
 ne, par la seule constriction. Quelque fois il les
 anroydit, de sorte que quand ez violans efforts
 elles

elles ne peuuet consantir, s'antr'ouuret par le bout, ou ! creuet an quelque androit. Ainsi le sang verse & coule an quelque cauité, où il se calhe & deuient noyr. Ce qui auient communement au poumon & au vantricule. De là s'anfuit, qu'on crache, ou vomit du sang an l'espece du Morfondement, que le vulgaire craind le plus. Car il pense, qu'il sort ainsi noir & calhé des veines, où le froid penetrant l'a congelé. Mais c'et vn erreur bien facile à reprouuer: premierement de ce qu'il ne pourroit passer l'estroit du bout des veines, quand il seroit déjà calhé: & faudroit vne grand' rōpure aus gros lopins qu'on an vuide. D'auantage, il et impossible que le sang gele dans les veines pour la froideur: autrement, quand on ha les parties extremes, piès & mains frois cōme glace, nous pourrions croire que le sang y et figé: Ancora plus facilement se calheroit il au cors des trepassés, où toutesfois il demeure toujours liquide: comme nous voyons par les anatomies, au bout des dis ou douze iours. Ce n'et pas la tiedeur des veines (quoy que die Aristote) qui garde le sang de calher. Car tout le cors et assez chaud, & neantmoins an nul autre lieu, que dans ses vaisseaus, le sang peut estre gardé qu'il ne soit pris. C'et vne propriété & naturelle condicion qui rend les veines ainsi conuenables a conseruer le sang.

Dez aussi tost qu'il an et hors, an quelque lieu qu'il tombe, il se calhe necessairement: & si c'est dedans nostre cors, il fait mille maus semblables à ceus du venin. Donques il faut bien ampescher que ce malheur n'auiene; & quand on le peut soupçonner, il conuient faire par tous moyens que le sang demeure fluide, ou qu'il se degeler, comme pretand le populaire.

Qu'ainsi soit, incontinent qu'il se trouue vn peu mal, apres s'estre echauffé & soudain rafraichi trop viste, se doutant que son sang ne commence a calher, ou qu'il soit deja pris, il vse de la mumie, de la pois, du persil, d'eau de nois, d'eau ardent, moutarde antiere avec du vin pur, du souffre, ou du saffran, de la sariete an poudre, ou du suc de berles, & semblables choses qui peuuet fondre le sang: ou d'eau de pate, avec du mithridat, ou du chardon benit, & des fleurs de geneste, pour exciter la sueur. les autres boiuet d'eau sel an fasson d'eau benite, ou de l'eau sandree comme lexiue. Il y a plusieurs autres grans secrets, pratiqués antre les pauures jans: desquels le but n'est autre, que d'echauffer & degeler le sang, qu'ils soupçonnet toujours estre calhé par leur Morfondement, soit il avec fièvre, ou sans elle. Car il peut causer ces deus maus ansemble, ou separes.

De ces propos ie ueus conclurre, que le propre du Morfödre est, de refroidir le sang dedäs
les

les veines. Je dis que c'est vne propriété dōnée a cette cause, & q̄ peu ou point d'autres maus font la mesme congelacion. Car il faut que la peau, & tout le cors soit bien ouuert: tellemāt que le froid n'y treuve aucun ampechemant. Ce qui auient proprement par l'occasion suddite. Et voila que i'estime vn vray Morfondement, auquel peuuet profiter les remedes que fait le populaire. Car quant aus fieures, elles ont tant d'autres moyens, qui les produisent (comme nous auons dit au precedant chapitre) que c'est vn grand abus au peuple, d'alleguer toujours cetuy-cy d'un ordinaire. La fièvre et plus souuent d'alheurs, que de Morfondemāt, & luy seul peut causer le calhemāt d'u sang; hor-mis la cheute: mais c'est d'une autre faſſon. Parquoy il faut vſer de ce mot an la plus propre ſigification, & ne l'accommoder ainſi communement a toute occasion de fièvre. Car le Morfondement peut causer deus sortes de maus: l'un deſquels ne prouient d'autre choſe, & l'autre et commun a pluſieurs. Donques les jans abuſet fort de ſon appellacion, & ſe trompet lourdement, quand ils rapportet là toutes fieures, & pluſieurs autres maus, qui ne prouiennent aucunement de froid, interne ou externe.

Il ya vn autre mal ou accidant, qu'on nōme Larfondemant, an quelques lieus où i'ay esté. & diset estre Larfondu, celuy qui an ses excremans (comme vrine & fiante) rand la graisse fondue, tout ainsi que du Lard, d'oū vient l'appellation. Cela et aus fieures ardantes, que les Medecins appellet colliquantes : parce que l'extreme chaleur dissipe les mambres solides, & les amoindrit peu a peu, les acheminant a l'hectique. Lors que le peuple les cognoit Larfondus, il n'an espere plus de guerison. & pense que l'occasion de ce desordre, nommé Larfondemant, est excès an choses trop echauffantes, ou de matiere venimeuse. Tellement qu'il y a notable differance du Morfondu, au Larfondu, mesmes selon le vulgaire, qui et l'inuāteur de ces noms.

C'est bien asses discouru, pour moutrer l'erreur de ceus qui preschet tant leur Morfondemant, & ne sauet qu'il signifie : neantmoins ils luy referet la source de tous maus, ou peu s'en faut. I'ay dit, que c'est le froit surprenant la chaleur emeuë du trauail, comme le vulgaire l'antand. Mais si c'estoit apres le bain, le courroux, ou autre echauffement, il ne changeroit pourtant de nom: car nous auons egard a la seule chaleur, d'ou qu'elle procede & viēne.

QVATRIEME CHAPITRE.

Pourquoy ordonne l'on de boire du vin pur, a ceus qui sont fort echauffés: & de pisser auant que se mettre an repos, quand on ha fort trauallé.



Ceus qui ont fort trauallé on donne a boyre du vin pur, voulant (a mon auis) ampecher & detourner la cause du Morfondement, laquelle on constitue an froid soudain surprenant la chaleur, dont le sang se congele. Leur intencion est bonne, & ils font mieus qu'ils ne repondet. Car ils diset que cela raffraichit, & garde qu'on ne se morfonde. Premierement, le vin echauffe euidamment. Comment peut il donc raffraichir? S'il le fait, c'est par accidat: tout ainsi que si on disoit, que le feu refroidit nostre cors; parce que nous deuenons plus frois, apres que nous y sommes chauffés, quand depuis nous sortons a l'air froid. La raison est, que les pores ouuers a cause de la chaleur, donnet antree a son contraire, plus facile qu'au parauant. Ainsi le vin peut raffraichir, an estaignant de sa grande chaleur, la moindre qui est prouenuë du trauail, & antretenant la naturelle an sa condition. Nous pouuons aussi dire, que la fraicheur est causée du vin pur, s'il ampeche que

- le froid surprenant la chaleur, n'angeandre
 3. la fieure, qui bruleroit le cors. Tiercemant il
 raffraichit aussi, quand il fait que l'emocion, &
 la chaleur imprimée, s'appaise petit a petit, &
 non pas tout a-coup. Ce qu'apporтерoit vn
 grand dangier, comme fait toute mutacion vi-
 te & soudaine. Car nature ne la peut andurer,
 sans offance & deplaisir. Nons pouuons aussi
 4. dire, que si on boit de l'eau quand on est fort
 echauffé, il y a dangier d'hydropisie, com-
 me dit Galen. Ce que le vin ampeche de
 sa chaleur potentielle, qui antretient la na-
 turelle du foye & de l'estomac: neantmoins
 les raffraichissant de son actuelle froideur,
 5. quand il est prins de mesme. D'auantage,
 le raffraichissement quelques fois signifie,
 nouvelle prouision de viures, & quelque
 reparacion. Car on dit proprement raffrai-
 chir, pour aitalher, ou renouueller les mu-
 nitions. Item il signifie racourtrer & ajancer
 le vieus: comme quand on dit, raffraichir
 le bord d'une robbe. Or telle signi-
 ficacion conuient bien a nostre propos. Car
 le traual fait grand' dissipation des esprits &
 vapeurs du sang: dont les esprits qui restet an-
 tiers, sont las & desseches. Le vin pour-
 uoit a tous ces maus, recreant les esprits, repa-
 rant leur dōmage, & anangeandrant de nou-
 ueaus, etant subtil & vaporeus. Voila com-
 mant

mant il rafraichit le cors, l'auitalhant d'espris, esquels noltre force consiste. Donques par toutes ces raisons, le vulgaire dit bien mieus qu'il ne pense: & fait ancor plus sagement, d'ordonner le vin pur aus echaufés. Le second point de leur reponce est, qu'ils pretendet d'ampecher qu'on ne deuïene Morfondu. Il y a double Morfondemant, comme i'ay dit par cy deuant. L'vñ, quand on est surpris de froid, constipant noltre peau, & augmentant la grand' chaleur ardante, de sorte que la fieure s'an ansuit. L'autre calhe le sang, nompas dedans les veines (comme le peuple croid) ains celuy qui se verse & s'epand dans l'estomac, les boyaus, ou ailleurs. Car il est impossible (sinon, parauanture, par quelque rare & secrette occasion de mal) que le sang vienne a se congeler dedans ses vaisseaus naturels. Mais hors d'yceus, tout incontinant, ou bien tost apres il se calhe. A ces deus especes de Morfondemant, conuient proprement le vin, etant sutil, penetrant, & echaufant, comme le desordre requiert. Car la penetracion conduisant' la chaleur, tiét les pores ouuers contre le froid, iusques a tant q' la vapeur emeuë ayt passé s'õ exhalaciõ, & q' la fumee du sãg echaufé ne soit point retenuë. Par ce moyé la fieure est detournée, quand il n'ya point de cõstipacion, ne dedàs ne dehors.

32 Des traualhés & echaufés.

Quant a la calheure du sang, le mesme vin l'ampeche d'une chaleur futile, qui antre-tient l'humeur an son estat rouge & liquide. Car si le froid l'a vne fois surpris, il deuient noyr, etant comme amortie sa vermeille viuacité: & il s'amasse tout-an calhas, qu'on ha grand' peine a dissoudre: lesquels sont si dangereux, & causet de tels accidās, qu'on les met au ranc des venins. Car le cors an deuient froid & quasi mort, le pous debile & comme nul: foiblesse saisit le cœur d'euanouïssmant, accompagné de sueur froide, & cæt. Parquoy c'est bien fait de pouruoir, quand on preuoit que le sang peut sortir des veines (ou par leur dilatacion & rarité, compagnes de l'echaufsemant, ou par leur dechiremant & rompure, quand le froit les ha anroidies) qu'il ne soit congelé. A ce danger le vulgaire oppose les remedes que nous auons produits au chapitre du Morfondemant, mais il n'an fait pas dextre-mant vsfer. On y a recours des aussi tost qu'on se ressent du Morfondemant: & le Vin y est ordonné, auant que sentir aucun mal. C'est tresbien fait d'an balher aus personnes, lesquelles du long & penible trauail ou exercice sont echauffés, auant qu'ils se reposet. Le peuple n'ha pas inuanté ce bon remede: C'est du conseil des medecins qui l'ont autresfois anseigné, & comme bien faiele les jans l'ont retenu,

nu, pratiqué, & continué iufques a noltre tās. Plusieurs ne fauet pas aquoy cela proffite, les autres n'antandent point comment cela peut faire ce qu'ils pretandent. Ils parlet de rafraichir, & du Morfondement, fans fauoir qu'et ce, ne l'un ne l'autre. Ils verront maintenant plus clair an leur beſogne, & y feront tant affurés, cognoiſſant par raiſon le fruit qui an reuiet, qu'ils pourront beaucoup mieus vſer de ce preſeruatif. Mais a propos de ce mal, auquel tous les maus des laboureurs & autres trauailleurs ſont rapportés, il me ſouuiet d'un qui diſoit, Tous maus ſont de Morfondement, parlant de toutes maladies an general: un bon homme luy repondit an ſon patoys, non és pas l'eſcaudadure: c'eſt a dire, la bruleure; comme du feu, de l'eau bouillante, & ſemblables. Car il eſt bien certain, que ce mal n'eſt pas de Morfondure.

Voyons maintenant, pourquoy il eſt ordonné de piſſer, auant que ſe mettre an repos. Quand on ha trauailhé, ou de cheminer longuemant, ou de courir & tracaffer, les bonnes jans conſelhet de piſſer auant que ſe reposer. Ce qui eſt fort bien auſé; & croy auſſi qu'ils tienet ce regime de leurs grans peres, qui l'auoient eu des anciens medecins, comme tout ce qu'on fait de bien ancores pour le iourd'hui a l'antretenement de ſanté. On l'ha

reffu de pere a fis, d'un si long tams, qu'on
 ne fait plus d'où ce peut estre venu : toutes-
 fois il est fort vraysemblable, que les vieux
 Medecins l'ont ansegné. Mais le vulgaire
 n'antand pas la rayson de ce qu'il fait, &
 ansuit toujours vne coutume, soit bonne,
 soit mauuaise. Cette-cy est des plus loua-
 bles: dont ie veus remoutrer, dequoy elle
 peut estre profitable. Quant noltre cors
 est echauffé, les humeurs deuient piquans
 & fors, de la chaleur qui les rand plus sub-
 tils. Et de là vient, qu'on fant comme des
 epines dans tout le cors, apres vn grand tra-
 uail, pour peu qu'on soit de complexion
 chaude. L'vrine par consequant an est plus
 cuisante; ce qu'on apersoyt bien an pissant.
 Car elle chatoulhe plus aigrement son passa-
 ge, & fait certaine horreur comme frisson au
 cors, mesmemant sur ses dernieres gouttes.
 Etant ainsi mordicante, elle pourroit andom-
 mager la vescie, si on la retenoit plus longue-
 mant, & par laps de tams l'ecorcher (mesmes
 ez cors mollets & tandres, comme ceus des
 ansans) y causant vn vlcere. C'est donc bien
 fait de vuidier soudain la vescie, sans attendre
 qu'elle an soit plus sollicitée. Car on ne fant
 pas finement ce que peut nuyre a noltre cors,
 quand il est echauffé. I'ay vne autre raison,
 qui n'est guieres de moindre pois : c'est qu'on
 doit

doit craindre durant l'echauffement, que l'vrine ja desfandue an son vaisseau, ne soit retiree des autres parties, & nuise au cors, de sa mauuaise qualite. Car les mambres vuides, & eschauffés du trauai, attiret de tous coutes les humeurs quels qu'ils soient. Les parties voisines de la vescie, an peuuet retirer quelque porcion, conuertie an vapeur, laquelle traaverse les pores fort dilates. Or c'est vne mesme matiere, de la sueur & de l'vrine: dont quand on ha fort perdu de la sueur, il est a craindre que pour ramplir le vuide, l'vrine n'alhe de suite. Et si elle se repand par le cors, elle l'abreuue mal, comm' etant humeur du tout inutile & superflu, qui absoluëment ha titre d'excremant. Il la faut donc vider incontinent. Et ce faisant on cuitera deus maus: l'vn est, le dangier qui prouient de sa piquante force: & l'autre, de ce qu'elle pourroit estre reprise du cors. Le peuple sauoit bien, qu'il se faut ainsi gouuerner: maintenant qu'il an saura la cause, il le fera mieus obseruer au siens. Outre les sudittes raysons, nous an pouuons alleguer vn autre, qui est de grand' importance: car ce regime preserue de la pierre. Quand le cors est bie echauffé, tous les cõduis sõt si ouuers, q la grosse matiere y passe car la chaleur dilate merueilleusement. Or les

passages & tuyaus de l'vrine etans fort elargis grande matiere epaisse vient avec elle dans la vescie. Ce sont les phlegmes visqueus, & la crasse ou lie de la cholere; dequoy se font les pierres, moyennant la chaleur desséchante: tout ainsi que la fange est andurcie par le Soleil, quand son humeur an est ebeu. Durant l'agitation & mouuement du cors, parmy l'vrine sont portés, & penetret a la vescie, ces gros humeurs: lesquels se departet & separet de la porcion aigueuse, lors qu'on se vient a reposer, & que l'vrine aussi se pose. Car la pesanteur de la matiere fait, que le plus epais tombe au fond de peu a peu: & ainsi par apres la propre substance de l'vrine est vuidee, laissant dans la vescie les crasses qu'elle y ha conduit: lesquelles y sont retenues de leur viscosité, outre le pois qui les y arrete. Si cela reuiert souuant, qu'on trauahe mal a propos (sur tout bien tost apres auoir mangé) & qu'on laisse an repos l'vrine ainsi confuse, an peu de tams il y a l'ettoffe & asses dequoy faire vne pierre. Car aujourd'hui il s'an amasse le gros d'une lantilhe, demain autant, & ainsi d'ordinaire: de sorte que tantost y an ha asses pour faire vn grad ampechemât. Donques il faut randre l'vrine quand on est echauffé, auant que le sejour donne loisir aus gros humeurs de pouuoir estre sequestres,

& re-

& requis au fond du vaisseau. Si on pisse incontinant, on void l'vrine trouble du melange des sudittes matieres. Et si on la met dans vn verre, laditte separacion faite on verra, qu'il demeure au fond vne epaisseur, samblable a celle que nous disons rester dās la vescie, si on differe d'vriner. Par ce discours il est facile d'antandre, combien sert aus anfans, de ne tenir leur vrine (mesmes quand ils ont traccassé, sur tout apres le repas) pour les preserver de la pierre: a quoy ils sont plus suiets que les grans (i'antans de celle qui vient a la vescie) a raison de leur insatiable voracité, & du trauail desordonné a heures deconuenables. Des trois raisons que i'ay randu, de l'institution vulgaire a faire pisser ceus qui sont echauffés, mesmemant les anfans quand ils ont trauailhé, celle cy est la plus vrgeante. La seconde ha quelque apparence: & la premiere ancore plus. Quoy que ce soit, la coutume an est fort louable, & doit estre bien obseruee de tous ceus qui sont curieus & soigneus de leur santé. Je peus ancor aiouter vn'autre raison, qui ne sera des moindres, 4. a mon auis. C'est, que l'vrine contenuë dans la vescie, depuis qu'elle est echauffee, rand chaleur au cors. Dont pour se rafraichir bien & sainement, il est bon de la vuider. Et quoy?

nous' vuidons & versons vne partie du sang echauffé par la fieure, pour rafraichir le cors: tout ainsi que nature d'elle mesme souuant decharge la teste bouilhante d'une porcion de sang qui fluë par le nez: dont s'ensuit vn grand soulagement & refraichissement. Il n'an faut moins panser de l'vrine, laquelle on ne plaint de vuider & reictter.

CINQVIEME CHAP.

*Qu'il faut souuant changer de linge
aus Febricitans.*

NOTRE chaleur naturelle (principal instrument de toutes actions requises a soutenir la vie) fondée en humidité, iamaïs ne cesse d'ouurer, preparant nourriture au cors, cuisant les humeurs, & triant le bon du mauuais. Le bon est appliqué aus mambres qu'il faut alimenter : le mauuais est reietté aus lieux ordonnés pour receuoir les excremans, desquels y en ha plusieurs sortes, & diuers re-
ce-

ceptacles. Les plus deliés & subtils (qui ser-
uet a mon propos) n'ont autre vaisseau que
la peau: & ne sont que fumees ou vapeurs,
cleues des matieres que nostre chaleur ela-
bore. La legereté les porte du plus profond
au cuir qui antourne le cors, comme tout-
tes exhalacions gagnent le haut. Or le cuir
antre ses vsages, ha c'etuy-cy bien propre &
necessaire, d'admettre sans contredit ces me-
nuës superfluites, qui luy sont anuoyees de
toutes pars: & an les receuant comme ra-
re, cler, ouuert, & spongieux, il leur don-
ne passage tout outre parmy ses pores &
meats inuisibles, afin qu'elles se dissipet
an l'air. Si ce n'et la porcion plus gluan-
te & epaisse, qui s'ampêche an ses detrois, &
par succession deuient poil. Tels excre-
mans sont la sueur, & les fumees qui atta-
chet nos chemises & autres vetemens, d'v-
ne salete noyre, grasse, & visqueuse.
Ils sont fort copieux an ceus qui ont la
chaleur piquante, pour la seicheresse de
leur cors: a raison qu'elle brulle beaucoup
plus que l'humide: par ce que l'ardeur
seiche conuertit beaucoup de matiere an
sueur & an vapeur fumeuse. La cha-
leur moite, an resoud dauantage.
Mais ce n'est que vne exhalation dou-

ce, suauue, & tant futile qu'elle se perd iuuifible
 mant, comme les fumees de l'eau chaude. Le
 bois rand vn feu plus ardent que la chaleur
 de l'eau, & iette vne fumee si epaisse, qu'elle
 fait de la fuye bien solide: & de sa substance
 brulee, les charbons an fin deuient sandre.

Telles superfluités abondet an l'age de viri-
 lité: les fumes & les ansans, comme etans plus
 mols, an ont beaucoup moins: dont ils ne san-
 tet ainsi au bouquin, ou a l'epaule de mouton,
 quand ils sont echaufés. Car telle puanteur
 vient de ces excremans secs, qui (pour les su-
 dites raisons) sont fort copieus an æté, & ez
 hommes passé l'adolescence. Si dōc la chaleur
 seiche produit grand amas de fuye (vapeur
 noire, grasse & puante) les fieures sont fort
 propres al'augmāter an grande quantité. Aus-
 si de fait nous voyons, que les chemises & lin-
 ceus des febricitans sont sales incōtinant: par-
 ce que leur mal est de chaleur naturelle con-
 uertie an feu sec & ardent. Or ces fumees sont
 mieus par nous dehors que dedās nōtre cors:
 & pourtant Nature tres-sogneuse de nōtre
 bien, voulant purifier le sang, fait que cette
 infection se vuide aussi tost qu'ell'et nec. Et a
 ces fins, ell'ha donné aus arteres deus mouue-
 mās: l'vn pour reietter & pousser hors, cōme an
 s'epraignant, les superfluités de la bruleure:
 l'au-

l'autre, pour receuoir de la fraicheur an s'elargissant. Car rié ne cōserue mieus la chaleur naturelle, que de vuidier les fumees, qui la pourroint etouffer: & d'euenter le sang, qui est son domicile. Puis qu'ainsi est, & que ces excresmans doiuet estre vuidés, pour la pureté des humeurs & esprits qui an seroient troubles, il faut antretenir le passage du cuir net & ouuert, an gardant tref-sogneusement qu'il ne soit ampeché. A quoy seruoient proprement les frictions & bains, que les anciens Grecs & Romains vsoient communement. Dauantage, il faut auiser, que ce qui nous antourne, comme le linge & tout abilhemant, soit bien net: afin que les ordures, que le cors y a ià transmis an s'epurgeant, n'an foyet retirees par l'ouuerture des arteres, qui succet indifferamment tout ce qui se presante. Elles ont reietté ces immōdes fumees, par leur contraccion. Si vous andures que la peau ayt touiours ce fumier aupres d'elle, certainemāt les arteres le reprādrōt. car elles tiret de tous coutés l'air, soit bō, soit mauuays, suaue ou puant, net ou infait. Donc il fait bon changer de linge apres auoyr sué, de peur que l'humeur superflu ne soit ebu du cors, qui fan est vn coup dēchargé: cōme le linge noyr & sale nous rand ce qu'il an ha pris. Puis donc qu'il et tant neceslayre, que ces matieres se vuidet pour raffraichir nostre chaleur; il et

fort dommageable qu'elles retournent au dedans. N'est ce pas grand sottise, de sauoyr qu'il est profitable que toutes telles immondices soient poussées dehors, & puis les laisser au lieu d'où elles y puissent aysemēt r'entrer? Il ne faut point douter, que cela ne corrompe de sa puante qualité, l'air qui et entre nos linges, & le cors. Les arteres an s'ouurant l'attirent tel qu'il s'y rencontre: & introduiset, quant & luy pefle-messe ce que s'y trouue mixtionné bien sutil. Qu'ainsi soit, sortant nud de l'etuee, mettes vous au lieu plein de poussiere emeuë. Vous sentires tantost quelque chose vous piquer, comme epines ou egulhes, par tout le cors. C'est le plus menu de la poudre, que les arteres an succeans l'air, attirent par les pores bien ouuers. Donques il faut estre bien sogneus de la condicion de l'air qui nous touche, comme de ce qui ha trafic avec nostre chaleur, & nourrit noz esprits: Or l'air qui adhere aus drapeaus sales, ne peut estre bien net. Et si les arteres le remettent dans le cors, c'est vn erreur pire que le premier. Il faut donc bien souuent renouveler le linge qui nous touche, pour reietter ce que y est posé: & non seulement an prendre souuent d'autre blanc & net, ains aussi qui soit bien odorant. Car cela rand l'air ambiant agreable a nos esprits, lesquels se delectet & restaurent de bones odeurs, tellement que si on y

prend

grand garde, vous verres qu'on et tout récreé,
reioüy, & ranforcé d'auoyr changé de linge &
d'habillemans: comme si cela renouuelloit noz
espris, & la chaleur naturelle, que l'infeccion
retenuë randoit acroupis, etonnes, confus,
broulhes, troubles & mal a leur aise. Car ils re-
quieret vn extreme pureté, netteté, & synceri-
té(côme ils sont celestes & diuins) pour mieus
fayre leur deuoir & moutrer leur puissance.
D'où et venu donc la sotte opinion du vul-
gaire, qui n'ose changer de linge aus malades,
& les contraint andurer bien long tams vn or-
de puanteur, comme porceaux se veautrans
dans la bouë? Parauanture qu'il fut quelque
fois deffandu, de les remuër fort souuant du-
rant les fieures, de peur qu'ils n'eussent froid. de
puis les bonnes jans antandet, que le linge
blanc leur soit dommageable. O grand erreur,
duquel procède la cruauté & barbare tyran-
nie qu'on vse auers les pauvres malades! Il
n'y a rien qui les reuiene plu-toist, & qui aug-
mente mieus la force naturelle, que de les te-
nir nets par tous les moyens qu'il et possi-
ble: & que leurs draps soient de suaué o-
deur, & iceller raffraichissante pour les fieureus,
comme de roses & samblables. Touttes les
fois qu'on refait le lit, de celuy qui ha fieure, il
seroit expediant qu'on lay changeat de linge,
linceus & chemise. Car la fieure an seroit plus

courte, & le mal plus ayfé. Nous voulons purger les humeurs par medecine, affin d'estaindre la chaleur qui les brule. Il ne faut donc estre moins curieux, d'epurger les fumees & futils excremans, qui antretienet vn tel feu. Et quoy? sans auoyr aucun mal, il peut auenir que de coucher dans les linceus d'un febricitant, on an prandra la fieure, pour peu qu'on y fut préparé. C'est a cause que noz arteres an attirât l'air, mettet dans noltre cors la qualité mauuaise des excremans imprimee aus linceus: dont la chaleur naturelle an deuient febrile. Feront ils moins de mal à celuy qui les ha salis? Au moins ils antretiendront le desordre ia auenu. Sus donc que l'on change d'auis, & que les malades ne soint plus molestes de cette facherie, d'estre confis & comme anseuelis dans leurs ordures & immôdices, puisque cela ne leur profite rien, ains au contraire leur fait grand mal. Il faut souuant changer de linge aus febricitans, & autres malades, quand il et sale: & panser que les pauvres patians ne doiuet moins estre commodement, que les sains, sauf le plus. car il les faut traiter mignardemât, affin qu'ils puissent mieus soutenir & supporter la facherie de leur mal.

Que les fames tuet les febricitans d'abstinence de boyre, abondāce de viures, & annuyeuſe couuerture. Et quel regime il conuient obſeruer au febricitant.



Yant decouuert & corrigé l'erreur de ceus qui ſ'echauffet par trop ez fieures, par l'vſage du vin, de l'epicerie, & force couuertes, pansans tout leur mal estre vn Morfondemāt: & de ceus qui ne veulet permettre, qu'on leur change de linge, pour conclurre ce propos, il ſera bon de remoutrer auſſi aus importunes fames, les troys notables fautes qu'elles y font, an gehenant les malades d'abstinence de boyre, contrainte de manger, & & grand ſardeau de couuerture. Le populaire an general tient cett' opinion, & vſe de tel regime: mays ſur tout les fames vienet à vn excès qui et inſupportable, & trauallhet plus les patians, que ne font le reſte du peuple. Cela prouient d'vne condicion naturelle, qui les meut a outrepasser les bornes de mediocrité, & estre toujours exceſſiues plus que les hommes, an leurs affections & œuures. Car ſi elles aymet, c'et an perfeccion, comme elles hayſet mortellemant. Si elles ſ'addonnet a l'auarice, ell' et extreme: ſi a folle depance, c'et la

mesme prodigalité. An douceur mansuetude & bonne grace, si elles veulet, sont excellantes: tout ainsi que an colere & an depit, mon-tret vne grand rage. Je ne le dis pas pour les blamer (comme la plus part des hommes se de-lecte a medire du sexe féminin, qui et le raffrai-chissement & vraye consolacion de ce monde) ains pour declarer la cause de leurs abus. Mesmes ie feray bien antandre a ceus qui an detractet, & amenet telles raysons pour mou-trer l'imperfeccion des fames, qu'ils vantet i-gnoramment. Car ces affections extremes, ne procedet que d'un esprit sutil, penetrant, & a-bille, anchassé dans vn cors mol, delicat, & bié purifié. Qu'ainsi soit, nous voyons d'autres ma-tieres aysemant andurer diuerses qualites & mutations, a rayson de leur syncérité. Le seul blanc receura toutes eouleurs an sa perfec-cion, comme la fame ressoit indifferantes meurs. Et tout ainsi que l'eau est iugee tres-bonne de sa legereté, laquelle on estime d'une facilité a estre soudain bouillante ou refroidie: ainsi i'affirme, que la complexion des person-nes qui se changet promptement, & soudain passet d'un extremité a l'autre, est simple, pure, & nette. Car le contrayre vient d'une pesan-teur, epaisseur & crasse, qui fait la contumace & immobilite. Les fames sont d'une substance tant deliée, clere, & sincere (temognee de leur mol-

mollesse, tandreur, beauté, & delicateſſe) que elles ont grande promptitude, & excedet les hommes tant an ſoudaine apprehenſion, que an ſuperlatiue affection. Parquoy elles ont moins d'arret an leurs propos & delibera- cions, a raiſon de la mobilité, qui procede d'vne legiereté, ſuiuant la pure ſimplicité, de laquelle auſſi eſt doué le ciel par deſſus tous les autres cors. Auſſi la viteſſe de leur antandement a comprãdre toutes difficultes & les reſoudre, eſt telle, que les hommes n'y peuuet auenir. Et pourtant on mepriſe leur reponce ſi ell' eſt premeditee: & dit on, qu'il faut prandre le premier conſeil d'vne fame, auant qu'elle y ait penſé. Car elles ont cette perfeccion, d'etre promptes & fort ſutiles: dont elles peuuet incontinant reſoudre vn fait. Si elles y paſſent a loyſir, font mille diſcours variables & diuers: parce que leur eſprit aigu & penetrant, ne ſe contente ſoymeſmes, & toujours voudroit mieus aiancer la beſogne, de forte qu'il broul- he & gate tout. Ainſi vn bon peintre, qui a le cerueau galhard, fera vn beau portait a ſon premier deſſain, qui contantera les jans. Si on ne le luy ote ſoudain, il y trouuera quelques traits a' reſayre, & ne ceſſera point qu'il n'ayt ampiré ſon ouurage. C'eſt donc grande louïange aus fames, d'etre ſi promptes & abilles, puis que cela prouient de leur ma-

48 Du regime des Febricitans
riere fort futile, qui les fait appeller volages.
Mais ce n'est pas vitupere, d'auoir vne si excel
lante legereté. Elles ne s'arretent gueres auant
que d'estre aus extremities, où les hommes am
peches de leur pesanteur ne paruienet si ay
semant. Voyla pourquoy nous trouuons les
fames tant excessiues de nature, non seulemant
quant a leurs meurs ou affecciōs, ains au serui
ce des malades, où ie m'arrete pour le presant.
Car si nous ordonnons vn bain chaud, elles fe
ront qu'il brulera. Nous antandons que la cha
leur soit tiede, & il suffit que l'on n'y sente
froid: Elles panset, puis que la chaleur y et re
quise, tant plus il y an aura, tant plus il proufi
tera. & de fait vous diries, que c'est pour peler
vn cochon. Si nous defandons aus malades le
boyre de mesure, s'il et seruy de fames, il mour
ra de soif. On dira, nourrisse-le bien: c'est asses
dit, il sera tout farcy de viandes. Commandes
vous qu'il soit couuert? vous le verres desor
mais etouffé. Ainsi presque an toutes choses el
les passet noltre ordonnance, tirant a super
fluité, ne pouuant tenir le milieu. Il leur faut
remoutrer ces fautes, affin qu'elles an abstien
net. Le Theologien & le Philosophe moral pre
cheront contre les meurs, & dirōt que les ex
tremes sont vicieus, la vertu consiste au milieu.
Le medecin fera cognoitre les maus qui suiuet
leurs exces, comme i'ay proposé de faire an ce
lieu.

lieu. Je ne parle qu'aus ignorantes, & a celles qui vſet de telles procedures : dont les plus ſauuâtes n'an ſerôt offancees. Il ſuffit que i'ay biẽ excuſé le naturel de toutes: ie ne reprans que les erreurs, & qui ne ſ'an tiendra coupable, n'a rien a voyr an ce diſcours. Mais retournons au chemin, duq̃l ie me ſuis vn peu detourné, pour ſayre antãdre aus ſames, que ie ne blame point leur ſexe (lequel m'et tref-agreable) ains pour le rãdre plus parfait, ie veus eſſayer de luy faire perdre ce qu'on y peut calomnier.

Prenant garde à la faſſon de ſeruir les malades, i'ay colligé des poins notables, où les idiots erret communement, & ſur tout aus Febricitans: comme quant a changer de linge, & a vſer du vin, de quoy i'ay fait deus chapitres a-part. Quant au manger, boyre, & couurir, les ſames antr'autres y ſont tant abuſées, que an paſſant bien ſoulager, ſuſtenter & guerir toſt leurs patians, elles les gehenet, accablet, eſtouffet, & randet ſouuant incurables. A leur dire toujours ils boiuet trop, ne manget rien, ne ſont ia mais prou couuers. I'eſpere qu'elles perdront cet erreur, qui les aueugle, apres auoir leu mes raiſons. Mais parce que ie veus, outre la remoutrance que i'an ſeray, donner au vulgaire vn petit regime, commant il ſe faut conduire ez fieures, le melheur ſera de mettre tout anſemble, pour ne faire ſi long propos, qui pourroit

annuyer. Ioint que anseignant le deuoir qu'on doit aus fieureus, on pourra bien cognoitre l'ignorance du peuple. car le droit nous moutre le tort. Donc an bailhât les memoires de se bié gouverner ez fieures, ie m'aquiteray par mesme moyen de ma promesse, & taxeray modestement ceus qui font autrement.

Je suppose toujours, qu'un Medecin ordonne, ainsi que presant il voyt an estre de besoin, les purgacions, la saignée, & autres remedes qu'il faut approprier aus maus particuliers, aus qualites des personnes, humeurs, ages, lieux, saisons, & cæt. Mon intanciõ n'et, que de discourir sur le traitemant du malade, an ce que nous commettons le plus souuant aus sames qui les doiuent seruir. C'et ansegnement leur sera profitable, si le veulet bien apprendre, releueront les medecins de la peine qu'ils ont a le redire tous les iours, & suppleront a ce que les medecins peuuet quelque fois oblyer, ayant diuers malades a panser. La fieure est vn mal chaud, comme signifie le nom, lequel i'ay deduit par cy deuant du mot feu, ou ferueur. Elle tient tout le cors vniuersellemât, apres auoir saisy le cœur, source de la chaleur naturelle, qui pour lors deuient si ardante, de sa qualité augmâtée, qu'on an brule etrangement. Le cœur de sa nature et echauffé plus, sans comparaison, que nulle autre partie du cors. Dont les arteres ne
le

le peuuet rafraichir suffisamment de leur seule operation. Il ha fallu que nature l'antourna de poumons, a mode d'euantoirs ou soufflets, qui luy communiquet l'air frais, & soudain le vuidet etant echauffé, avec ses fumées. Or quand cette ardeur et plus grande que de coutume, il faut halener plus souuant, & haleter pour suenir à la necessité du rafraichissement, & chercher l'air plus froid. car autrement on ne peut amortir l'exces de la chaleur. Si donc ez fieures tout le cors brule, & le feu procede du cœur, on ha grád besoin de fraicheur an l'air de nostre demeure, tout ainsi que l'on et cōtraint de respirer fort menu. Les ignorás qui panset tous leurs maus prouenir de Morfondement, & que la fieure soit de froideur, chauffet la chambre tant qu'il leur et possible, fermans toutes les ouuertes, & allumans gros feu, aupres duquel ils loget leurs malades, comme pour les rotir. Tellement que l'air tiré de leurs poumons echauffe dauantage leur cœur, augmáte le mal, & souuát d'vne fieure terminee ils an font naitre la fieure continuë. Nous supposons icy, la saison de l'æte, an laquelle les fieures sont plus frequantes: & mesmes que la saison soit fort ardante, comme durant les iours Caniculiers. Autrement il faut rabbatre an proportion, vne partie de ce que nous dirons pout bien rafraichir l'air. Nous donques ansuiuant

52 Du regime des Fieureus

les raisons precedantes, ordonnons que le Febricitant soit an vne chambre spacieuse & euaittee, de sorte que l'air y soit fort a commandement. Aus cabinets & garderobbes on ha tantost echauffé l'air anclos, & si on y demeure lōg tās, il faut reprādre les fumees que nōtre poumon y ha vuidé. Les sales sont plus propres a nōtre intanciō: les lieux bas & an voute (pourueu que l'etage soit sec) encore plus cōmodes. Le lieu etāt bien choy si, il faut ampecher tout ce qui le peut echauffer. Qu'on ne permette dōc y antrer multitude de jans, ne aucun chiē: car leur haleine rand grand chaleur. Qu'il n'y ayt point de feu, nompas mesmes de la chādel-le alumee, si on s'an peut passer. Que les rayōs du Soleil n'y antret aucunemāt, voyre que par dehors ils ne touchet pas aus vitres. Le melheur seroit, qu'au lieu ou repose nōtre malade, y eut des fenestres de deus ou trois coutes: affin que quand le Soleil donne a l'vne, on tiēne les autres ouuertes, pour auoir toujours la fraicheur: de laq̃lle il faut etre sogneus, & mesmes d'an faire toujours prouisiō dez le matin. Le soir redonne samblablement du frais, qu'il ne faut mepriser. S'il y a quelque porte d'oū vienne vn ioly vant, elle doit toujours etre ouuerte, mais a-demy, pour randre le vant plus fort. Et si cela ne suffit, il faut vser d'euantoirs, & agiter l'air de la chambre, cōme on fait d'un
 fac

sac moulhé, qui toujours ebranlé de secousse,
 rand l'air mobile & bien frais. Le mouuemāt y
 est requis d'alheurs: c'est affin que l'air qui tou
 che le malade, soit continuëllement repoussé de
 telle agitaciō, & qu'un autre plus frais luy suc
 cede. Outre l'emociō (qui raffraichit euidam
 mant, comme il appert desvans) on vsera de di
 uers artifices à mesme fin. Prenes de l'eau du
 puis bien froide, & qu'on la verse continuëlle
 mant d'un seau a l'autre, an la renouuellant de
 coup a coup. Cela bat l'air, l'humecte, & refroi
 dit: & le bruit venāt aus oreilhes du malade qui
 ne peut dormir, quelque fois l'induit a sōmeil
 her. Il faut aussi moulher d'eau froide le paué a
 toutes heures, l'arroufant par dessus de bon
 vinaigre. Les plus riches y repandront du vin
 aigre rosat, d'eau rose, ou d'eau de violettes de
 Mars. car l'odeur fraiche mitigue la chaleur, &
 reuient les esprits. Le parterre soit tout semé de
 roses, violettes, pampins de vigne, laitues, feuil
 les & fleurs de Nenuphar, qui aurōt trampé an
 l'eau bien froide, eau rose, & vinaigre rosat. La
 chambre soit garnie de ramee, melsmemant des
 branches de saule toujours fraiches; car elles
 venant a secher, nuiset. Le lit ordonné au mala
 de (polé au lieu plus frais & obscur de la chā
 bre) soit grand & spacieus, affin qu'il s'y pour
 mene a l'ayse, an muant souuant de place, com
 me l'on et contraint de faire. Outre ceil faut

vne couchette pour raffraichissement, quand le lit et tout echauffé d'une longue demeure: aussi pour le refaire commodement. car les malades doyent estre tenus fort proprement: ancor tout leur deplait, du mal qui les rend difficiles. C'est aussi pourquoy il leur faut vne grande netteté, qu'ils ne sentent rien de puant, que les couuertures soient fort molles & douces, sans ordures & sans rudesse: les linceus bien deliés, bien blancs, & de suauë odeur, lesquels il faut renoueller tous les iours, si le malade ha grand' fièvre, ou s'il suë abondamment. De coucher sur la plume, c'est bien folie a ceus qui se plaignent de la chaleur, veu qu'elle echauffe euidentement. I'accorde qu'il est necessaire, que les fieureus ayent quelque lit mol, pource que ils sont prou cassés & rompus de la maladie: mais il faut que ce soit de chose moins echauffante, comme et le cotton, la layne ou bourre, dequoy on fait des mattelas qui sont bien fort doulhets. Il y ha matiere plus fraiche an la balle ou balouffe & poussiere d'auoyne, d'orge, milhet, & autres. Je coucheroys volontiers sur la paille fraiche, pour estre mieus a mon aise. Quelques vns mettent sur la coëtre leur mattelas, pour coucher plus fraichement & mollement: mais ie ne voudrois point de plume, an sorte que ce soit; pource que la chaleur penetrant iusques là, y est longuement antretenuë.

Des-

Dessus le linceul il fait bon mettre a l'androit des reins du malade, vne piece de camelot a ondes, ou vne peau de marroquin, ou d'a faire vn carreau fort plat, a demy plei de balloffe, pour se coucher dessus. Plutarque dit, qu'an Babylo- ne les plus riches dormoynt, pour grand delicatesse, sur des sacs de cuir pleins d'eau, ausgrá des chaleurs de l'été. Telle froideur nous et vn peu suspecte ez fieures: & il vaudroit mieus (parauanture) ramplir ces sacs de vant, a mode de ballon, comme l'antans qu'an Italie quelques seigneurs ont de tels lits. Mais ce s'ot choses rares, desquelles on se passe fort aysemant. I'estime bien vn lit pandu a cordes, pour deus commodites qu'on ha d'etre branlé: l'vne et, qu'il d'one vát & raffraichit, pour les causes sudittes, l'autre, que l'agitaciõ sert a les andormir, cõme dans vn berceau. Le ciel du lit soit vn peu haut, affin qu'on ayt plus d'air. Les lits de camp qui ont leur paviillon fort bas, presset tant vn malade, qu'il n'y peut halener. Si les fenestres ou les portes iettet du vát droit contre le lit, lors qu'on veut raffraichir la chambre, il faut tirer les rideaus (qui autrement ne seruet de rien) de peur que le froid ainsi roide ne surprenne le cuir, & constipe le pores, d'où il faut que sortet les fumees de l'ardante chaleur. Car nous ne voulons pas refroidir par dehors: cela ne feroit que augmanter le feu interieur.

Nous demãdons l'air frais pour le poumõ, qui euante le cœur embrasé de la fieure. Parquoy tout le cors, hor-mis le visage, doit estre couuert selon la qualité de l'air, affin que la peau soit toujours bien ouuerte. Il ne faut pas aussi accabler les patiãs d'un fais de couuerture: car ce tourmant ne sert de rien, & les altere dauantage. Suffit qu'ils soient autant couuers, que la constipacion du cuir an soit ampeechee, & soit gardé libre passage aus vapeurs & fumees: & non moins a la sueur, quand elle veut sortir. Donques ils ont asses du linceul, a la grande ardeur: sur la declinacion, quand ils commãcet a fantir la moiteur, (laquelle finifie la sueur estre pres) il les faut biẽ couvrir dauantage, pour ayder a la chaleur au vuidange de cet humeur: non obstant la facherie d'andurer ce tourmãt. Mais on doit estimer, que c'est le reste des matieres qui ont fait le paroxysme: & que si on an retiẽt quelque porcion, on sera beaucoup plus long-tams a estre biẽ net de fieure. car tãt qu'il y an demeure vne goutte, le cors an et emeu. Donc se persuadãt, que c'est la vraye terminacion, il faut supporter patiãmant l'annuy, & ne se decouurir point. Car si le cuir est constipé, la sueur retenuë, l'acces dure plus longuemant: & est quelque fois dangereux, que vne fieure terminee deuienne continuë, par la retancion des excremans, & constipacion de la peau.

C'et

C'est donq' alors que les couuertures sont a propos, quand on et pres de la sueur, nompas durant l'acces & brulante chaleur, comme an dispoſet les importunes fames. Car pourueu que le cors ne ſante par dehors la fraicheur de la chambre, & qu'on ſoit vn peu couuert, tout hor-mis le ſeul viſage, on s'an doit contanter, ſans gehenner ainſi les malades. Au commandement de l'acces, quand ils ſantet friſſon, rigueur, & horripilacion, on les doit tant couvrir qu'ils veullet : & an cela faut ſuiure leur deſir, echauffer les piés avec drapeaus, tuylles, & pierres, ſayre par tous moyens de couuerture & applicacion (nompas de breuuage echauffant, comme fait le vulgaire. car ils ne ſont que trop chaus au dedans, qui les rád fort alteres) que ce facheus trablemât paſſe viſte. Quand le chaut commâce a regner au dchors, & que les couuertures annuyet, il an faut oter de peu a peu, mettant le malade a ſon ayſe le mieus qu'il et poſſible, iuſques à ne laiſſer que vn linceul deſſus luy. Voyla commant il ſe faut conduyre ez fieures terminees. Touchant aus continues, qui ont toujours ſemblable chaleur, ou peu s'an faut, & dure tant qu'ils ſoint gueris du tout; il ſi faut gouuerner ſelon ſa qualité, & couvrir ſi peu les malades qu'ils n'á ſoint pas plus alterés, leur laiſſant iuſtemât ce qui eſt requis pour ampecher la ſurprinſe

du cuir. Donques si le chaud et ardent, on ne les couurira nomplus qu'au milieu des acces des fieures terminees; & il ne faut pas suiure l'auis des fâmes. Car iamais les malades n'ont prou de couuerture a leur gré. Mais il faut bié noter les reigles qui s'ansuiuet, pour antandre quand, commant, & combien nous deuons rafraichir l'air, & moderer la couuerture. D'autant que la saison, l'heure, & l'espece du mal (ou gist grande varieté) font qu'a tout propos et requise bonne discrecion: parce qu'on ne peut limiter iustement par escrit la quantité des remedes, & il y faut vne grande obseruacion, comme nous deduirons presantement.

An ce fait nostre but n'est autre, que d'entretenir l'ouuerture des pores, & permettre aus poumons iouyr de la fraicheur. Dont si c'est an hyuer, il nous faut estre plus couuers, de peur que la peau ne se serre: & ne sommes pas an peine de rafraichir noltre air, ains tachons a le tiedir, affin que quand l'impatient malade se tourne dans le lit, l'air qui y antre, ne surprene le cuir de sa froideur gelee. Il ne faut pas aussi, que le malade soit mis aupres du feu, comme an vsent les païsans: c'est assés que l'air de la chambre ne soit pas autant froid, que porte la saison. An æté il est bien difficile, de le refroidir tât, qu'il puisse cōstiper la peau,

(si on

(si on et couuert d'un linceul) durant la grand chaleur. Or an cecy il faut bien considerer la grandeur du chaud qu'andure le malade, & de l'air qui l'antourne. Car si l'ardeur de la fieure est extreme, nous randrons l'air tant frais qu'il nous sera possible: si ell'est moindre, nous y trauaillerons moins, obseruant la deuë proportion a l'opposition des contraires. Quand la chaleur de l'air et moderee, peu de chose suffit al'amortir: si ell'et excessiue, il la faut cō-batre de plusieurs sortes. Donques si la chaleur de la fieure, & de l'air, sont de mēme brulantes, il ne faut rien oblir de ce qui les peut raffraichir: si sont moindres, an proportion. Car on doit comparer les choses presantes, & egalier les remedes aus maus, sans se tenir toujours a certain point. Nous ne serons donc an soucy de raffraichir noltre air, sinon l'æté: & alors plus ou moins, selon sa qualité. An hyuer il se faudra moyennement echauffer. Le printemps & l'automne il et asses moderé: dequoy nous deuons contanter. Car tel a noltre egard et nommé frais, tresconuenable a noz fieures. Ainsi et il des couuertes, qu'il faut accommoder aus condicions de l'air: c'est que an æté il an; faut moins, an hyuer dauantage: la saison tâperee tiët le milieu. La nuit aussi et d'ordinaire plus fraiche, que le iour: dōt il faut etre mieus couuert, tāt pour tāt, la nuit q̄ le iour.

Et quant on dort, parce que les mambres extérieurs se refroidissent, il faut auoir plus de couuertures quelque heure que ce soit : mais bien peu dauantage, si elles annuyet le malade fort echauffé du mal. Pour mieus faire, il faudroit attendre que le malade fut andormy, & adonc luy ietter quelque chose par dessus : car si on le couure auant qu'il antre au sommeil, quelquesfois cela le fache tant, qu'il an perit tout moyen de reposer. Moyennant la discretion, dressée d'un bon sans, par ces limitaciōs on pourra disposer & ordonner facilement des couuertures, & du rafraichissement, en toutes les especes de fieures, a tout'heure & toute saison. Aquoy il faut aiouter la complexion des jans, l'age & le sexe, qui suiuet le tēperament. Car d'une mesme fieure, les vns seront plus echauffés, les autres moins, selon que leur chaleur auant la fieure estoit grande ou petite. Ceus qui l'ont douce, & fort suauē, cōme les fames & les ansans, ne fantet pas telle ardeur que les ieunes de trante ans, desquels le cors et de soy mesme plus ardent. Et de ceus cy les sanguins ou choleric, surpasset les autres en chaleur. Les vieus sont frois, dont ils ne peuuent auoir les fieures si ardantes, comme dit

Apho. 14. Hippocras. Outre ce, a raison de la seicheresse leur cuir et fort serré : aus fames & aus ansans, la grand mollesse ampeche les pores d'estre ouuers

uërs. Les ieunes tiennet le milieu: dont il et mal ayse de constiper leur peau. Par ces deus raisons il ne faut pas tant craindre de raffraichir bien l'air, quand vn ieune homme de cõplexion fort chaude (& qui an santè mesme samble tout feu) ha fieure , comme sil estoit d'autre temperamant; ne qu'a vn bõ vielhard, ou ieune anfant, ou bien a vne fame . An eccy il ya ancores plusieurs distinections: car toutes fames, tous vieus, & tous ansans, ne sont pas d'vne condicion : les vns sont plus chaus que les autres. Ainsi et il (pour faire brief) de toutes limitacions, où il faut auoir egard d'approcher le plus pres qu'on peut, de la portee d'vn chacun. Car il n'et pas possible de mettre an reigle ces particularites. Il suffit bien qu'on sache an general les condicions necessaires, a bien conduire les fieures. Quant et de l'air & couuertures, ie l'ay deduit si amplemant, que le discours an et prolix. Mais ie seray plus brief a poursuyure le demeurant, auquel pourront seruir les raysons dessus alleguées, pour peu qu'on ayt d'inuancion a les sauoir accommoder.

Ce chapitre n'a point eté acheué, mais les deus ou trois qui s'ensuiuet, y peuuet seruir, & estre accommodes.

*Contre ceus qui ne permettent aus Febricitans, de boyre
durant leur acces: & les autres qui veulent qu'ils
boiuet chaud, pour suer plu tost & mieus.*



⁂ Ay alheurs remoutré, com-
mant il se faut gouuerner ez
fieures, pour an auoir mieus
& plu tost la rayson. yciie
toucheray succintemât l'er-
reur, de ceus qui ampechet
de boyre les tieureus durant l'acces, soit par
force, ou par leurs remoutrances. Nottre Hip-
pocras dit bien an ses aphorismes, qu'ez acces
il faut abstenir mais c'et des sorbicions, & au-
tres viandes. Car il aioute, qu'il et nuisible
d'aministrer pour lors de la viâde. Mais quât
au boyre, il et tresnecessaire pour amortir la
fieure, quand ell'et an sa grand vigueur: &
lamesmes Galen ordonne de boyre grand
quantité d'eau froide, au plus haut de la fie-
ure ardante, & des fieures synoches. Or
l'etat d'un acces, repond a l'etat de toute la
fieure continuë. Et quel dangier y ha il, de boi-
re vn bon trait, quand l'acces et an sa vigueur?
Mais au contraire, cela proffite grandement,
& amortit plu-tost la fieure, comme quand on
iette force eau au feu. Ancor faut il auiser, que
le breuuage du Febricitant soit bien froid

(nom-

Aph. II.
liu. I.

Li. 9. de la
meth.
cha. 5.

(nompas chaud, ainsi que plusieurs veulet) afin que le malade an suë plu-tost. Car ceus qui l'ordonnet chaud, s'abuset doublemant: c'est, q de boyre chaud, on ne desaltere point: & que le boyre froid emeut autant ou plus la sueur, que feroit le chaud. Ce que chacû peut eprouuer a part soy, s'il an doute: & il verra que etant bien echauffé & alteré, s'il boit bien frais, la sueur luy an viendra au front, quand bien ce seroit an hyuer. Dont puis que il y a & plaisir & proffit, nous permettons aus malades qu'ils boyuet le plus frais qu'ils pourront: & vn grand trait ou deüs, selon que l'acces durera. Le vulgaire ha cela de mauuais, que cõme tout luy et suspet, a cause de son ignorance, & qu'il craind mesme ez choses où il ya toutte assurance, ainsi ne peut il accorder aucun plaisir aus malades, craignant de complai-a leur volonté, comme si elle estoit toujours deraisonnable.

HVITTIEME CHAP.

Des boulhons & orgemondés qu'on balhe à minuit, ou le matin, fort indiscrettement.

DEs boulhons & orgemondés le plus souuant on importune les malades, qui n'y prenet aucû plaisir: & quelque fois on romt fort indiscrettement leur sommeil, par l'aministration de tel le nourriture, ou a minuit, ou sur le matin: laquelle ne peut tant valoir, qu'un bon

dormir . Voila commant le vulgaire est iniuste an deus sortes:l'vne , quand il ne permet au sieurs de boire raisonnablement: & lautre,quād il le presse de viures mal apropos.

Certainement il n'y a rien de si bien ordonné , qu'on n'an abuse facilement : & sur tout, quand c'est de chose qui plait aucunement .

Mais ancor plus, si cela mesme ha quelque espece d'aliment. Car le propos des viures, et si plausible & agreable , que le vulgaire l'embrasse tres-volontiers:le nom des drogues luy et fort odieux & horrible,mesmes tout ce qui vient de chez l'apothicaire, sinon le sucre, l'ippocras, les biscuiteaux, le pignolat, les tartres de Massepā, cōfitures, & autres friandises. Dequoy ie ne m'esbays pas, ne le reprans aussi.

Car cela et fort naturel. Ie suis hōme, & resfais l'infirmité commune: Ie ne suis estrangier ou aliené d'aucune humanité. Ie say que les medicamans sont contraires & ennemis du bon naturel : & que s'ils estoient familiers ou amys de Nature, ils ne feroient tels effets , ains surmontés de nostre cors, seroient conuertis an sa substance . Dont l'horreur que nous an auons , et chose fort naturelle, & non reprehensible. Ce que i'ay dit, et comme an passant, afin qu'on ne m'estime Rhabarbatif & facheus droguiste, veu mesmes que i'an vse bien souuant pour moy, & cognoissant le besoin que
i'an

i'an ay. I'ay voulu seulemât toucher ce point, tât pour excuser le commun anuers quelques medecins, qui n'ont grand pitié de ceus qui ne se peuet accommoder aus medecines: que pour accuser les delicas outre mesure, qui ne voudroint que des boughons ou orges-mondés, pour se guerir, ou preuenir le mal. Ancora n'an vset ils ainsi qu'il apartient. Car pour vn tel de jeuner, ils ne rabbatet des autres repas ordinaires. C'est ce que ie veus reprendre, & leur remoutrer commant les medecins l'antandet (au moins ceus qui l'ont premierement institué) & commant ie l'ordonne.

Ces boughons & orge-mondés de la minuit, ou du matin, sont pour triple occasion. L'une, au faueur de ceus qui ont faute d'appetit, & ne peuet guieres manger a diner, ou a soupper: mais sur tout a soupper: auxquels pour recompance on donne quelque chose a la minuit, ou le matin ansuiuant. La seconde & presque samblable, de ceus qui ont grand faim, est sont presque insatiables, comme au releuer d'une grand' maladie. Car d'autant qu'ils ont l'estomach affoibly, & ne peuet tant digerer, qu'ils pourroint bien manger a vne fois, on leur conseilhe de partir les repas. & parce que la nuit (a cause du dormir, qui retarde la coccion de l'estomach) on ne digere si bien que le iour, nous ordónons qu'ils

Decad 1.
Parad.

souppet legierement: & pour recompance, nous leur donnons sur le matin vn boulhon: comme si on gardoit le potage du soupper, qu'on an auroit rabbatu, au landemain matin, apres qu'ils ont dormy. Ce que ie dis, que le dormir retarde la coccion de l'estomach, est suffisamment prouué an mes paradoxes, par viues raisons: desquelles i'an toucheray vne, pour autant qu'elle sert a ce propos. C'est, que du diner au souper, communement il n'y a que huit heures: & du souper au diner suiuant, il y an ha seize: sans qu'on ayt plus de faim apres, qu'apres lesdittes huit heures: suppose ancores, que ces deus repas soient de mesme an qualité, & quantité, du manger & du boyre. brief qu'il n'y ayt autre differance, sinon que l'vn de ces repas est suyui de la nuit & du sommeil: & l'autre non. La troisieme occasiõ est, pour alterer ou preparer le cors par ce moyé delicat: sauoyr est, le raffraichir, ou humecter, inciser & attenuer les humeurs, desoppiler, faire vuidier le grauier & pierrettes des reins, prouoquer les sueurs, ou menstres, & autres petits menus affaires, de moindre importance qu'il falhe mettre an besogne les remedes plus forts & mal playfans. Dequoy vous verres verser infinies personnes au printems, mesme-ment ez moys d'Auril & de May, mais avec telle indiscrecion, qu'il leur fait plus mal que bien

bien. Dont i'ay esté contraint , de remoutrer
 cette faute, suiuant le deuoir de ma charge. La
 faute est principalemant an ce, qu'ils ne rabba-
 tet rien du diner & souper ordinaires, pour ces
 boulhôs & orge-mondés. Car s'ils dinet & sou-
 pet autant que de coutume, il est certain, que
 l'endemain matin l'estomach n'est pas vuide:
 & par consequant le boullhon rãcontre des ma-
 tieres cruës, qu'il recrudit encore d'auantage:
 & l'arrete pour se digerer aussi , iusques a la
 venuë du diner; lequel se melant parmy cela,
 prand le vice & contagion de crudité. Ce qui
 est derechief rancontré du soupper. Tellemãt
 qu'il n'y a point de fin a tel desordre genera-
 tif de phlegme, si aucun le fut iamais. Si le boul-
 hon est de choses aperitiues, incisives & atte-
 nuatiues, prouocatiues d'aucune excrecion, il
 fait bien pis. Car il pousse, ansonce & precipi-
 te les restes du souper crud dans les veines &
 arteres, où elles font des oppilacions , & cau-
 set des catarrhes, fieures, & autres mille maus,
 qui est bien pire, que si les humeurs crus se-
 journent ou croupisset dans l'estomach & les
 boyaus, où ils causet la colique , des tranches
 & bruit devantre, dedain, mal de cœur, vomis-
 semant , & samblables . Donc, quiconques
 voudra vser de ces boulhons alteratifs ou pre-
 paratifs (comme est aussi tost l'orge-môde)
 pour biẽ faire, qu'il soupe legieremãt, a ce q

68 Des boullions & orge-mondés.

l'estomach ayt digéré plu-tost que de coutume, & qu'il se trouue pour lors vuide. Il faut faire, comme si on gardoit vne partie de son souper, pour landemain matin. Et quand on dineroit apres, vn peu moins que de coutume, c'eseroit le mieus fait du monde. Voyla commandant il se faut gouuerner an ce fait, pour an tantir profit, & non dommage, comme il auient a la plus part de ceus qui an abusent. Aucuns s'an trouuet bien, a cause que par faute d'appetit, ils ne manget guieres a diner, ny a soupper: qui est la premiere occasion cy dessus expliquee. Et ie ne doute point, que les premiers auteurs de ce regime, ne l'ayent ainsi antandu & pratiqué. De cela mesmes on peut apprendre, que quand on ha a prandre landemain quelque Iulep, Apozeme ou Sirop (choses preparatiues, pour la plus part) il faut auoyr legierement soupe, affin qu'elles rançôtret l'estomach vuide. Autrement si ce sont choses aperitiues, elles precipitet les crudités aus veines & arteres, an augmentant la cause du mal, que nous voulons combattre. Et quand cet inconueniant cesseroit, d'autant que toutes telles drogues ne sont penetratiues, il ne faut pas qu'elles rançôtret quelque chose dans l'estomach. Car cela romt la force du remede, le detrampant mal a propos. Je remoutreray ailleurs, combien il est requis d'a-

d'auoir l'estomac vuide, lors qu'on prend medecine: & que plusieurs font mal, de manger & boyre le soyz auparauant, de tout a leur plaisir, esperans que la medecine amportera toutes les superfluités. Tels propos se peuuent aysemant accommoder a cetuy cy. Car quoy que ce soit, boullion, orge monde, l'ait d'anneſſe, ou d'autre animal, Iulep ou autre droguerie, s'il ne trouue l'estomac vuide, & déchargé de la viande du souper precedant, ou il ne fait guieres de bien, ou il apporte grand detrimant. Si on me demande, que sert il d'auantage de prandre les boullions, alteratifs & les orgemondés, au matin sans autre chose, que a disner ou a souper avec les autres viandes, veu que tout est alimant, qui se peut accorder avec le reste: ie repons, comme par cy deuant, que si telles choses se melet avec des autres, ou leur vertu se diminuë, ou (si elles sont aperitiues) conduiset la viande auant sa meure concoction, hors l'estomac, & font plus de mal que de bien. Dont il vaut mieus, que chaque chose soit prise a part, & de ne confondre les viandes avec ce qui est medecinal.

si r'est mal fait de boyre a l'heure de coucher.



A coutume est an France (au moins es meilleurs maisons) d'auoir toujours le vin de la colacion, & n'etre iamais la nuit sans vin a la chambre: cōbien que plusieurs abstiennet de ce vin volontiers de cēte buvette; les autres boyuet quelques fois, les autres d'vn ordinaire, à l'instant qu'ils se veulet mettre au lit, plus par coutume, que contrains de la soif. Le vulgaire de Lāguedoc ha vn cōmū prouerbe, cōtraire a cela, q̄ qui se va coucher an soif se leue an fanté. A quoy il samble q̄ Hippocras s'accorde bien, disant an ses Aphorismes, ceus qui la nuit ont appetit de boyre, si ayans grand soif ils s'andormet la dessus, ils sōt bien. Mais on pourroit interpreter son dire, de ceus qui seuelhet an soif, nompas des autres qui ont soif auant que dormir. Car il y a plus d'apparāce, de ne permettre de boyre sur nuit & au premier reueil, que auant le dormir. Et quant a moy, ie ne trouue pas fort mauuais, que ceus qui ont accoutumé de boyre a leur coucher, le continuet : ainsi que i'ay veu faire a feu mon pere, plus de vint ans. Et i'ay ouy dire qu'vne des plus nobles & illustres maisons

sons de France, le pratique ordinairement; ayant certe opinion, que cela fait a la santé: de sorte que ses ansans y sont nourris. Il est vray que la coutume est vn tiran, ha grand' force, & bien souuant plus de pouuoir sur nous, que la Nature mesme. Combien que cette cy est legitime gouuernâte, & l'autre par vsurpaciõ. Touttestois il ne faut pas mepriser la coutume, a cause du pié & auantage qu'elle ha gagné sur nous. Ioint que (comme dit Galien) Li. 5. de la ceus qui s'acoutumet a quelque chose, pour la conf. de plus part eliset vne coutume conuenable a sante. leur naturel: d'autât que offancés coup a coup de ce qui ne leur cõuiet, ils le repudiet. Touttesfois quelques vns, ou vaincus de la volupté & douceur, ou ne fantans par grãd' folie d'anestre offancés, continuet an mauuaises coutumes. Mais il y an ha peu de ceus cy: il y an ha plus qui n'y perseuerët point. Et an vn autre passage. Il n'y a personne si stupide (dit il) que Li. 9. de la etât offâce grandemât deboyre de l'eau froide meth. veulhe tirer cela an lõg vsage. Car an etât offä cha. 16. cé, & malade euidámât, il an abstiēdra totalemât. On pourra biē repõdre, qu'il ya fort peu de jās qui veulhet cõmãder à leurs appetis, voire qui veulhet abstenir de chose que ce soit, si les medecins ne la leur deffandet expressement, & mesmes que ce soit par escrit. Autrement il leur samble n'y etre pas tenus.

72 Du boyre quād on se couche
 Voyla vne grande reuerie : ne vouloir abste-
 nir de ce qu'on eprouue & confesse estre nui-
 sant a son naturel, sinon que le medecin l'ayt
 expressement deffandu: ancor y a il bien affai-
 re a le persuader. Vne sage personne & tam-
 perante, luy mesmes se fera aysemant vn re-
 gime de santé, sur ces experiances & obserua-
 tions, an la qualité & quantité de toutes cho-
 ses, plus assuré que le plus sauant medecin du
 monde, s'il y veut antādre sans se flatter aucu-
 nemant. Mais laissons apart la coutume, &
 mesme la nourriture dez l'ansance : voyons
 s'il ya quelque apparence de raison, qui per-
 suade ou permette de boyre quand on se va
 coucher. Il me samble qu'on peut deffandre
 telle procedure, an faueur de ceus qui y pren-
 net grand plaisir, & le font volontiers. Car,
 comme dit Hippocras du boyre & du manger,
 ce qui est vn peu pire, may's plus agreable,
 est melheur que le contraire. D'auantage, sup-
 pose qu'il y ayt grand trait depuis le soupper
 iusques au coucher, comme de trois heures
 pour le moins, la digestion est a demy faite.
 Dōt il n'est pas mal fait de prandre vn peu de
 vin. Car il s'accorde & accōmode biē avec ce
 qui est a demy-cuit, le vin n'ayāt besoī de lōg
 sejour a etre digeré: veu que c'est vne liqueur
 facile a transmuier, & qui parfait la digestion.

Ainsi

Apho. 38.
 liu. 2.

Ainsi il ne retarde pas ce qui est ja fort auancé, ains sera aussi tost prest a sortir de l'estomach, que l'autre, a qui d'abondant il fera ce bien, de le conduire plus auant: de sorte que le chyle an penetrera mieus au foye. Aussi les plus aises de ceus qui vset d'un tel regime, le font (cōme i'ay antan du) pour cet egard, que la distribution se fasse plus soudain, & le foye an soit humecté. De quoy il s'ansuit (a leur auis) qu'on an repose mieus, & le dormir est plus plaisant. A cela fait aussi la douce vapeur du vin, laquelle humectant le cerueau, andort plus fermement: par quel moyen, la seconde digestion est heureusement accomplie, & il s'an ansuit quantité de bon sang. On ne peut icy obiecter que crudité, qui est à craindre pour l'interruption de la coccion que l'estomach ha bien auancé. Mais ce n'est pas du boyre (& mesmemant du vin) comme d'un autre chose qui seroit de longue cuitte, ou qui epaissiroid d'auantage le chyle: lequel a raison de ce, pourroit trop sejourner, & estre mal aysé a distribuer. Le vin qu'on boit, et comme l'eau qu'on aioute a vne soupe epaisse, qui autrement bruleroit dans le pot. Et pour n'interrompre sa cuitte, les bons cuisiniers la detrampet avec du boullon chaud, ou l'eau bouilhante. A quoy repond le vin; qui de sa chaleur naturelle antretien & fait mieus continuër la digestion, sans que tel-

74 Du boyre quand on se couche
le interpretacion soit de duree, ou preiudicia-
ble. Car soudain apres, la cuite recommâce de
plus belle, & est parfaite plus aysement: l'esto-
mach se vuide mieus, quand son chyle est plus
liquide, & le foye an ha melheure part. De ce-
cy on peut colliger & cōclurre, que cette col-
lacion ne peut conuenir, sinon a ceus qui boy-
uet peu a leurs repas, & sur tout au souper, les-
quels mangeans bien, ne sont pas alteres. Tels
ne sont pas mal de boyre quelques heures a-
pres, & ie pense qu'il leur est sain. Toutesfois
ie n'ecris cecy, pour persuader a aucun de re-
cevoir cette coutume: moins voudrois-ie aque-
rir telle reputacion, d'auoir par mes raisons in-
troduit pour vn regime de santé, le boire apres
souper, comme auocat des collacions noctur-
nes, (aussi vaud il mieus de beaucoup, boyre a
ses repas competamment, & a proporcion de
ce qu'on mange) mais ie remontre par ce dis-
cours, que ceus qui ont telle coutume, sont fō-
des an quelque raison: & s'ils y sont nourris
d'ansance, ils le peuuent sainement antretēir.
Aussi, qu'il ne faut s'ebair de ce qu'ils ne s'an-
trouuet mal. I'auois vne tante, seur de mō pere,
mariee a Condrieu, an la maison des villars, qui
mourut fort agee. Elle ne falloit iamais de
boyre s'allant coucher, vn grād trait d'eau, dās
laquelle auoit trampé vn gros quignō de pain,
anuiroñ vn heure au parauant. Et continua ce-
la

la plus de quarante ans, toujours se portât biē. On dit pourtant, qu'an fin elle mourut hydro-
pique, ce que luy pouuoit estre auenu d'autre
occasion. mais ie n'aprouue pas ce boyre d'eau
a l'heure du coucher: & moins ancor ce que fōt
plusieurs filhes & fames, trop suiētes a leurs ap-
petis & fantasies: qui ne font difficulté de boire
deus ou trois grans verres d'eau pure, simple, &
froide, a l'heure du coucher. Elles s'an vantent
quelque fois: mais il n'y ha pas toujours de-
quoy s'an rire, mesmement quand de ce desor-
dre, elles ont andepuis vn mauuais estomach, le
foye & la ratē pleins d'oppilacions: d'oū pro-
cede: les palles & vilaines couleurs, courte ha-
leine, battement de cœ̃ur, suffocacion de ma-
trice, & a aucunes le vice de sterilité.

DISIEME CHAPITRE.

*S'il faut boyre aussi chaud qu'on ha le sang, mesmem̃s
an atē: & s'il est mauuais de raffraichir le vin.*



A plus-part des opinions vul-
gaires, sont doctrine de vielhes
ians, qui ayans vecu longuemāt,
& veu beaucoup de choses, veu-
let tout reformer, & ranger les
autres a leurs appetis sans di-
stinguer des ages. Ainsi d'autāt qu'ils sont tous

76 Du boyre chaud, ou froid

morfondus & frilheus. ils voudroint que chacun se vetit & couurit de mesme eus, & abstint de mille choses qu'ils santet nuisibles a leurs personnes: comme le boyre frais an æté. & diset, que chacun doit boyre aussi chaud qu'et son sang. Laquelle propolicion i'accorde pour leur respet seulemant. car ayans le sang froid, comme aussi tout le cors, ils n'ont besoin de grand' fraicheur. Mais le ieune homme qui ha le sang boulhant, ne seroit iamais de falteré sil beuuoit ainsi chaud, nompas mesmes ainsi tiede qu'est le sang tamperé an æté. Car la soif est vn appetit de froid & humide: & est causee non naturellemant de tout ce qui echauffe, ou qui desseiche. Commant donc la peut on appaiser, sans fraicheur humectante? L'experiance demoutre asses euidammant, que si on boit chaud, c'est a recommancer: parce que on ne se desaltere pas. Pour conclurre ce propos, ie diray ancores ce mot, que sil estoit sain de boire autant chaud qu'on ha le sang, les vielles jans auroint à boyre beaucoup plus frais que les ieunes: chose par trop absurde, & ridicule. Il y a vn autre opinion plus commune & d'apparance, de ceus qui aprouuet bien le boyre frais, tel qu'il sort de la caue ou du tonneau, & l'eau venant du puis, ou de la fontaine: mais nompas que l'vn ou l'autre soit rafraichy. Donques on sera commandé de la dis-

posicion des caues, selliers, puis, & fontaines: tellemât que qui les aura fraiches, il an aura le plaisir: & les autres soutiendront grand' facherie pour leur santé, quâd ils n'oserôt raffraichir le vin, l'eau, ou tous deus. Mais (ie vous prie) qu'importe il de mal, q̄ le breuage soit frais, ou de l'air qui le cõtient, ou de l'eau dâs laquelle il trampe? Si l'eau n'est mal saine de sa froideur, quâd elle sort du puis, de la fontaine, citerne, ou riuere, elle ne randra pire le vin qui an sera alteré & raffraichy. Je suis content qu'il ne soit pas si sauoureux, mais il ne sera pas moins sain, que celuy qui sortira frais d'une caue bien froide: veu que le raffraichissement ne luy peut apporter mauuaise qualité. Reste que ce soit la seule froideur que l'on decrie tant, d'où que elle procede. Mais quoy? il y a du vin raffraichy, qui est moins froid qu'un autre sortant du tonneau, lequel on ne condamne pas. Et que ne crie l'on ancor plus, du boyre glacé qu'on fait an hyuer? Est il possible de boyre si froid an æté, qu'il gele ainsi les dans, & souuant ampeche de boire si long trait qu'on voudroit bien? Toutesfois vous n'oyes personne, qui vulgayrement reproue cela: ains au cõttaire, la plus part trouue mauuais, que an hyuer on echauffe le vin, ou l'eau. Sont ce pas des jans du tout contraires à Nature, qui la veulet forcer a mode de

geans? Noz cors an æté sont boulhans, brulés & asseiches, nous ne boyrons pas frais, & abondamment, pour resister a l'intemperature & inclemence de l'air, qui conuertit noz humeurs dous an amertume, qu'on appelle cholere: de quoy procedet les ficures tierces & ardâtes, les dysâteries, & autres diuers maus qui regnet an æté? Et an hyuer, que nous sommes transis & contrains de froid, tous rheumatiques & morfondus, nous boyrons de la glace? Les appetis, non recherches, ains spontanees, sont pour la plus part conduis de Nature, a laquelle ils appartiennent. Dont il leur faut complaire avec raison & mesure: comme de resister au froid, par la chaleur, & au chaud par son contraire. Autrement, les saisons de l'annee nous causent mille maus, par l'alteraciõ de l'air: lesquels on peut preuenir, par le droit vsage des choses q̃ Dieu nous donne an tams opportun, & lors qu'elles conuiennent. Est ce an vain, ou d'une grand' prouidence de Nature, que les puis, fontaines, & caues sont plus fraiches an æté, plus chaudes an hyuer? Et qui n'ha telle commodité de foy, ne la doit il pas contrefaire par artifice? Est ce an vain, que les fruis humides & frois, sont produis an æté, & lors qu'ils nous sont necessaires, an hyuer point: & que adonc le vin commande d'estre an sa force, venant bié a propos pour nous armer contre le froid? La ramee faisant

vmbrage

vmbrage nous defand du Soleil an æté, qui ne seroit propre an hyuer : aussi ne l'auons nous pas naturellemant. Qui n'ha de l'ombre an æté, au moyen des boccages, tonnes & treilhes, fait il mal de la cōtrefaire d'vne frescade? Certainemant comme il est proffitable, d'vser an æté de ce qui raffraichit, & an hyuer de tout ce qui echauffe, suiuant la raison naturelle, & l'auis des plus sages (qui sont les plus sauans) aussi est il bien proffitable, d'employer ce qui ha de fait les qualites requises. Mais que faut il tant s'arreter a impugner des erreurs si grossieres, & des personnes qui n'ont propositions, certaines ou repondantes l'vne a l'autre, ainsi qu'il appartient a vne vraye doctrine? Car an samblable fait, telles jans se contredifet fort lourdemāt, cōme des fruis qu'on mäge pour se raffraichir. Y a il personne, qui ne trouue mauuais, qu'on mäge des cerises, prunes, figues, raisins, melons, & samblables, tandis qu'ils sont chaus du Soleli? On les fait raffraichir, les vns dans vne caue, les autres dans l'eau froide. Et pourquoy ne boira on aussi du raffraichi pour se defalterer? Il y a bien des artifices qui peuet estre suspects, comme de mettre dans le vin ou de la glace, ou de la neige: item de tramper les boutelhes dans l'eau qui ayt du salpetre, cōbié que le salpetre ne soit tel, qu'on n'an puisse bié aualler sans dāgier. Mais de trāper les bou-

80 Du boire chaud, ou froid.

telles an eau simple, qui soit bõne a boire, quel mal y a il, puisque on boit biẽ d'y celle mesme eau, & seulẽ, & avec du vin? Ou quel dangier y peut il auoir, que le vin & l'eau soient raffraichis an l'air du puis? Quelcũ pourroit icy obietter la Colique. & biẽ, ceus qui y sont suiets, ou qui se trouuet autrement offancẽs de boyre froid, qu'ils abstienent non seulement du refroidy, ains aussi de celuy qui est frais de soy-mesme. Car c'est le deuoir, & vne grand sagesse, de n'vser chose qu'on ayt quelque foys eprouuẽ nuisante a son naturel: mais d'y ranger les autres, il n'y a point de raison. Ou il faudroit, que le fourmage fut du tout condannẽ, pour ce qu'il nuit aus graueleus: & que chacun abstint du vin, parce que il fait mal aus goutteus. Y ha il rien plus iniuste & tyrannique, que de vouloir assuietir a ses appetis ou santimans, les autres qui sont de differante complexion? A cela vienent les bonnes jans, qui reprouet le boire frais, & conseilhet a tous de boyre autant chaud qu'on ha le sang.

Contre

ONZIEME CHAPITRE.

*Contre ceus qui se plaignet an até de la chaleur desnuis,
& ce pandant ils couchet sur la plume, les fenetres
fermees.*



NO v s oyons plaindre ordinai-
remant les jans an até, de l'ex-
treme chaleur de la nuit ; plus
que du iour, an vn mesme lieu,
comme dans la maison, & mes-
memant ez chambres où l'on
couche. Lesquelles, si on considere, sont com-
me des fours, ayans l'air etouffé, a faute de les
euanter souuant, & tenir tout ouuert aus heu-
res que le Soleil n'y donne point, & de les raf-
fraichir souuant d'eau bien froide, avec vn peu
de vinaigre, & force feulhes a qui an ha la cō-
modité. Car de laysser les chambres durant l'æ-
té, an mesme etat que ez autres saisons, il ne se
faut pas ebayr si on y brule. Que pis est, la plus
part des jans couchet sus la plume, tout ainsi
qu'an hyuer: & ne font differance des lis, sinon
quant a la couuerture, qu'ils prenet plus legie-
re an até. Rien ne sert de m'alleguer, que tous
n'ont le moyen d'auoir des matelas à part les
coittres. car il vaudroit ancor mieus, coucher
dessus la palhe, ou dessus la poussiere du bled,
ou de l'auoyne (chose fort delicate) qu'on nō,

82 Du dormir fraichement an æté.
me autremât Balouffe. On y et vn peu pl^s dur,
q̃ sur la plume, mais la fraicheur & l'ayse qu'o
an ressoyt, recôpance bien cela: mesmes que le
sommel y et plus gracieus, suaue & paisible, sâs
côparaïson. Et an toutes choses il n'y ha que
l'accoutumâce. Que la palhasse soit bié plaine,
& la palhe bié remuee, on y et asses mollemât:
& au reste bié fraichemât, avec vn plaisir nôpa-
reil du plaisant dormir qu'on y prand. Vn au-
tre erreur non moindre et, de tenir les fen-
etres fermées toute la nuit, mesmes quand on
ha commodité de rideaus, ou de pauillon, qui
defandet du vant, si parauanture il s'eleuoyt
tandis qu'on dort. Car quant au froid simple,
il ne le faut ainsi craindre, veu que il n'et ia-
mais si froid an æté, les fenetres etans ouuer-
tes, qu'il et an hyuer tout etant bien fermé,
mesmes avecques des chassîs, dans vne cham-
bre nattee & tapissée, an laquelle tout le iour y
ayt eu bon feu. Qu'ainsi soit, il vous faudra an-
cor plus de couuerture etant au lit (sur peine
de s'antir froid) qu'il ne faut an æté, les fenetres
etant ouuertes. Si on ne craind pas vn tel froid
de la chambre an hyuer, pourquoy le craind
on an æté: lors mesmes qu'il ne peut etre dit
proprement froid, ains tiede & tamped? De
craindre le serain sous vn couuert, & lit an-
cortiné, c'est abus: comme on peut aysemant
côprendre du discours que i'an ay fait ailleurs.

Car

Car il n'y a aucune mauuaise qualité an l'air extérieur du serain , dont il le falhe ampecher d'antrer aus chambres. Il n'y a que la fraicheur ou qualité fraiche , bien requise au repos & dormir plaissamment. Et qui et celuy, qui ayât a choisir an æté de deus chambres, l'vne bien chaude, l'autre bien fraiche , etans sur vn mesme plancher, ne choy sit plustost la fraiche? D'oc si on peut commodement rafraichir celle qui est chaude, comme an tenant les fenestres ouuertes, depuis le Soleil couché, iusques au matin, quel mal y aura il ? supposé, que l'air libre de la rüë ne soit pire (sinon meilleur) que celuy de la maison anclos & etouffé. Ceus qui couchet aus chams, gardans le betal , ou les fruis, & les soldas an campagne a l'ansigne des estoilles, & de la Lune, contre vne haye, ou sous vn arbre, ou an des petites loges & cabanes, pour se garantir seulement de la rosee , & du vant, dormet sans comparaison plus sainement (oultre le plaisir inestimable) que ceus qui s'anfermet dās les maisōs. I'experimāte le semblable, avec toute ma famille , & les habitans de ma maison, y ayāt mis la coutume, de laisser ouuer tes les fenestres de toutes les chambres, au gros de l'æté, durāt la nuit: & les tenir bien closes, avec des cōtrefenestres, tout le iour. Si on craid d'etre surpris la nuit de quelque tantimant de froid, qu'on ayt au pié du lit vn autre couuer-

84 Du dormir fraichement an æté.
ture de secours . Et combien de fois auient il
de mēmes an hyuer , qu'on s'euelhe pour le
froid que l'ont fant extraordinai emant surue-
nu, a quoy on remedie de mēme sorte, sans fai-
re grand cas de cela. Mais on repliquera, qu'il
est pire an æté, d'autant que les pores sont plus
ouuers de la chaleur du iour. Et bien, il y a re-
mede , a se couvrir dauantage dez l'antree du
lit. Car il est raisonnable , que l'on se couure
plus ou moins , selon la fraicheur de la cham-
bre. Ce pendant on ha cette recreacion & prof-
fit, que l'air qu'ō inspire est frais, & non etouf-
fant: ce qu'il faut principalemant rechercher.
Car nous ne voulons pas , que le froid touche
le reste du cors echauffé: ains seulemant le visa-
ge, pour la bouche & le nez, par ou nous respi-
rons . Aussi c'est le vray moyen de raffraichir
tout le cors, an raffraichissant le cœur, le pou-
mon , & le cerueau , le tout par dedans. Car
le froid surprenant par dehors la superficie du
cors, an constipant les pores, redouble la cha-
leur, & donne plus grand malayse, alteracion,
inquietude, lassitude , & autres facheus acci-
dans, à cause de laditte chaleur, conceuë & aus
antralhes & aus iointures.

Que

DOVZIEME CHAPITRE.

*Que les boudins ne valet rien gardes : & que de la est
venue la coutume d'an faire des presans.*



Le sang et estimé mauuaise viande, de quelque animal que ce soit, & comme qu'on l'aprete : parce que tout incōtinant qu'il est hors de son lieu, (ce sont les veines, & arteres qui seules ont pouuoir de le contregarder an son integrité) il cōmance a se corrompre & gater. Dont qui an veut vsfer, il ne doit attendre longuemant. Car toujours il deuiant pire. La friandise ha mis beaucoup de viandes a l'vsage de l'homme, qui sont mauuaise nourriture. La chichette & pauvette an ha introduit d'autres, qui sont autant pernicieuses. Le sang de beuf est bien de celles, qu'on vse plus par grand necessité, que par delicatesse, veu le peu de gout qu'il y ha. Celuy des moutons vaut bien mieus, comme leur chair est plus friande. Mais de vray, le meilleur ne vaut rien a manger, & seroit bon qu'on les ietta, a la mode de France, où le sang de tels animaux n'est point ressu antre les alimans, ains réputé poison ou excremant. Des brebis il est pire que des moutōs, tout ainsi que leur chair. Quant a celuy des boucs, ie ne panse pas qu'on

an vſé, ſinon an Medecine, pour diſſoudre les pierres de la veſcie: a quoy il et eſtimé propre, etant bien préparé, Le ſang des chieures ha été de requete & priſé de l'ancienneté (comme te mogne Homere) eſtimé friandise. On y meloit beaucoup de graiſſe, & de cela on rampliſſoit les boyaus ou le vautre de tels animaues: d'où ie panſe que noz boudins ayet leur origine. Mais il ne ſe faut prandre au gout, & moins au iugemât des ians de ce tams la, qui ne cognoiſſoint pas ancores les viandes plus ſuaues, & de facile digeſtion, comme dit Galien. Auiourdhuy on reſſoit ledit ſang, & melé de perſil, ou autres menuës herbes, avec le gras du lard, il et eſtimé de bõne ſorte, plus q̃ les deſſudis, auxquels on n'antremele rien. Le ſang des agneaus & cheureaus eſt appreté, comme le precedant: & eſt d'autant plus delicat, que leur chair eſt friande: dont celuy du cheureau precede l'autre. Meſmes appareil ſert au ſag des poullets, poulles, & chappons. lequel et priſé ſur tous autres, de notre tams. An Italie on ne ſaigne point la poulalhe, ains on leur romt le cou, où ſamaſſe beaucoup de ſang, & fait comme vn boudin, qu'ils eſtimet fort ſauoureux. Et de vray il an et bien melheur, que ſi l'air y auoit touché: car la peau du cou le conſerue & garde de corrompre. Les anciens ont fait grand cas du ſang des lieures, ou leuraus: meſmes au

tams

Liur. de la
fac. des a-
lim. chap.

tams de Galien, tel sang estoit le plus recom-
mandé, & comme viande tres-delicate : qu'ils
faisoient cuire avec son foye. Je ne le voys pas
an vsage, mais ie croy qu'il seroit melheur que
d'autre bete. Je dis melheur, nompas simple-
ment bon : car pour an faire vne reigle, tout
sang angeandre mauuais humeur, & et de ma-
le digestion. Le sang des porceaux aujourdhuy
ha les plus grans honneurs, veu qu'il et depar-
ty & presanté aus plus prochains amys, an for-
me de boudins. Le peuple ha obserué de lon-
gue-main telle coutume, ne sachant bonne-
mât pourquoy il le faut ainsi faire. Il le prend
comme symbole de beneuolance & amytié:
ou parce qu'on an ha beaucoup, on an veut
faire part aus autres, attendant mesme gratui-
té. Ce que sert d'an auoir long tams de frais,
quand chacun a son tour veut randre la pareil-
le. La premiere cause et hōneste. car aussi pour
faire presant de boudins, qui soit plus honnora-
ble, on y aioute vne penne de foye, & aus vns
la ratelle, aus autres vn des filets, ou bien des
hautes coutes : les moindres sont, où il y a du
rognon, ou du poumon. Tout cela est cou-
uert de la coiffe ou crepine, laquelle on tal-
he an autant de pars, qu'on veut ordonner de
presans. Toutes ces pieces sont l'arichissemât
de noz boudins: lesquels principalement signi-
fiet (si on le veut ainsi prâdre) quelque affectiō

cordiale, & chérie, comme le sang. Lequel denote aussi l'amour: parce qu'il sort du foye, où Platon luy ha donne siege. Donques on veut moutrer vn signe d'amytie, quand on anuôye du sang: mesmes tel qu'on estime & sain & delicat. L'autre raison ha lieu, àntre ceus qui estimet l'antretien de santé, & obseruet diligement la qualité des viandes. Car le sang quel qu'il soit, ne peut guieres durer sans estre corrompu de l'air. Et pcurtât on ha auisé, de mettre celuy des pourceaus, (qu'on estime si delicat) dans les boyaus, qui de leur epaisseur le cōtregardet mieus. Dont les melheurs boudins, sont ceus qu'on fait le sang etant ancores tie-de. Depuis on le fait parboullir, tant affin qu'il se garde mieus (cōme la viande cuite) que pour le pouuoir departir cōmodement. On met parmy le sang, pour le preseruer plus long tams, du sel, du thym & serpoulet. Aucuns y aioutet du fenouil, les autres vset de mariolayne, persil, hyfop, & autres herbes menuës de bonne odeur, excepte la faricte, parce que le peuple estime faussement, qu'elle peut ampecher, que le sang ne s'epaississe quand on le cuit, veu qu'on le donne aus malades, pour dissoudre le sang calhé. La graisse n'y et hobliee an bonne quantité, sinon des chiches fames, lesquelles on taxe honnetement, an les nommât bonnes menageres, quand elles y ont bien e-

pargné la graisse. Mais si les boudins ne sont gras, ils sont mal sains, d'autant qu'ils sejour-
net long tams a l'estomach, & sont tard dige-
res a cause de leur apreté, & seicheresse. La
graisse les fait mieus glisser: dont ils an sont
moins dangereux. Comme les autres viandes
mauuaïses, quand elles n'arretet guieres au
cors. Quoy qu'on y fasse, le meilleur et d'an
abstenir du tout, ou an vser fort sobremant, &
que les boudins n'ayet passé vn iour, ou deus,
pour le plus tard. Voyla pourquoy l'institu-
cion est bonne, de les distribuer. Car de les gar-
der longuemant, ils deuiennet tant pernicious
qu'on les peut bien nommer poison. Vne fa-
me de Mompelier iadis an moutra l'exemple,
comme l'on dit. C'et, qu'elle mourut suffo-
quee, pour auoir mangé des boudins gardes,
pansant bien menager de n'an donner a persõ-
ne, & ne manger autre viande tant qu'ils pour-
roint durer. A peine les eut elle acheué, qu'el-
le mourut, de meme qu'on meurt ampoison-
né.

Contre ceux qui craignent par trop la saignée, & ont opinion que la premiere sauue la vie.



D'Autant que le sang et le tresor de nature, aliment des esprits, & le sujet de la chaleur naturelle (qui gouuerne le cors an toutes ses operaciōs) on fait bien de l'auoir cher, & le garder soigneusement, comme etant necessaire a lantretien de noz forces, & conseruacion de santé: dont il ne le faut laisser perdre facillement, an faisant peu de comte. Mais aussi on doit obseruer deus choses principalemāt: l'vne, qu'il soit bien pur & net de toutes immondices: l'autre, qu'il n'abonde rien trop, ancor qu'il soit bon an toute perfeccion. Parce q̄ s'il et depraué, immōde, & laid, il nuit plus qu'il ne proffite. S'il et demesuré, il met ses vaisseaus an dāger de creuer, & la chaleur de se-taindre. Parquoy il ne faut riē craindre quād il et si copieus, d'ā vuidier vne partie, pour fayre place au nouveau qui s'āgeandre incessāmant. Aussi quād il et eschauffé & boulhāt, a cause de la fieure, si on ne luy fait ouuerture pour expirer (cōme on donne vant au vin nouueau) il met la personne an grand dangier, & la tourmente etrāgemant. Quand il est corrompu des mau-

mauuaifes humeurs, & an grand quantité, auât qu'il soit du tout gaté, on an vuide quelque porciõ, affin de nettoyer plus aysemât le reste par medecines: lesquelles separet & triet parmy le sang lesdits humeurs, & les chassent dehors: dequoy elles meritent le nõ de purgatiues. Il ne faut dõc pas decrier simplement la saignée comme ennemie de nature, & l'auoir an telle horreur q̃ plusieurs l'õt (suiuãs Erasistrate, qui appelloit sanguinaires & estimoit meurtriers ceus qui la cõselhoint) puisque vn grãd nõbre de maladies qui procedent des sudittes causes, ne peut estre aboly, sans recourir à ce remede. Quãd la fièvre est fort vehemãte, le visage inflãmé, & les veines anflees, la saignée n'est elle pas requise? Si on est estrãglé d'une Squinãce, ou suffoqué d'une inflãmacion de poumõ, ou d'une vraye pleuresie, il n'y a riẽ qui secoure plustost, & interrompe si promptemât le mal, que la prompte saignée: laquelle generallemât conuient a tous desordres fais d'abõdance & surcharge de sang, quel qu'il soit, bõ ou mauuais. Je m'ebays de quelques vns, qui prãdrõt pl⁹ volontiers vint medecines, que d'ãdurer vne saignée leur etãt necessaire, veu si grande cõmodité, & nõ moindre facilité. Car on y peut obseruer iustemât la mesure qu'il nous plaist de vuider: on l'arreste quãd on veut, & elle peut estre reiteree pour n'affoiblir le malade a vn coup. La medecine n'est pas de mesmes.

92 De ne craindre la saignée.

Car bien souuât elle vuide plus qu'on ne voudroit, & il n'est pas a nostre puissance dela faire cesser quand il nous plait. Ce sont de grandes incommodités, outre le mal de cœur, l'angoisse d'estomach, & les grandes extorsions de ventre, qu'elle donne le plus souuant. Or quâd on et phlebotome, si on voit sortir du mauuais sang, il se faut persuader que le meilleur demeure dâs le cors: & se reiouir de telle vuidange. Si le vuidé est beau, croyes que le demeurant est encore plus louable, & que cela y estoit superflu. Quelqu'un pourroit iuger, que ce moyen de curacion et contre le deuoir de nature, laquelle ha soin de conseruer le sang, comme vn sien tresor. Auquel nous respondrons, que c'est elle mesme qui nous ha enseigné, qu'il faut au plusieurs maus vser de ce remede. Car le flux de sang mestrual aus femmes, nous moutre euidamment, que l'abondance peut etre dommageable, si elle n'est tâtost euacuée. Et pourtant Nature mesme luy ordonne passage nompas vne fois l'an, mais tous les mois. Et si pour quelque ampechement ce sang est reteuu, la fame s'an trouue mal. C'est vne reuerie de panser, qu'il doit etre vuidé comme etant du tout inutile, mauuais, & venimeus; veu que vn enfant an et fort bié nourry dedans le ventre de sa mere. Autrement, pourquoy seroit il supprime durant la

grosse

groisse, pouuant bien estre mis dehors sans toucher a l'infant ? C'est par les veines du col de l'amarry, par où se purget celles, qui ont ancor plus de sang, que leur fruit n'an consume. Plin raconte, que les herbes touchees de tel sang meuret, & le fruit choit des arbres sur lesquels môte la fame menstrueuse: que l'yuoire an perd sa lueur, & le fer son tranchant: que les chiens pour an auoir goûté deuiennent anragés, & s'ils mordet quelqu'un apres, il n'aguerira iamais. Les autres diset, que le sang des ladres n'est pas pire que cetuy-la. Je ne croy rien de tout cela: car il faudroit que les femmes eussent de plus estranges maux, qu'elles n'andurent par la suppression de leurs menstrues: outre ce que l'infant an seroit mal nourri. Il est donques plus superflu de quantité, que de mauuaise qualité, si ce n'est d'estre cru & phlegmatique. Celuy qui sort par les hæmorrhoides et souuent plus mauuais, que le sang menstrual: car c'est de la melancholie, le pire des humeurs, & qui verse a terre la fait boullir comme le fort vinaigre. Mais il est rarement syncere & pur. Car tout le plus gros sang aborde aus veines hæmorrhoidales, pour estre mis dehors, quand Nature l'a ainsi ordonné, au grand profit de tout le cors. Voila deus sortes de vuidange de sang, faites par Nature: qui montret bien euidamment, ce que

24 De ne craindre la saignée

nous deuons faire, quand nous cognoissons le besoin, & que Nature n'y peut pas auenir. Et si on dit, que ez cas proposés le sang et vuidé, a raison de son vice tant seulemant, on accorde par là, q̃ la saignée est profitable, quand le sang et ansamblemant vicieus & an grand abondance. Car s'il n'et que vicieus, il et retenu au cors pour la prouision de sa nourriture, & n'et point reietté. Mais que direz vous, de ce que bien souuant le sang n'etant pas corrompu, Nature an met dehors vne portion, pour soulager les veines qu'il anfle outre mesure, & alleguer le cors d'une grieue pesanteur? C'et le profit que plusieurs font de saigner par le nez. Dont si nous voulons ampecher & desaccoutumer Nature de ce passage là, il luy faut donner autre yssue par certains laps de tams, ainsi que nous le voyons abonder. Car autremant, d'auoir clos le passage, sansuiuroint plusieurs maus: comme des veines qui se creueroient dans l'estomach, au poumon, ou ailleurs: de quoy procedet le cracher & vomir de sang à quelques vns. Quoy? plusieurs maladies, autremant dangereuses, guerissent par grande effusion de sang au iour critique, & le mal de tete souuât se perd, apres qu'on ha saigné du nez. Tous ces exemples moutret bien, que suiuant l'œuure de nature, les medecins (qui ne sont que ses ministres) doiuent

doiuet quelq̃ fois amoindrir la quãtité du sãg,
qui menace diuers maus, ou les cause de fait.
Serons nous moins dociles, q̃ les betes deray-
sonnables, lesquelles aprises de nature cognois-
sent l'utilité de la saignée? Plinc escrit, q̃ l'Hip-
popotame se sentant fort replet, cherche des
cannes talhees fraichement, & trouuant vne
bonne pointe, il la presse contre sa cuisse, pour
ouurir la veine : par ce moyen alleguant son
cors, qui sans cela deuiendrait tost malade. La
chicure ayãt la veuë trouble, se blesse an l'œil
d'vn ionc poinctu, voulant decharger cette
partie d'vne porcion de sang; ainsi que le mes-
me auteur recite. Il y a beaucoup de personnes,
qui ne reprenet la saignée, sinon pour autant
qu'ils ont veu mourir des jans, apres qu'ils
auoyt saigné. Mais leur argumãt samblera fort
legier (ou plu-tost ridicule) si nous sommes per-
suades (comme il et vray) que toutes mala-
dies ne sont pas guerissables, pour le regard du
suiet. Et q̃ celles qui sont necessairemãt mor-
telles, meprisent tous remedes: dont la saignée,
bien qu'elle soit sagement ordonnée, ny peut de
rien seruir, comme l'effect temogne. Mais qui
veut neãtmoins attribuer l'occasiõ de mort a
la phlebotomie, pource que la mort l'ha suiuy,
on luy pourra dire par sãblable rayson, q̃ les
jans meurent pour auoir diné, souppé, ou dor-
my, d'autant qu'ils meurent tantost apres.

96 De ne craindre la saignée.

Si on voyoit mourir vn homme ce pendant qu'on le saigne, il y auroit grand apparence, que tel remede n'y conuenoit pas, ou qu'on la mal aministré. Toutesfois il faut toujours prendre an la melheur partie, ce que nous est incertain, & n'accuser legierement de faute le medecin qui ha ordonné la saignée, bié que le mal n'ayt prins an a l'auantage du patient: & panser que a malice & grandeur de la maladie, & non pas le remede, anichilant ses forces, l'ha precipité a la mort. L'accorde bien, que plusieurs foys on saigne mal a propos & que les medecins ignares y commettent de grandes fautes: toutesfois le vulgaire n'a peut ne doit iuger. Ou il fera souuant grand tort aus plus sauiens. Car de tous indifferamment, il an dira autant. l'an oy d'autres qui diset, ne se vouloir accoutumer a cette faison de remede, le reseruant a quelque grand & extreme besoin, comme pour l'imminent danger de mort. Car ils ont ferme opinion, que la premiere saignée sauue la vie infalliblement. Il est bien vray (& il faut ainsi parler) qu'on ne meurt iamais de la premiere. car si on mourroit cette fois là, on ne seroit plus saigné: & par consequant, telle saignée ne seroit proprement ditte premiere, ains vniue: d'autant que premier et relatif au segond, & aus autres ansuuiens. Mais que la premiere sauue la vie, comme

me ayant plus de propriété, c'est vn erreur de-
ja fort decouuert par longue experiance, qui
ansegne le contraire. Car on an voit tous les
iours mourir de diuers accidans, auxquels la
premiere saignée n'a pu remedier, & mille
personnes guerisset de fort estranges maladies
par la phlebotomie, qui ont souuant vsé de
ce remede. Cette opinion est par trop dange-
reuse & preiudiciable, d'autant que les maus
sont petis a leur commencement : & pour
lors peu de malades se desient de la guerison.
Or ceus qui suiuet telle fantasie, refuset la sai-
gnée aus premiers iours, la voulans reseruer a
plus grand' maladie, & a l'extreme necessité.

Ce pendant l'occasion (que Hippocras a bon
droit appelle soudaine & prompte) nous e-
chappe: & puis quand le paciant, fantant l'ex-
tremité, comance de s'y accorder, il n'est plus
a propos. Touchant a l'accoutumance, tant
s'an faut qu'elle puisse porter dommage, que
plu-tost elle nous y sert de beaucoup. Car ce-
luy qui est coutumier a se faire tirer du sang,
(pourueu que sa force n'an soit euidamment
diminuee) il l'andurera plus gayement qu'un
autre: tout ainsi que les maus ordinaires & ia
accoutumés, sont moins facheus: suiuant l'Apho-
risme d'Hippocras, que ceus qui ont acoutu-
mé des trauaus, combien qu'ils soient foibles &
vieux, ils les portet mieus que les robustes &

Aph. 2.
li. 1.

Ap. 49. li. 2.

ieunes. Donques il ne faut pas tant priser la premiere saignée: & la saignée an general ne doit estre ainsi suspecte au peuple, quant vn sauant & sage medecin l'ordonne, puis q'ce remede nous est anseigné de Nature, & est sort aysé, seur, & profitable a plusieurs sortes de maus.

QUATORZIEME CHAP.

*Qu'on peut saigner les fames grosses, les ansans
& les vieus.*



Le peuple ha su quelque fois des medecins, qu'il et dangereux de saigner les fames anccintes, les ansans, & les vieus. Maintenant si le medecin le veut faire, on estime que ce soit vn acte nouveau, temeraire, & hazardeus: & s'il auient que le malade meure, ce remede sera non seulement reprouué, ains reproche bien aigrement: non-obstant que le mal, & nompas le remede, ayt fait mourir le malade. Si on s'an trouue bien, c'et (à leur dire) plus de cas fortuit que de bõne cõduitte. Dequoy il ne se faut ebayr, puisque noz peres ont eu cette mesme opiniõ, & l'ont persuadé au peuple. Je dis, noz peres
les

les medecins, qui ont eté depuis deus ou trois
 fans ans. Ils antandoint, que Hippocras & les
 autres anciens, auoient ansegné, que c'ettoit
 vne grand' faute: & combien que souuant la
 saignee leur samblat necessaire, ils ne l'osoient
 pas ordonner. Mais s'ils eussent bien leu les li-
 ures, de ceus qui ont de plus pres suiuy les
 premiers Medecins, & sont presque au milieu
 d'Hippocras & de nous (quát au tams de leur
 vie) grecs & latins, jans rares an sauoir, & con-
 sommés an methodique experiance, ils eussent
 mieus antandu l'auis de noz bons auteurs, qui
 souloient an peu de parolles creuément ecrire
 leurs reigles. Car pour signifier, que la force
 du patient est sur tout requise au fait de la sai-
 gnee, ils ont dit, que les velhars & les petis an-
 fans, an doiuet estre exans: & ont ancor de plus
 pres limité l'age qui la peut andurer, de qua-
 torze iusques à soissante ans: pource que ceus
 qui demeuret dessous ce terme, ou qui le sur-
 passet, communemát n'ont pas les condicions
 que y sont requises. L'ordonnance et an ge-
 neral: de laquelle on peut dispanser & disposer
 particulièrement, sans contreuenir a l'inten-
 tion de ses auteurs, comme si on rancontre (ce
 qui auient bien souuant) vn enfant de bonne
 charnure, ferme & epaisse, etant fort & vigou-
 reus, ou vn vielhard robuste, lesquels ayet
 grand besoin de saignee, a cause de leur mal.

100 de saig. an tout age, & fam. gro.
 Galen nous a fait antandre, qu'il ne se faut
 tant arreter au nôbre des anneés, qu'a la ver-
 tu: laquelle on peut comprâdre du pous egal,
 vehemant, & grand, comme d'un signe trefue-
 ritable, & qui ne faut iamaïs de temogner assu-
 remât la force. Et pourtant aus septuagenaires
 qui ont sâblables pous, il permet la saignée, si le
 mal la requiert: pource (dit il) qu'il y an ha d'au-
 cuns fort sanguins & robustes an l'age de se-
 ptante ans, comme il y an ha d'autres a soïs-
 tante qui nela pourroint supporter. Quant aus an-
 fans, il n'ha iamaïs permis qu'on les phleboto-
 mat: nompas craignant de leur foiblesse (car
 ils ont plus de force vitale & naturelle, qu'ils
 n'auront a vint ou a trante ans) ains pour l'ai-
 sée dissipation de leur sustance, etans de ma-
 tiere ancor tandre, molle, rare, & fort resolu-
 ble. Touttesfois on ha eprouué, que souuant
 la saignée leur et proffitâble, voire aus moin-
 dres de sis ans, comme plusieurs temognet,
 & nous l'auons quelquesfois heureusement
 eprouué. Auenzoar escrit, auoir fait saigner son
 fis qui n'auoit pas trois ans, dont il se trouua
 bien. Et pourquoy an feroient ils du tout for-
 clos, si mesmes etant a la mamelle, quelques
 foys ils saignet fort du nez, sans qu'il leur an
 prenne mal? Si nature de son mouuemant se
 decharge quelque foys du sang aus ansans, le
 medecin qui n'et q son ministre & imitateur,

ne

Li. de la
 cur. par
 phlebo.
 chap.

ne l'osera il antreprendre ? Vn ieune enfant saignera plus d'un coup de poin au nez , que nous n'á tirerons du bras a vne fois: car il faut auoyr egard sur tout a la quantité , & auiser de ne leur an oter beaucoup. Dont a bon droit on pourra excuser noltre Galen , qui ne leur permet la saignee: pource que de son tams ils la faisoient fort grande. Car pour vn iour on eut tiré quatre liures de sang, & il dit an auoir veu sortir iusqu'a sis liures, au profit du malade. Auourd'huy c'est beaucoup d'an auoir trois ou quatre paletes (qui sont dis ou douze onces) d'un ieune homme qui soit robuste: & des enfans, an proporcion. Ancor antandons nous, qu'ils soient habitués de la charnure dessus mencionnee: outre ce que leur mal an doit faire instance. Touchant aus fames grouffes, Hippocras ha escrit , que la saignee les met an dangier, nompas de leur personne, ains d'auor tiffemant, mesmes si l'enfant est grâdet: pource que il est frustré de nourriture. Ainsi dit il estre impossible, que le fruit soit biẽ sain, quãd la mere ha ses fleurs an bonne quantité, durant la groisse. Mais quãd on voit, que la replecion outree, causee de grand' oisuetè, avec abondance de viures, & bonte de nature, menasse d'etouffer l'enfant, ou le contraindre a deplacer) comme il auient à quelques vnes, que a faute d'etre saignees, passés les trois ou quatre

Aph. 31.

li.5.

Aph. 61.

li.5.

premiers mois, s'affoulet de leur vâtree, pourquoy n'otera l'on du sang, qui et trop abôdant & dômageable. Si la mēme abôdâce, ou bien moindre, par vne sieure ardante et echauffee outre mesure, & cômâce à boullir, faisapt presq rôpre les veines, n'oserons nous (pour respēt de la grosse) vuidér vn peu de sâg, & euanter la veine, quand la fame grosse brule de sieure? Hippocras dit, qu'vn mal aigu, tel q'ay proposé, est mortel an la fame anceinte. La raison et qu'il y faut faire grand' abstinence, laquelle tuera l'ansant: ou si on luy permet grand nourriture, la sieure s'augmâtera, pour les faire tous deus mourir. La saignée nefait pas plus de mal, que la grand' abstinâce: & ne peut causer que l'auortissemât, cōme dessus et dit. Or il est moins mal d'â perdre vn, q' deus: mais le plus souuât tout et preserué, Dieu mercy: Et cōmant pourroit estre sain l'ansant, dans le brasier de sa mere? Quel alimant luy donnera le sang qui boult? Il faut par tous moyens e-taindre ce grâd feu, pour soulager la mere & l'âfant. Hippocras no' permet, de purger vne fame grouffe, depuis le quatrieme mois iusq' au settieme: a quoy tous noz docteurs cōsantet. Si dôc la fame anceinte peut, sans aucū dômage, andurer la purgaciō, laquelle agite, trouble, & ebranle le cors sans cōparaisō plus q' la phlebotomie (mesmemât les fortes medecines, desquelles vsoit Hippocras) pourquoy n'oserons

Aph. 30.
liu. 5.

Aph. 1. li.
4. & Aph.
29. li. 5.

de saig. an tout age, & fam. gro. 103
rôs nous vser de la saignee, quand il an sera de
besoin, mesmes cōsideré, q̄ c'et vn des reme-
des le plus seur & ayse? Car on sort tant de sãg
qu'on veut, & nō plus: cōm'etât an nōtre puis-
sance de l'arreter à chaque goutte. ce que ne
pouuons pas des medecines, quād elles vuidet
plus q̄ nous ne voulons. Mais que repondres
vous a ce, q̄ plusieurs fames cōtinuet d'auoir
leurs fleurs, durât toute la groisse, sans qu'el-
les ou leur fruit an valhe moins? Outre ce nō^s
voyōs souuāt, qu'vne fame grouisse, saignera
beaucoup du nez, ou d'vne playe, sans auorter
ou an rapporter aucū mal. Ce sōt experiāces
qui auient iournallemāt, desquelles on pour-
roit meshuy cōclurre, q̄ la saignee n'et pas si
dōmageable aus fames grouisses, qu'ō ha parcy
deuāt cuidé. Touttesfois affin qu'ō ne pāce, q̄
cette opiniō soit nouuelle, & des jās d'aujour-
d'huy, Celse (qui fut du tās d'Auguste, il ya pl^s
de mille & cinq sans ans) ha fort biē remoutré,
qu'il ne faut rien plus cōsiderer, q̄ la vertu de
ceus qu'ō doit saigner, disāt: de tirer du sãg aus
fames qui ne sōt pas anceītes, & aus ieunes per-
sōnes, cela est vieus: d'eprouuer le mesme aus
anfās, aus velhars & aus fames grouisses, il et
nouveau Car les anciēs ont estimé, q̄ le pre-
mier & dernier age ne pouuoit andurer tel re-
mede: & s'etoit persuades, q̄ la fame auorti-
roit d'etre ainsi traitee durant sa groisse.


104 de saig. an tout tās & fa. gros.

„ Depuis l'usage ha demoutré, que ces reigles
„ ne sont pas generales & sans exception, ains
„ qu'il y faut aiouter quelques melheures ob-
„ seruacions, auxquelles soit adressé le iugemāt
„ du guerisseur. Car il ne se faut pas arreter a
„ l'age, ne a ce qu'on porte, mais aus forces tant
„ seulemant. Donques si la personne ieune se
„ trouue foible, ou la fame qui n'est pas grouesse
„ ha peu de force, on fait mal de leur tirer du
„ sang: parce que la vertu qui reste, an languit
„ & se meurt. Mais vn enfant bien ferme, vn viel
„ hard fort robuste, & la galharde fame ancin-
„ te, an peuent seurement guerir. Touttesfois,
„ an ce cas l'ignorant medecin peut aysemant
„ falhir, d'autant qu'il y ha volontiers moins de
„ force an ces ages là: & que la fame grouesse ha
„ besoin de sa force, apres la guerison, non seule-
„ mant pour soy, ains aussi pour l'enfant. Par-
„ quoy le principal de l'artifice, requerant dis-
„ cours & prudence, git an cela, de ne conter
„ point les annees, & de ne regarder à la seule
„ conception, ains estimer la force, & d'icelle
„ cōprendre s'il an pourra souurer pour soute-
„ nir l'enfant, le vieus, ou ansamble deus cors an
„ vne fame. Par ces doctes propos on peut an-
„ tandre facilemāt, an quel erreur ont versé nos
„ peres depuis anuiron trois cens ans, iusques a
„ noltre tams, q̄ les sciencies ont reprins leur an-
„ cienne dignité, par l'ouuerture des bons li-
ures

ures, que l'ignorance auoit tenus caches.
 Et pouuons dire comme Celse, que noz ancestres ont frustré de la saignée les fames grousses, les ansans, & les vieus, sans aucune distinction : depuis l'experiance guide de rayson, ha fait connoitre aus plus suffisans de cet age, qu'on les peut bien saigner, quand le mal le requiert, & on le peut supporter. Donc, que le populayre, qui ha esté mal instruit, cesse mes- huy de faussement calomnier les bons & sages medecins, qui avec grand respect & meure de- liberation, amployet ce remede, quand il an et besoin.

QVINZIEME CHAPITRE.

Contre ceus qui temerairement & trop souuant vsent de la saignée.

 E que ie viens de remoutrer au pre- cedant chapitre, pourroit antrete- nir l'erreur de ceus qui trop volon- tiers vsent de la saignée, sans aucune discrecion. l'an voy plusieurs, qui pour peu de mal qu'ils se fantet, soudain veulet etre saignes: & il y a des barbiers outrecuides, qui sans auis de medecin, vsurpet ce remede a tout propos. Il et fort singulier quand on le fait accommo- der: mais le seul medecin (comprenant sous ce nom, le docte chirurgien) an doit auoir la char-

106 De feignerauec grád' discretiõ
ge. Car il faut estimer la force du malade, & la
grandeur du mal, presant ou auenir: qui sont
les deus condicions concluantes à la saignée.
Or c'et vn grand dommage, de saigner indis-
crettement & sans besoin: parce que a la neces-
sité on n'y peut recourir, le cors etant plus e-
puisé qu'il ne deuroit: & affoibly par le gast
des esprits, qui se perdet & verset an quantité
notable, quand on vuide beaucoup de sang.
Dont il auient, que le cors etant refroidy, les
operaciõs naturelles sont mal exequutees. Par-
quoy Galen disoit bien, qu'il n'et expediant
de saigner plusieurs fois l'annee. Celse parlant
an general, donne ce conseil, qu'on doit etre a-
uise, de ne consumer an santé les remedes qui
apartienet aus maladies. Ainsi an tams de pais
il ne faut gater les prouisions & municions de
la guerre, de peur d'an auoir faute au besoin.
Le sang et tresor de Nature, lequel on ne doit
ietter hors, que pour sauuer le demeurant, cõ-
me quand le mal et si grád & impetueus, qu'il
peut tout faire perdre. Ainsi les marchans an
l'extreme fureur de la tempeste & des orages
sumergeás, ne fõt pas difficulté de perdre leurs
richesses pour allegier la nef, & sauuer leurs per-
sonnes. Il n'et pas permis de saigner, que la grã-
deur du mal presant, ou auenir (comme nous a-
uons dit) ne le suade: & que la force y cõsante,
etant suffisante a soutenir le cors apres la phle-
boto-

botomie. Si l'un des deus y manque, c'est mal fait de saigner: veu mesmemant que la seule replecion & abondance de sang (sinon qu'elle menassat de quelque facheus accidant) ne suffit a persuader ce remede. Car a un cors autremant sain, l'abstinence, le flux de ventre, le bain souuant reiteré, la grande friction, ou le seul exercice, y peut assez remedier, come Galen ha bien deduit en son liure de la raison de curer par phlebot. De saigner vne personne, pour la seule chaleur excessiue du foye, ce n'est pas toujours a propos: veu qu'il y a prou de maus causes de chaleur, esquels l'usage des choses froides conuiet trop mieus, que la phlebotomie. Outre les deus sudittes condicions (qui seules indiquet la saignee) il y a plusieurs egars particuliers qui nous seruet de circonstances, & sont compris sous la force de celui qu'on veut saigner: lesquels il faut diligemment observer, & ne tirer du sang indiscrettement a toutes personnes, en toutes regions, & en toute saison: ce que le peuple n'antad pas. Les jans maigres a grosses veines, ont beaucoup plus de sang que les gras, qui par consequent ne supportet si aysement la saignee. En pays frois les jans sont grans mangeurs & beueurs: mesmemant de chair & de vin) abondans en nourriture: dont il auient qu'ils engeandret beaucoup de sang, & peuuet supporter la saignee, plusq ceus des regions cōtraires.

Car la chaleur dissout l'vnion de noz forces, & alanguit le cors: outre ce qu'elle dissipe noltre substãce, & ne permet faire prouision de beaucoup d'humeur. Voyla pourquoy les jans sont fort petis & grâiles ez regions plus chaudes, & ne peuuet (sans preindice de leur sãte) andurer la saignee, ny beaucoup, ny souuât. Touchant a la saison, si c'est pour preuenir les maus, Hippocras nous anseigne, qu'on doit saigner au printams: parce que adonc le sang abonde, & la force est plus grãde, a cause de l'air tamperé. Mais si an autre tamson ha besoin de saignee, il n'an faut faire difficulte: pourueu qu'on ayt ce respect, d'y estre plus chiche, & sur tout an æté. Anquoy se falhet lourdemant les Ampiriques, qui sans discrecion saignent prodigalemãt ez fieures ardantes, qui regnet sous la Canicule. Je diray ancor cela pour conclusion, qu'il ne faut moins de iugement & suffisance a bien ordonner la saignee, que la purgaciõ: veu mesmemant que la purgacion affoiblit moins le cors, quand la vertu de la medecine, & la force du patient, sont bien cognuës, & les humeurs bien preparés. Car les fautes qui an peuuet auenir, ne sont de telle importance, que celles de la saignee. Aussi faut il qu'elle soit diligemment obseruee, & prudamment dispensée, comme plus grand remede que la purgacion. Car Galen an priue les ansans, auxquels

Aph. 55.
Liur. 7.

quels toutesfois il permet les medecines. D'o-
ques il n'an faut vser si familierement, comme
i'an voys plusieurs, qui se font saigner comme
par gayeté de cœur: & le Magistrat deuroit in-
terdire aus barbiers, d'executer cela sans l'or-
donnance des medecins.

SEIZIEME CHAPITRE.

*Que la purgacion peut conuenir a toute saison, voire
durant les iours Caniculiers.*



E peuple ayant ouy souuant
mancionner aus medecins, les
iours caniculiers, pour suspects,
faeheus & ineptes à la purgaciõ,
suiuant l'opinion des anciens,
cuide parfaitemât que c'et mal

antrepris, de donner aucune medecine durant
telle saison, nonobstant qu'elle soit autrement
necessaire. Noz precesseurs ont mal fait, de leur
alleguer telles raisons, qui meritent grande di-
stinction. Car les idiots ayans retenu la reigle
ainsi pure & simple, comme leur ha esté pronõ-
cée, sans la sauoir limiter, aujourdhuy veule-
nt debatre contre les Medecins, de ne purger du-
rant la Canicule: au moins ils trouuent fort estra-
ge, & an murmure, si quelqu'un l'antreprand.
Pour les oter de cet erreur, nous serons con-

Aph. 5.
Liur. 4.

trains de leur interpreter l'aphorisme d'Hippocras, où et le fondemant de ce propos. Il dit, que l'vsage des medicamans laxatifs et moleste & difficile, dessous & anuirō la Canicule: signifiant, qu'il y a des autres tams plus cōuenables, & que cetui-cy et le pire. Qui sainemant antādra ces paroles, il ne cōclurra pas tout soudain, que le purger soit condanné & banny de telle saison, tellemāt qu'on ne le puisse quelque fois introduire, quand il et de besoin: ains qu'il apporte plus d'incommodites, & fache dauātage, que deuant ou apres la Canicule: & c'est a cause de l'air inflāmé. Car durāt la Canicule, nostre cors brule, & fond tout de chaleur. Les medecines purgatiues ont certaine forceur (mesmemant celles des anciens, violentes extrememant) qu'il n'est possible d'andurer, sans deplaisir & grād peine, outre le dangier qu'il y a d'allumervn plus apre feu. Dōt il auient, que pour estre purges inconsideremant durant telle saison, plusieurs tombet an fieure, comme dit Galien. Outre ce, nostre force deja foible & abbatuē par la chaleur de l'air, deuient ancor plus lache par les medicamans. De sorte que nous poutons dire, tel tams estre peu conuenable a purger nostre cors: & qu'il ne le faut antreprādre, sans q̄ le mal nous y cōtraigne. Car qui auroit a prandre medecine vne fois l'an (comme doiuet faire ceus, qui ordinairement apres vn grand

Au cōm.
du sūdit
aph.

grand amas d'humeur pernicious, tombet an quelque maladie) il feroit mal de choisir ou atâdre les iours Caniculiers. Le prim-tams y et plus propre, ou bien l'automne, selon que ces maus coutumiers sont familiers au tams d'hyuer, ou à l'æté. Quand c'et pour la precaution (c'et a dire pour preuenir aus maladies) & nompas pour guerir le mal presant, nous vuidons la matiere long tams au parauant, & e-lisons le moys, le iour, & l'heure qui micus s'accordet a noltre intancion : c'et que le ciel se trouue clair & serain, l'air tampere, & le tams frais. Mais quand on et de fait malade, & la purgation y est requise, il ne faut rien differer, ne regarder a autre chose, que à la force du paciant, & à la sorte des medecines. La vertu et plus forte aus premiers iours du mal : l'occasion qui se presante a noz remedes, est fort soudaine, & il la faut prendre par le front (comme on dit an commun prouerbe) où elle ha des cheueus. Ceus qui attandet a l'andemain an toutes deliberacions, vienet souuant mal a propos, augmâtet par accidant le desordre, & causet vne grand ruine. Donques si la necessité requiert & demande instamment vne purgacion, nous ne deuons auoir egard au tams, sinon pour y approprier la medecine. Car si c'et an tams d'æté, il la faut plus benigne, & sur tout quand l'air brule deffous la Canicule. L'hyuer suppor-

te mieus les fortes, le tams moyen, demande les moyennes. Avec cette limitation, nous faisons auenir noz drogues a toutes les saisons de l'an, au profit des malades. Parquoy il ne faut plus abuser de la fantance d'Hippocras, laquelle sera toujours veritable: c'est, que durant les iours Caniculiers noz cors supportet moins facilement d'estre purges, qu'an autre tams: & pource les medicamans doiuent estre fort benins, quand l'espece du mal an requiert l'vsage. Et quoy? si i'ay besoin de vider la cholere, qui fait la fieure tierce, ou l'ardante fort dangereuse, voyant que nous sommes deffous la Canicule, faudra il que i'attande melheur saison? Si on ne purge l'humeur, la maladie fera rage de tourmanter le cors, il abbatra de sorte les forces de nature (assez affoiblie de la saison) qu'elle ne pourra rien vider de la matiere, qui an fin l'accablera. Laisserons nous mourir le malade, a faute d'un peu d'ayde, alleguans l'incommodite des iours Caniculiers? Ancora si c'estoit vn mal qu'on peut trainer hors de ce tams là, il y auroit quelque couleur d'impetrer vn delay. Mais quand il faut, ou guerir, ou mourir dedans ce terme, si on void que la purgacion soit a propos, il n'an faut faire difficulte: & si le malade meurt, c'est du mal violent, & nompas du remede. Qui ordonneroit la medecine autant forte, qu'aus saisons les plus

plus propres a supporter les laxatifs, lesquels arrachet de tous coutes & deracinet la matiere qu'ils ont choysie, il se trouueroit frustré de son intancion, & le dommage qu'il causeroit, passeroit de biẽ loin la commodité pretenduẽ. Car Hippocras tient pour suspectes les medecines, durãt la Canicule, à rayson de leur vehemance, n'ayant eu le bon homme an vsage, que celles dont nous faisons aujourd'hui doute d'vser, mesmes an hyuer, & an personnes fort robustes. Qui voueroit interpreter son aphorisme, des medecines qu'il vsoit, nous pourriõs bien tenir ancores cette conclusion, qu'il ne faut du tout rien purger dessous la Canicule. Car noz cors sont deuenus de peu a peu si delicas & foibles, que nous ne sommes que d'ansans aupres des hommes du tams passé. Qui de nous pourroit andurer la saignee iusqu'a sis liures, pour vne fois, comme ha veu Galen an ceus de son age: qui toutesfois n'etoint plus tã robustes, que du tams d'Hippocras? Leurs medecines an proporcion etoint si violentes, qu'il nous sont presque horreur d'an ouyr parler, tant s'an faud que nous les accommodions aus iours Caniculiers. Ancor ne les defandet ils pas totallement: car ils diset seulemant, que la purgacion et pour lors mal aysee. S'il eussent eu l'vsage de noltre casse, du sené, rhabarbe, mauue, syrop rosat, & autres legieres medeci-

nes qui ne font point de violence, ils n'eussent pas trouué mauuais de purger durant les grans chaleurs, quand les maus nous an sollicitet & importunet. Il faut donc ainsi dire, concludant à la verité, q pour double raison la fantâce donnée par Hippocras, ne fait point contre ceus qui purget aujourd'huy regnant la Canicule: veu qu'il ne defand pas absoluëmant la medecine laxatiue, ains remoutre seulemant qu'il an faut sobremant vsfer, & que nous abstenons des siennes, confessans que ce seroit mal fait de les exhiber a noz malades, cz iours Caniculiers.

J'aiouteray icy pour le playfir des fames, qui contrerollet plus cela, que les hommes, antreprenât de remoutre aus Medecins, qu'ils ne doiuet purger durant la Canicule, vn conseil tref-proffitabile a la santé de leurs maris, C'et, que la copulacion charnelle, n'est moins suspecte durant la chaleur de l'été, que la purgacion. Que plus et, le ieu d'amours doit ettre suspendu antieremant, où la medecine ha souuant lieu. Car on purge pour recouurer santé, & venus la ruine. Celse dit, que an été (fil est possible) il an faut du tout abstenir, & le commun prouerbe ansuit telle opinion, disant qu'an été on doit moullher le bec, & auoir le mambre sec. Les autres diset, tous les mois qui n'ont point de R, laisse la fame & prans le verre. Mais ie ne suis pas tant rigoureux: ie n'or-

donne que certains iours suspects à la besogne, Ce sont lesdis Caniculiers, qui consommet asses le cors, le lasset & enernet prou, sans qu'on traualhe dauantage a l'appetit des fames. Ils commancet anuiron le vintieme de Iulhet, & durent quarante iours. C'et le caresme ou quaranteine des mariés, qui doiuet lors abstenir totallement de l'œuure de la chair. Et voyla ce que les fames ont principallement a soigner (faisant reffus de leurs personnes, si elles s'en peuent deffandre) & nompas contredire aus medecins touchant la purgaciõ, ou autres remedes qu'ils sauuet bien accommoder a la saison, pour peu qu'ils ayet de iugement.

DIS ET SETTIEME CHAPITRE.

Comment il se faut gouuerner le iour qu'on prend medecine. Si on peut dormir apres: De l'heure du bouillon lauatif: Des repas qui conuienet a ce iour là: & pourquoy on ne doit sortir de la chambre.



Le me samble que ce sera bien fait d'instruire le vulgaire, cõmant il se doit gouuerner le iour qu'il prend medecine, sur tout an estat neutre, quand il n'et pas malade au lit, & an plein pouuoir du Medecin: lequel an ce

118 Regime pour vn iour de med.

cas le doit conduire de point an point comme il cognoit estre de besoin , selon la nature du mal, & la condicion du malade. Car ie ne veus mettre ma faucille an la moisson d'autrui . Je n'antans parler que à ceus, qui n'ont auprès d'eus que leurs seruans ordinaires , & qui ne sauēt comment il se faut traiter ou conduire, quand il leur conuient prendre , ou que ils ont pris medecine . Or tels soint auertis, qu'il faut auoir legierement souppé le soir au parauant , affin que sur le matin, apres auoir bien dormy, l'estomach se treuue vuide. Autrement , la vertu de la medecine, detrampee de la viande ancores indigeste , se romt & affoiblit. Ainsi l'on dit vulgairement , que le iour de la medecine est vne grande feste : parce qu'il faut ieuner la veille. Pour la prendre plus aysément , & sans guieres apercevoir sa mauuaise saueur, il est bon de macher au parauant vn peu d'ecorce de citron, ou d'orange, ou vn peu de girofle: dequoy la bouche estant preoccupee & echauffee, n'aperçoit tant le gout du medicament. Et pour ne sentir l'horrible odeur, il faut bien couvrir le verre ou le gobelet, d'vn linge trempé an bon vinaigre rosat: lequel sera meilleur etant musqué, si on ha le dequoy , & que ce ne soit vne fame subiette à la matrice. Pour ampecher le vomissement, il n'y a rien de meilleur, que soudain apres auoir
bien

bien rincé la bouche de vin trappé, ou autre liqueur agreable, humer vne gorgée dudit vin, ou de l'orge mondé, ou de la ptisane, du bouchet, ou quelque boullon. Car par ce moyen, on laue le gosier & l'œsophage (c'est le canal de la viande & du breuage, depuis la bouche iusques a l'estomach) où la trace & impression de la medecine s'arrete fort long-tams, & se represante a la bouche. Dont et causé vn dedain, & le vomissemant: nommement si l'orifice superieur de l'estomach (qu'on appelle le cœur) n'est, laué & nettoyé de la qualité odieuse du medicament. Car de là il se ranuerse a vomir. C'est ainsi que ie le pratique, auers ceus qui craignent de reietter la medecine, comme ils ont de coutume: & peus bien asseurer, qu'a peine en ay-ie veu de sant vn, qui ce faisant l'ayt vomy. Il ne me chaut quelle liqueur ce soit, pourueu qu'elle s'accorde avec la medecine, comme les su-nômes, esquelles on ne se roit difficulté de trapper vn laxatif, quand il seroit ainsi plus agreable a la personne. Il y a d'autres remedes pour ampecher le vomir: comme de macher vne pomme, poire, ou autre fruit, & en aualler vn peu du suc: flairer du vinaigre, trapper les mains dans l'eau froide en vn bassin, ou les couvrir d'un drap mouillé de vinaigre trappé, qu'on appelle oxycrat: Ne parler, ne cracher, ou toussir, ne

autrement agiter le cors : & se tenir an son
 seant quelque tams, & puis se promener. Vn
 des melheurs remedes et aussi, d'anelopper
 le cou d'vn linge bien chaud. Et voyla com-
 mant on peut euitier le vomissemant : qui est
 trop odieux, tant parce qu'on ha double poi-
 ne, l'vne à prandre la medecine, l'autre a la
 randre : & de ce qu'on n'ha rien auancé, car
 il faudra recommencer, si on ne la retient au-
 moins vne heure, ou anulron. Ce terme passé,
 il ne se faut autrement contraindre a ne vomir
 point : d'autât que la medecine ne fera pas guie-
 res moins, que si on la gardoit plus long tams :
 & par le vomissemant on reiette quant &
 quant beaucoup d'excremans, qui se vuident
 ainsi plus aysemant, au profit de la personne.
 & de se contraindre dauantage a retenir cela,
 apporte souuant de grans inconuenians. foy-
 blesse de cœur, euanouyssemant, sueur froide,
 grand passion d'estomach, comme s'il deuoit
 creuer. Puisque la matiere incline an haut,
 etant assamblee dans l'estomach, permettes
 qu'elle se vuide par là, c'est vn beau decharge-
 mant. Et quand la medecine qu'on reiette
 ansiblement ne feroit autre chose, ce n'est
 peu de proffit. Mais (comme i'ay dit) elle ne
 lairra pas de chasser les autres humeurs par le
 bas. Car sa qualite & vapeur se versant
 bien-tost par tout le cors, fait la principale

(sinon totale) operation. Quant a dormir apres, ie ne le defans iamais, etant persuadé tant de la raison, que de l'experiance. De ceus qui la defandent, les vns craignent que la medecine agitée de la chaleur naturelle (qui se renforce au dedans par le sommeil) an deuienne plus forte & furieuse. Et que ne l'ordonnet-ils si foible, qu'avec le sommeil (fort agreable aus preneurs de medecine), & sur tout du rhabarbe, icelle deuenant plus galharde, fasse le deuoir qu'on an pretand ? Les autres au contraire, ont peur que le medicament diminuë de sa vertu, etant affoibly de laditte chaleur. Et que ne l'ordonnet-ils d'autant plus fort, qu'ils pansset qu'il perdra de sa vertu par le dormir ? Ou pourquoy tous d'un accord le permettent, voyre l'ordonnet, sur les pillules ? On dit, qu'icelles etant fonduës, & leur vertu excitee par la chaleur naturelle, operet plus tot & mieus. Et n'est-il pas aussi bon, que la vertu d'un potus, d'un bolus, ou d'une tablette laxatiue, soit tantot excitee, afin qu'ils besognent sans grand delay, annuyant l'estomach & tout le cors de sa presance ? Quelques vns craignent que les vapeurs de la medecine ne montent au cerueau: qui et ce qui les inuite ainsi a dormir, quelque fois de sy grande force, qu'il y a extreme peine de s'en garder: & les personnes an sont infiniment an-

nuyees, d'estre contrains d'an abstenir. Et que peut nuyre cette vapeur! Mais au contraire, elle est fort profitable, quand nous voulons purger le cerueau. Car telle vapeur y antrant, elle en retire ou chasse les humeurs que nous voulons euacuer. L'accorde bien, que quand la medecine commence a operer, il ne faut plus dormir, sinon qu'on voulut arreter son operation: ainsi qu'il est quelque fois de besoin. Car le dormir fait cesser toute euacuacion, excepté la sueur. Dont Hippocras dit tresbien, Quand tu voudras que l'hellebore purge dauantage, remuë le cors: & quand tu voudras que la purgacion cesse, fais dormir & non mouuoir. Il y ha qui osent bien dire, que la medecine par le dormir se conuertit en nourriture (dont nous sommes frustrés de nostre intencion) mesmes si elle est debile: comme de la casse, mauue, tamarins, sené, rhabarbe, & samblables. O la grand viande pour deiuner! Et-il possible que le medicament deuienne aliment, veu qu'il est estrangier à nostre nature, & non familier en substance, pour andurer telle metamorphose? Ils ne s'auisent pas, que c'est par bonne astuce, que nos ancetres ont persuadé au peuple, que les medecines quelque fois se conuertissent en nourriture: afin

Aph. 15.
liur. 4.

affin que si elles ne produiset l'effait pretâ du, le patiant n'an soit marry, fâché & depité, cōme si elle deuoit apporter quelque dommage. Car c'et la plus belle & fauorable excuse du monde, de dire que la medecine (qui n'ha eu asses de force à operer) se soit conuertie an aliment. Outre ce, ie n'accorde pas, que l'estomach ayt plus de force a digerer par le dormir: ainsi q'ie panse auoyr suffisamment prouué an mes paradoxes. Mais ie m'oublie. il semble que i'an veulhe aus medecins, auxquels ie n'antans parler an ce traité, ains à toutt' autre sorte de jans, iusques aus apoticaire, qui non-obstant noz auertissemans, oset biē dire quelquesfois aus malades que nous traitons, qu'il ne faut dormir apres la medecine. Parquoy souuant ie suis contraint, d'ecrire au bout de mes ordonnances, et *superdormiat*, c'et a dire, qu'il dorme apres. Quelqu'un pourroit bien repliquer, a ce que ie viens de dire, & soutenir contre moy, que l'on pent etre nourry de poison: comme il et escrit d'une vielhe d'Athenes, nourrie dez son anface a la Ciguë, & de la ieune Indienne anuoyee au roy Alexandre le grād, nourrie de Napel. Cōbien plus aysemant pourra se conuertir an nourriture vn medicamāt purgatif, lequel n'et tenu q' moyē antre le venin & le cors humain, ainsi que Galen remoutre au cinquieme de la vertu des

124 Regime pour vn iour de Med.
simples medicamans? Il et aysé de repondre a
telle obieccion: c'et, que la poison ne peut ia-
mais etre alimant, de sorte qu'elle soit conuer-
tie an la substance de nottre cors: Mais que le
cors se peut bien accoustumer a sa qualité, qui
s'imprime de peu a peu aus esprits, humeurs &
parties solides. Ainsi se peut on accoustumer
au froid, a l'ardeur du Solhel, a la moulheure,
au vant, au trauail, a tout desordre, y procedant
de petit a petit, de sorte qu'on n'an sera point
offancé. Ainsi plusieurs sont tant accoutumés
au malaise, & a quelques maladies, qu'ils n'an
santet rien, si l'obiet ou suiet n'et excessif. Ain-
si quelques vns s'accoutumet tellemant aus
clysteres, medecines, & autres drogueries, que
a la fin ils n'an sont aucunemant emeus, ou
fort peu, sinon qu'on les rande plus fortes.
Car la qualité de long tams accoutumee n'ex-
cite aucune passion, mouuement, ou alte-
ration au cors. Mais que les choses ainsi
qualifiees, se conuertisset an nottre sustance
(qui est autant comme dire, qu'elles nour-
rissent) il ne le faut pas croire. Touchant au
boulhon qu'on prend auant diner, il est nô-
mé lauatif, signifiant son vsage: qui est de
nettoyer & lauer l'estomach & les boyaus
des restes de la medecine. Parquoy il ne doit
etre prins, tandis que la medecine seiourne

an l'estomach. Car an la detrampant, il luy feroit perdre sa force, comme si on mettoit beaucoup d'eau sur vn peu de vin: dont elle ne pourroit auoir a l'operacion pretendue. Or de limiter le terme du sejour que la medecine fera dans l'estomach, c'est chose impossible: veu que la mesme chose an mesme personne, quelquesfois ira plus vite, & quelque fois plus tard, selon qu'il r'ancontrera diuerses occasions. Combien plus grand' diuersité an effet, doit on attendre de diuers medicamans, an diuers cors? Pourtant on ne peut dire iustement, qu'il faille humer le boullon a tant d'heures apres la medecine, comme l'on fait vulgairement: ains le terme doit estre presis par cette coniecture, laquelle signifie que la medecine (au moins pour la plus part) ha passé outre l'estomach. C'est quand elle ne reuiert plus a la bouche par sa vapeur, & qu'on se sent l'estomach dechargé, apres quelque remuemant au vautre: & qu'on ha bien vuidé outre son ordinaire, comme de la medecine: ioint qu'il y a notable tams que on l'ha prise. Adóc, qu'ell'heure que ce soit, & non plu-tost il faut humer le boullon. Depuis ce boullon (qui est plus pour lauer, comme dit et, & faire desandre les restes de la medecine,

126 Regime pour vn iour de medec.
que pour nourrir, combien que il y serue aus-
si aucunement) iusques au diner, il faut in-
terposer le terme du seiour, que le boulhon
peut faire dans l'estomach. Car on le veut lauer
& rincer principalemant, a-ce que la viande
suruenante rancontre l'estomach net, & non
infet de la medecine : d'autant que les viures
an seroient corrompus. Donques il faut diffe-
rer, iusques a tant que cette rinceure & laual-
he an soit dehors, & que le diner ne rancontre
ledit boulhon. Autremant il an auiendroit,
comme qui rincerait vne pinte, & y laissant la
rinceure, y mettroit de bon vin. Or ce boul-
hon, soit an grande ou petite quantite, seiour-
ne d'as l'estomach plus de deus heures, comme
fait bien la moindre chose qu'on aualhe. Dont
ie ne puis approuuer, ce qu'on ordonne com-
munement, de diner demy'heure, ou vn'heure
apres le lauatif. Vray et, qu'il n'est possible de
limiter iustement le terme du diner, nomplus
que celuy dudit boulhon: mais par coniectu-
re, & a peu pres, on rancontrera l'heure. C'est
quand il y a ia long tams qu'on ha prins le
boulhon, & on sent l'estomach vuide, comm'a-
yant appetit. Pour lors il faut diner, qu'elle
heure que ce soit: & c'est volontiers bien tard.
Car vne medecine prise a cinq ou sis heures
du matin, a peine et elle hors de l'estomach a
neuf

a neuf ou a dis. Lors il faut prandre le bougho: lequel sejournera dans l'estomach deus ou trois heures, tellemât que le diner echerra sur le midy ou vn heure. Et il ne faut pas craindre, qce pandât celuy qui se purge anandure quelque foiblesse. Car si le cors a besoin de nourriture, il an aura pris du boughon, asses pour attendre son repas. D'alheurs, il faut donner loisir a la medecine de faire son deuoir: & ne detourner pas Nature, qui coopere (voire fait le principal) an toute purgacion. Car si on mange auant que la plus part soit executee, nature s'amusant à digerer la viande, ne fauorise plus tant a la medecine: laquelle se trouuant presque seule, n'a pas grand force. Aussi c'et l'un des moyens que Mesuë nous anseigne, pour arreter le cours d'une medecine, quand ell' et trop farouche. On attribue cela au Mechoacan particulierement, & comme vn priuilege: mais il et commun à tout laxatif, que son operacion et affoiblie ou rompue, si on mäge ou boit quelque chose, qui le puisse rancôtrer. I'ajouteray ancores cette raison, que l'estomach abhorre & dedaigne la viande, tant qu'il y a du reliqua de la medecine: & si on le contraint de receuoir le diner, plustost que d'etre bien lauë, remis, & reposë, il ne fera son profit de la viande, ains an fera plus traualhë que sustantë. Pour cette mesme cause, le diner doit etre fort legier, d'autant que l'e-

228 Regime pour vn iour de med.
estomach n'est pas bien à soy, tout annuyé du
passage de la medecine. Et parce que elle e-
chauffe & desseiche aucunement (dont il auient
communément qu'on a et alteré) il faut user
de choses humectantes & raffraichissantes, a
peu pres comme si on auoit la fièvre. Parquoy
le bouilly sera plus conuenable que le roty: &
vn potage de laitues, pourpier, oseille, bor-
rages, & semblables. Il faut aussi tramber fort
le vin, qui soit rouge vn peu couuert & bien
meur: & abstenir de tout fruit mol & fuyart,
de peur qu'un flux de ventre ne succede a la
purgacion. Mais pour dessert et permise vne
poire de saueur brusque, cuite & couuerte de
fenouil doux & ancor plus le coing, ou codignac
pour reserer & ranforcer de leur astriccion,
les parties que la medecine & les humeurs an
passant ont debauché. De souper, ie ne luy
trouue pas grand lieu a tel iour, qui est fort ro-
pu, & l'estomach detraqué: de sorte qu'on ne
le peut ranger aus heures ordinaires de ses re-
pas: sinon qu'on eut prins la medecine a deus
ou a trois heures apres minuit: qui n'est pas
inconueniant, si on n'a rien souppé, ou fort peu,
le soir au parauant. Car ainsi pourroit bien a-
uenir, qu'on seroit pret de diner a dis ou onze
heures & souper antre sis & set. Il y auroit aus-
si plus de lieu de dormir, sur la medecine, com-
me on fait volontiers iusques au iour. Mais
d'au-

d'autant que la plus part des malades, & autres qui ont a prandre medecine, veulet que l'Apoticaire mesme la leur baille: & qu'il et trop incommode a l'Apoticaire de sortir auât l'aube ou pointe du iour, sans autre necessité, l'on ha prins cett'heure pour la plus commune. Dont si c'et annuiron les iours æquinoccials (que nous supposons, parlans absoluement du iour: & aussi que c'et le tams plus propre aus purgacions choisies, & non contraintes) la pointe du iour et a cinq heures: & on ne peut diner avant onze heures, ou midy: suiuant le comte que i'ay fait. Dont ie conseilhe volontiers, que ce iour là on ne soupe pas autrement, que d'un coulis, ou orgemondé, fait du boulhon de chair, ou de lait d'amandres: ou bien de manger vne rotie au sucre. Ce qu'on prandra sis ou set heures apres diner: puis se coucher de là a vne heure, ou deus, pour dormir an plus grand repos, que si on auoit fort souppé. Et si on et alteré, on peut boire vn peu de vin fort trappé. Voyla commât i'ordonne le regime a ceus qui sont an ma charge, pour vn iour de medecine, s'ils me veulet croire: & comme i'an vse an mon androit, & des miens & c'et le vray *regimen artis*, que nous antandõs a la fin de noz receptes. Quant a l'autre mot, qui est *custodia*, ie l'expliqueray maintenant.

Le vulgaire pense, que nous ordonnons l'arret dans la chambre, seulement a cause que l'air exterieur peut offacer celuy qui ha prins medecine. C'est bien vne de noz raisons: mais il y en a d'autres que ie deduiray cy apres. Et quant a l'air, il y faut vser de cette distinction, s'il est diuers ou samblable. Car s'il est de mesme tamperature, & dedans & dehors la chambre (comme il est volontiers au saison tamperce) comment peut nuire l'exterieur, plus que celuy de la maison? Quand l'air des rues est venteux, pluuieus, plus froid ou plus chaud que celuy de la chambre, lequel nous requerons tamperé, ou de soy ou par artifice, vrayement il y a bien grand rayson, de condamner celuy qui ha prins medecine, a ne sortir de la maison. Car le froid, le vent, ou la pluyé, surprenant les pores, & penetrant au cors emeu, ouuert, & lache au moyen de la medecine, l'offance grandement. Le chaud aussi, rancontrant vn cors plus ouuert & echauffé de la medecine, peut causer fièvre, grand' alteration, lassitude, foiblesse, & autres facheux accidans. Il faut donc se contenir dans vn air tamperé, tel qu'on peut faire au tout tās, pour ceus qui ont des commoditez. Mais si l'air est de soy bien moderé par tout, & tant dehors que dedans la maison, il ne peut nuire au patient: & peut on pour ce respect, tenir les

fene-

fenestres ouuertes, mais il y a autre chose qui le defand: c'est que l'obscurité sert a la purgacion, autant que les humeurs se randet plus aysemant au dedans, & vers le fantre du cors, an tenebres: etans au contraire inuites de la clarté & lumiere, de se presanter au dehors. Parquoy si on ha grand' clarté, & meismes que les fenestres etant ouuertes, on ait l'aspect de quelque lieu plaisant, ou qu'on voye dans la chambre quelques belles couleurs, tableaux, peintures, & autres ouurages, cela peut detourner secrettement l'operation de la medecine. Et ainsi il vaud mieus que tout soit fermé, iusques aus vitres, & qu'on allume de la chandelle, se contéant ainsi tout le iour a l'obscur: & n'auoir point de visite, pour ne se contraindre rien, ne se reioir extraordinairement. Car cela aussi detourne l'operation, ou la rad moins galharde. Les autres raisons, pourquoy il ne faut sortir de la chambre, sont premiere-ment, que si on va par ville, an tel androit on peut auoir besoin de vuider le vantro, qu'on n'an aura la commodité: & les excremans agités, quand ils sont retenus par force, causet beaucoup d'inconuenians, outre le mal de vantro & les facheuses tranchees. Secõdemat, l'aller par ville & tracasser, echauffe le cors mal a propos, an dangier d'exciter vne fieure: veu que d'ailleurs le cors est cõmunement echauffé.


132 Regime pour vn iour de med.
& alteré de la medecine. Tiercemant, si on ne-
gocie quelque chose (dequoy on ne se peut
bonnement abstenir, si on ha liberté de sortir)
on trauaille l'esprit, qui ha plus besoin de re-
pos, quand le cors et an peine. Ce sont des
pains qu'il faut bien obseruer. Ancor ne suffit
il pas, de reposer & se contenir le iour qu'on a
pris medecine: il le faut continuer iusques
au landemain apres diner: & se retirer de bon
heure an la maison: c'est a dire, auant soleil
couché.

J'ay esté vn peu prolix a discourir le regi-
me de l'art, que nous disons deuoir estre ob-
serué quand on prend medecine: d'autant que
l'on commet cela volontiers aus apoticares,
auxquels s'adresset noz ordonnances pour les
executer: & la plus part d'iceus antandent mal
ces pains. dont il s'ensuit, que le peuple an et
plus mal seruy. Les fames qui seruet ou gou-
uernent ceus qui prennent medecine, sont ancor
plus ignorantes. Dont il ma fallu instruire le
vulgaire, affin que chacun pour soy antande
commant il s'y faut gouverner. Car la mede-
cine n'est chose de petite importance, ains qui
peut nuire & proffiter grandement, selon qu'on
an vse bien ou mal. Il ne faut oblier les tran-
chees, que donne souuent la medecine: auquel-
les nous remedions avec des draps chaus, qu'on
applique sur le ventre. Ce sont des vantosites,
ou

ou des grosphegmes, qui causet ces douleurs: sauoyr et , les vantosittez excitees de la matiere emeuë, lesquelles anflet & tãdet les boyaus tout ainsi que an la colique. Les gros phlegmes ne peuuet antrer des orifices ou bous des veines mesaraques, dãs les boiaus (ainsi qu'il faut , s'ils vienet de plus loin) sans donner quelques extorsions. Nous voyons souuant des phlegmes fort epais , randus par les dernieres selles, qui n'ctoient pas dans l'estomach, ne dans les boyaus. Car ils n'eussent tant seiourné là. Ils vienet donques de plus haut : & faut qu'ils passet par les bous des petites veines mesaraïques, non sans faire grand' douleur : ja soit qu'ils n'y passet autant gros , que nous les voyons au bassin. Car ils filet prim au sortir, & depuis se ramassent. Les draps chaus fondet & liquifiet ces gros humeurs, & les font couler plus doucement: la chaleur aussi cõsume & dissipe les vantositès. Ainsi les tranches cesset de tourmanter.

DIS ET HVITTIEME CHAP.

D'ou auient communement, que les plus chers menret le plus souuant.

 N void souuãt auenir, que le mary fort cheri de sa fame, & mignardé a toute outrance, mourra plutost (le reste demeurant samblable, quãt a la maladie, age,

134 Que les plus cheris meur. le plus
condicion & force du paciant, la saison, le lieu,
les commodites requises, & autres particula-
rites) que celuy duquel la fame voudroit bien
estre vaine. Comme aussi la fame, de qui le ma-
ry sera tant amoureux, qu'il semblera an estre
alfoté, mourra plu- tost, que telle que son ma-
ry aymeroit mieus an terre que an pré. On
void de mesmes au fait des peres & des meres,
a l'androit de leurs ans. Car ils perdet le
plus souuant, ceus qu'ils ayment le plus. Je ne
dis pas que cela soit d'ordinaire, mais que il a-
uient fort souuant: de sorte que le vulgaire s'a-
plaine, comme si l'excellue (& quelque fois
desordonnee) amytie, estoit cause de la mort.
Ce que ie ne veus pas reprouuer, sachant que
Dieu peut estre offencé, & se courroucer de
l'extreme affectio, qui trasporte les personnes
ainsi passionnees, & les detourne de son serui-
ce (qu'il requiert de tout le cœur, de toute la
pensee, & de tout l'attandement) & les ampe-
che de s'accorder humblement a sa sainte vo-
lonté. Dont souuant il nous ote ce que nous
auons de plus cher an ce monde, comme vn fis
vnique, bien né & de grand' esperance, affin
que nous plaissions moins an cetteralee de mi-
seres, & desirions la fruicion de l'obiet digne
de l'excellance de noz ames. Toutesfois par-
lant ancores humainement, & come il nous ap-
pert au sans, i'ose bien dire, que l'excellue a-
mitie

mitié que l'on porte aus siens, iointe a indiscrecion et ignorance, et souuant cause de la mort de ceus qu'on cherit le plus tandremât. Car de ceus qu'on n'ayme pas tant, on an laisse volontiers le pansement & charge totale aus medecins, & aus personnes soigneuses de leur seruice: lesquels souuant on appelle & amploye par maniere d'aquit, plus que d'affection, pour euitier ce reproche, d'auoir laissé mourir sans secours, son mary, sa fame, son enfant, ou autre parant sien. Or a ceus-cy le medecin fait libremant ce qu'il cognoit estre requis, sans que personne luy contredise, ou cōtrerolle ses accions, & il pratique biē a son aysse: dequoy il ressoit plus dhonneur, que de gré. Mais quand c'est pour vn qu'on ayme fort, quelque fois trop & indiscrettement, le vulgaire des parans, alliés, ou amys (desquels la plus part sont presumptueus, outrecuidés, & panset sauoir plus que majtre Mouche) veut antandre & sauoir tout ce qu'on ordonne au patient: il conteste, debat & marchande presque an toutes choses, ignorant de ce qu'il cōvient faire: tient an peine & an crainte le medecin, l'arguant a tout propos, ou de l'exces, ou du defaut: il se veut faire a croire de la quantité, & mesmes de la qualité des viures, des heures & du nombre des repas, ou des prises du potage, de l'ordre, de l'air, de la couuerture

136 Que les plus cher. meur. le plus
re, & autres appartenances du regime : il attribue tous accidans qui suruienet, iusques a ceus qui sont ordinaires, a la procedure du pauvre medecin: & aus remedes il fait tant de scrupule, que le medecin craintif n'ose ordonner la moytié de ce qu'il feroit autrement, pour bié tost guérir le malade. Car si nõ obstant son deuoir, & sa bonne procedure, suruient quelque grief symptome inopiné & nonpredit (comme il y en ha plusieurs, qu'il n'est possible de preuoir) ou bien la mort, on attribuera tout le desordre au medecin : & il sera grandement blamé ou calomnié, s'il ha fait quelque chose contre l'auijs du vulgaire, & des assistans. Car le peuple ha vsuré cette tyrannie sur les medecins: auxquels il deuroit totalement s'accorder, accommoder, obeyr & soumettre, pour le service du patient : n'ont pas les tenir aucunement en crainte & defiance, ains les laisser en pleine liberté & autorité souueraine. Autrement le plus suffisant du monde n'est pas dimy medecin, & ne peut rien faire d'excellent, ayant perdu la hardiesse, tresrequise a combattre le mal. Dont contraint de flechir, complaire & s'assuiettir a ceus qui contrerollet tout, ou qui iettet des mots piquans a la trauersé, il n'ose presser (moins contraindre ou conuaincre) par raison, ce qu'il estime estre meilleur. Ainsi plusieurs meurent bien pauurement, &

& d'un mauuais menage, a l'appetit de ceus qui les aymet desordonnément. N'est ce pas grand pitié, que le vulgaire ignorant tienne le medecin (qui ayme son honneur & sa reputaciõ, plus que chose du monde, ou il est indigne de cet estat) en telle subieccion & seruitude, qu'il n'ose & est craintif, meismes a l'endroit des siens, pour peu qu'il y ait de doute & difficulté? Car si sa fame, son enfant, ou autre parant, et pansé & traité de luy autrement que les idiots presument sauoir & antandre, il sera soupçonné, ou de n'aymer pas beaucoup, ou d'estre mal auisé, hazardeus & temeraire. De sorte que n'om pas a soy mesme, s'il croyoit le vulgaire, il ne seroit bon medecin. Ne voila pas un grand desordre, & horrible confusion, que celuy qui doit estre obey, voire admiré, sans aucune defiance, ou de sa preud'hommeie, ou de sa capacité soit contraint de s'assuiettir au plaisir des plus ignorans du monde: & que cela redonde au detrimant & preiudice des pauures malades, lesquels seroient beaucoup mieus secourus, & plus artificiellement traites, si les assistans en estoient moins soucieus: ie dis non plus, ne autrement que le Medecin l'ordonne.

k iiii

*Contre ceus qui diſet, que mort ne fut iamais
ſans regret.*



E propos et trop general, & faus pour la plus part. Car ceus qui meurent d'extreme vielheſſe, & comme vne chandelle qui ſ'etaind, la meche n'ayant plus de ſuiſ, ou de cire, meurent ſans regret d'aucune procedure tenue an leur regime ou traitemant. Car il faut ainſi antandre le regret, an ce propos icy. De meſmes, ceus qui ſont blecès a mort inenitable & que chacun tient pour mors dez leur bleſſure. Car comme on n'eſpere qu'ils puiſſet guerir, auſſi n'ha on aucun regret a ce qu'on y ha fait. Reſtet ceus qu'on iuge gueriffables dez le commancement, leſquels an fin mourans (quelque fois comme a la derobee) laiſſet vn grand regret a leurs amys, qui ne ſ'an peuuet contanter. Or le regret peut etre de deus ſortes, & la chacune raiſonnable, mais nompas ordinaire, ou toujours veritable, an ce qui touche les medecins: comme veulet antandre ceus, qui vſet volōtiers de ce lāgage a tout propos. L'vne et, des grans fautes q̄ cōmettet les malades, ou leurs amys, quād il ne pouruoyet bien

bien & soudain au commencement des mala-
 dies, d'un bon & fidelle medecin, ansamble de
 toutes choses requises au recouurement de la
 fanté. Quelque fois on aura le secours pres, &
 on le meprisera, comme on meprise la maladie:
 laquelle ampirant, & an fin cōduisant a la mort
 sans qu'on y puisse remedier, causé vn extre-
 me regret. On fait aussi mille nullités par igno-
 rance, ou pour complaire au paciant, qui cou-
 tet bien cher, & laisset vn grand regret, quand
 on cognoit depuis a veuë d'œil, que cela ha
 causé la mort. On ne sauroit expliquer, la grā-
 de diuersité des fautes que commettent les ma-
 lades, ou ceus qui les gouuernent: dont il s'ensuit
 finalement, le regret de la mort suruenü. C'est
 asses d'auoir remoutré par ces trois condiciōs,
 de l'extreme vielhesse, des naurés a mort subi-
 te, & des fautes que commet le vulgaire, qu'il
 n'y a toujours regret fondé sur la procedure
 qu'aura tenu le medecin: qui et l'autre sorte de
 regret, des personnes qu'on pansoit guerissa-
 bles. Je ne veus icy maintenir, que nul meure
 de la faute des medecins. Car ie ferois tort aus
 plus suffisans, doctes, & bien auises, si i'estimois
 tous ceus qui se meslet de noltre etat, d'une
 mesme fasson irreprehenfibles. Aussi ie say bié,
 que les ignorans, & les nonchalans medecins,
 font de si lourdes fautes, que les cimetieres an
 sont bossus: & comme dit l'ancié auteur, la ter-

re couure les erreurs des medecins. Mais pour certain les plus sauans, prudans, & diligens, sont fort souuent calomniés, & a grand tort soupçonnés ou accusés, de la mort des personnes qu'ils ont pansé. Car, combien que ie confesse, que aucuns meurent d'un mal qui n'estoit, ou ne sembloit, premierement mortel, si et ce que le medecin an doit estre excusé, si n'y a rien oblié, & s'y et porté diligemment, avec toute curiosité & deuë obseruacion: d'autant qu'il y ha si grãde diuersité de cors, & de maus, que l'imbecillité humaine ne peut toujours auenir, à comprendre iustement, ou le naturel, ou la grandeur d'yceus. Et quand Dieu veut appeller quelqu'un a soy, il ote tous moyens d'amepechement: de sorte qu'on n'aura pas mesme l'auis d'appeler au secours le medecin à tãs oportun: ou le medecin ne pourra bien iuger du mal, & de la portee du patient: ou les remedes n'auront point d'efficace an cetui-cy, comme ils ont d'ordinaire. Il ne faut donques reietter la coulpe sur le medecin, quand quelcun vient a mourir, duquel il auoit bien esperé dez le commencement: ni auoir regret a sa procedure (pourueu qu'il soit sauant & expert, homme de bien & diligent, affectionné au malade, comme il doit) ains se resoudre chretienement, que Dieu an ha ainsi disposé a sa volonte, laquelle seule est ray-

sonnable. Où si on ha regret de quelque chose, qu'on le supporte humainement, comme cas fortuit, & qu'on n'ha peu preuoir pour l'euitter. Car ainsi auient il an tous affaires, aus plus accors & prudans, auxquels succedet mai plusieurs bonnes antreprises, sans qu'il y ait de leur faute, si ce n'et faute de deuiner: ce que l'esprit humain ne peut comprendre, par moyens ordinaires & legitimes.

VINTIEME CHAPITRE.

Contre ceus, qui pour auoir le vautre lache, marchent piés nus sur un lieu froid: ou boiuet de l'huile an quantité: & qu'et ce, qu'auoir bon vautre.



Let euidant & certain, que le froid des piés cause flus de vautre. La raison et, que le cerueau, source de tous les nerfs, se morfond & refroidit, quand les extremities du cors (parties fort nerueuses) sont refroidies; Et c'et, a raison de la continuation qui et antre elles, & le cerueau, au-moyen desdits nerfs. Or le cerueau fait part de son morfondement a l'estomach, & a tout le vautre inferieur, auxquels il et fort allié par la sisième couple des nerfs.

142 Cōmant on se fera bon vātre

Dont il auient, que les antralhes de mesme refroidies, ne retienet asles long tams la viande, pour la cuire & digerer. Parquoy il s'an ansuit indigestion & deuoyement d'estomach, qui cause vn flus de vātre. Et cela et il sain? Non vrayement. Il vaudroit beaucoup mieus garder sa constipacion: ou bien de raffraichir tant seulement les reins, & le foye par dehors, afin que la matiere fæcale ne fut ainsi recuite: dequoy procede, qu'on ne la peut bien librement vider. Et a cela suffiroit l'onguant rosat commun, & ancor plus le violat, que i'ay mis an mon Dispanfaire. Mais de se faire venir vn deuoyement de vātre par froidure de piés, c'et tref-mal auisé, d'autant que l'estomach, les boyaus, & autres parties du vātre, s'an affoiblisset. Et de fait, c'et vn trait de poste ou frippon de college, qui pour auoir occasion d'etre r'auoyé a sa maire pour quelques iours, essaye de se faire malade. Tel flus de vātre, quand on an fait la vraye cause, se guerit a force de verges. Et si on craint de decouurir les fesses, pour ne morfondre d'auantage le cul, ou pour n'attirer ancor plus les matieres a l'androit qu'elles ont prins leur cours, il faut tref-bien fouetter le doz: & cela seruira d'vne bonne reuulsion. Touttefois le fouët sur les fesses, rechauffec tellement ces perties là, qu'il fait bien passer le morfondement.

A M. FRANC. IOVBERT, CON-
SEILHER ET MAITRE DES RE-
questes ordinaire de l'hostel du Roy de
Nauarre, iuge mage de Valance, Chri-
stophle de Beauchastel, son tref-hum-
ble neveu, Salut.



ONSIEVR, voyant que M. Ber-
telemey Cabrol, ha bien osé publier
& faire imprimer, quelques cha-
pitres des Erreurs populaires & pro-
pos vulgaires, discourus par M.
IOVBERT (vottre tref-cher fraire,
& mō tref-honoré oncle) cōme à la derobee: me l'ayant
communiqué toutesfois, & fait que i'an ay tiré profit:
i'ay pansé de luy en fournir ancores quatre (pour faire
vn quarteron) lesquels i'ay trouué parmy les broulhars
de l'auteur. Ce sont quatre propos, discourus autremant
qu'ils ne sont au premier liure de la premiere partie. Je
ne say s'ils ont esté composés premiers ou derniers: mais il
me samble qu'on les trouuera aussi bons, ou melheurs,
que ceus que leur auteur ha fait luy-mesmes imprimer:
outre ce, que la diuersité et agreable. Ainsi on aprette
vne viande en plusieurs façons, & en la chacune elle
et trouuee bien sauoureuse. Dauantage, ayant veu le Ca-
talogue que ledit M. Cabrol, faisoit imprimer des propos
vulgaires & Erreurs populaires, qu'on ha anuoyé à M.
IOVBERT, ie me suis auisé de faire le samblable &
publier vn ramas des autres que i'auois en main: des-
l iij

quels la plus part ont esté fournis par M. Ian Momin, docteur en medecine de l'vniuersité de Möpelier: hōme fort studieus. Ie say bien qu'il y en ha beaucoup de discours par M. IOVBERT: qui outre ce ha toutes prestes les cinq autres parties promises de son œuvre, diuisee en trāte liures: mais ie ne say quād on le pourra auoir. Ce pendant on passera le tans a voyr ce que on luy adresse de toutes pars, & chacun sera inuité à faire de mesme, suiuant son exhortatiō promise a la premiere partie, au lecteur d'esprit libre & studieus. Et si par fortune quelcun vouloit traiter vn tel sujet, il est prié d'abstenir au-moins des propos qui luy sont ia vouës. M. Cabrol s'est adressé a Mōseigneur de ville-Roy, pour faire que mondit sieur & oncle ne fut marry & courroucé de son antreprise: à mesme fin ie m'adresse à vous, qu'il respecte & hōnore singulierement, comme son fraire ainé, & pour les rares vertus qui vous illustret, & font tref-digne successeur des principaus biens de voſ maisons paternelle & maternelle, des IOVBERS ET GÉNAS. Prenez donc (s'il vous plait) & soutenez la deffiance de cette mienne antreprise: & s'il y a du mecontantement, ie vous supplie de faire mon apointement: comme il vous sera tref-ayse, ie m'en assure: & ie prieray Dieu que vous augmentez ses grāces, en toute prosperité. De Paris ce 15. iour de Feurier, 1579.

VINT ET

VINT-ET-DEVZIEME CHAP.

Contre ceux qui iugent de la suffisance des medecins par le succes, qui et deu souuant a l'heur, plus qu'au saoir.



L n'y a estat plus suiet a calō-
nié, que celuy du medecin,
pour la dignité de la vie &
santé, que l'on prise & cherit
sur toutes choses du monde.
Aussi n'y a il estat de qui plus
de ians se veulhet meler, qui ayt plus de con-
trerolleurs, & duquel chacun veut cognoitre
pour iuger de la suffisance de ses professeurs.
Or le plus iniuste iugement et du succes, qui
souuant et d'un bon heur & rancontre, nom-
pas da la suffisance ou bone procédure du me-
decin. Car on void quelque fois guerir le ma-
lade, auquel on aura ordonné tout au rebours
de ce qu'il falloit. De sorte que la force du
paciant aura resisté, & au mal, & au desordre
du medecin. Comme quelquefois les malades
echappet, ayans fait quelque grand faute, qui
ne les a pu accabler. D'alheurs, il y ha de me-
decins tant heureux, que communement ils
rancontret des malades guerissables, & ne sont
appelles pour ceux qui ont a mourir: qui et un
grand heur, mais nompas ordinaire, & pour

156 Iugement de la suffis des Med.
y fonder iugement, Donques il an faut venir
au sauoir, & a la diligence, accompagnes de
preudhommie, prudance & fidelité. Car le suc-
ces bon & mauuais, n'ont distinction du sa-
uât medecin a l'ignorant, veu que au meilleur
medecin du monde il peut mal succeder, apres
auoir fait tout deuoir. Mais s'il et autremant
heureux qui et de n'estre communement ap-
pelle pour les mortels, on an verra de si beaus
& frequans effets, qu'ô pourra iuger de sa suf-
fissance. A ce propos ie dis volontiers, quand
on meprise quelque sauant medecin pour a-
uoir fally a son iugement ou dessein, & on vâ-
te vn ignorant ou de peu de valeur, pour auoir
mieus rancontré au mesme fait, ou samblable,
que les fautes du sauant sont de bon comter,
tout ainsi que les beaus succes de l'ignorant.
Et pourtant cettui-cy les preche ordinaire-
ment: car on les peut aisement reciter. Et les
fautes sont innombrables. Du sauant, tout au
contraire: les calomniateurs repeteront sou-
uant les fautes, ou vrayes (car le bon Homere
somelhe quelques fois) ou pretandues. Aussi ses
braues cures sont infinies. Le peuple ingrat
met facilement an hobly les benefices, qu'il
aura souuant reffus, & donne lieu an sa me-
moire aus plus legieres fautes. Mais pour
moutrer cuidamment l'abus, de iuger par les suc-
suc-

succes, de la suffisance des medecins, ie ne veus autre argumant, sinon que vn mesme personnage sera dit bon & mauuais medecin (chose contraire, & partant impossible) a cette preuue là . Car de samblable mal, an mesme tams, & toutes circonstances parelles de deus malades l'vn guerira, & l'autre mourra, etant traittes de mesme medecin: d'autant que le mal sera plus vehemant, & la vertu moindre an l'vn, qu' an l'autre: ou que l'on n'aura amployé samblable deuoir a tous deus. On ne peut donc iuger de la suffisance du medecin par le succes, qui bien souuant et deu plus a l'heur que au sauoir.

VINT-ET-TROIZIEME CHAP.

Que le vulgaire n'estime rien, si on ne guerit contre son opinion, que les derniers remedes ont tout l'honneur, & bien heureux le medecin qui vient a la declinacion du mal.



Omme il n'y a plus iniuste & deraisonnable que l'ignorant, aussi n'y a il rien de plus ingrat ou mecognoissant. Car l'ignorance auenglit tant, qu'on fait mauuais gré du bien ressu. & on se tient pour obligé du contraire,

An la curacion des maladies, le vulgaire (iuge
 incompetant) estime peu ou rien, si on ne gue-
 rit contre toute esperance: ou plustost & plus
 aysemant que il n'auoit comprins. Autrement
 il dit, que c'est tout de l'effort de nature: que
 la ieunesse luy a bien serui, que les bons pota-
 ges, coulis & autres alimens, ou le bon seruice
 des gardes l'ont gueri. brief le medecin n'y au-
 ra part ne quart, ains aura fait plus de mal que
 de bien, & dira on bien souuent, que s'on n'y
 eut rien fait, le malade fut plustost gueri: & au-
 tres samblables absurdites, que le peuple igno-
 rant debagoule. Mais si on tiét le malade pour
 mort, & puis il vient a guerir, quand bien ce ne
 seroit du bon ordre qu'y aura donné le mede-
 cin (pourueu qu'il ayé continué a le visiter,
 & faire toujours quelque chose, ou bien ou
 mal, sans l'abandonner aucunement) on estime
 qu'il ha tresbien fait, & que c'est vne belle cu-
 re, voire miracle, ne plus ne moins que s'il l'a-
 uoit resussité, ou absout de la mort, a laquelle
 on l'auoit condamné. Samblablement aus dou-
 leurs vehementes de teste, des yeus, des orel-
 les, de la colique, nephritique, goutte,
 & samblables, si les remedes ne les otet ou di-
 minuēt soudain, ils ne sont rien prises, & dit on
 qu'il falloit biē que a la fin le mal s'an alla ainsi
 qu'ainsi, & les medicamans n'y ont de rien ser-
 uy: combien qu'ils soient cause que la douleur
 f'et

s'est appaisée, mais non si tost qu'on eut bien desiré. Car les remedes, comme tout autre chose naturelle, requieret tams a produire leur effet. Y a il rien au monde plus actif que le feu? touttefois si vous luy voulez faire consumer & mettre an sandres vn gros bois verd, ou fondre du cuire, a vn instant, vous seres deraisnable. Et qui dira, que ce pendant il ne fait rien? C'est pourquoy le peuple veut, qu'on change d'heure an heure des remedes, comme si celuy qu'on ha ordonné & appliqué ne faisoit rien. A quoy le prudent medecin ne se doit accorder, si le medicament et propre & bien institué: suiuant l'Aphorisme d'Hippocras, que s'il ne succede selon rayson, a ce luy qui fait tout par raison, il ne faut passer a autre remede, tant que perseuere ce qui ha sâblé des le commencement. Ceneantmoins, afin de contanter & anuser le patient, on peut bien de mesme matiere ordonner vn autre forme de remede, & continuant an la qualité ou geâré des medicamans, changer souuant de forme & composition. Et voicy vn autre erreur, qui se decouure: c'est qu'on attribue la guerison au dernier appliqué, ia soit qu'il ne fut differât des autres an vertu, & que tous les precedans y ayet leur bonne part. Ainsi quand au centieme coup de hache vn arbre tombe, ce n'est pas le cētieme qui ha tout fait,

Ap. 52. li. 2.

ains le chacun des nonante & neuf ya fait sa rate porcion. Le peuple voudroit (& il n'a pas tort de le vouloir ou desirer, comm'il ha bien tort d'an importuner le Medecin) que comme on romt vn rayffort, & q l'o coupe vn filet, ainsi on tracha le mal, qui et quelq fois aussi roide & anraciné qu'un vieux chesne, lequel resistera a mille coups avant q de tóber. Mais de peu a peu tout se fait, & plus seurement, q par grand violence: côme l'eau, qui et molle, vse & rompt la pierre par frequance de gouttes.

A ce propos reuient, ce qu'on dit communement, heurus le medecin qui vient a la declination du mal. Car il et impossible, que le patient meure de la maladie qui diminue, puisqu'il ha eu la force de resister a l'effort de la vigueur, du mal, comme Galen nous anseigne. Dont ceus qui donnet sus la queue du mal, où il n'ya guieres de resistance, n'ont pas grand besoin a faire. Et ce pendant ils acquierent (mais a mauuais titre) reputacion d'auoir sauue la vie au patient, & que les autres medecins n'y ont rien fait que valhe. C'et pour reuenir toujours a nostre proposicion, que le vulgaire n'estime pas beaucoup, si on ne guerit contre son opinion. Car an la vigueur du mal tout et si debordé par inquietitude, veilles, reuerie, soif insaciabile, & autres tels accidans, que le vulgaire n'an attend que la mort. Si vn

Me-

Medecin arriue la dessus, & le malade meurt: les premiers an sont accuses ou soupsonnes, s'il guerit (comme apres vne tintamarre d'accidans le mal va an declinant, s'il et guerissable) le dernier l'aura sauué. Et voila comment on recompance d'ingratitude ceus qui ont eu la plus grand peine. Dequoy i'excuse ancores le peuple ignorant, nompas les medecins presumptueus & vains, qui arrogamment & impudamment s'attribuet l'honneur de la guerison: combien que (s'ils ne sont ignorans & fraqueus) ils sacht bien que cela ne leur appartient pas de droit. Car etants venus sur la fin, ils n'ont fait que voir le fruit du labeur d'autrui, ou quelque effort inopiné de Nature.

VINT ET QUATRIEME CHAP.

Des importuns & soupsonneus, qui calomniet les procedures du medecin. Des outreuiues & presumptueus, dangereux au pres d'un malade.



LE medecin n'ha faute de besogne, quand outre le mal qu'il doit combatre, il trouue resistance du costé du malade, des assistans, ou de ces deus ansamble. Car comm'il combat l'annemy,

qu'il se met & propose au deuant, il et assally ou detourné par derriere, & de toutes pars, de l'importunité de ceus qui interpretet tout an mal, & rapportet les accidans, avec la lōgueur de la maladie, aus procedures du medecin. Car s'il auient, que les acces de la fieure soient plus grans apres la saignee, ou la purgacion, ils murmuret ou reprochet que lesdis remedes an sont cause. Ils ne s'auiset pas, que tout mal va an augmentant iusques a vn certain estat: apres lequel, si le mal est guerissable, il commence a decliner: & n'antandet pas, que les acces seroient ancor plus vehemens, & auroint plus long accroissement, si telles euacuations eussent esté omises. Ils ne s'auiset pas aussi, que souuant les maus recidiuet par diuerses occasions: que quelquefois ils donnet des traiues, puis font plus forte guerre qu'au parauant, selon que les humeurs se remuet & rebellet, faisans sedicion les vns apres les autres. Quelquefois il auindra par vn malheureus rancontre, que la medecine sera fuiue d'un flus de ventre iusques au sang. Ce flus estoit a la porte, & on l'attribuera a la medecine, qui n'a peut mais. Souuant auient de soymesme quelque douleur de teste, vomissement, alteracion tranchees de ventre, inquietude, faute de dormir, & autres facheus accidans, qui n'estoient dez le commencement de la maladie: comme
le plus

le plus souuant les maus commancet de peu, simples & legiers. Que diront ceus a qui tout et suspet, & causet mal les accidans? Cecy et auenu depuis le clystere, ou depuis l'epitheme l'onccion, la poudre, le potus, & autres remedes qu'on aura amployés. Il sera biē vray que c'et depuis, mais nompas que le precedant an soit cause. Ou ie diray samblablement, cela et auenu depuis qu'il et au lit, ou depuis qu'il ha prins du boullhon, ou qu'il ha dormy, ou parlé a quelcun, &c. Donques ces choses an sont cause. Il n'ya que le medecin expert & sutil a l'inuestigacion des causes, & diligement obseruateur des effets suruenans aus maladies, qui puisse vrayement dire d'oū partet ces accidans: & si c'et de la nature & essance du mal, ou de l'erreur du malade & des assistans, ou des choses externes. Ce pendant le Medecin et chargé de tout: & si on ne luy an fait plainte ou reproche, c'et par crainte de l'annuyer, voyāt qu'on ha besoin de luy. Mais on ne laisse pas d'an murmurer, & d'auoir regret a tout. C'et grandissime peine au medecin, de se-voir ordinairement interroguer & ergotiser, d'oū viēt cecy, d'oū vient cela? il ne l'auoit pas hier: c'et depuis telle chose. Ie disois bien, que cela luy ameneroit quelque accidant: & autres tels reproches piquans & aigres, trespardicilles a supporter ou dissimuler au medecin qui ha

164 Des importuns & outrecuid.

bon cœur, & s'amploie fidellemât au secours du malade: qui ha tous ses esprits bandés & tâdus, comme les chordes d'une epinette, a inuanter & accorder les moyens de surmonter le mal: & ce le plutost que luy sera possible, le plus seuremant, & avec la moindre facherie que faire se pourra. Et qu'etce (ie vous prie) ainsi l'importuner a tout momât, & metre toutes choses an doute & soupçon, ~~si n'ô q~~ par vne opinion de defiance, ou de sa volôté ou de sa suffisance, luy faire perdre courage, & la hardiessè qu'il doit auoir a bien faire sa charge, etant fauori & acouragé de tous les assistans, lesquels ne se doiuet etonner d'aucun accidant, tant que le medecin plus clairvoyant les an assure. P'accorde bien toutesfois, que luy

1. aph. 1. mesmes y et souuant trompé, comme le iu-
li. 2. cha. 6 gemant des maladies est difficile & incertain
» suiuant la protestacion du grand pere Hippo-
» cras. Car (ainsi que Celse ha tresbien remou-
» tre) la medecine et art coniecturel: & la raison
» de la coniecture et telle, que quand elle aura
» souuant repondu, quelque fois nous abuse.
» Mais si aucunesfois & apeine au millesieme
» cors nous y sommes trompes, cela n'et pas
» notable, veu qu'elle repond bien & rancon-
» tre an infinies personnes. Ce que ie dis, non
» seulement an ce qui et dangereux, ains
» aussi an ce qui et salutaire. Car souuant on

et

et frustré de son esperâce: & tel meurt, duquel le medecin an premier s'assuroit: & les choses inuâtees a guerir, quelquefois font ampirer le mal. Ce q̃ l'imbecillité humaine ne peut euter an si grâd diuersité de cors. Il y a toutesfois creâce a la medecine, veu qu'elle proffite le pl^s souuât & a beaucoup plus de personnes. Il faut tenir cela pour resolu, q̃ tât qu'il plait a Dieu (auquel il faut toujours remettre le principal, voire le tout) nous preuoyôs a peu pres l'auenir, par ce qui et presant, & ce qui et passé, de quoy nous assurôs, ou nous desîôs de la guerison des malades. Mais il y suruient des cas si inopines & fortuis, que les plus auises du monde ne s'an pourreint douter. Et que feries vous là? Il n'y a personne qui puisse repondre, de tant mille suces que nous obseruôs an diuerses maladies. Car nature ha interieurement des secrez mouuemans, & quelque fois des erreurs de son impuissance: desquels ne se presantet a nous aucuns indices qu'on puisse remarquer, iusques a tant que l'on void le desordre auenu, & au decouuert. Lors le vulgaire ignorant & plein de soupçon, le rapporte a quelque chose de celles qui ont été faites pour le meilleur. Et voila vn blame au medecin. Il le faut bien prendre autrement, & iuger sainement,

166 Des importuns & outrecuid.

que nō obstant la bonne procedure, infinis accidans peuuet auenir; & que c'et du naturel de la maladie, qui continuellement fait nouuelles sorties, & assaut du cotè qu'on se doute le moins. Quelque foison pāse auoir acheué, & c'et a recommancer. La maladie n'et pas vn annem̃y qu'ō voye a l'œil, & duquel on puisse comprendre tous les desseins, pour les rompre ou preuenir. C'et biē beaucoup de reparer toujours les ruines qu'elle fait, & finalement la contraindre a quitter la place. An ces antrefaites suruienet mille & mille accidans ou inconuenians, qui troublet & peruertisset la curacion. Il faut prandre le tout an bonne part, & sans molester les medecins (qui an sont autant fachés que personne qui soit) estimer, qu'on n'y sauroit donner autre remede, que celuy qu'on pratique.

Nous auons taxé les importuns & soupsonneus, qui ne cesset de contreroller les accions des medecins, & les troubler de mille doutes. A presant nous parlerons des outrecuides, temeraires & presomptueus, qui ont opinion de sauoir quelque chose au fait de la medecine & des maladies, ou par obseruacion, ou par vsage: & aucuns pour y auoir estudié quelque peu. Ce sont personnes fort dangereuses, & qui trauailhet infiniment vn bon medecin. Les simples ignorans & non outrecuides, n'antre-

Au

prennet que ce qu'on leur commande pour le service du paciant, sans y aiouter ou diminuer, emeus d'une sage crainte de mal faire. Au contraire, ceus qui cuidet sauoir, & n'ont aucun fondement, glosent toujours sur le *Magnificat*, & n'estiment rien que ce qu'ils s'imaginent, iugeans le medecin fort suffisant, s'il s'accorde a leur propos. Autrement, il est rhabarbatif, hazardeus, rude, & non amy de nature. De telles gens parle Terence bien au vray, disant, qu'il n'y a rien plus inique ou iniuste, que l'homme ignare: car il n'estime rien bien fait, que ce qu'il fait. Donques il ne faut aupres des malades, pour les servir, traiter & gouverner, ou auiser de leur affaire, que les medecins bien sauans, & les seruans ou seruantes qui ne sachent rien, sinon executer proprement ce que leur sera commandé, & qu'ils peuuent comprendre. Car ceus qui sauent a dimy, ou pansent sauoir sans rayson, sont merueilleusement dangereux. Ils ne sont ne chaus, ne frois, ains tiedes: parquoy on les doit vomir, c'est a dire, ietter hors, de la chambre des malades. Or i'approuue les ignorans, pour assister aus malades, non pas qui soient lourdaus & bestiaux, ains qui antant seulement le service requis: comme de bien faire potages tels qu'ordonne le medecin, cuire les viandes, fassonner le lit, leuer & coucher le malade, vser discrettement de tout

tes choses ordonnees comme luy sera dit, mesmes de l'apothicaire, an suiuant l'ordonnance du medecin: Lesquels sacht bien raconter ce qui est passé, ou de iour, ou de nuit, obseruant toutes choses fort curieusement. Je trouue bon aussi, qu'ils proposent quelques doubtés au Medecin, comme l'auertissant de ce que il peut moins fauiser, n'estant toujours presant & d'ordinaire. Car cela le met au chemin bien souuant de tenir autre procedure.

VINT-ET-CINQUIEME CHAP.

Que ce n'est le proffit des malades, d'auoir plusieurs Medecins d'un ordinaire.



Le vulgaire s'abuse grandement an ce qu'il cuide auoir plus de secours tant plus il ha de medecins: comme a la guerre, le grand nombre de jans, fait plus de force. Il est vray, que plusieurs de bon accord, ne font qu'un: mais comme il est tres-difficile de rancontrer personnes qui ayent mesme auis an toutes particularites, bien souuant la multitude est dommageable, comme eprouua le bon empereur, qui dit an mourant, l'antree de plusieurs medecins m'a perdu. Je trouue fort bon, que a la moindre difficultè d'importance, on appelle

le an conseil quelque nombre de personnes doctes & expertes: may s'a exccuter la resolution, & regir le malade ordinairement, il n'an faut qu'un surintendant a toutes les particularites, lequel de sa prudance & discrecion a ioute, diminue, change, auance, retarde, dispance, inuante & ordonne chaque chose par le menu. Autrement on n'auance pas grand' besogne, l'un se reposant sur l'autre, ou bien cōtredisant de chose qui ne vaudra presque le parler. Cependant mille belles occasions se passet & perdet; dequoy le paciant an souffre, lequel s'atand a la discrecion de ses gouuerneurs. Vn' autre incommodité bien grande et, quād les medecins ne sont expres cheus vn malade & d'ordinaire, ains le visitet par ville, c'est qu'etans plusieurs an part, il ne se rācontre pas de pouuoir toujours s'y trouuer a mesme heure: & si l'un attend l'autre, il perd tans, qui fait bien besoin à d'autres malades. S'il ne l'attend pas, il n'y aura communicatiō avec discours, ainsi que le malade ou ses parās desirēt. Cela et merueilleusement incommode aus pacians, & mesmes aus medecins. Dont ie dis volontiers, que qui veut etre mal secouru, ayt plusieurs medecins. Voicy comment il faudroit faire: des le comancement an appeller quelque nombre, afin de consulter & conclurre ce qui et a faire

170 Des importuns & outrecuid,
pour mettre le malade au bon train de gueri-
son. Puis retenir celuy de tous qui sera plus
aggreable, auquel seul on remette la discreciõ
de tout. Et quand il suruient quelque acci-
dant nouueau, ou que le mal et opiniatre, ou
qu'il se presante occasion de panser a autres
remedes, r'appeller le conseil, lequel sera de-
puis executé par le medecin ordinaire.

*RAMAS DE PROPOS VVLGAI-
res, & erreurs populaires, avec quelques
problemes, anuoyes de plusieurs à
M. IOBERT.*



Es barbiers de village, ne
veulet point de chemi-
ses de fame; pour faire
de la charpie, des pluma-
ceaus, tantes, compressees
& bandages; ne aussi du
lin, ou etouppes de lin.
a panser les playes, vlceres, contusions, & fra-
ctures.

2. On auertit ceus qui ont le carboncle, de
ne passer l'eau, sur pont, ou sur bateau, ne au
forte que ce soit.

Pour-

Noli me tangere.

ON appelle ainsi le chancre au visage, d'autant qu'il ne le faut traiter tant soit peu rudement, parce qu'on l'ampireroit. Il an et de mesme du chancre des autres parties: mais au visage on l'estime plus dangereux, a cause de la beauté qui an diminuë: & pour le dangier imminent, à cause du cerueau qui an et fort voyfin, dequoy la mort s'an peut ansuiure.

Saignier du nez.

ON dit volontiers cela, de celuy qui et faylli de cœur: cōme ayant antreprins ou promis quelque chose, laquelle il n'ha courage de tenir ou exequuter. On dit, il saigne du nez, ou il ha saigné du nez. C'et, que la saignée affoiblit le cœur, quand elle et copieuse. Car les forces consistet au sang & aus esprits, qui se perdet ansamblemant: & de cette perte, le cœur etant refroidy, deuient craintif, & on n'ose antreprendre ou exequuter, ce où l'on void quelque peu de dangier:

Migraine.

C'et la douleur d'une moitié de la teste: mot corrompu du grec *Hemicranie*, qui signifie

dimy teſt. On ha dit premieremāt, an corrompant le mot, *Micranie*, puyſ *Migranie*, & puis *Migraine*: qui ſignifie vne Grenade an Languedoc, fruit ainſi nommē, pour la pluralite des grains, excellans a raffraichir & deſalterer. Il y a vn des Royaumes d'Eſpagne qui an porte le nom: ou bien, ce fruit ha prins ſon nom de là.

Lunatic, & tenir de la Lune.

LEs grecs nommet *Seleniaques* (c'et de mot a mot, *Lunatics*) ceus qui au deſaut de la lune, ſont egares de leur ſans. Et maimes tous maus qui ſuiuet fort euidamment le cours, & les faces de la Lune, ſont dits *Seleniaques*. Comme le mal caduc, dit an grec *Epilepſie*, & quelques eſpeces de folie, ditte *Melancholie*. Ainſi dit on communement, que les fames tienet de la Lune, d'autant que la Lune definit les moys: & les fames ſe purget tous les moys. Dont leur purgacion et ditte *Mois* & *Menſtruē*. Puis donc qu'elles ſont regies & conduittes de la Lune, on dit qu'elles *an tienet*, ſupplees (affin de ſauuer leur honneur) le principal point de leur ſantē, & de la ſecondite. Autrement on dit, *tenir de la Lune*, pour dire etre inconstant & variable, cōme la Lune, qui change tous les iours de face. Ce qu'on attribue volontiers au ſexe feminin. toutesſois c'et vn reproche d'honneur: autant que

Tenir de
la Lune.

que cela procede d'une grande pureté & simplicité de matiere, qui rend les fames legieres & muables, cōme le ciel. Dequoy ie l'ouë ieur, Au chap. que les fames tuet les febric. &c.
condicion, contre l'opinion vulgaire, an mes Erreurs populaires.

Mal caduc, Mau de terre, Mal S.Ian, Mau de las passeras, Haut-mal.

C'Et le mal qu'on dit an grec *Epilesie*: lequel mot signifie, surprise on retancion de tous les fantimans. Dōt il auient que l'homme chet a terre, s'il n'est soutenu. Car il perd tout a vn coup la veuë, l'ouye, & autres fantimans, comme par vne syncope, vulgairement ditte *Enanouyssemant*: ou comme par vn Apoplexie, Mais il y a grād differance: an ce que par l'apoplexie, & par la syncope, il n'y a nomplus de mouuement, que de fantimāt: & an l'*Epilepsie*, le cors se demene fort roidemant, traualhē de conuulsion, an grec dit *Spasme*. On l'appelle *Mal caduc*, de tomber & choir a terre. Cōme vn Mal caduc. homme fort vieus, et dit caduc, quād il et courbé inclināt vers la terre, & quil ha (cōme on dit vulgairement) vn piē dans la fosse. Pour mesme raison (a mon auis) on appelle ce mal an *Languedoc*, *Mau de terre*, a cause qu'il iette par terre Mau de terre. celuy qui an et attaind: comme si on luy auoit

Mal de S.
Ien.

Mau de
las passe-
ras.

Hautmal.

donné vn coup de masse sur la teste. On le nomme aussi, *Mal de saint Ien*, pource (parauanture) que la teste de sain Ien Baptiste cheut a terre quand il fut decapité: puis mise dans vn plat, à l'appetit d'Herodias. An Gascogne on l'appelle, *lou mau de las passeras*, c'est à dire des passereaux: d'autant que les moneaus y sont fort suiets. Le commun des François l'appelle *Hautmal*, pour sa grandeur & vehemance: ou pour les sudittes raisons, qu'il fait tomber l'homme de son haut.

Mau loubet.

C'est vne des imprecacions du vulgaire de Languedoc, comme le sudit *Mau de terre*. Ie pense qu'ils signifient le loup, qui est vn chancre ulceré aus cuisses & aus iambes (mal incurable de vraye cure, sinon par extirpacion) comme celuy du visage et dit, *Noli me tangere*. Et an diminutif ils l'appellent *loubet*, qui signifie petit loup. Car ils disent *loub, loubé, & loubet* pour loup, louue, & louueton.

La male bosse.

C'est vne troisieme imprecacion du mesme pays: qui signifie la peste: sauoir et, la tumeur ou bosse pestilentielle, laquelle (sans

doute) et male & mortelle. Ainsi les Italiens (comme dessus auons noté (diset *La ghiandozza*, Ghian-
 par imprecacion. Car la peste proprement dit- doz za.
 te, et vne bosse ou tumeur & anfleure an quel-
 que glâde (*ghiande* an Italien) de celles qui sont
 au cou, aus aisselles, & aus aines.

Escannar,

C*anne* et la gargamelle, ou le sifflet par où
 nous respirons. Ceus qu'on etouffe & e-
 trangle, sont priues de leur câne: & par cō-
 sequant ils sont *Ecannés*, que le Languedogeois
 (amy des SS) prononce *Escannats*.

Aualisque, Euanoïr, Spasme, Pasmaison.

A Valir an Languedogeois, et se perdre &
 disparoïr, de sorte qu'on ne le void plus,
 cōme si le diable l'auoit amporté, ou qu'il
 fut abimé. Nottre vulgaire de Mompelier, ha
 ce mot fort frequent an la bouche, & le dit
 quelque fois en risée & familièremant. On le
 peut dire an Franfois *Euanoïr*, signifiant se per- Euanoïr.
 dre an l'air, & au vant: comme quand on dit, ce
 la *s'euanoït*, & ne fait on qu'il deuiant. Mais
 auire chose et *Euanoïr*, qu'on dit autrement tō-
 ber an *Pasmaison*. C'et quād soudain toutes for- Pasmaiso
 ces defailhet, q nous disons an terme grec, *syn-*

Spasme. *copiser.* Spasme et yn autre mal, duquel l'epile-
plie et elpece: mais on abuse vulgairement du-
dit mot, pour denoter l'euanouyssment & foi-
blesse de cœur.

Deiuner, Boire, Resiner, Gouter, Souper.

Deiuner. **D**Eiuner et proprement rompre le iune. Car
on et a iun iusques au premier morceau
que l'on mange: & la syllabe *De*, et icy priua-
tiue, comme an *Dedire*, *Demordre*, *Defaire*, *Delier*,
Denouër, *Desalterer*, *Desopiler*, *Desanyurer*, *Deployer*,
Desannuyer, *Demambler*, *Demeubler*, *Depriser*, *Deso-
beyr*, *Debrider*, *Desangager*, *Deshonorer*, *Dechassier*,
Debander, *Detandre*, *Decrouter*, *Deroulher*, *Deferrer*,
Demantir. *Decoudre*, *Decourrir*, & samblables. Ainsi *Deman-
tir*, et oter la manterie: comme quand quelcun
mant, & vous luy dittes qu'il ha manty, c'est de-
mantir, qui signifie oter ou se priuer, exempter
& vindiquer, de la manterie. Ainsi et *Deiuner*,
priuation de iune. Dont ceus là abusent fort du
mot, qui diset, j'ay deiuné aujourd'hui deus
fois, trois fois, &c. Car on ne peut deiuner (qui
et a dire, rompre le iune) qu'une fois le iour: &
c'est au premier morceau. Car on n'et pl^a iun,
pour peu qu'on ait mangé. Que les autres re-
pas soient appellees comme on voudra, le pre-
mier sera toujours le deiuner, quand ce seroit
bien à midy, voyre au soy: & lors on dira, j'ay

iuné iusques au soir. Et si on ne fait que deus repas, qu'on appelle Diner & Souper, le diner et vrayemant deiuner. Si on en fait trois, le premier etant au matin s'appellera Deiuner: & le segôd Diner. Mais si le premier est assez tard, on le nommera Diner, le segond sera le Gouter, ou Resser, & le tiers Souper. Lequel semble estre dit de la Soupe, que l'on mangeoit au soir, plus qu'à autre heure. Gouter et dit, de sa petitesse: d'autant que c'est comme vne collation, en laquelle on goute & tate quelque fruit, ou l'on ne fait que boire, avec vn morceau de pain. Le boire absoluëmant, et dit pour le Deiuner: à cause que les anciens, auteurs de ce repas, ne faisoient que trumper du pain au vin pur, & beuuoint cela, qu'on disoit *Acratisma*. An Lâguedoc, on n'vse que du mot Boire, pour le premier repas, que les François appellent Deiuner: & le mot Deiuner est prins tout au contraire, pour dire Iuner & abstenir. Ainsi l'Italien dit, *Io son digiuna*, pour dire ie suis à iun.

Grasse matinee.

LE matin n'est ne gras, ne maigre: toutesfois on dit communemant, dormir *La grasse matinee*, parce que le dormir du matin engraisse fort. Car comme ainsi soit, que la premiere coction (action du vantricule) et plus

Explication des Finales
tardive la nuit & au dormant, que n'est pas le
jour & au veillant : & que le dormir fauorise
plus la seconde concoction, qui est generati-
ue du sang, duquel (étant plus copieux & dous)
prouient la graisse: il est certain, que le dormir
tard, comme la matinee, engraisse & fait l'am-
bopoint. Dequoy sont communemant priués
les grans estudians, qui sont fort matiniers: par-
ce que l'aube est amie des Muses.

Panser un malade.

C'est vne phrase & facon de parler vulgaire,
pour dire auiser, pourvoir, & instituer ce
qu'il faut au malade, & de fait y mettre la main,
si la Chyrurgie y a lieu. Ainsi dit on, panser les
cheuaux; qui n'est pas les imaginer, & auoir au
pansee ou cogitacion, ains les estrilher, frotter,
bouchonner, nettoyer leurs piés, donner a man-
ger & a boire, leur faire bonne litiere, &c. C'est
donc vn soin & pansement avec effect, de ce
qui est necessaire au malade, quand les mede-
cins ou chirurgiens le pansent: comme si on di-
soit, panser au malade, & pourvoir à ce qu'il
faut.

R E M E-

DES REMEDES SUPERSTICIEVS
en vains & cerimonieux.

IL ya mille superfticieus remedes, qui n'ont aucun fondement an rayfon, n'y an experiãce:ia soit que plusieurs s'abuset, an croyant que ils soient bien eprouues. Leur erreur procede, de ce qu'il auient quelquefois, qu'on guerit pour lors, & durant qu'on an vse: tout ainsi qu'il auient de guerir apres plusieurs choses prises, appliquees, faites, ou dittes, auxquelles on attribue toute la guerison. De tels remedes vains, & ineptes moyens, i'an reciteray quelques vns, qui m'ont ete communiques de diuerses personnes, pour grans secrets. Il et bien vray, que an aucuns il y a quelque mystere, & qu'ils guerisset, nompas de foy, ains par accidant: comme ie pourray expliquer apres les auoir proposees. Touttesfois le peuple et an erreur, de ce qu'il ne fait la vraye cause, & attribue totallement l'euenement, a ce qui luy apert, soit fait, soit dit, ou appliqué.

Pour arreter tout flux de sang.

IL faut auoir vne egulhette rouge, qu'un marié ait donné le iour de ses noces. Serres an fort le petit doit de celuy qui saigne: & q ce soit de la main qui repôd a la partie saignante.

226 Remedes superſtitieus

Le ſang tãtoſt ſ'arretera, de quelque part qu'il verſe, & fut ce d'une playe.

Item, la pierre du cerueau d'une carpe, miſe contre le ply du petit doit, repondant a la partie qui ſaigne, arrete le flus de ſang, le plus impetueus qui puiſſe etre.

Item mettre vne palhe an crois, ſur le doz de celuy qui ſaigne, etant vetu, & qu'il n'an ſache rien. Ou le faire ſaigner ſus vne palhe an crois.

Contre la iauniſſe.

TRouues du plantain qui naiſſe ſus vne maiſon. Que celuy qui ha la iauniſſe, piſſe deſſus par pluſieurs fois, tant que la plante an meure. A meſure qu'elle mourra, la iauniſſe ſe paſſera.

Contre la goute grampe.

FAut porter toute la nuit aus piés, contre les cheuilles, vn iazerant, comme des braſſelets, fait de letton vierge.

Pour faire ſortir plu-toſt les dans aus petis anfans.

Prenez le tuyau d'une plume : rampliſſes-le d'Alum. ſoit biẽ bouché des deus bous:
&

& que l'enfant le porte pandu au cou.

Pour ne vomir point sur mer.

Mettes du sel sur vottre teste, quand vous
antreres au vaisseau.

A faire perdre le lait.

Que la fame alhe sauter trois fois, ou du-
rant trois matins, sur la sauge du iardin
d'un prestre.

Contre toute fièvre.

Portes vne araigne viue, dans vne nois, pa-
duë au cou.

Contre la fièvre quarte.

Qu'un fraire mandiant la vous demande
pour l'amour de Dieu : vous la perdres;
& il la prandra.

Pour faire perdre ses verruës.

Touches-an la robbe d'un que vous sa-
chies bien estre cocu: an quelque androit
de son abilhement que vous le touchies, sans
qu'il s'en auisse, voz verruës se perdront. On

228 Remedes superſtitieus

dit auſſi, que ſi voulant trancher vn leuraut, conuil, perdris, volalhe, &c. vous etes ampeché a trouuer les iointures, panſes a vn cocu, & vous les trouueres.

Item, pour perdre les verrues, faites les cōter a vne perſonne qui ſoit plus ieune que vo^s: elle les prandra, & les pourra auſſi donner a vn' autre plus ieune, par ſemblable moyen.

Item, faites les toucher avec autant de pois, a qui que ce ſoit, & il les vous prandra.

Item, prenez vne pognée de ſel, & allez tout courant le ietter dans vn four, & les verruës ſ'euanoiront.

Pour guerir de l'hydropiſie.

IL faut piſſer durant neuf matins ſur le mar-
rube, auant que le Soleil l'ait touché. & a
meſure que la plâte mourra, le vantage ſe deſ-
anſlera.

Contre le maſclon.

Portes vn anneau de letton au petit doit.
On dit que ce remede et bon auſſi contre
le haut mal.

Contre le mal de maire.

IL faut porter au doit vn anneau, qui ſoit de
trois filets antortilhes, l'un d'argent, l'au-
tre

tre de letton, & le tiers de fer.

Coniuracion de l'amarry delouëe,
an langage Agenois.

*Mairo mairis, que as cinquante dos rasits,
Et uno mais que l'on non dis.*

Tiro te das coust as.

Aqui non son pas touz estas.

Tiro te de las esquinas:

A qui non son pas tas esinas.

Tiro te del son del ventre:

A qui non te podes estendre,

Mais bonte te a l'ambounil,

Là on la vierge [Mario] portet son [car] fil.

Cric croc, Mairo torno te al loc.

Pater noster. Ave Maria. Faut reiterer
cela par trois fois

C'est a dire an François.

Amarry merasse, qui as cīquāte & deus racines,

Et vne plus que l'on ne dit,

Tire toy aus coutés.

Ce ne sont pas la tes etres, ou places.

Tire toy vers l'echine:

Yci ne sont pas tes aises.

Tire toy au fond du vautre:

Yci tu nē te peus etandre.

Mais bonte toy au nombril,

Là où la vierge [Marie] porta ſon [cher] ſis.
Cric, croc, mere retourne a ton lieu.

Pater noſter. &c.

Propos fabuleus.

LE peuple erre an pluſieurs propos des animaus, leſquels il n'ha pas inuanté, ains les tient des anciens qui ne les ont pas bié antandus ou expliques, ou (parauanture) ont expreſſement feind telles choſes, pour quelque bonne raiſon: comme les ſages & diuins poètes ont anſigné la vertu aus hommes beſtials, par fables & inuancions plaiſantes. Ce que leur ha eté & ſera toujours permis, non-moins que aus Peintres, ainſi que temogne le jantil Horace, diſant:

Touiuors egal pouuoir & hardieſſe ont u.

Le poete & le peintre, an ce qu'ils ont voulu,

QVant aus peintres, voyes commant ils re-
preſantet vn Ange, an forme de iuuan-
ceau, reuetu d'vne etolle blanche ceinturce, la
teſte nue, ayant des ailes comm'vn oiſeau. Et
l'Ame de l'homme, comm'vn petit anfant
tout nud. Le diable, avec des cornes, & vne
queuë. Touttesfois ce ne ſont qu'eſpris ſans
cors, leſquels ne reſſamblent a aucune creature
viſible. Ainſi l'anfer, qui n'et qu'un lieu, et fi-
guré comme vne grand gorge: la mort qui n'et
ſinon

sinon priuacion de vie, comme l'ossemât d'un trepassé, tenant vne faus an sa main. Ainsi l'amour qui n'est que passion & accidant, ne subsistant aucunement de soy mesme, et peint & representé comme un enfant nu, & aueuglé ayant des ayles, un arc, & un carquois garny de fleches. Les vans qui ne sont que l'air emeu & agité, sont peins cōme teste d'hommes ayās les iouës fort anflees, ainsi qu'un sonneur de trompette. Et quand les Astrologiens se sont voulu seruir des peintres, pour instruire les ignorans, ils ont fait representant les douze signes du Zodiaque (qui ne sont que certaines etoilles disposees an diuerses figures) l'un de la forme du Belier, l'autre du Taureau, le tiers de deux enfans gемеaus, &c. Ainsi les images du ciel qui sont hors du Zodiaque, l'une an Ourse, l'autre an Aigle, les autres an riuie-re, an Harpe, an chien, dragon, &c. Puis les planettes, qui ne sont qu'etoilles ou astres, Saturne, Iuppiter, Mars, Mercure & Venus, an personages de diuers habis & contenance. Le Soleil autrement, & autrement la Lune. Les peintres ont toujours retenu la figure des etoilles. A cinq rayons, denotans leur brillante lueur, ja soit que toutes n'etincellet pas ainsi: & on fait bien que toutes sont de figure ronde, sans pointes, ne rayons corporels. Quāt aus elemans, ils peignent le feu, qui est inuisible, cō-

me nostre feu articiel: ce que n'est trop mal a propos. L'air ne peut estre peint, non plus que le ciel, cors diaphanes & transparans; mais on les represente de couleur bleuë. L'eau et figuree a ondes, & la terre au globe, comme vne boulle. Des animaux: ils en contrefont quelques uns fabuleusement, comme la salamandre, qui n'est pas telle qu'on la peint, ny le Dauphin aussi, comme on le met en devises & armoiries. Nompas mesmes la fleur de lys, qui est assez vulgaire. Et le cœur, soit de l'homme, ou d'autre animal, n'est pas de la figure que les peintres le font. On peint le Pelican, ayant le bec aigu tourné contre sa poitrine, qu'il bequette pour en sortir du sang a nourrir ses petits, tant qu'il en meurt. & toutesfois nous voyons, que le Pelican a le bec moussé, plat & large, iustement a la facon des spatules d'apothicaire: tellement qu'il n'en peut blecer sa poitrine. Aussi le nom Grec Pelecan, signifiant vne hache ou doloire, montre bien que son bec doit estre plat. Joint qu'on dit, que le père bat les petits, comme a coup de soufflets, tant qu'ils sont presque mors: & que la mère se blesse pour les restaurer de son sang. Or les soufflets se donnent de quelque chose plate, & non d'un bec pointu. Le Phœnix qu'on represente, se brulant au feu qu'il s'en prepare, et encore plus fabuleux. Mais tout cela est permis aux peintres & aux poëtes, comme nous auons dit,

pour

le faon paroît depuis an forme d'animal. Ainsi qui verroit sortir vn chien , ou autre beste parfaite , de la bourbe fort gluante , il ne sauroit cognoitre que c'est d'un premier rançon- tre . Apres qu'il an et nettoyé , on recognoit toutes ses parties distinctement.



A MONSIEVR.

MONSIEVR IOVBERT.

CONSELHER ET MEDECIN ORDINAIRE du Roy & du roy de Nauarre,
Chancelier de l'Vniuersité an medecine de Mompelier, à Paris.

Let bien raisonnable, Monsieur & tres-honoré paire, que ie vous rende raison de mes etudes, tant pour obeyr à vostre commandement, que pour demoutrer par quelque bon effait (comme ie desire toujours) le progres de mon petit sauoir, depuis vostre depart. Monsieur Giraud, mon bon maitre, & tres-methodique precepteur, m'a balhé ces iours passez à traduire pour mō exercice, deus de voz Paradoxes: & ayant approuué ma version (apres l'auoir vn peu corrigeé) il ha bien voulu, que i'entreprinse de la vous anuoyer: comme pour mou-
tre de ce que ie say faire. Ma-damoiselle, & tres-honnoree maire, continue avec nous tous voz enfans le melheur portemant qui se peut en vostre absence: laquelle nous etant griene, nous di-
mi-

minue autrement la bonne chere. Mais nous
esperons vous reuoyr au brief, ayant acheuè de
seruir ce quartier cheus le Roy, ainsi que promet-
tes par toutes voz lettres. Dieu nous en fasse la
grace, & vous maintienne toujours en bonne
prosperité. Nous vous baisons tous les mains,
saluans tres-humblement voz graces. De vottre
maison, ce premier iour de Ianuier) pour etrai-
nes) 1579.

Vottre tres-humble, tres-affectionné,
& tresobeyssant fis, I S A A C.

QVE LES POISONS NE PEV.

C'est le
dernier
Parad.
de la se-
conde
Decade.

VET ETRE BALHEES A CERTAIN
iour, ne faire mourir à certain tams: au
tres-renommé Docteur an Medeci-
ne, M. PIERRE PERREAU,
le ieune.

Combië que vous puissies beaucoup
plus promptement & plus exactemāt
expliquer ce doute, tres-docte PER-
REAU, toutesfois puis qu'il vous
plait d'an ouyr aussi mō auis, sur la limitaciō
& efficace des venins à iour presis, ie vo' diray
an brief ce que i'an panse. I'ay bien toujours es-
timé absurde & ridicule, ce qu'on affirme vul-
gairemāt, que les venins soynt limites des am-
poisonneurs à certain tams. Car comme ainsi
soit, que des medicamans, voire qui sont vtiles,
la vertu (de la notice de laquelle on limite a
chacun sa quantité & dose) ne peut estre appri-
se, que par longue & frequante experiance, &
icelle étant cognüe ne nous laisse ancor vn art
certain, ains coniectural: ie ne voy point par
quelle raison, les ampoisonneurs ayet vn
tams prescrit a l'efficace de leurs venins. Car il
n'et pas loisible de les eprouer sans danger, ne
mesme sans punicion, tout ainsi qu'on experi-
mente l'action des medicamans salubres. I'ay
opinion qu'ils essayet les leurs sur des bestes,
chiens,

chiens, porceaux, & oiseaus. & que de là ils se
constituet des reigles, ayans obserué diuers
tams de mourir, selon la nature des venins.
Comme si les natures, de l'homme (le plus
tamperé dés animaüs) & des autres, n'etoint
fort differantes. Outre ce qu'il et beaucoup
plus facile, que vne heure certaine & precise
de l'yssüë auienne aus bestes, que aus hommes.
Car les animaüs priués de raison, ont fort peu
de diuersité chacun an son espece, paissans le
mesme pasturage, & n'etans adonnes a diuers
etudes [ou occupations] Dont il s'ansuit, que
des mesmes choses les bestes anduret presque
samblable passion. Mais les hommes, ja soit
qu'ils conuiennet an vne espece, toutesfois ils
font tant differans, que iamais vous n'an trou-
ueres deus samblables [de face]. Et de diuer-
ses complexions, conditions, & occupations,
combien de milliers an trouue l'on? Certaine-
ment ie panse, que an la seule espece des hom-
mes, il y a autant de differance antre les par-
ticuliers, qu'il y a d'especes diuerses au reste
du geanre des animaüs. Et pour-tant il faut e-
stimer totallemant abusive & non ferme, la
coniecture des ampoisonneurs : comme il et
aisé a antandre, de ce que i'ay a dire incont-
nant. Commançons donc nottre antrepre-
se.

Plusieurs cuidet & tiennet, que Theophraste (tres-graue & approuué Philosophie) soit auteur de cette opinion, parce qu'il escrit ainsi de l'Aconit. On dit, qu'on le compose de telle sorte, qu'il peut faire mourir a certain tams: fauoir et, dans deus mois, trois moys, sis moys, vn an antier, & quelque fois an deus ans. Et dit on, que ceus-là meuret plus miserablemant, qui y peuuet plus long tams resister. Car il faut que leur cors transisse petit à petit, perissant d'vne langueur diurne: & ceus qui meuret soudain, ont la mort plus facile. Mais l'autorité de Theophraste ne nous doit rien emouuoir, veu qu'il escrit cela, plus de l'opinion d'autruy, que de la sienne, comme les mots recités declaret tres-euidamment. Et si quelcun requiert la cause de cette persuasion, il la trouuera double. La premiere et l'estuée des hommes, qui se flatet trop, & mignarder leurs vices. Car combien en trouuera l'on, qui ne portet plus paciammant, qu'on leur reproche vn mal auenu de cause externe, que si on le disoit auoir eu source de la mauuaise temperature de leur cors, [ou de leur intemperance]? Car ia soit que nul puisse estre dit cause de sa premiere constitution, & que par consequât le reproche de son imperfection ne touche pas a luy, toutesfois par ce qu'elle et noltre, nous [la couurons &] luy fauorisons outre mesure: telle-

tellemant que sil arriue quelque faute de la part de noltre imperfection, nous craignons qu'elle nous soit reprochee. Dõt il auient, que nous accordõs plus volontiers, la cause du mal proceder de quelque chose externe, que de l'interieur. Les exemples an sont plus manifestes, an ceus qui ont moins de sauoir, ignorans les bons ars & siances, transportes du simple iugement de l'amour de soymaime. Comme sont les vieus, & le surplus des idiots: auxquels on ne peut rien dire de tant receuable, que si on rapporte la cause de leur mal, ou à vn saint, ou à la poison secretemant donnee, ou à l'aspet forceleus d'une vielhe. De la procedet les plaintes, desquelles Virgile an dit vne:

L'ignorã
ce des cau
ses intro-
duit fort
souuant,
le faus
suspçon
de poison
& force-
lerie.

*Je ne say pas quel regard mal-ueulhant,
Va mes agneaus tandres anforcelant.*

Car ne pouuans mantir probablemant, que presantemant, ou vn peu au parauant on ait donné de la poison, on controuue plus seuremant, qu'on l'ha balhee long tams y a. L'autre cause de cette opinion et, la deprauee interpretation des theoremes astronomiques. Car comme ainsi soit, que les astrologiens constituet (ce qui et vray) les diuerses manieres des affections ou passions des cors inferieurs, etre de la diuerse conionction, opposition, & aspet rechargé des superieurs, le vulgaire ignorant ha

Ainsi et il
des her-
bes cuil-
lies la vel
he de la S.
I'an.

prins de là occasion, d'establiſſir & fonder la va-
riété des effais, ſur les moindres différen-
ces qu'il peut obſeruer aus cors celeſtes. Com-
me quand il conſtitue, quelque plante auoir
efficace a l'ancôtre des fieures, pourueu qu'el-
le ſoit cullie auant Soleil leué. Or cet erreur
et allé fort auant. Car non ſeulement de ces
différences (certainement fort legieres) les
hommes conſtruiſet communemât la diuerſi-
té des effais an eſpece, ains auſſi veulet que les
accidans de ces effais ſoient diuers, pour la mai-
me raiſon: côme et, le tams de manifefter l'ef-
ficace des poiſons. La raiuerie dequels ecriuât
„ Theophraſte, dit, que la mort ſuruiſſent an au-
„ tant de tās, que la plante ha été cullie. Recher-
chons donc la vraye ſolucion de ce problème,
par raiſon, plu-toſt que par la relacien ou te-
mognage d'aucun. Ce que nous ferons tref-
commodemant (ſi ie ne m'abufe) commenceas
par la definiciō de venin ou poiſon: a celle fin
qu'on antande plus ayſemât, qu'et ce dequoy
nous antreprenons la diſpute.

Nous diſons proprement etre venin, tout
ce que prins dans le cors, repugne tellemant à
la nature du cors, qu'il n'an peut etre ſurmon-
té: ains au contraire il change le cors ainſi que
le cors change coutumieremant ſes viandes.
De tous venins il y a deus ſouueraines diffé-
rences. Car ou ils ſont ennemis de la nature
hu-

humaine, a raison de leur qualité manifeste, ou ils luy sont aduersaires de toute leur substance. Dauantage, les vns peuuet tuer plu tost, les autres plu-tard, de leur propre naturel. Ceus tuet soudain & dans peu de iours, ou dans peu d'heures, qui sont incontinant portés au profond du cœur. Tels venins sont extremement chaus, & pour la plu-part corrosifs ou putrefactifs, des grecs nommes *Septiques*, douës de parties tres-subtiles. Car les frois & grossiers sont paresseus, & se insinuet tard aus veines & arteres. Il y an ha qui infectet & detruiset noz cors de la seule vapeur, ou exhalacion inuisible: entre lesquels tiennet le principal lieu d'atrocite & malice, certains venins artificiels, qui ont la vertu tant futile, que an ayant oint ou frotté les etrieus, ils penetret les bottes de l'homme a cheual, iusques a paruenir aus plantes des piés nuës: & de là antrans au cors, par les spirals de la peau, corrompet tous les mambres. On an infeste aussi les selles & brides des cheuaus: & sont depuis introduis de la chaleur naturelle, aus veines & arteres de celuy qui et a cheual, par les pores des mains & des cuisses. Finalement on an ampoisonne les abilhemans, lits & couuertures. A ce genre peuuet estre rapportes, ceus qui tuet par la seule veuë ou odorat, & qui seulemât goutés (sans estre avalés) soudain precipitet l'homme an ruïne, sans

aucun retardement. Tous ces venins apportent avecques eux vne mort presante: de sorte qu'il ne reste aucun tans de secours, aus miserables qui tirent a la mort. L'antant que telles poisons sont an frequent vsage aus Turcs, & autres nations sauuages. De ceus-cy differet les venins grossiers, qui sont plus paresseus & tardifs a faire leur action: mais an fin ils brulet biē fort, ronget, manget, tourmantet, & du seiour aquiret plus grandes forces & plus de malefice. Or il n'y a pas seulement differante efficace ez poisons de diuers geant, mais aussi il leur auient grande varieté du terme de nuire, selon la constitution & temperament de ceus qui an ont pris. C'est, que les vns sentet plu-tost ou plutard la nuisance, que les autres, accablés de la poison: quelques vns aussi an echapet. Car il auient aucunes fois, que la force venimeuse et mitigee & vaincue, de la complexion de celuy qui ha prins le venin: ou qu'elle soit de soy asses robuste, ou qu'elle soit ranforcee par le moyen de la contrepoison. Ainsi de ceus qui habitent an vn maim air pestilant, il y an ha qui ne sont attains de peste: & de ceus qui an sont malades, les vns meurent soudain, les autres plus-tard, les autres an fin an rechapet. S'il et ainsi, il samble totallement ridicule ce qu'on affirme, qu'il soit possible de balher de la poison, laquelle a iour presis & an certain

certain tams fasse mourir: & que ce soit de la condicion du venin. Auquel erreur samble fauorir vn autre, que nous auons ranuerse dez long tams: sauoir et, que les medicamans prenet de noltre chaleur le commencement de leur mutacion, comme Galen anseigne. Dont il s'ensuit, qu'étant pilés grossierement, ils produiset plus tard leur effait. Mais ancor que ie leur accordasse cela, toutesfois ils n'auient pas à ce qu'ils affirmet icy, si ce n'est captieusement. Car si quelcun argumante ainsi: Cette drogue deploye ses forces plu-tard, que cette-là: donques il le fera à certain tams, l'argumantacion sera fausse: & et nommee d'Aristote *Elenche au consequant*. Ne plus ne moins que si quelcun disoit, la Chieure et vne beste, donques la Chieure et vn Anc. Car *faire tard & faire à certain tams*, sont especes diuerfes de ce qui fait ses actions an quelquetams. Or que telles jans ne regardet, que a-la seule condicion des poisons, cecy le preuue asses, que vous ne les ouyes faire aucune distinction des cors, ains seulemant feindre l'espece de la poison, à laquelle ils mettet la limitation du tams, & n'om pas de la complexion des hommes. Mais on ha veu souuant, que ayant balhé d'une poison au maim poise, & a maim heure, a plusieurs qui banquetoit ansamble, les vns moururent soudain, les autres apres quelque iours, & que a

Parad. 1.
Dec. 1.

aucuns elle ne fit guieres de mal,

Nous voyons tous les iours auenir le semblable des medicamans purgatifs : lesquels e- tant donnees au maimme tams, maimme mesure, & pareille preparacion, a diuerſes perſonnes, ils vuidet les vns fort vite, les autres tard : & les vns bien fort, les autres peu ou rien : & outre ce, les vns vuidet ſans facherie, les autres avec grande difficulte, grieues tranchees, & frequente foibleſſe de cœur. Et qu'et-il de be- ſoin alleguer diuers hommes, quand à vn mai- me le maimme medicamât ne produit toujours maimmes effais? Puis donc que ſelon la diuerſe & non-pareille complexion & conformation des cors, nous voyôs telles choſes auenir pour la plu- part : & d'alheurs qu'ô ne peut iuſtemât comprâdre la propre temperature de chaque homme : comment ſaura quelcun, combien de tams pourra la chaleur naturelle reſiſter au venin? Quand i'accorderois bien que quelcun fut ſi expert ampoifonneur, qu'il peſat d'vn certain iugement le pouuoir de ſa poiſon, au- tant exquiſement qu'on peſe le muſc à la ba- lance : toutesſois ie n'admetray iamais, qu'on la puiſſe tât exactement limiter, au naturel de celuy qui la doit prandre, qu'elle ne falhe au- cunement de la fin, ou du terme qui luy et pro- poſé. Car la Medecine maimmes et tenuë pour [ſiance] fondee an coniectures, quant et de pre-

prescrire a chaque homme la quantité & la propre qualité de ses remedes. D'autât qu'on ne sauroit aucunement ecrire ou dire, le iustement propre, comme dit Galen, au troisieme de la methode, troisieme chapitre. Et vn peu apres: An l'art de medecine il n'y a chose ou remede (dit il) qu'on ne puisse nommer an espece: mais ce qu'on ne peut dire, ne ecrire, ne ordonner antierement, c'est la quantité pour vn chacun. Il repete cela bien souuant aus propos qui s'ansuiuet, enseignant que chaque homme ha sa propre curacion, & que la propriété naturelle et indicible, & incomprehanfible d'vne exacte fiance. Le vulgaire des medecins appelle *Idiosyncrasie*, la propriété naturelle, comme Galen remoutre. Et parce que tous confesset, qu'on ne la peut comprandre, on attribue le vray art de Medecine a Aesculape & Apollon. Car le principe & comme fondement de la Medecine parfaite ou accomplie, & infailible (laquelle Galen nomme, *la de vray medecine*) et la particuliere cognoissance des naturels. Dont il aioute: Si ie sauois recognoitre iustement la nature de chacun an particulier, ie panserois vrayement estre tel, que ie consoy an mon antandement auoir esté Aesculape. Mais d'autât qu'il ne se peut faire, i'ay deliberé de m'exercer tant, que i'an approche le plus pres que peut l'homme, & i'exhorte les

autres de faire comme moy. Donques si la medecine et coniecturelle, & non certaine, de la partie qui ordonne a chacun ses remedes, & que cela ne peut estre aperçu, sinon finalement par vnelongue obseruacion & experiance, qui se pourra persuader cela des venins? Car si an l'art de medecine l'experiance et dangereuse, comme sagement nous auertit Hippocras, il et aisé à panser, combien et incertaine la preuue des poisons: parce qu'il n'et pas loisible d'experimenter leur vertu, sans danger & sans punicion, ainsi que des medicamans salubres, an diuerses personnes. Et ce que peut quelcun auoir obserué aus bestes brutes, i'ay dit par cy deuant, qu'il et inepte de le vouloir accommoder a l'homme: d'autant que les naturels des hommes & des bestes sont grandement differans, mames par cet argument, que les etourneaus viuēt seurement de la ciguë, & les calhes de l'hel lebre, qui nous sont poisons & medicamans. Nous pouuons an fin colliger de ces raisons, qu'il faut estimer fort erronee & peu ferme, l'art (si art se peut dire) & la coniecture des ampoisonneurs: veu maimement, qu'un venin produit son acciō, autresfois hative, autresfois tardive: & ce non tant a raison de soy, que pour la nature & cōplexiō du cors, lacheté ou étroitesse des passages, force ou foiblesse de la chaleur naturelle, & le beaucoup ou le peu des excremans sâ-

bla-

blables, ou diuers. Car la force du venin demeure quelque fois vaine, ou fort rabbatuë: comme ez cors de ceus qui ont les facultes de l'ame robustes, a raison d'une tresbonne trãpe. Aussi Galen panse, que le batimant & la composition du cors, et cause que la cigüe tue l'homme, & nourrit les etourneaus. Aquoy il aioute, la force de la chaleur menuïsante & subtiliante: a raison de laquelle il panse, qu'il auient aussi, que les venins frois demoutret plu-tost & mieus leur force, a l'endroit des natures chaudes. Ce qui pourra sambler-paradoxe a plusieurs: mais ayant eté tres-ouuertemãt demoustré par ledit auteur, i'ã omets la preuue a mon eciant. Quant au naturel des excremãs, ils affoiblisset les accions des venins, repugnãtes a leurs qualites. Car s'il ya aus antralhes de la pituite an abondance, la force du venin chaud an sera grandemant rabbatuë: & au cõtraire, l'humeur chaud hatera l'accion d'un tel venin. Ainsi la cholere copieuse, rebouche & romt le narcotic qu'on ha prins: & la pituite le fauorit. Ce que peuuet sauoir les mechans ampoisonneurs, n'et gueres autre chose, sinon qu'ils cognoisset, quels venins font mourir seulemant de l'euidante condicion de leurs qualites: & quels nuiset de toute leur sustance. Tels sont ceus qui tuet par pourriture ou corrosion, auxquels il auient de se ranforcer a-

uec le tams, comme dit Galen : an lieu q̃ les autres s'affoiblisset par leur retardement. Car tous ceus là pourrisset avec le tams & de tant plus, que le lieu sera plus humide & plus chaud. Donques ceus qui agisset an pourrissant, le tams augmente leur accion : par ce que il augmente la pourriture : & veu qu'ils ne cesset de se pourrir, reciproquemāt ils pourrisset [le cors]. De là procede, qu'ils sont mourir long tams apres, principalemant les venins qui sont de substance grossiere & terrestre. Voila (dis-je) que les ampoisonneurs peuuent auoyr appris par longue obseruacion : de sorte qu'ils sachet distinguer, les venins qui tuet de leurs insignes qualites, d'avec les autres qui sont mourir de toute leur substance : ité que ceus cy aportet de leur nature a quel homme que se soit, vn mal plus soudain : & que ceus là ne deployet leurs forces, sinon an plus long tams. Et outre ce, que de toutes les deus sortes, ils tuet plu-tost ou plutard (sans auoir aucun egard aus cors,) selon qu'il y a ha plus grand ou moindre quantité. Ils peuuent bien aussi faire, que tous venins soient tampus a leur plaisir, & randus plus dous, ou plus apres, a ce qu'ils tue, plus vite, ou plus tard : ce qui est sans aucun secret ou miracle de nature. Car nous aussi coutumieremant vsons de tel artifice aus drogues purgatiues, aguisant

fant les plus paresseuses, & leur donnans comme des éperons: & au contraire, retenans la trop hative penetration des autres, an y melant de ceus qui sont naturellemant plus tardifs & grossiers. Mais qu'on limite les effais des poisons a certain iour & point nommé, nous pansons estre absurde & du tout ridicule: d'autant que la nature de chaque homme ne peut estre parfaitemant cognuë (ainsi que nous auons cy dessus suffisamment demoustré) d'où procede le tres-incertain terme de chaque venin, a faire mourir l'homme. Car toute accion naturelle rancontre diuers effais, selon la diuerse disposition, tant de ce qui agit, que de ce qui andure. Et cela auient, non seulement a raison des qualites euidantes, ains aussi des occultes & propres: dequoy procede aussi, q̃ a vn autre nuit beaucoup, ce q̃ profite a cetuy cy. Pierre de Abano (lequel on nōme Conciliateur) la où il explique cette question, propose qu'il se peut faire, q̃ ayant cognu certainemant la duree de la vie d'un homme, par la quantité mesurée de son humeur radical, on balhe vne poison, qui le consume an dis ans. Dont il collige, quelques vns estre ampoisonnes, qui vont toujours an desseichant (on les appelle an vulgaire [Italien] *herbati & strigati*) & qu'on peut faire aucunes fois, que la poison soit limitee. Mais ce qu'il pre-

suppose de l'Astrologie, a-peine peut estre bien deuiné. Je confesse, que tous ceus qu'on void transir de peu a peu, etans ampoisonnes, ils ont vn mal long, mais il est pour amporter l'homme an tams a nous incertain. Plin ne dit pas vn terme plus certain, de la mort qu'apporte l'vsage du lieure marin (poisson venimeux)

» quand il dit: Les hommes qui an mangent san-
 » tet au poisson: & de ce premier sine on aper-
 » soit ce venin. Au reste, on an meurt an autant
 » d'heures, que le lieure ha vecu. Car qui deu-
 » nera l'age de ce lieure, afin de pouuoir predi-
 » re l'heure ordonnee a mourir? Et quand bien
 ie donneroie cela, qu'on peut sauoir combien
 de iours ha vecu le lieure, toutesfois ie n'ac-
 corderay pas, que tous hommes an meurent a
 mame tams, veu que vne mame poison agit
 fort diuersement, selon la diuersité des cors,
 ainsi qu'il ha esté plus q'assez prouué. Tellemant
 qu'il ha esté dit plus veritablement (ce que le
 mame Plin ajoute) ledit venin estre a tams
 incertain, comme disoit Licinie Macer.

C'est P E R R E A V, tres-amy & tresdocte,
 ce que me samble deuoir estre tenu de la verité
 de ce Probleme. Pardonnez moy, si i'ay esté vn
 peu prolix a l'expliquer: & saches que ie l'ay
 fait, pour l'amour de quelques ecoliers an Me-
 decine, qui par fortune sont suruenus quand
 ie le pourparlois. Car ils m'ont prié de leur
 don-

donner la copie de ce discours. Ce que ne pou-
uant refuser honnetement, il m'ha fallu trait-
ter la question plus au long, affin de m'accom-
moder a leur capacité. Vous excellant an sa-
voir & antandement, eussies facilement com-
pris an beaucoup moindre propos, mon auis
là dessus, comme vous l'aues desiré.

*QVIL YA RAISON QVE, QVEL-
ques uns puissent viure sans manger, durant plu-
sieurs iours & annees: au tresrenomme
Iuriconsulte, M. IAN PAPON,
Iuge & lieutenant general
au Bailliage de Forest.*

C'est le se-
cond Pa-
radox, de la pre-
miere De-
cade.



A Religion chretienne nous
anseigne, qu'il faut soudain a-
jouter foy aus propositions
Theologales qu'on oyt reci-
ter, & que ez choses nullement
sujettes à preuue, la fiance &
le ferme consantemāt, et tres-agreable à Dieu:
veu que c'est luy qui peut rompre les lois de
nature. Mais aus disciplines, qui meritent d'estre
appellees Mathematiques, & vrayement sciencies,
d'autant qu'elles expliquent tout par ses causes,
d'affirmer quelque chose sans demonstration,
& an ordonner comme fait vn legislateur,
nous estimons cela ridicule. Car il n'ya rien

qui samble plus absurde, que le consantemāt
precipité, sans conseil, & temeraire : anuers
ceus maimemant, qui cognoisset l'esprit hu-
main tres-auide & tres-apte a rechercher la
verite. Touttesfois vous an voyes beaucoup,
qui si plusieurs autres ont dit de maim, ils n'y
contrediset pas: & ne panset point à cecy, s'il
et plus licite de dire vray, ou au contraire de
mentir, d'une cause cōmune. O qu'il vaudroit
bien mieus s'arreter-là, & douter des choses
q̄ l'esprit ne peut comprendre! Ce que i'ay ac-
coutumé de faire: & a raison de cela, plusieurs
qui sont de temeraire consantemant, m'appel-
let incredule. Car ie me suis proposé dez long
tams, n'admettre aucune chose comme vraye
de celles qu'on peut comprendre par raison
& discours, pour grande que soit l'autorité, de
celuy qui les propose. Ie confesse bien, (que
la cause de tout ce que l'experiance nous te-
mogne, n'est pas ancores trouuee & cognüe de
nous: comme aussi ie tiens pour tres-vrayes
plusieurs opinions, qui sont Paradoxes au cō-
mun, n'estant ancor persuadees. Mais comme ie
ne veus pas que l'on croye aus miennes sans
raison, ainsi me soit-il permis de n'accorder
les autres, auant que i'aye aprins de leurs au-
teurs les causes de tels effais, ou que ie les pūis-
se comprendre an raisonnant moy maim.
Qu'il soit libre a tous, de n'ajouter foy aus pro-
pos sans demonstracion. Car ceus-là samblet

peu auises, & que plus et fort lourdaus, qui re-
soiuet les admirables affirmacions, emeus de
quelque vaine opinion du discurs. Telle et
celle que ie proposois hier, tref-renomme Pre
sidât: que quelques vns peuuet viure sans măn-
ger, non seulement plusieurs iours, ains plu-
sieurs mois & anneés. Vous aues prudamment
dit, que vous ne la receuries pas, ains que ie
l'eusse preueue: d'autant qu'elle vous samble
la plus paradoxe, de toutes celles qu'aues ouy
de moy. Touttefois ell'est tref-veritable, com-
me les autres, & deormais vous n'y contredi-
res pas. Car vous ne douteres point de venir
an mon opinion, veu qu'ell'ha pour fondemāt
des raisons & causes tref-euidantes, prises des
choses naturelles. Ie ne diray pas de l'auoir
obseruē, mais ie confirmeray qu'il se peut fai-
re. S'il falloit prouuer le fait par temoins, nous
an produirions quelques vns, irreprochables
& de grand'autorité. Hippocras limite a vne
semaine, le iune mortel de l'homme. Mais Pli-
ne dit, qu'il n'est pas mortel d'une semaine, veu
que plusieurs ont durē plus d'onze iours.
L'antans qu'il y a pour le presant an Auignon,
vn homme de soissante ans, qui mange fort
peu souuant, & par longs interualles, de cinq,
fis, dis, & plusieurs iours. Ce que Albert e-
crit et samblable, qu'il y auoit vne fame,
laquelle passoit quelque fois vint iours sans
manger, & bien souuant trante. Il dit

aussi, auoir veu vn homme melancholique, lequel vequit set semaines sans manger, ne beuuant que de l'eau, vn iour & autre non. Athe næ raconte, que la tante paternelle de Timon, se cachoit toutes les annees dans vne cauerne, comme les Ourses, l'espace de deus moys: viuant sans aucun alimant que de l'air, a demy-morté, de sorte qu'apeine la pouuoit on recognoître. Personnes graues rapportet, auoir esté veuë an Espagne vne filhe, qui ne mangeoit rien, & antretenoit sa vie ne beuuât que de l'eau, & auoit deja vint & deus ans. Plusieurs ont veu an Languedoc vne garce, qui demoura trois ans, & nous sauons par ce qu'an ont escrit quelques bons & doctes personages, qu'il y an ha eu vn'autre a Spire an Allemagne, qui vequit autant d'annees sainement, sans autre viande où breuage que de l'air. Guillaume Rondelet atteste, d'an auoir vu vn'autre, qui de parelhe maniere de viure, paruint iusques a dis ans: puis quand elle fut grande se maria, & eut de beaus ansans. Ian Bocace escrit d'vne Allemande, laquelle vequit trât'ans, sans manger aucunement. Pierre d'Abano (qu'on nomme Conciliateur) raconte d'vne Normandé, qui ne mangea rien de dishuit ans, & d'vn autre qui dura trante & sis ans sans manger. On tient pour certain, que a Romme vn praitre vequit quarante ans, de
la

la seule inspiration de l'air: cela etant bien obserué sous la garde du Pape Leon [dixieme] & de plusieurs prinées, & fidellement temogné par Hermolao Barbaro. Mais pourquoy m'arrete ie tant a reciter ces miracles, qui peuuet sambler pures fadaizes, iusques a-tant que ie les aye expliqués par raison ? Certainement l'autorité & l'obseruacion des autres et de tres grand pois: mais ce ne doit pas estre asses, là où il n'y a faute de raison a confirmer son dire. Je suis bien aise, que vous n'ayes voulu receuoir sans cela ma proposition, afin que ie puisse cōmodement exercer mon esprit, a rechercher sa cause, ainsi que i'ay de long tams desiré.

C'est vne fantance ferme & ratifiée, que tous cors viuans, soient plantes, ou animaux, viuet a raison de la chaleur qu'ils ont anclosée en eus: au moyen de laquelle ils attirent l'aliment, le cuisset, s'an nourisset & soutiennent, croisset & angeandret: outre ce que les animaux fantet & se meuiet. & tant plus parfaites sont telles œuures, tant plus et abondante la vertu & la substance de la chaleur. Pource Aristote, qui ha desfiny la mort estre l'extinccion de la chaleur, ha laissé pour memoire (comme chose fort remuée & diuulgée) que la vie et contenuë de la seule chaleur: & que sans la chaleur ne peuuet viure, ne animaux, ne plantes. A son imitation

tous les philosophes d'un consantement, définissent la vie par chaleur, & la mort par extinction de chaleur. Car pour petite que soit la chaleur, le cors qui en a iouït de la vie, & produit lesdites actions de soy, ancor qu'elles soient obscures. Cette chaleur est nourrie & antretenuë d'un humeur gras & aëree, qui inferé dans la substance des parties similaires, et du tout inuisible. C'est le premier [ou principal] humeur, commun a tous viuans, auquel tied premierement & par soy l'esprit, muny de chaleur: tellement que ne l'esprit, ne la chaleur peuuet estre, ou durer longuemât, sans l'aide dudit humeur. Donques la vie, & la duree des choses animees, git au consantement & accord de ces deus, chaleur & humidité. Cette-là est tenue pour ouuriere de toutes actions: cette cy luy est sou-mise, affin que la-ditte chaleur dure plus longuemant, et tant que cette humidité vtile & agreable, peut nourrir la chaleur vitale, autant vit l'animal ou la plante. Dont il auient, que ceus ont plus longue vie, qui ont plus d'humeur naturel, ou iceluy plus epais & plus resistant a dissipation. Car il est de nature gras, huilleux & gluant, affin que la chaleur (qui en estant enuelppee, en gaste & consume tout bellement de petites porcions) l'eboiue & absorbe plutard. Toutesfois auant que cela auienne, l'animal

nimal rand l'ame à Nature, luy etant otee sa propre matiere, languissans l'esprit & la chaleur. Or puis que le cors des viuans s'ecoule & diminue ainsi toujours, si vne substance semblable a l'ecoulce n'est restituee, certainement il s'euopoterá & dissipera tout. Mais il n'ya de quoy remettre au lieu de l'humide sustantific (comme on l'appelle) consumé, ie ne dis pas autant, qu'il s'en diminue incessamment, ains seulement vn petit brin de tel. Car il ha toute son origine de la semance, & des principes de nostre generacion, & nous ne voyons pas, qu'on puisse aiouter a noz cors aucune telle chose. De là procede la mort ineuitable: par ce qu'il n'ya aucun artifice de reparer, ce que seul retient la chaleur. On restitue bien la substance charnue, epuisee du transissemant: l'humide primitif, iamais. Et veu que la pature etant consumee, la chaleur s'etaind quant & quant, si ell'est cause consumante la pature (comme certainement ell'est) il s'ensuit incontinant, que la chaleur maime et cause de sa mort. Il nous reste seulement, q̄ puisqu'on ne peut totallemant detourner la cause de nostre mort, a tout le moins no^r la retardiōs & rebouchiōs, etāt trop hatee & precipitāte (s'achemināt vite de son naturel à l'issue de la vie) affin que l'animal ne s'etaigne si tost. Ce q̄ peut estre fait, au moyē des alimens: quand par addicion de quelque plaisante hu-

midité, on arrouse la naturelle, affin qu'elle resiste dauantage a la voracité de sa chaleur. Car ell'et ainsi plus long tams conseruee, quand la chaleur naturelle ne peut librement exercer sa force sur le suiet humide: parce qu'elle et aucunement rebouchée, quand elle agit an la masse charnuë, & aus humeurs nourissâs, & ce pendant elle consume moins de l'humeur radical. Toutesfois il s'an consume toujours quelque petite porcion, mais moins quand il y a de l'autre an quantité suffisante. Et a ces fins Nature, non seulement aus animaux, ains aus plantes aussi, ha donné des le commencement certaines vertus, d'appeter continuellement ce que leur defect & manque, affin que tout se preserua de mort, le plus longuement que faire se pourroit. Car tout ce qui et angeandré, & tient de la nature, desire extremement d'etre prorogé tres-longuement, & subsister au monde. Pource les animaux n'ont iamais aprins d'aucun à manger, boire, & respirer: ains dez le commencement ils ont des facultes, qui parfont cela sans precepteur. Dequoy il appert, comme ie pense, que l'vsage des alimens et necessaire a tout ce qui ha vie, non pour autre chose, que pour entretenir cet humeur interne (familier, & vrayement vnique pature de la chaleur naturelle) affin qu'il ne soit si tost eueu. Et tant que no⁹

le pouuons faire, & que l'humidité primitiue et de reste, an suffisante quantité pour conseruer la chaleur vitale, nous sommes autant de tams an vie.

De cecy on peut colliger (pour la seconde proposition que nous auons a expliquer) que il ne faut beaucoup de nourriture, a ceus qui ont la chaleur moindre & plus languide: parce qu'elle ne samble fort d'efficace à consumer son humidité. Tout ainsi que le petit feu, ne peut porter beaucoup de boys, ains et de peu antretenu: mais le grand feu s'estaint incontinant a faute de pature, si vous n'y aioutes vn grand amas de boys. Et pource les vieux anduret facilement le iune, comme dit Hippocras: an second lieu, ceus qui sont au plus fort de leur age: moins les adoleffans: le moins de tous, les enfans, & antre autres, ceus qui ont l'esprit plus vif, & sont plus vigoureux. Car ceus qui croisset, ont beaucoup de chaleur naturelle: dont ils ont besoin de beaucoup d'alimant: autremât leur cors se consume. Les vieux ont peu de chaleur: pourtant ils n'ont besoin de grans viandes, d'autant qu'ils an suffoqueroient. Car cōme la flame des lampes (dit Galen) ia soit qu'elle ayt l'huile pour alimant, Aph.13. li.1. “ “ “ “ “ Aph.14. li.1. au comm. dudit ap. toutesfois si on l'y met tout a vn coup, ell' an se ra plus estainte, que nourrie: samblablemant aus vielhes ians, & autres qui ont la cha-

leur plus remise, l'abondance des alimens leur nuit, au suffoquant la chaleur, & l'accablant de sa multitude. Ceus qui ont beaucoup de chaleur, comme les enfans & les adolefscens se plaisent a l'abondance des viures: parce que la masse de leur cors se cōsume fort, & leur chaleur vorace dissipe entierement la naturelle humidité, si elle n'est bridee & retenue par addition d'un familier suc. Donques la proportion & mesure des alimens est ordonnee, a raison de la chaleur, sans autre enseignement que de Nature. Car la faim ou l'appetit, qui suit la necessité naturelle des alimens, et sa reigle certaine: tellemant que ceus ont besoin de copieux & plus fréquent aliment, qui ont plus souuent & grand appetit: ceus qui n'en ont point, ou peu, & moins souuent, n'ont pas affaire qu'on leur donne aliment, sinon fort peu, & par longs interuales. Les laboureurs, artisans, & autres qui trauailhet tout le iour au fortes besognes, sont contrains d'vser grand quantité de viandes, & de repas coup a coup reiteres, pour la faim qui les presse. D'autant que la qualité de la chaleur naturelle, deuiet plus acre, & consume plus, par l'exercice: de sorte que ceus qui s'adonnent totallemant au trauail, ne peuuent iurer, sans tresgrand perte de leur santé & force. Ainsi Galen remontre, que aus *picrocholes*, c'est a dire bilieus, l'abstinence est tres-nuisan-

te:& que de iuner longuemant ils tombent an tres-piquâtes & tres-aiguës fieures, desquelles il est aisé de venir aus hectiques, & an outre de celles-cy au marasme roty. Les sanguins andurent plus facilement le iune, parce que l'humide sustantifique redonde an eus, & l'alimantaire aussi. D'auantage, leur chaleur et plus remise & moins aiguë, comm'etant grômee de l'humidité. S'ils ne prennent aucun plaisir a l'exercice, ains sont toujours an repos, paresseus & andormis comme glirons, ils ont peu d'appetit, & tard; ils deuiennet phlegmatics, & le plus souuent se mettet a manger sans necessité, seulement par coutume: aus heures ordonnees. Ceus-cy ont vrayement la chaleur plus remise & comme angourdie, laquelle il seroit melheur d'exceiter & aguïser par trauaus afin que etant dissipée la grand quantité de l'humeur superflu, elle approchant de la moderee, fit sentir l'appetit: lequel n'est autre chose, que naturel desir de ce qui defaut & manque. Ce que defaut & manque a chaque particule, et l'aliment, qui soit substitué au lieu de la substance qui s'ecoule perpetuellement, par la vertu de la chaleur. Quand donc il n'ya point d'appetit, il est vray-semblable, que la chaleur agit an autre humidité, laquelle est excremanteuse & nō na-

turelle: la consommation de laquelle n'estant point dommageable, qu'est-il de merueille si sans nuisance ou douleur, le desappetit perseuerre, tandis q̃ cet humeur superflu amassé resiste a sa dissipaciō: maimement veu que la chaleur languissante d'oisiueté, ne peut guieres consumer? C'est la seconde raison, pourquoy les vielhars portent le iune plus aisement & sans incommodité: s'auoir et, d'autant, que outre la petitesse & foiblesse de la chaleur, ils ont a raison de cecy vn grand amas d'excremās pituiteus, & que leur cors lourd, pigre, & tardif, et tref inepte à tous mouuemans & exercices. Pourtant il leur auient, de n'auoir besoin de beaucoup d'alimens: veu que leur chaleur, par beaucoup de raisons, dissipe fort peu de la masse du cors. Or ce que nous auons anseigné estre aus vieus, cela maimement conuient iustement aus naturels samblables. Car si quelcun et, ou de complexion naturelle, ou de sa maniere de viure, plus humide & plus froid, il aura peu d'appetit, & se soulera aysemant de peu de viande: parce qu'il luy manque de la chaleur, qui puisse consumer grand substance. De la vient que les bestes exangues (des Grecs dittes *anaimés*) auxquelles le froid et tref-offansif, a cause de leur petite chaleur, se cachet tout l'hyuer, & viuet sous terre, ez lieux plus

plus tiedes sans alimant . Cela et aprins de l'experiance, à laquelle constant bien la raison. Car le besoin des alimens et, pour reparer ce que perpetuëllement s'ecoule, afin que l'humour primitif, pature de la chaleur naturelle, ne soit si tost consumé : ceus auxquels rien ne s'ecoule, & il n'y a presque point de chaleur, (au moins par quelque tams) n'auroint aucun besoin ou prouffit de la viande. Or les serpens, laizars, & leurs samblables, sont frois de nature . La chaleur qu'ils ont fort petite, ne dissipe guieres, & durât l'hyuer ancor moins que d'ordinaire: parce que adonc elle deuient plus languissante , de la violence du froid. Pource il n'y a comme point d'effluxion ou dissipation, la peau étant epaissie & exactement constipee, de la force du froid hyuernal . Et autant qu'il y a de fuligineus excrement suscitè de leur amette languissante, il s'amasse au cuir : lequel au fin deuenant plus sec & plus rude, se depoulhe & separe de la peau suiette, sans faire mal au cors. C'est ce qu'on appelle, la depoulhe du serpent, de laquelle il se deuettit au milieu ou a la fin du printams. Puis quand le Soleil reuenant à nous, excite leur chaleur, ayant chassè l'angourdissèment, ils deuienet plus remuans, & reprenet leur premiere agilité : car la chaleur conduit & fait les mouuemans. Dôt Vitruue disoit: Les serpens se remuet terrible-

Liu. 6. de
l'architec.
chap. 1.

» mant, quand le froid de leur humeur et epuisé
 » par la chaleur. Durant les petis iours an tams
 » d'hyuer, ils sont sans aucun mouuement, an-
 » gourdis du froid, qui prouient du changemât
 de l'air. Que les glirons & les rats de montai-
 gne[dis marmotans]non seulemât s'abstiennet
 tout l'hyuer de mâger, & ne font que dormir,
 ains aussi qu'ils an deuient plus gras, il et au-
 tant merueilleus, que confirmé de vraye ex-
 periance. De là et fort y, ce que dit Martial du
 Gliron, an ses distiques:

*Durant l'hyuer ie dors,
 Et suis plus gras alors,
 Que nourry suis de rien,
 Sinon de dormir bien.*

Vous repödrés, que les petis animaus se peu-
 uet passer quelque tams de la viande, mais nō-
 pas les plus grans. Sur quoy ie produiray le
 Crocodil, baite sauuage de fort grand' talhe:
 duquel seul on ha opinion, qu'il croit tant
 qu'il vit:& il vit longuemant. Or Pline escrit,
 qu'il passe toujours quatre mois de l'hyuer à
 jun, dans sa cauerne. On affirme aussi, q l'Ours
 peut viure tout l'hyuer sans manger. Donques
 comme les vielhars, à raison de leur froideur,
 n'ont pas gråd appetit, & n'ont besoin de gråd
 nourriture: ainsi touttes les complexions, qui
 ont plus de froid que de chaud, durent long tās

sans viande. Et qu'ont besoin de nouuelle pasture, ceus auxquels la naturelle ou l'appliquee ne se consume point? Et que consumera la chaleur languissante? Si elle consume quelque chose, & il y a abondance de chose qui luy resiste, on ne sentira pas ce besoin incontinant, ains apres vn long tams. A la dissipation de l'humeur naturel, resiste quelque fois l'alimantaire humidité accumulee, quelque fois l'excrementeuse; sur laquelle s'exerceans la chaleur naturelle, & la dissipant, fait ce pendant; moins de dommage à l'humeur naturel.

On peut tirer d'icy la troisieme proposition, qui seruira de preuue a la cōclusion proposee: sauoir et, que la seule petite chaleur, ne rand pas l'abstinence plus facile, ains aussi l'abondance de l'humeur superflu, qui amuse la chaleur naturelle. Car ce que fait l'aliment toujours epars, arroufant les parties, & abreuant l'humeur naturel, cela mame fait quelque fois le copieus humeur excrementeus accumulé au noz cors; quand il rebouche l'acrimonie & force de la chaleur, & l'ampeche de consumer vne melheure sustance, iceluy se presantāt à estre consumé. Pource le vantricule etant plein de pituite (sinon qu'elle fut aigre) nous n'auons point d'appetit, & dedaignons les viandes: & (a mon iugement) nous

270 De viure sans manger

n'auons [grand] besoin d'aliment, iusques à tant que le ventre ayt digéré cette matiere là, ou qu'il l'ayt iette autre-part. Il peut biē estre, que tandis que l'estomach refuse les viandes (parce qu'il n'ha besoin de nouuelle pature) les autres mambres andurent faim naturelle: laquelle n'est pas sansible, dont ils languisset & s'amaigrisset, si on ne leur ottroye de la nourriture. Parquoy souuantesfois il vaud mieus, luy presanter de la viande, sans attendre qu'il soit venu a bout du reste: Touttesfois il vaud mieus au prealable (si faire se peut) artificiellement auoir purgé le ventre, affin que la viande ne s'y corrompe. Si tout le cors vniuersellement estoit plein de mame humeur que l'estomach, chaque partie n'appeteroit nō plus que luy, & n'auroit besoin d'autre aliment, tandis que tel humeur suffiroit a la chaleur. Mais l'estomach le plus souuant et sou, parce qu'il ressoit premier tout, & sa cauite et plus ample. Il auient moins souuāt, que tout ce geant d'excremant s'epande par tout le cors. Ce qui arriue toutesfois aus vielhars, & aus autres frois de nature: parce que la petite chaleur, ne peut digerer l'aliment ordōné à chaque partie, ains laisse par tout beaucoup de crudité. Ces humeurs sont pituiteus & dous, conuenables à nourrir la chaleur, s'ils sont plus elabores. Car les medecins ensegnent, que la pituite se parfait
de

de la chaleur dedans les veines , où elle se cuit a loysir, & se conuertit an sang loüable . Car (comme ils parlet) le phlegme n'et que sang moins cuit: lequel seruira à nourrir les parties, apres qu'il aura eté sogneusement elaboré . Il faut donc permettre, que la chaleur s'exerce a vne si loüable euvre : ce que la viande continuëlement aualee detourne. A cela proffitent les iunes , fort sains à ceus qui ont abondance d'humeur pituiteus, ou dous ou insipide, accumulé an tout le cors. Dont Hippocras conseille bien la faim, à ceus qui ont les chairs humides: parce que la chaleur vse plus plaisamment des humeurs, ancor qu'ils soient crus, que de la viande nouvellement receüe. Car la viande et beaucoup plus elognee de la forme du sang, & de la nature des parties, que n'et la pituite : & la chaleur aura plu-tost apreté l'humeur ja fait, que de la viande. Et s'il ne le fait, d'autant qu'on luy fournit toujours nouvelle matiere, il et force que tout se corrompe, & que tout deuienne excrement . Lequel etant retenu au cors, par tout pullulet des maladies familiares à tel humeur, œdemes, vitiliges, alphas, scirrhes, loupes, neus, & [autres] infinis maus de la classe des phlegmatics: lesquels celuy euitera, qui permettra à la chaleur, de parfaire & exactement elaborer cet humeur froid, an ne prenant aucune viande , ou pour le moins an prenant

Aph. 61.
Liu. 7.

plus tard & rarement. Car comme ainsi soit, que la chaleur se doive toute occuper en cet affaire, elle en est detournée par la nouvelle matiere, laquelle est inutile, & ancor dommageable. Mais quand la chaleur a consumé, ce qu'elle a trouué plus commode, pour l'usage des parties qu'il falloit nourrir, des-lors chacune d'elles commence d'auoir appetit, & de faire entendre leur indigence, par mutuelle communication iusques au ventricule: Toutesfois, comme nous disions par cy-deuant, quelque fois l'estomach n'appete rien (à cause qu'il est plain d'humeur) ja-soit que les autres parties iunent: & au contraire, l'estomach étant vuide & affamé, les autres parties peuvent estre rassasiées. Adonc, etans contrains de la facheuse faim, de prendre de la viande, nous tachons par autre moyen, de decharger les autres parties de leurs humeurs, afin que la chaleur ne soit accablée de leur trop grande quantité. Mais si la replecion est commune a tout le cors, de sorte que l'on sante le ventricule, ansamble toutes les autres parties, pleines d'humeur pituiteux, lors qu'il n'y a aucun appetit, la chaleur tamperee étant occupée en beaucoup de matiere, pendant qu'elle fait cette autre besogne, il n'y a pas necessité de viande. Car la chaleur a prou besogne, & peu de force: dont elle ne fait pas euidente consommation

ption de l'humidité naturelle des parties, tandis qu'elle iouyt d'une autre qui luy et tres-plaisante: comme et, la douce pituite. Cecy fait bien pour ceus, qui demeurent an jun trois ou quatre iours, & plus long tams. Car que faut-il presanter des viures, quand tout le cors verse d'humeur froid, & mal-aisé a dissiper, si nous auons appetit de manger, seulement lors que la premiere viande et depechee ? Quoy ? si quelcun dedaigne les viandes, & luy font mal de cœur à les voir, n'est-ce pas vn certain indice qu'il n'a[grand] besoin de viande: de laquelle c'est Nature maime qui nous an ha donné l'appetit, sans anseignement de personne. Et de qui pourrions nous antandre l'heure du manger, & la quantité, voire la qualité ? An ces choses nous suiurons de nous-maimes, l'inclination naturelle, & le desir exant de toute raison. Parquoy celuy qui abhorre totalement la viande, il n'an ha pas [grand] besoin: veu que c'est vn appetit naturel, & non pas volontaire, ne qui obcyisse a la raison. Il est donc ja plus que asses confirmé par noz raisons, ce que l'experiance atteste: que aucuns ont vecu par plusieurs iours sans manger, & ce sans aucun dommage de leurs forces & santé: ains (que plus et) on croid, qu'ils ont preueni des maladies, qui les menassoit, ou qu'ils s'ot echappes des presantes. Car les maus menacet, ceus

Aph. 19.
Liu. 2.

qui sont ainsi sous, & ont grande replecion de tout le cors, si vous y mettes toujours de la viâ de: parce que il et force, que le tout se corrompe. Dont Hippocras dit, tant plus tu nourriras les cors mal-nets, tant plus tu les offanceras. Du mal presât excité de cacochymie, echappa la filhe Allemande, qui iuna trois ans. Car on raconte, qu'elle estoit douce & benine, taciturne, oyfiue, & andormie, pleine de pustules & rognés, à raison de l'abondance de l'humeur pituiteus gros & visqueus. Elle ayât soutenu, de son propre mouuemant, vn si long iune, an fin les humeurs etans consumés, & la matiere de son mal ôtée, elle remise an sante, commâcea d'auoir appetit. Cecy ne doit sambler absurde, veu que l'esprit comprend facilement, que non seulemât il peut ainsi auenir, ains aussi qu'il se fait très sainement. Peut estre que cela et dur, d'admettre que l'action de la chaleur naturelle, perseuere deus ans ou plus, à la consumptiõ des humeurs vne fois assamblés. Vous accorderes bien, que le plus long termé de iuner, soit limité à vne semaine ou deus, ainsi qu'ont dit Hippocras & Plin. Mais ie feray, que la lōgueur du tams ne vous retiendra pas, de venir de pies & de mains à ma santâce. Moy certainement, qui suis moins a condamner du vice de credulité, que d'aucun autre, ne me suis persuadé telles choses sans raison. Et vous

con-

consideres (s'il vous plait) d'où ie collige que cecy peut estre fait, apres que vous aures acheué de lire, ce peu qui nous reste encore à dire.

Quand l'humeur pituiteus abreuuât le cors, & soulant plaissamment les parties, et copieus, telle nourriture suffit long tams. quand il et an petite quantité, la matiere an-brief etant consumée, soudain l'appetit reuiét. Or si l'humeur n'est pas seulement copieus, ains aussi gros & visqueus, qui doubtera ancores, que la vie ne puisse estre prolongee longuemant, sans qu'on y aioute aucun aliment: Soit an outre, la chaleur petite & languissante, ou de nature, ou par accidant: elle ne pourra pas dissiper beaucoup d'humeur: & pourtant il luy resistera fort long tams. An vn vielhard, vne filhe, vn prestre, la chaleur et moindte & plus remise, à cause de l'age, du sexe, & du repos. Et l'abondance des humeurs gluans, peut estre si grande an iceus, que la chaleur naturelle n'an fera moins agreablemât antretenuë de son acointance, que de l'abord d'un autre aliment nouveau & iournalier. Cela continuë, tant qu'on luy fournit d'humeur an abondance. & il an etourny longuemant, quand à-raison de son epaisseur, viscosité & froideur, il an et fort peu dissipé de la chaleur, laquelle n'est vehemente, ne acre. Et combien qu'elle ayt este quelque fois telle, au moins elle et maintenant rebouchee. Ainsi

Liu. 2.
ch. 67.

nous auons eprouué, la Salamandre (que l'on croid vainement n'estre brulée du feu, comme Dioscoride dit) mise sur le feu, pouuoir longuement resister à la brulure, & etaindre le feu s'il estoit moindre: parce qu'elle est toute plaine d'humeur froid, epais & comme lait, au lieu de sang. De semblable matiere (à mō auis) sont farcis les cors, de ceus qui abstienent des viandes durāt quelques annees. Et ie me doute, que tel est le naturel du Chamæleon, si ce

Liu. 8.
ch. 33.

qu'an escrit Pline et vray, que luy seul d'entre tous animaux, vit la bouche toujours beante, sans manger, & sans boire, ne vsant d'autre aliment que de l'air. Car ce que luy mame narre des Astomes [c'est à dire, sans bouche] lesquels viuent de la seule exhalacion, & des odeurs qu'ils tirent par le nez, se fait par vn autre moyen, si vous receues le tres-ingenieus rai-

Liu. 7.
ch. 2.

Liur. 2. de
la triple
vie, ch. 18.

sonnement de Marsile Ficin, qui est tel: On dit, que an certaines regions chaudes, & qui flairent par tout de grand odeur, plusieurs de grande stature, & d'estomach debile, viuent quasi seulement des odeurs. C'est (par auanture) d'autant que la nature du lieu reduit an odeur presque tous les sucres des herbes, des grains, & des fruits mols: & la mame nature resout an espris, les humeurs des cors humains. S'il est ainsi, quel ampechement y a-il, qu'ils soient nourris seulement de vapeur, veu que tout semblable et

nourry

nourry du samblable. Mais ceus qu'on ha obserues iuneurs an l'Europe, ont ete pleins de suc froid & visqueus. Nous pouuons aiouter aus sudittes condicions, le resserremant des pores de la peau, lequel Alexandre Beniuën ha cognu, auoir grand pois an cecy : quand parlant d'un, qui a Venise iuna quarante iours continuels, n'ha pas seulemant noté, qu'il fut de mambres frois, contenant au dedans du phlegme gros & cru, ains aussi que les pores du cuir etoint ferres. Or sil m'est loisible de conduire cecy, des animaux aus plantes, j'ay an main plusieurs telles experiances. Car l'ognon, l'al, & le fromant, plusieurs mois apres qu'ils sont separés de la terre, qui leur fornissoit d'alimât, non seulemant viuet, ains germet aussi : parce qu'ils ont vn humeur gros & copieus, qui resiste beaucoup au flaitrissemant & secheresse, antretenât la chaleur naturelle, maimé sans aide d'aucun humeur nouuellemant ressu. Ainsy la loubarbe, herbe nommee *Semperuiue*, le Aloë [dit Perroquet] & celle qu'on appelle vulgairement *Faba inuersa* (on panse que ce soit *Tephio*, des Latins nommé *Illecebra*, & des boutiques *Crassula maior*) etâs arrachees de terre & pādûës [an l'air] viuet fort longuemant : parce qu'elles ont du ius visqueus, & abôdât an leurs feulhes bié epaisses. Et quel besoin ont elles de frequât ou cōtinuël alimât, puisque elles ont vn suc tât

gluant, qu'à-peine il peut finalement estre consumé par les grandes chaleurs? Et affin que personne ne se moque de ce discours (par lequel ie compare les plantes aus animaux, an ce que concerne la facile abstinence des viures) ie veus bien qu'on sache, qu'il et beaucoup plus malaysé, que les plantes demeuret quelque tams viues sans nourriture, que les animaux. Car pourquoy faut-il que les plâtes soient toujours attachees à leurs racines, sinon affin que elles attiret continuëlement du suc, qui leur et necessaire à tout momant de tams? Nature ha donné mouuement aus animaux, parce qu'il ne leur conuenoit pas chercher des viandes, sinõ par quelques interualles. Et pource vous voyes, que les animaux priués de viande, viuet au-moins quelques iours: & les plantes presque toutes se flettrissent, aussi-tost que nourriture leur defaut: & sur tout la race des herbes. Toutesfois celles qui ont beaucoup d'humour, & la sustâce serrée & epaisse, sont de plus grand duree, & viuet quelque tams apres que elles sont arrachees. Car elles retienet vne portion de l'humour gluant, auquel l'ame et conseruee, qui suffit a plusieurs iours. Ainsi de plusieurs arbres les rameaus retrâches, meurent tard ainsi des bestes insectes, les parties decoupees se remuēt: parce que l'humour tenace & difficile à dissiper, retarde leur ame, comme anuelopee

& ampetree, qu'elle ne s'en voise tost. Cela m'a fait, que les bestes exâgues puissent (comme cy deuant nous auons remoutré) viure fort longuemant, sans l'usage des viandes.

Je pense que rien n'empêche plus, que ie ne concluë estre vray (comme tres bien preuë) que telle abondance d'humeur gros & gluât, se trouue quelque fois amassée en vn cors froid, que la chaleur naturelle ne fera autre chose durant plusieurs années, sinon le consumer. Ce pendant le cors n'a besoin de nouveau alimât: dequoy le sçait et, qu'il n'a point d'appetit. L'experience nous l'a premièrement enseigné: la raison preuë cela m'aime, avec la comparaison de plusieurs choses semblables. S'il vous plait examiner cecy plus attentiue-
 mant, tres-renommé P A P O N, vous n'y pourrez plus contredire, ains souscrire a nostre auis: & vous emeruellerez (cōme il et biē-seāt à tout homme d'esprit) comment des principes les plus petis & vulgairement notoires, ie vous ay tiré à l'opinion que vous iugiez tant reietable. C'est la force des demonstrations, desquelles les Geometriës, beaucoup plus certainement que les autres, inferent leur conclusions, des suppositions confessees & cognuës du vulgaire. Car ils ne parlent premierement que de lignes, de poinz, de superficies, quarres, angles, cercles, & semblables: puis soudain ils

280 De viure sans manger

deduiset tellemant l'un de l'autre, que an fin sans aucune capcion ou habilité sophistique, ains de necessaire consequence, ils conduiset de main an main leur disciple, a mesurer la grandeur des cieus, la distance des astres, la maniere des eclipfes, & autres choses fort cachees. Pareillemant celuy qui et expert an Physique, & es choses naturelles, sachant trouuer par certaine methode les principes & causes de tout, peut facillemant affirmer des propositions paradoxes, tres-veritables toutesfois, & les prouuer de ce que le sans & l'usage cōfirmet. Cecy suffira à vous, qui etes biē verse an toute discipline, & non tardif, pour confirmation de mon propos, lequel du cōmancement vous aues pansé, n'estre pas seulement vray-samblable. l'an debatroy avec vn autre plus au long, si ces demonstrations ne luy faisoient rien: mais vous y consantes deja (ie le say bien) & y aiou-
tes vottre suffrage.

Ayant paracheué cecy, i'ay rancontré fortuitement vn lieu d'Auicenne l'Arabe, qui cōfirme nostre opinion, par le phlegme: lequel estant plus copieus, il pense pouuoir auenir, que nous viuions longuemant sans manger, parce que telle matiere tient place de viande. Il ne nie pas aussi, que cela ne puisse auenir aus hommes sains. Je suis bien aise, de ce que vn si grand auteur approuue mon opinion, laquelle ie pā-
fois

sois n'auoir esté traitée de personne.

Ce que sansuit , et traduit de la seconde partie des Opuscules de M. IOVBERT pag. 136.

OR ie preuoy facilement, que deus sortes de jans se peuuet emouuoir, ou du seul suiet de ce discours, ou de lespreuues. Les vns sont ignorans de la Philosophie naturelle, & de la Medecine, personnes venerables pour leur simplicité & pieté: comme le menu peuple, & tous ceus qui n'appliquet leur etude à examiner les causes de chaque chose. Les autres sont diaboliques, qui poursuiuet de calōnie tres-impudante, ce qu'ils sauēt etre biē dit. Je ne m'arreteray point à ceus-cy, parce que ils n'attandēt pas l'explicacion [de mon dire] & qu'ils depraueēt & infectēt de leur poiso, tout ce qui et ressu de leur pansee impure. A us autres il me samble qu'il conuient satisfaire benignemāt & synceremāt. Je voy qu'on me pourroit obietter cecy: Les iunes de quarāte iours antiērs, lesquels IESVS CHRIST, Elie & Moyse, ont soutenu, ainsi que temognēt les saintes Escritures, dictées par le saint Esprit, ne seront plus tenus pour miracles, si par quelque raison naturelle on peut andurer le iune, voire par plusieurs mois & ans. Certainement il seroit vray, si on ne recognoissoit, que cela eut esté donné tellement

Obiectio

Responce:

contre les lois de Nature, à des hommes parfaitemant sains, par certain priuilegé, comme nous croyons pieuant. Car il leur fut diuinement ottroyé, exampcion de l'infirmité de la chair pour vn tams: de sorte que leur condition estoit pour lors, autre que du geantre humain. Mais ceus que nous auons aprins des histoires prophanes, auoir vecu durât quelques années sans manger, si elles diset vray, il faut qu'ils ayet tous esté mal sains & pleins de beaucoup de suc froid, duquel le cors ha pu estre nourry longuemant: comme i'ay demoustré amplemant par ce discours. Ainsi nous aprenons de ce qui auient iournallemant, que plusieurs malades n'ont point d'appetit, à cause que leur vantricule et farcy de mauuais humeurs: & ils prennent moins de viande an vne semaine, qu'ils ne prenoient chaque iour quād ils se portoient bien. Mais qu'un hōme de cors tres-sain, puisse passer seulemant vn iour [ou deus] sans viande, & n'auoir pas faim, cela excède les bornes de Nature, & et vn miracle diuin. Combié plus et il admirable, qu'un tel hōme iune quarāte iours antiens, de sorte qu'il ne sente point de faim, n'ayt à combatre la cōuoitise de mager, & n'appete la viande ou le breuuage, nomplus que l'un des anges? Nous croyōs que IESVS CHRIST ha u le cors extrememāt tapperé & pur, ja soit qu'il fut suiet a maladies, selon

selon la condicion de sa nature humaine. No^s recognoissons samblablement, que Moyse & Elie, quand ils s'abstindret durât quarâte iours de manger & de boire, etoint parfaitement sains pour lors par certaine prerogatiue exams de la commune vie des hommes. Dequoy il s'ensuit, que a bon-droit on estime cela illustres miracles, par lesquels l'autorité de ces prophetes & de I E S V S C H R I S T fut etablie. Or ce n'est pas chose nouuelle, que samblables effais auient, par l'ordre des choses que Dieu tres-bon & tres-grand ha prescrit a Nature, & par un miracle euidant contre les lois de la mame Nature. Car telles fieures, & plusieurs autres maladies, que les Sains ont guery, les medecins otet aussi. Mais les moyens desquels il vset, y apportet tres-grand' differance. Car les Sains de leur seule parolle, ou de l'atouchemât, defaisoient (moyennant la grace de Dieu) les causes de tels effais, avec la necessité imposee a Nature. Les medecins ne font autre chose, que opposer aus causes naturelles d'autres samblablemant naturelles: par lesquelles si la vertu des remedes donnee du Createur, et plus puissante, & qu'il ne veulhe que pour lors elle soit vaine, la cause qui fait le mal et effacee. I E S V S C H R I S T guerit parfaitement le sang menstrual inueteré, du seul attouchemant de la frange de sa robbe. Nous par art medecinal

duquel luy-maime (comme paire benin, ayât pitié de la condicion humaine) et auteur & vray instituteur, remedions a samblable mal par certains medicamans. Ainsi certainemât, l'humeur phlegmatic plus copieus, peut induire [naturellement] le iune, comme il a esté aus funommes se portans bien, de la seule volonté du treshaut Dieu. Mais outre ceus-cy, il ya infinis miracles qui excedet nôtre antandemant, lesquels ne l'art humain, ne la Nature maime fait imiter an aucune maniere. Telle et la guerison de l'aucuglement naturel: de chasser les esprits immondes du cors humain: ressus-citer les mors ia à demy pourris, & samblables, qui confirmet l'autorité de Dieu tout puissant. Je pense qu'il appert de cecy, que les choses qu'on dit auenir par certaine loy de Nature (ia-soit que raremant) ne reprouuet point les vrais miracles, ou ne diminue leur certitude: & que celuy ne contredit à la foy chretienne, qui examine diligeammât les causes de tels euenemens. Ains plu-tost: n'an confirme l'on pas mieus la verité des miracles non feins: an otant quant & quant l'occasion des impostures, affin qu'elles n'abusent facilement le peuple mal expert? Car si quelcun de ceus qui viuet sans manger, a cause de leur intemperature froide, & l'abondâce de phlegme, vouloit contrefaire le Prophete inspiré de Dieu:

Dieu, combien de mille hommes precipiteroit il an tres-graues erreurs & ruine? Certainement celuy et impie, & ignorant de la vraye (c'est la diuine) philosophie, quiconques pansant a ces choses, & les estimant, prononcera estre impie & tres-irreligieus, de vouloir distinguer par raisons non fardees, les ceuures & (comme les nôtres parlet) miracles de Nature, des miracles diuins. Ce que tous jans de bien & de pieté confesseront libremant, cōuenir fort à vn homme de bien, religieus & notammant charitable.

Ce qui est entr'alassé au texte, par ces marques [], et de l'auteur, apres auoir reconnu & approuué la version de son fils.

FIN.

P. REVEILLES, SVR LE TRAI-
te des Erreurs populaires, expliqués ou
refutes par M. IOBERT.

T*V as fait, mon IOBERT, que tout le
monde honore.*

*Faisant preuve de toy, tes si doctes escrits.
Et mesme as estonné les plus rares esprits,
Dont le lustre diuin nostre siecle decore.*

*Icy, tousiours plus gräd, ainsi cōme l'Aurore
Dissipe de son taint les brouillars obscurcis,
Tu chasses les erreurs dont le vulgaire esprit,
Populaire ignorant, cōme un Oracle adore.*

*Tu fais que maintenant on voit a descouuert
Ce qu'un masque trōpeur auoit pieça conuert
Embrouillé dans l'obscur de mille resueries.
Courage dōc, IOBERT, tu rabattras l'effort
Du temps qui ronge tout, tu rabattras l'ēuie,
Et, hoste du tombeau, viuras apres la mort.*

IE louangeroy bien le cours d'une riuierre,
 Qui d'un calme sourcil, douce, se va roulāt :
 Mais ie m'ebrouille alors que ie vay louāgeāt,
 Le reply mutiné de l'onde marinierre,
 Ie lou'roy bien aussi la science ordinaire
 Qui fait que le commun est estimé scauant:
 Mais la tienne qui va les autres surpassant,
 Me fait demeurer court, accable de matiere.
 Car qui pourroit louer le scauoir si exquis,
 Et les graues discours qui ornet tes escrits,
 Et f'ot qu'un seul IOVBERT soymesme se sur-
 passe ?
 Il vaut dōc mieux me taire, affin de ne sembler
 Vouloir de tes honneurs les louanges embler,
 Par un chāt trop soumis de ma rime si basse.
 P. Recueilles.

Voz plumes desormais (ingenieux esprits)
 N'usēs, pour enrichir d'une eternelle gloire,
 Lenō de mō IOVBERT. Il l'ha par ses escripts
 Graue au haut du cœur du temple de memoire.

I. Heroard.

EXTRAICT DV PRIVILEGE
DV ROY.

Ar grace speciale & priuilege du Roy,
Pdonné à Poitiers, le 30. iour d'Aoust. 1577.
il est permis à M. Laurens Ioubert, premier docteur regent, & Chancellier en l'vniuersité de Medecine à Mompellier, de choisir tel imprimeur & libraire, que luy plaira, pour imprimer toutes ses œuures & liures: auec inhibition & deffence à tous autres, de quelque qualité & condition qu'ils soient, de ne les imprimer, vendre, ne distribuer, durant le temps & terme de dix ans, apres la première impression de chascue œuure, & liure. Le tout à peine de confiscation des liures, d'amende arbitraire, & de tous despens, dommages & interrests. comme plus à plein est contenu par les lettres patêtes dudit priuilege, signé HENRY. Et plus bas. Verifiees & enregistrees au siege presidial d'Aginois, le 7. Nouembre 1577.

Ledit M. Laurens Ioubert, ha permis par scdulle signee de sa main, à Lucas Breyer libraire. &c. d'imprimer ou faire imprimer vne secōde partie de son œuure des Erreurs populaires & propos vulgaires, touchant la medecine & le regime de santé (qui luy ha esté baillée par
M. Ber-

M. Berthelemy Cabrol chirurgien , de Mompellier) pour le temps & terme de cinq ans , à conter du dernier iour de l'impression.

